

ტომას მორი - უტოპია



უთვალსაჩინოესი და ენამზებობით გამორჩეული ვაჟკაცის, ლონდონის სახელოვანი მოქალაქისა და ვიკონტის ტომას მორის - არანაკლებ სასარგებლო, ვიდრე გასართობი, - ჭეშმარიტად ოქროს წიგნი სახელმწიფოს საუკეთესო წყობილებისა და ახალი კუნძულის უტოპიის თაობაზე.

*ტომას მორი და მისი „უტოპია“
ტომას მორი სალამს უძღვნის პეტრე ვედიუსს*

ტომას მორი და მისი „უტოპია“

ტომას მორი დაიბადა შემღებული ლონდონელი იურისტის ოჯახში. მამამისი, ჯონ მორი, სამეფო სასამართლოს წევრი იყო. მორის სიტყვებით რომ ვთქვათ, მისი ოჯახი „ნაკლებად ცნობილი, მაგრამ პატიოსანი გვარისა“ იყო. მორის დაბადების თარიღის დადგენაზე დიდხანს დაობდნენ. 1886 წელს ინგლისელმა ისტორიკოსმა იულიამ რაიტმა კემბრიჯის სამეცნიერო კოლეჯის ბიბლიოთეკაში მიაგნო მორის მამის ხელნაწერს, საიდანაც ირკვევა, რომ „უახლოეს პარასკევს, ნეტარი ქალწული მარიამის მირქმის დღესასწაულის შემდეგ, სახელდობრ თებერვლის მეშვიდე დღეს, ორიდან სამ საათამდე, ქვეყნად იშვა ტომას მორი, ძე ჯონ მორისა, ჯენტლმენისა, ედუარდ მეოთხის ინგლისში გამეფების მეჩვიდმეტე წელს“. ამ დოკუმენტზე დაყრდნობით ირკვევა ტ. მორის დაბადების ზუსტი თარიღი. მირქმის დღესასწაული ძველი სტილით, ანუ იულიუსის კალენდრით ყოველთვის ორ თებერვალზე მოდის. რადგან ედუარდ IV გამეფდა 1461 წელს (ტაუნტონთან ბრძოლის შემდეგ), მისი მეფობის მეჩვიდმეტე წელი იქნება არა 1478, როგორც მკვლევრები ფიქრობენ, არამედ 1477, ხოლო რადგან 1477 წლის 2 თებერვალი კვირა იყო, „უახლოესი პარასკევი“ იქნებოდა 7 თებერვალს. ამ დოკუმენტიდან ნათელი ხდება, რომ ტომას მორი 1477 წლის 7 თებერვალს დაბადებულა.

ტომას მორმა პირველდაწყებითი განათლება წმ. ანტონიუსის გრამატიკულ სკოლაში მიიღო, რომელიც ერთ-ერთი საუკეთესო დაწყებითი სკოლა იყო ინგლისში. ამ დროს გავრცელებული ჩვეულების თანახმად 12-14 წლის ვაჟებს პაჟებად გზავნიდნენ ლამბერტის სასახლეში კენტერბერის არქიეპისკოპოსს (შემდგომში კარდინალს) ჯონ მორტონს (1420-1500 წწ.). მისივე რჩევითა და რეკომენდაციით 1497 წელს მორი ოქსფორდის უნივერსიტეტში შევიდა.

XV-XVI საუკუნეების მიჯნაზე ოქსფორდის უნივერსიტეტი ინგლისის ჰუმანიზმის ცენტრს წარმოადგენდა. XVI საუკუნის 90-იან წლებში ჰუმანისტური იდეების გავრცელება ოქსფორდში უკავშირდება გამოჩენილ მეცნიერ-ჰუმანისტების უილიამ გროსინის, ტომას ლინაკრისა და ჯონ კოლეტის მოღვაწეობას.

1499 წელს მამის დაჟინებული თხოვნით ტომას მორმა დატოვა ოქსფორდის უნივერსიტეტი. სერ ჯონ მორს არ სურდა, მისი შვილი „უფულო“ მეცნიერი გამხდარიყო. მორი ლონდონში დაბრუნდა და დაიწყო იურისპუნდენციის შესწავლა ინგლისური სამართლის სკოლაში. 1502 წელს მან დაამთავრა ეს სკოლა და

„სრულუფლებიანი“ ადვოკატი გახდა. როგორც ერაზმ როტერდამელი აღნიშნავს, მორი იყო „ყველაზე სამართლიანი და კეთილსინდისიერი ადვოკატი, რომელიც საკუთარ თავზე უფრო ნაკლებად ზრუნავდა, ვიდრე სხვის კეთილდღეობაზე“.

1504 წელს, როცა მორი მხოლოდ 27 წლისა იყო, პარლამენტში თემთა პალატის წევრად აირჩიეს. ეს იყო უკანასკნელი პარლამენტი ჰენრი VII მეფობის პერიოდში. იმავე წელს მეფემ თემთა პალატისაგან მოითხოვა დაემტკიცებინათ ახალი სუბსიდია, 38 ათასი გირვანქა სტერლინგის ოდენობით, ამ პარლამენტის მოწვევამდე ორი წლით ადრე გარდაცვალებული მისი უფროსი ძის, უელსის პრინც არტურის რაინდად კურთხევასა და მეფის ასულის, მარგარიტას გათხოვებასთან დაკავშირებული ხარჯების დასაფარავად.

დეპუტატთა წინაშე გამოვიდა ტ. მორი და იმდენად გაბედულად და დამაჯერებლად უარყო მეფის მოთხოვნა, რომ თემთა პალატამ მას სავსებით დაუჭირა მხარი. მეფეს მოახსენეს, რომ ვიღაც „უწვერო ბიჭუნამ ჩაშალა მთელი მისი ჩანაფიქრი“. მეფე სიამოვნებით დასჯიდა მას, მაგრამ თემთა პალატის წევრები ხელშეუხებლად ითვლებოდნენ, ამიტომ მეფის მთელი რისხვა თავს დაატყდა მამამისს: ჰენრი VII იგი დაამწყვდევინა ტაუერში, ვიდრე 100 გირვანქა სტერლინგის ოდენობით ჯარიმა არ გადაიხადა. ამ ინციდენტის შემდეგ მორმა, რეპრესიის შიშით, თავი დაანება პოლიტიკურ მოღვაწეობას.

ტომას მორის ჰუმანისტური მსოფლმხედველობის ფორმირებისა და განვითარებისათვის ძალიან დიდი მნიშვნელობა ჰქონდა მის შეხვედრას ერაზმ როტერდამელთან. მათი გაცნობა მოხდა ინგლისში ერაზმის ჩამოსვლის დროს, 1499 წლის შემოდგომაზე, ხოლო ნაცნობობა შემდგომ მჭიდრო მეგობრულ ურთიერთობაში გადაიზარდა.

1509 წელს ერაზმმა მორის სახლში მისივე დაჟინებული თხოვნით, დაწერა „ხოტბა სისულელისა“, რომელმაც მორი აღაფრთოვანა. თხზულება გამოიცა 1511 წელს პარიზში მორის თაოსნობით.

1504-1509 წლებში ტომას მორმა იმოგზაურა ნიდერლანდსა და საფრანგეთში. მან ინახულა ლუვენის და პარიზის ცნობილი უნივერსიტეტები.

1509 წელს, მეფე ჰენრი VII გარდაცვალების შემდეგ, ტომას მორი დაბრუნდა სამშობლოში და კვლავ შეუდგა საზოგადოებრივ მოღვაწეობას. 1510 წლის იანვარში იგი აირჩიეს პარლამენტის დეპუტატად. ამავე დროს მორი დაინიშნა ლონდონის შერიფის ერთ-ერთი თანაშემწის ფრიად საპასუხისმგებლო თანამდებობაზე. პარალელურად იგი განაგრძობდა ლიტერატურულ მოღვაწეობას, რომელიც არ შეუწყვეტია მთელი თავისი სიცოცხლის განმავლობაში.

ტომას მორის შემოქმედება გამოირჩევა არა მარტო მდიდარი შინაარსით, არამედ ჟანრთა მრავალფეროვნებით. გარდა გამოჩენილი იტალიელი ჰუმანისტის პიკო-დელა მირანდოლას (1462-1494 წწ.) ბიოგრაფიისა, რომელიც მორმა 1510 წელს თარგმნა ლათინურიდან ინგლისურ ენაზე, მის ლიტერატურულ მემკვიდრეობას შეადგენს „რიჩარდ III ისტორია“, „უტოპია“, ძველი ბერძენი პოეტების ნაწარმოებთა თარგმანები, შესრულებული ლათინურ ენაზე, მდიდარი ეპისტოლარული მასალა და

მწვავე პოლემიკური ტრაქტატები ლუთერისა და რეფორმაციის ინგლისელ მიმდევართა წინააღმდეგ.

1515 წელს ტომას მორი დიპლომატიური მისიით იმყოფება ფლანდრიაში. აქ მან გაიცნო გამოჩენილი ნიდერლანდელი ჰუმანისტი პეტრე ეგიდიუსი (1483-1533). აქვე იგი იწყებს თავის ცნობილ ნაწარმოებზე „უტოპიაზე“ მუშაობას. როგორც ერაზმ როტერდამელი აღნიშნავს, თავდაპირველად მორმა დაწერა მეორე წიგნი, ხოლო შემდეგ მიუმატა მას პირველი. 1516 წლის 3 სექტემბერს მორმა ლონდონიდან ლუვენში ერაზმს გაუგზავნა ახლად დამთავრებული წიგნის ხელნაწერი. იგი აცნობდა ერაზმს, რომ წინასიტყვაობის მაგივრად იგი მომავალში წიგნს დაურთავდა ხელნაწერს, რომელიც დასათაურებული იქნებოდა ასე: „შესავალი წერილი ჩემს მეგობარ პეტრეს“ (ე. ი. პეტრა ეგიდიუსს). მორის მეგობრების - ერაზმისა და ეგიდიუსის გულმოდგინების წყალობით, 1516 წლის შემოდგომაზე „უტოპია“ გამოქვეყნდა ბელგიის ქალაქ ლუვენში ასეთი სათაურით: „უთვალსაჩინოესი და ენამზეობით გამორჩეული ვაჟკაცის, ლონდონის სახელოვანი მოქალაქისა და ვიკონტის ტომას მორის - არანაკლებ სასარგებლო, ვიდრე გასართობი, - ჭეშმარიტად ოქროს წიგნი სახელმწიფოს საუკეთესო წყობილებისა და ახალი კუნძულის უტოპიის თაობაზე“.

„უტოპიის“ გამოსვლისთანავე ტომას მორი მთელი განათლებული ევროპის ცენტრში მოექცა. მორის პოლიტიკურ პოპულარობასთან ერთად იზრდებოდა მისი, როგორც მეცნიერ-ჰუმანისტის დიდება.

1518 წელს მორი გახდა მეფის საიდუმლო საბჭოს ერთ-ერთი წევრი და იმ პეტიციათა მომხსენებელი, რომელნიც შემოდიოდა მეფის სახელზე. მორს უნდა მოეხსენებინა მეფისთვის განსახილველი საქმეების ვითარება და მის მიერ წინასწარ მოფიქრებული გადაწყვეტლებანიც.

1521 წლის მაისში მორი დაინიშნა ხაზინადრის თანაშემწის თანამდებობაზე. ამასთან ერთად მან მიიღო რაინდის წოდება და მონაწილეობდა დიპლომატიურ მისიებში, თან ახლდა კანცლერ უოლსს კალესა და ბრიუგეში. 1522 და 1525 წლებში, მეფის ბრძანებით მორს საჩუქრად გადასცეს მიწები ოქსფორდისა და კენტის საგრაფოებში.

ტომას მორის შემდგომ პოლიტიკურ მოღვაწეობაზე დიდი გავლენა მოახდინა რეფორმაციამ. გამოდიოდნენ რა თეოლოგ-სქოლასტიკოსებისა და კათოლიკური სამღვდელთა კრიტიკით, ჰუმანისტებმა ობიექტურად ბევრი რამ გააკეთეს რეფორმაციის მოსამზადებლად. მაგრამ მათ ამოცანად არ დაუსახავთ არსებული კათოლიკური ეკლესიისა და, მით უმეტეს, არსებული საზოგადოებრივი წყობილების დანგრევა. მათი კრიტიკის სუბიექტური მიზანი იყო ნაკლოვანებების გამოსწორება „ზევიდან“, ხალხთა ფართო მასების მონაწილეობის გარეშე.

ამიტომ, როდესაც ევროპაში გაიშალა რეფორმაციული მოძრაობა და მან მოიცვა საზოგადოების უფრო ფართო სოციალური წრეები, ჰუმანისტებმა ცივილიზაციის ბედი განათლებულ ადამიანთა წრეს მიახდეს, რადგანაც ფიქრობდნენ, რომ მხოლოდ მას შეეძლო მსოფლიოს ბედის გადაწყვეტა და არა ხალხთა ფართო მასებს. სწორედ ამის გამო არა მარტო მორი, არამედ მისი მეგობარი ჰუმანისტები, მათ შორის ერაზმ როტერდამელიც, მკვეთრად განუდგნენ რეფორმაციას.

მორი მარტინ ლუთერის გამოსვლისთანავე რეფორმაციის მოწინააღმდეგე გახდა. მორსავით მეფეც ასევე მტრულად შეხვდა ლუთერის რეფორმაციას. ჰენრი VIII ხშირად იხილავდა მორთან ერთად რეფორმაციის საკითხებს. 1521 წელს ჰენრი VIII ლუთერის წინააღმდეგ სპეციალური წიგნი გამოაქვეყნა - „შვიდი საიდუმლოს დასაცავად“. ტომას მორმა მონაწილეობა მიიღო ამ წიგნის რედაქტირებაში, მეტიც, არსებითად იგი მეფის თანაავტორი იყო. ამ შრომის საფასურად ჰენრი VIII პაპისაგან „რწმენის დამცველის“ საპატიო ტიტული მიიღო. გარდა ამისა, ყველა იმას, ვინც ამ წიგნს წაიკითხავდა, პაპი ჰპირდებოდა ცოდვების შენდობას. ამ დროიდან უკვე იწყება მორის პოლემიკური ბრძოლა რეფორმაციის წინააღმდეგ.

1523 წელს, მეფის თანხმობით, ტომას მორი აირჩიეს თემთა პალატის სპიკერად, ე. ი. თავმჯდომარედ, მაგრამ მეფისა და მისი პირველი მინისტრის, კარდინალ უოლსის იმედები არ გამართლდა - მორი არ გამხდარა მეფის მორჩილი იარაღი პარლამენტში.

1525 წელს მორმა ლანკასტერის საჰერცოგოს კანცლერის მაღალი პოსტი დაიკავა. ამასთან ერთად, იგი მონაწილეობდა მნიშვნელოვან დიპლომატიურ მისიებში.

1529 წელს, კარდინალ უოლსის ჩამოგდების შემდეგ, ტომას მორი ინგლისის ლორდ-კანცლერი გახდა. ეს იყო პირველი შემთხვევა, როცა ინგლისში ეს პოსტი დაიკავა ბურჟუაზიული წრის წარმომადგენელმა, მაგრამ მორს არ გამოუხატავს დიდი აღფრთოვანება, იგი არ ფიქრობდა თავისი შეხედულებების შეცვლას და მეფის მორჩილ იარაღად გახდომას. ტრადიციულ სიტყვაში, რომელიც წარმოთქვა ამ თანამდებობის მინიჭების ცერემონიალის დროს, მან ნათლად გამოხატა თავისი შეხედულება კანცლერის მოწოდების შესახებ: „მე ვფიქრობ, რომ ეს სავარძელი აღსავსეა შრომითა და საფრთხით და არა პატივით. რაც უფრო მაღალია თანამდებობა, მით უფრო მძიმეა დაცემა. ეს კარგად ჩანს ჩემი წინამორბედის (იგულისხმება უოლსი - ნ. გ) მაგალითიდან. რომ არ ყოფილიყო წყალობა, ჩემს ადგილს მივიჩნევდი ისეთივე სასიამოვნო ადგილად, როგორც დამოკლესათვის იყო სასიამოვნო მის თავზე აღმართული მახვილი“.

მორის შეჯახება ჰენრი VIII-სთან მორის დაღუპვით დამთავრდა და ეს სწორედ რეფორმაციის საფუძველზე მოხდა. ინგლისის ბურჟუაზია და ახალი თავადაზნაურობა მოითხოვდნენ და თანაუგრძნობდნენ რეფორმაციას. ინგლისის ისტორიული განვითარება თვით განაპირობებდა ჰენრი VIII და პაპის კურიას შორის განხეთქილებას. გაბურჟუებული თავადაზნაურობა და ბურჟუაზია დაინტერესებული იყვნენ უფრო იაფი ეროვნული ეკლესიის შექმნით, დიდ მოგებას უქადდა მათ საეკლესიო ქონების სეკულარიზაცია. როგორც ცნობილია, პაპთან უთანხმოების საბაზად იქცა მეფის განქორწინების ამბავი. მეფეს სურდა გაჰყოფა თავის პირველ ცოლს - ეკატერინე არაგონელს და დედოფლის ლამაზი სეფე-ქალი ანა ბოეინი ცოლად შეერთო. მეფეს სჭირდებოდა პოლიტიკური მხარდაჭერა თავისი კანცლერისაგან - ტომას მორისაგან. მეფის იმედები არ გამართლდა. მორმა მხარი არ დაუჭირა და ჰენრი VIII და 1532 წელს უარი განაცხადა კანცლერის თანამდებობაზე.

მის წინააღმდეგ დაუყოვნებლივ დაიწყო რეპრესიები. სასამართლომ მორს ბრალი დასდო „სახელმწიფო ღალატში“ და კენტენბერის მონაზვნის ელისაბედ ბარტონის მხარდაჭერაში, რომელმაც უწინასწარმეტყველა მეფეს დაღუპვა ანა ბოლეინზე დაქორწინების შემთხვევაში.

1534 წლის 17 აპრილს მორი ტაურში გადაიყვანეს, სადაც მან წელიწადზე მეტი დაჰყო. მისი მდგომარეობა კიდევ უფრო მეტად გაუარესდა მას შემდეგ, რაც 1534 წლის ნოემბერში მიიღეს სპეციალური აქტი, რომლითაც მეფე ოფიციალურად ცნეს „ინგლისის ეკლესიის უზენაეს მეთაურად“. ამავე დროს გამოაქვეყნეს აქტი „სახელმწიფო ღალატის შესახებ“. ღალატად ითვლებოდა მეფის რომელიმე ტიტულის უარყოფა. ამის შემდეგ პარლამენტმა დაამტკიცა, რომ ფიცი, რომლის დადებაც უარყო მორმა, „ჭეშმარიტია“ და სრულიად შეესაბამება ახალ აქტს „ტახტის მემკვიდრეობის შესახებ“.

ტ. მორს ბრალად დასდეს სახელმწიფოს ღალატი და თავს დაატეხეს ათასგვარი უბედურება: ჩამოართვეს 1522 წელს მეფის მიერ ნაბოძები მიწები, მისი ოჯახი ყოველგვარი შემოსავლის გარეშე დატოვეს. დაიწყო ხანგრძლივი სასამართლო პროცესი.

1535 წლის 1 ივლისს მორი უკანასკნელად წარსდგა სასამართლო კომისიის წინაშე. მას მრავალრიცხოვანი ბრალდება წაუყენეს და გამოუცხადეს სასტიკი განაჩენი: „იგი უნდა წაიყვანოს კონსტებლ უილიამ კინგსტონმა სასამართლოდან ტაურში, საიდანაც გადაიყვანენ ტაიბერში. იქ სახრჩობელაზე უნდა ჩამოკიდდონ, სანამ ნახევრად არ მოკვდება. შემდეგ გადაჭრან თოკი, მოჰკვეთონ სასქესო ორგანო, გაუფატრონ მუცელი, გამოჰგლიჯონ და დაწვან შიგნეულობა, შემდეგ ოთხად გაკვეთონ და დაკიდონ მისი სხეულის ოთხი ნაწილი ქალაქის კარიბჭეზე, ხოლო თავი - ლონდონის ხიდზე“. შემდგომში მეფემ ერთგვარად „შეამსუბუქა“ განაჩენი და ბრძანა „მხოლოდ თავი მოეკვეთათ დამნაშავესათვის“. მორი განაჩენის მოსმენის შემდეგ მიხვდა, რომ უსაფუძვლო იყო თავისი შეხედულებების დამალვა. ამიტომ მან განაცხადა: „მე შვიდი წელი ვსწავლობდი ეკლესიის ისტორიას და ვამტკიცებ, რომ საერო ხელისუფალი არ შეიძლება იყოს ეკლესიის მეთაური“.

განაჩენი სისრულეში მოიყვანეს სასამართლოს უკანასკნელი სხდომიდან ოთხი დღის შემდეგ. 1535 წლის 6 ივლისს, დილაადრიანად, ტაურში მივიდა მორის მეგობარი - ტომას პოპი, რომელმაც აუწყა მორს, რომ დასჯიდნენ ცხრა საათზე და რომ მეფემ მტანჯველი სიკვდილი „შეუმსუბუქა“ თავის მოკვეთით. ამაზე მორმა წამოიძახა: „ღმერთო! შენ დაიფარე ჩემი მეგობრები მეფის ამგვარი მოწყალებისაგან“. ეს არაჩვეულებრივი სიმტკიცე მორს ეშაფოტზეც არ დაუკარგავს. მას აუკრძალეს სიკვდილის წინ ხალხისთვის მიემართა. ალბათ მეფეს ეშინოდა არ გამომჟღავნებულყო მორის მკვლელობის ნამდვილი მიზეზი. როდესაც მორი ეშაფოტზე ადიოდა, მედილეგეს უთხრა: „დამეხმარეთ ასვლაში, ჩამოსვლას კი თვითონ შევეცდები“. მორმა წარმოთქვა მოკლე ლოცვა და სიკვდილის წინ ჯალათი გაამხნევა: „ცოცხლად მეგობარო! ნუ გეშინია შენი მოვალეობისა, კისერი მოკლე მაქვს, კარგად დაუმიზნე, რომ არ შერცხვე“. უკანასკნელ წუთებში კი წამოიძახა: „ცოტა დამაცადე, წვერი გადავწიო, მას ხომ არ მიუძღვის ბრალი სახელმწიფო ღალატში“.

ასე დაიღუპა XV-XVI საუკუნეების ინგლისის დიდი ჰუმანისტი და სახელმწიფო მოღვაწე ტომას მორი, „ინგლისის ერთადერთი გენიოსი“, როგორ უწოდა მას თავისმა თანამედროვე მეცნიერ-ჰუმანისტმა ჯონ კოლეტმა.

მორის ტრაგიკულ ბედთან ერთად დასამარდა ჰუმანისტური ილუზიები, კეთილი მრჩეველებით გარშემორტყმული განათლებული მონარქისადმი რწმენა. ჯერ კიდევ 1519 წლის ივლისში ერაზმ როტერდამელი აღნიშნავდა, რომ „ბედნიერნი იქნებოდნენ სახელმწიფონი, თუ მათი მმართველნი ქვეყნის სათავეში ჩააყენებდნენ მორის მსგავს თანამდებობის პირთ“.

ტომას მორი სალამს უძღვნის პეტრე ეგიდიუსს^[1]

მვირფასო პეტრე ეგიდიუს, მართალი გითხრა, ცოტა მრცხვენია კიდევ ამ წიგნის გამოგზავნისა უტოპიელთა^[2] სახელმწიფოს თაობაზე ასე დაგვიანებით, თითქმის ერთი წლის შემდეგ, რადგან მას, ალბათ, თვენახევარში მაინც მოელოდი. მეტადრე იცოდი, რომ ამ ნაშრომში მასალის მოპოვების ტვირთი მოხსნილი მქონდა და გეგმაზე ფიქრიც კი არ მჭირდებოდა. მარტო ის უნდა მომეწერა, რაც შენთან ერთად მოვისმინე რაფაელისაგან. არც მჭერმეტყველებაზე დამდგომია ჯაფა, რაკი თვით მთხრობელის სიტყვაც ერთობ ნაუცბადევი და მოუმზადებელი^[3] გახლდათ. თანაც, ვითარცა უწყი, ეს სიტყვა ეკუთვნის კაცს, ვინც ისე ვერაა განსწავლული ლათინურში, როგორც ბერძნულში; და რაც უფრო მიუახლოვდებოდა ჩემი გადმონაცემი მის უბრალოდ მონათხრობს, მით უფრო ახლოს იქნებოდა იგი ჭეშმარიტებასთან. ამ ნაშრომში კი მე მხოლოდ ამაზე უნდა ვიზრუნო და აკი ვიზრუნე კიდევ.

ვადიარებ, ჩემო პეტრე, რომ ამ უკვე მზა მასალამ თითქმის სრულიად ამაცილა თავიდან შრომა, ვინაიდან მასალის მოფიქრება და მისი დაგეგმვა საკმაო ნიჭს, სათანადო განსწავლულობასა და გარკვეულ დროსა და გულმოდგინებას მოითხოვდა; ხოლო თუ საჭირო იქნებოდა საგნის გადმოცემა არა მარტო ჭეშმარიტების, არამედ მჭერმეტყველების თვალსაზრისითაც, მაშინ ამისთვის არ მეყოფოდა არც დრო და არც გულმოდგინება. მაგრამ რაკი ასეთი საზრუნავი აღარ მქონდა, რის გამოც ამდენი ოფლის დაღვრა იქნებოდა საჭირო, მე მხოლოდ ისლა დამრჩენოდა - უბრალოდ ჩამეწერა მოსმენილი; ეს კი უკვე მეტად იოლი საქმე იყო. და მაინც ამ მეტად იოლი საქმის შესასრულებლადაც კი ჩემი სხვა საქმენი ჩვეულებრივ სულ მცირეზე ნაკლებ დროს მიტოვებდნენ. მე ხომ მუდამ ხან სასამართლო საქმეებზე ვხარჯავ დროს (ზოგი მე მიმყავს, ზოგს ვისმენ, ზოგს ვამთავრებ, ვითარცა შუამავალი, ზოგსაც ვწყვეტ მოსამართლის უფლებით), ხან ზოგიერთი პირი მყავს სანახავი, ზოგი მოვალეობის, ზოგი კი - მართლა საქმეთა გამო. და აი, ვწირავ რა მსხვერპლად თითქმის მთელ დღეს სხვებს და ცოტას ახლობლებს ვუთმობ, ჩემთვის - მწერლობისათვის აღარაფერი მრჩება.

მართლაცდა, შინ დაბრუნებული ცოტა ცოლსაც ხომ უნდა ებაასო, ბავშვებს ეტიტინო, მსახურთ გაესაუბრო. ყველაფერი ეს მე საქმედ მიმაჩნია, რადგან აუცილებელია მათი შესრულება (დიახ, აუცილებელია, თუ არ გინდა საკუთარ სახლში უცხოდ გიგულონ). საერთოდ კი უნდა ეცადო, რაც შეიძლება სასიამოვნო იყო იმათთვის, ვინც შენ ცხოვრების თანამგზავრად გერგო ან ბუნების ძალით, ან შემთხვევის წყალობით, ან კიდევ შენივე არჩევანით; მაგრამ ესეც კია არ უნდა გააფუჭო ისინი ალერსით ანდა შენი გულმოწყალებით მსახურები ბატონებად არ უნდა აქციო. ამ საქმეებში გადის დღეები, თვეები, წლები. აბა, როდისლა უნდა ვწერო? თანაც მე არაფერი მითქვამს ძილზე, ისევე როგორც სადილზე, რასაც ზოგიერთები არანაკლებ

დროს უთმობენ, ვიდრე თვით ძილს, რომელსაც ისედაც ცხოვრების ნახევარი მიაქვს. მე კი ჩემთვის მოვიხელთებ ხოლმე იმ დროს, რომელსაც ძილსა და ჭამა-სმას ვპარავ; რა თქმა უნდა, ეს ცოტაა, მაგრამ მაინც რაღაცას შეადგენს. ამიტომაც, როგორც იქნა, დავასრულე „უტოპია“ და წასაკითხად გამოგიგზავნე შენ, ჩემო პეტრე. გთხოვ წაიკითხო და შემახსენო, თუ რაიმე გამომრჩა. მართალია, ამ მხრივ თითქოს ეჭვი არ მეპარება და მინდა ჭკუაც და განსწავლულობაც ისეთივე მქონდეს, როგორც მეხსიერება, მაგრამ საკუთარ თავს იმდენად მაინც ვერ მივენდობი, რომ ვიფიქრო, არაფერი დამვიწყებია-მეთქი!

აი, მაგალითად, ჩემმა აღზრდილმა, იოანე კლემენტიმ[4], ვინც როგორც იცი, ჩვენთან ერთად იყო (მას ხომ არ ვუკრძალავ დასწრებას არც ერთ საუბარზე, რომელმაც შეიძლება რაიმე სარგებლობა მოუტანოს, ვინაიდან დროთა განმავლობაში საუცხოო ნაყოფს ველოდები იმ მცენარისაგან, რომელმაც ამწვანება დაიწყო ბერძნულსა და ლათინურში მისი მეცადინეობის წყალობით), მეტად უხერხულ მდგომარეობაში ჩამაგდო. რამდენადაც მახსოვს, ჰითლოდევისი[5] ჰყვებოდა, რომ ამაუროტის[6] ხიდი, რომელიც მდინარე ანიდრუსზეა[7] გადებული, სიგრძით ხუთასი ნაბიჯია, ჩემი იოანე კი მეუბნება, რომ საჭიროა ორასის გამოკლება, რადგან მდინარის სიგანე სამას ნაბიჯს არ აღემატებაო. გთხოვ აღიდგინო შენს მეხსიერებაში ეს. თუ შენც ამ აზრის ხარ, მაშინ მეც დაგეთანხმებით და ვაღიარებ ჩემ შეცდომას. მაგრამ თუ ვერ გაიხსენებ, დავტოვებ ისე, როგორც დავწერე, სწორედ იმას, რაც თვითონ მახსოვს. რა თქმა უნდა, ყოველ ღონეს ვიხმარ იმისათვის, რათა ჩემს წიგნში არავითარი სიცრუე არ იყოს; თუმცა სხვა მხრივ საეჭვო შემთხვევებში, სიცრუეს უნებურად უფრო ვიტყვი, ვიდრე შეგნებულად დავუშვებ მას, ვინაიდან მირჩევნია პატიოსანი ადამიანი უფრო ვიყო, ვიდრე მოხერხებულის.

ამ სადარდებელს ადვილად ეშვებოდა, თუკი რაფაელს ჰკითხავ პირადად ანდა წერილობით; ამის გაკეთება კი საჭიროა ჩვენთან წამოჭრილი მეორე სიძნელის გამოც, რაც, არ ვიცი, ვისი მიზეზით მოხდა: ჩემი, შენი თუ თვითონ რაფაელისა. სახელდობრ, არც ჩვენ მოგვსვლია აზრად და არც მას უთქვამს, ახალი ქვეყნის რომელ ნაწილში მდებარეობს უტოპია. მე, რასაკვირველია, მზად ვარ გამოვისყიდო ეს დაუდევრობა რიგიანი თანხით; ჩემთვის ხომ მეტად სამარცხვინოა არ ვიცოდე, რომელ ზღვაში მდებარეობს კუნძული, რომელზეც ამდენს ვლაპარაკობ; მეორე მხრივ, ჩვენთან იმყოფება რამდენიმე ცნობისმოყვარე პიროვნება, განსაკუთრებით კი ერთი სათნო კაცი, ხელობით ღვთისმეტყველი, ვინც შეპყრობილია გასაოცარი სურვილით, მოინახულოს უტოპია არა ახირებული ჟინის ან ახლის ნახვის ცნობისმოყვარეობის გამო, არამედ იმიტომ, რომ დაამშვენოს, დაიცვას და განამტკიცოს ჩვენი რელიგია, რაც იქ ასე კარგად დაიწყო. ამიტომ მან გადაწყვიტა წინასწარ მიიღოს ზომები, რათა იგი იქ გაამწესოს პაპმა და უტოპიელთა ეპისკოპოსადაც აირჩიონ; მას სრულიადაც არ აკავებს ის, რომ ამ წოდების მოპოვება ესოდენ დიდი თხოვნით უხდება. მას წმიდათაწმიდად მიაჩნია ასეთი ცდა, რომელიც პატივმოყვარეობით და გამორჩენის ანგარებით კი არაა ნაკარნახევი, არამედ ღვთის წინაშე მოკრძალებითაა ჩაგონებული.

ამიტომ გთხოვ, ჩემო პეტრე, მიმართო ჰითლოდევს ან პირადად, თუ ეს შენთვის მოსახერხებელია, ანდა წერილობით და მიიღო ზომები, რათა ჩემს ნაშრომში არ იყოს არავითარი სიცრუე, ან არ გამომრჩეს რაიმე ჭეშმარიტება, ეგებ ჯობდეს ეს წიგნი

ვაჩვენოთ მას. მასავით ხომ არავის შეუძლია აქ დაშვებული შეცდომების გასწორება; თვითონ კი ამას ვერ შეძლებს, თუ ბოლომდე არ წაიკითხავს ჩემს ნაწერს. ამ გზით შევიტყობ იმასაც, მოსწონს თუ არა ეს თხზულება. თუ კი მან თვითონ გადაწყვიტა თავისი მოგზაურობის აღწერა, მაშინ ალბათ არ მოისურვებდა, რომ ეს მე გამეკეთებინა. ყოველ შემთხვევაში, მე არ ვისურვებდი უტოპიელთა სახელმწიფოს შესახებ ჩემი ნაშრომის გამოქვეყნებით მის ისტორიას სიახლის სურნელება და სილაზათე დავუკარგო.

სიმათლე გითხრა, ბოლომდე არც კი ვიცი, გადმოვცემ თუ არა ამ წიგნს. ადამიანთა გემოვნება ზედმიწევნით მრავალფეროვანია, ხასიათები ახირებული, მათი ბუნება მეტისმეტად უმადური; მსჯელობა კი ხანდახან სრულ უაზრობამდე მიდის. ეტყობა, შედარებით ბედნიერად უფრო ისინი გრძნობენ თავს, ვინც განცხრომითა და მხიარულად ცხოვრობს და თავის ჭიას ახარებს, ვიდრე ისინი, ვინც იტანჯება იმის გამოცემაზე ზრუნვით, რასაც სხვებისათვის - ამპარტავანთა და უმადურთათვის - სარგებლობის ან კმაყოფილების მოტანა შეუძლია. ადამიანთა დიდი უმრავლესობა არ იცნობს მწერლობას, ბევრი ზიზღითაც უყურებს მას. ბარბაროსი მძიმე ტვირთით ჩამოიშორებს ხოლმე ყოველივეს, რაც მთლად ბარბაროსული არ არის; ნახევრად უმეცარნი უკუაგდებენ ყოველივეს, ვითარცა უხამსობას, რაც არ არი გადატვირთული დრომოჭმული სიტყვებით; ზოგიერთს მხოლოდ ძველმანი მოსწონს, უმრავლესობას კი - მხოლოდ საკუთარი; ერთი იმდენად კუშტია, რომ ვერ ურიგდება ხუმრობას, მეორე კი იმდენად ბრიყვი, რომ მახვილგონიერებას ვერ ეგუება; ზოგიერთი ისეთი უჟმურია, რომ ყოველგვარ ოხუნჯობას ისე უფრთხის, ვით ცოფიანი ძაღლისაგან დაკბენილი - წყალს. ზოგი ისეთი მერყევია, რომ დამჯდარი ერთს აქებს, ფეხზე წამომდგარი - მეორეს[8]. ზოგიერთები დუქანში სხედან, სასმისით ხელში მწერალთა ნიჭზე მსჯელობენ და ყველაფერს, რასაც კი მოისურვებენ, დიდი რიხით კიცხავენ ხოლმე, ყოველ მწერალს თავისი ნაწერისათვის, ასე ვთქვათ, თმით ათრევენ, თვითონ კი სამიზნიდან შორს უჭირავთ თავი. ეს ვაჟბატონები ისეთი მჩატე და ისე პირწმინდად გადაპარსულნი არიან, რომ ბეწვის ნასახიც არ გააჩნიათ ხელის წასავლებად!. იმდენად უმადური ადამიანებიც არსებობენ, რომ ნაწარმოების ძალზედ დატკბობის შემდეგაც კი არავითარ განსაკუთრებულ მოწიწებას არ გრძნობენ ავტორისადმი. ისინი როდი განსხვავდებიან იმ უმადური სტუმრებისაგან, რომლებიც მდიდრულ ნადიმზე გულუხვად ღრეობის შემდეგ გამამდარნი ბრუნდებიან შინ და მასპინძელს მადლობასაც კი არ უხდიან. მოდი და გამართე საკუთარ ხარჯზე ნადიმი ასეთი ღრჯუ ხასიათისა და სხვადასხვა გემოვნების მქონე, ამასთანავე ასეთი უმადური ადამიანებისათვის.

და მაინც, ჩემო პეტრე მომიგვარე ჰითლოდევსთან ის საქმე რაზედაც შემოგჩვილე. შემდეგ კი, ცხადია, სრული შესაძლებლობა მექნება ახალი გადაწყვეტილება მივიღო. დავასრულე რა წერა, გვიან მოვედი გონს. ამიტომ, თუკი ეს ემთხვევა მის სურვილს გამოქვეყნების თაობაზე, დაუჯერებ მეგობრებისა და, უპირველესად შენს რჩევას. ახლა კი კარგად იყავი, ჩემო ტკბილო პეტრე ეგიდიუს, შენს მშვენიერ მეუღლესთან ერთად[9] მინდა წინანდებურად გიყვარდე, მე კი სულ უფრო და უფრო მეტად მიყვარხარ!

პირველი წიგნი

პირველი წიგნი საუბრისა, რომელიც გამართა გამოჩენილმა კაცმა რაფაელ ჰითლოდევსმა სახელმწიფოს საუკეთესო წყობილების თაობაზე და გადმოსცა უსაჩინოესმა ვაჟკაცმა, ბრიტანეთის სახელოვანი ქალაქის ლონდონის მოქალაქემ და ვიკონტმა ტომას მორმა

ინგლისის უძლეველ მეფე ჰენრის[10], ამ სახელით მერვეს, გამოჩენილი ხელმწიფის ყველა თვისებით უხვად შემკულს, ახლახან მეტად მნიშვნელოვანი სადაო საქმეები ჰქონდა კასტილიის მეფე კარლოსთან[11]. მათი განხილვისა და მოგვარებისათვის მეფემ ელჩად ფლანდრიაში[12] გამგზავნა და წილად მხვდა ვყოფილიყავი თანამგზავრი და ამხანაგი შეუდარებელი ვაჟკაცისა - კატბერტ ტუნსტალისა[13], რომელიც ამ ცოტა ხნის წინათ, ყველას სასიხარულოდ მეფემ სასულიერო არქივების მცველად დანიშნა. არაფერს ვიტყვი მის საქებად მაგრამ იმის შიშით კი არა, რომ მასთან მეგობრობა ჩემი გულახდილობის უტყუარ საბუთად არ გამოდგება, არამედ იმიტომ, რომ მისი სიმამაცე და ცოდნა ჩემს ყოველგვარ შეფასებას აღემატება. მისი სიქველე და განსწავლულობა იმდენად საჩინოა და გასხივოსნებული, მათ გამოცხადებას რომ შევდგომოდი, იგივე იქნებოდა, მზე გამემშუქებინა ლამპრით.

ბრიუგეში[14] (როგორც დაითქვა) შევხვდით მათ ვისაც მეფემ საქმის წარმოება დაავალა. ყველანი უსაჩინოესი ვაჟკაცი იყვნენ, მათ შორის პირველი და მოთავე იყო ბრიუგეს პრეფექტი. ხოლო მათი სული და გული - გეორგ ტემზიციუსი[15], კასელის ტაძრის წინამძღვარი, მჭერმეტყველი არა მარტო განსწავლულობით არამედ ბუნებითაც, ამასთანავე იგი სამართლის საუკეთესო მცოდნე და მოლაპარაკების წარმართვის დიდოსტატი იყო, როგორც თავის ჭკუის ისე დიდი გამოცდილების წყალობით. რამდენიმე შეხვედრაზე ჩვენ ვერ მივაღწიეთ სრულ თანხმობას ზოგიერთ საკითხში. იმიტომ ისინი ჩვენთან გამომშვიდობების შემდეგ ცოტა ხნით ბრიუსელში გაემგზავრნენ. თავიანთი ხელმწიფის ნება - სურვილის გასაგებად, მე კი ამასობაში (სხვადასხვა გარემოების გამო) ანტვერპენს ვეწვიე.

იქ ყოფნის დროს ყველაზე უფრო სასიამოვნო კაცი ვინც კი მინახულა, იყო პეტრე ეგიდიუსი, ანტვერპენის მკვიდრი, ადამიანი, რომელიც თანამოქალაქეთა შორის დიდი ნდობითა და პატივით სარგებლობს და კიდევ უფრო მეტიც ეკუთვნის. არ ვიცი, რომელი სჭარბობს ამ ჭაბუკში - მისი განსწავლულობა თუ ზნეობა, რადგან იგი მშვენიერი ადამიანიცაა და დიდად განათლებული პიროვნებაც. გარდა ამისა იგი ყველასთან ერთნაირად სათნოა, მეგობრებისადმი კი - განსაკუთრებით კეთილგანწყობილი, უყვარს ისინი, მათი ერთგულია, ისე გულთბილად ექცევა, მნელად თუ მოიძებნება მეორე, მეგობრობაში რომ შეედაროს. პეტრე ეგიდიუსი უჩვეულოდ თავმდაბალიცაა, მისთვის უცხოა მაღალფარდოვნება, გაბღენძვა; მასში საოცრადაა შეზავებული გულწრფელობა და კეთილგონიერება. იშვიათი მოლაპარაკეა, თანაც ენამახვილი, მაგრამ უწყინარი. მასთან ზედმიწევნით სასიამოვნო ურთიერთობამ და საამო საუბრებმა მართლაც რომ შემიმსუბუქეს სამშობლოსთან და ოჯახურ კერსთან, ცოლთან და შვილებთან დაშორებით გამოწვეული სევდა, მე ხომ უკვე ვეღარ ვითმენდი და სულმოუთქმელად მოველოდი შინ დაბრუნებას (მაშინ უკვე ოთხ თვეზე მეტი ხნის წამოსული ვიყავი სახლიდან).

ერთხელ ღვთისმსახურებას ვესწრებოდი ღვთისმშობლის ტაძარში, ამ ულამაზეს შენობაში, სადაც მხოლოდ უწარჩინებულესნი დადიან. წირვის დამთავრების შემდეგ ის-ის იყო სასტუმროში დაბრუნებას ვაპირებდი, რომ უცებ, შემთხვევით დავინახე

პეტრე, რომელიც ერთ ხანში შესულ, მზისაგან გარუჯულ, გრძელწვერა, ლაბადაწამოსხმულ უცხოელს ესაუბრებოდა. სახითა და გარეგნობით მეზღვაურს მივამსგავსე უცნობი. როგორც კი შემაძმნია, პეტრე მომიახლოვდა და მომესალმა. სანამ სალამზე ვუპასუხებდი, მან განზე გამიხმო და მკითხა: „ხედავ ამას?“ და სწორედ იმ კაცზე მიმითითა. „მინდოდა - მითხრა მან - აქედან პირდაპირ შენთან წამომეყვანა...“. „მისი მოსვლა ჩემთვის ძალიან სასიამოვნო იქნებოდა შენს გამო“, - ვუპასუხე მე. „არა, - მომიგო მან, - შენ რომ ამ კაცს იცნობდე, გამოვიდოდა რომ უფრო მის გამო. სხვა არავინ მეგულემა ქვეყნად ისეთი, ამდენი ისტორიის მოყოლა შეეძლოს უცნობ ადამიანებზე და ქვეყნებზე. მე ვიცი, რომ ამ ამბების მოსმენით უდიდეს სიამოვნებას მიიღებ“. „როგორც ჩანს, - ვუთხარი მე, - სწორად მივმხვდარვარ. პირველივე შეხედვით მივხვდი, რომ ეს კაცი მეზღვაურია!“ ამაზე პეტრემ მიპასუხა: „ო, როგორ ცდები. იგი მართლაც დიდხანს იყო ზღვაზე, მაგრამ არა როგორც პალინურუსი[16], არამედ როგორც ულისე[17], უფრო სწორად კი როგორც პლატონი[18]. ეს კაცი რაფაელია. საგვარეულო სახელად ჰითლოდეუსს უწოდებენ; ლათინური კარგად იცის, მაგრამ ბერძნული კიდევ უკეთესად. იგი უფრო გულმოდგინედ სწავლობდა ბერძნულს, ვიდრე რომაულს (ვინაიდან მთლიანად შესწირა თავი ფილოსოფიას. ამ მეცნიერების სფეროში კი, როგორც მან შეიტყო, ლათინურ ენაზე არ არსებობს რაიმე მნიშვნელოვანი, გარდა სენეკას[19] და ციცერონის[20] ზოგიერთი თხზულებისა). რაც რამე გააჩნდა შინ მამისეული, რაფაელმა ძმებს დაუტოვა (იგი ლუზიტანელია[21]), თვით კი, მსოფლიოს გაცნობის სურვილით, ამერიგო ვესპუჩის[22] შეუერთდა და უკვე საქვეყნოდ ცნობილ ოთხიდან სამ მოგზაურობაში მისი განუყრელი თანამგზავრი იყო. მაგრამ ბოლოს მოგზაურობიდან უკან აღარ ჩამოყოლია, რამეთუ ამერიგო დაითანხმა და იმ ოცდაოთხთა რიცხვში აღმოჩნდა, ვინც ციხე-სიმაგრეში დარჩნენ ბოლო ნაოსნობის შედეგად. რაფაელი იქ დატოვეს თავისი ხასიათის წყალობით, რადგან მოგზაურობა ერჩია შინ ჯდომასა და იქ ზარზეიმით დაკრძალვას. ამიტომ მას მუდამ პირზე ეკერა: „ვისაც ურნა არ გააჩნია, მას ზეცა დაფარავს[23]“ ან კიდევ საიქიოსაკენ მიმავალი გზა ყოველგნით ერთია![24] ღმერთი რომ მისადმი კეთილგანწყობილი არ ყოფილიყო, ასეთი აზრები ძვირად დაუჯდებოდა. ვესპუჩისთან განშორების შემდეგ რაფაელმა ციხესიმაგრელ ხუთ ამხანაგთან ერთად ბევრი ქვეყანა შემოიარა და ბოლოს გასაოცარი შემთხვევითობის გამო ტაპრობანაზე[25] აღმოჩნდა. აქედან იგი კალიკვიტში[26] ჩავიდა, სადაც მას ბედად ლუზიტანელთა ხომალდები დახვდა და, ბოლოსდაბოლოს, მოულოდნელად სამშობლოში დაბრუნდა“.

როცა პეტრემ თხრობა შეწყვიტა, მადლობა გადავუხადე იმ მზრუნველობისათვის, იმ დიდი მონდომებისათვის, რომელიც გამოიჩინა მან ჩემდამი და საშუალება მომცა, დავმტკბარიყავი ხსენებულ კაცთან ესოდენ სასიამოვნო საუბრით. შემდეგ კი რაფაელს მივუბრუნდი; ურთიერთ მისალმებისა და იმ საყოველთაოდ მიღებულ მიმართვათა გაცვლის შემდეგ, რომლებიც ჩვეულებრივ ითქმება ხოლმე უცნობ პირთა პირველი შეხვედრისას, ჩემთან, შინისკენ გავემართეთ, იქ მწვანე კორდით დაფარულ ბაღში, სკამზე ჩამოვსხედით და საუბარი გავაბით.

აქ რაფაელმა მოგვითხრო, თუ ვესპუჩის გამგზავრების შემდეგ მან და ციხე-სიმაგრეში დარჩენილმა მისმა ამხანაგებმა თანდათანობით და ტკბილი სიტყვებით როგორ მოიპოვეს იმ ქვეყნის მცხოვრებთა კეთილგანწყობა. შემდეგ კი არა თუ საფრთხე აღარ ელოდათ, მეგობრობდნენ კიდევ მათთან. ბოლოს მათი მმართველის (არც ქვეყნის

სახელი მახსოვს და არც ის, მმართველს რა ერქვა) კეთილგანწყობა და მოწყალებაც დაიმსახურეს. მისი გულუხვობის წყალობით რაფაელმა და მისმა ხუთმა მეგობარმა უხვად მიიღეს სანოვაგე და ფული, ამავე დროს სანდო გამყოლიც იშოვეს (ისინი წყალზე ტივებით გადადიოდნენ, ხმელეთზე კი ურმებით მოგზაურობდნენ). გამყოლს მგზავრები სხვა თავკაცებთან უნდა მიეყვანა და კეთილი შუამდგომლობა წარედგინა. რაფაელმა თქვა, რომ მრავალდღიანი მგზავრობის შემდეგ იხილა დიდი და პატარა ქალაქები, მჭიდროდ დასახლებული სახელმწიფოები, სადაც არცთუ ურიგო წესწყობილება სუფევდა.

მართლაც, ეკვატორული ხაზის მახლობლად, მის ორივე მხარეს რომელსაც მზის ბრუნვა მოიცავს, ხვატისაგან გამომშრალი ვრცელი უდაბნოებია გადაჭიმული. ყველგან ჭუჭყია, საგნებს უბადრუკი იერი დასდებია, ყველაფერი მკაცრია და მოუვლელი, ყველგან მხეცები და გველები დაბუდებულან, და ბოლოს აქვია ხალხი, რომელიც ურჩხულებზე ნაკლებად ველური ბოროტი როდია; მაგრამ როცა წინ წაიწევ, ყველაფერი თანდათან შეიცვლება, თითქოს ცაც იხსნება, ირგვლივ სიმწვანე და სიმშვიდე ისადგურებს, აი, ხალხიც გამოჩნდა. დიდ და პატარა ქალაქებში ვაჭრობა გაჩაღებულა, თანაც მარტო ურთიერთშორის და მეზობლებთან კი არა, შორს მცხოვრებ ტომებთანაც, სადაც კი სწვდებიან ზღვითა და ხმელეთით.

რაფაელს საშუალება ჰქონდა მრავალი ქვეყანა მოეარა, ვინაიდან არა მარტო მას, არამედ მის თანამგზავრებსაც სიამოვნებით ლებულობდნენ ნებისმიერ ხომალდზე, რომელიც ისე იყო აღჭურვილი, რომ ყოველგვარ მგზავრობას გაუძლებდა. პირველად ნანახ ქვეყნებში ნაირნაირი გემები ნახეს, ზოგს პაპირუსის ფოთლებისგან შეკერილი აფრები ჰქონდა, ზოგს - დეროებისგან დაჭიმული, ზოგს - ტყავისა. შემდეგ მსხვილძირა გემები იხილეს რომელთაც ტილოს აფრები ჰქონდათ; ბოლოს ჩვენი გემების მსგავსნიც უნახავთ. მათმა მეზღვაურებმა ზღვაც კარგად იციან და ცაც. მაგრამ, როგორც რაფაელი ჰყვებოდა, თვითონაც დიდი გავლენა მოუხდენია მათზე, რამეთუ მაგნიტის გამოყენება[27] ასწავლა. აქამდე ისინი კრძალვით უყურებდნენ ზღვას და მხოლოდ კარგ ამინდში ენდობოდნენ მას. ახლა კი, რაც მაგნიტის ძალა იწამეს, უკვე არაფრად აგდებდნენ ზამთარში ცურვასაც. ყველაფრის შედეგი კი ის იყო, რომ არათუ შიში აღარ ჰქონდათ არაფრის, უფრო უდარდელობა დასჩემდათ და ამიტომ მოსალოდნელი იყო ახალი საშიშროება; ნივთი, რომელსაც სარგებლობა უნდა მოეტანა ადგილობრივი მეზღვაურებისთვის, მათი არაგონივრულობის გამო, დიდი უბედურების მიზეზი არ გამხდარიყო.

რაფაელმა ისიც მოგვითხრო, თუ სად და რა ნახა, მაგრამ ახლა ამის გადმოცემა საუბარს დიდად გაგვიგრძელებდა და ეს არც არის ამ ნაწარმოების მიზანი, ამაზე სხვაგან შეიძლებოდა გვეთქვა. ახლა ჩვენთვის განსაკუთრებით სასარგებლო, რა თქმა უნდა, იმ სწორი და ბრძნული ღონისძიებების გაცნობა იქნება, რომლებიც რაფაელს იქ, კეთილმოწყობილ სახელმწიფოებში შეუნიშნავს. ჩვენ სხაპასხუპით ვაყრიდით რაფაელს შეკითხვებს და ისიც ყველაზე უფრო დიდი სიამოვნებით ამაზე გველაპარაკებოდა. დროებით თავი ვანებოთ ყოველგვარ შეკითხვებს ურჩხულებზე, ვინაიდან აქ არაფერია ახალი. მართლაც, მტაცებელ სკილებსა[28] და კელენოებს[29], კაციჭამია ლესტრიგონებსა[30] და მათ მსგავს უზარმაზარ ურჩხულებს თითქმის ყველგან შეხვდები, ხოლო სადად და გონივრულად აღზრდილი მოქალაქენი ადვილი საპოვნელი როდია.

და რაფაელი... გვესაუბრა ახალგაცნობილი ხალხის მრავალ მცდარ კანონზე, მეორე მხრივ კი ბევრი ისეთიც ჩამოთვალა, რომელთაგან მაგალითის აღება შეიძლება ჩვენი ქალაქების, ხალხების, ტომებისა და სამეფოების ცხოვრების წესის გამოსასწორებლად; ამათზე, როგორც უკვე ვთქვი, სხვაგან ვილაპარაკებ. ახლა კი მსურს გადმოგცეთ რაფაელის მონაყოლი უტოპიელთა ჩვეულებებზე და დაწესებულებებზე, მაგრამ წინასწარ მაინც გაგაცნობთ იმ საუბარს, რომელმაც ამ სახელმწიფოს დასახელებამდე მიგვიყვანა.

რაფაელმა მეტად ჭკვიანურად დაიწყო ამა თუ იმ შეცდომების ჩამოთვლა, რომლებიც ასე ბლომად აქვს ორივე მხარეს. ხოლო შემდეგ დაასახელა როგორც ჩვენი, ისე მათი ბრძნული და კეთილგონივრული კანონები. იგი ყოველი ხალხის ჩვეულებებსა და წამოწყებებს ისე აყალიბებდა, გეგონებოდა რომელიმე მხარეში მთელი სიცოცხლე გაუტარებიაო. აღტაცებულმა პეტრემ შესძახა: „გაოცებული ვარ, ჩემო რაფაელ, რატომ არ ამოუდგები მხარში მეფეს? მტკიცედ ვარ დარწმუნებული, რომ სავსებით მოახერხებ მისი გულის მონადირებას, რადგან შენი განსწავლულობის, ქვეყნებისა და ადამიანების ესოდენ დიდი ცოდნის გამო შეგიძლია არა მარტო გაართო იგი, არამედ ჭკუის სასწავლი მაგალითიც მოუყვანო და ბევრი რჩევაც მისცე. თანაც ამ ხერხით საკუთარ საქმეებსაც შესანიშნავად მოიწყობ და დიდ დახმარებას გაუწევ ყველა შენს ახლობელს“. „რაც შეეხება ჩემს ახლობლებს, - თქვა მან, - მეტისმეტად არ ვდარდობ მათზე. მიმაჩნია, რომ ჩემი ვალი მათ წინაშე შეძლებისამებრ მოვიხადე. არა მარტო ჯერ კიდევ სრულიად ჯანმრთელმა და მხნემ, არამედ ახალგაზრდამაც, ჩემს ნათესავებსა და მეგობრებს დავუნაწილე მთელი ჩემი ქონება. სხვები ქონებაზე მხოლოდ სიბერეში ან ავადმყოფობის ჟამს ამბობენ უარს, მაშინაც დიდის გაჭირვებით ელევინ და მხოლოდ იმიტომ, რომ უკვე აღარ ძალუბთ მისი შენარჩუნება. ვფიქრობ, ჩემი ახლობლები კმაყოფილნი უნდა იყვნენ ამ მოწყალეების გამო და არ მოითხოვენ და არ დაელოდებიან იმას, რომ მათი გულისათვის მეფეებს დავემონო“. „კარგი სიტყვებია! - შენიშნა პეტრემ, - მაგრამ მგონი აქ იგულისხმება არა „დამონება“, არამედ „მომსახურება“.

„ამ სიტყვაში, - მიუგო რაფაელმა - ერთადერთი მარცვალია მეტი!“ „მე კი ვფიქრობ, - უპასუხა პეტრემ, - რომ რა სახელიც არ უნდა უწოდო შენს ამ საქმიანობას, სწორედ ის არის საშუალება, რომლითაც სარგებლობის მოტანა შეგვიძლია არა მხოლოდ ადამიანთა ვიწრო წრისათვის, არამედ საზოგადოებისთვისაც და საკუთარი მდგომარების გასაუმჯობესებლადაც“. „გაუმჯობესდება კი იგი, - ჰკითხა რაფაელმა - იმ გზით, რომელიც ჩემს გულს არ ეკარება? ახლა ხომ ისე ვცხოვრობ როგორც მინდა; დარწმუნებული კი ვარ, რომ ეს მხოლოდ უმცირესობის ხვედრია მოწივით მოსილთა შორისაც! განა ცოტანი არიან ისეთები, თვითონ რომ ეძებენ მეგობრობას მეუფეებთან და განა, შენი აზრით, დიდი უბედურება იქნება, თუ კი ისინი უჩემოდ ან ჩემს მსგავსთა გარეშე შეძლებენ არსებობას?“.

მაშინ მე ვთქვი: „ჩემო რაფაელ, ცხადია, არა ხარ დახარბებული არც სიმდიდრეს, არც ძალა-უფლებას და, რა თქმა უნდა, ასეთი აზრების კაცს იმაზე ნაკლებ პატივს როდი ვცემ და ვაფასებ, ვისაც უმაღლესი გამგებლობა უპყრია ხელთ. მაგრამ მგონია, შენი საქციელი მეტად ღირსეული იქნება როგორც შენთვის, ისე შენი ამაღლებული და ჭეშმარიტად ფილოსოფიური გონებისათვის, თუკი შეეცდები გარკვეული პირადი ზარალის ფასადაც კი საკუთარი ნიჭი და გულმოდგინება საზოგადოების სამსახურს

შესწირო; ამის ხორცშესხმას კი ისე ნაყოფიერად ვერსად შესძლებ, როგორც იმ შემთხვევაში, თუკი რომელიმე დიდი სახელმწიფოს მრჩეველი გახდები და (ექვიც არ მეპარება) მას სათანადო პატიოსან აზრებს ჩაუნერგავ. არ უნდა დაივიწყოთ, რომ ხელმწიფე, დაუშრეტელი წყაროს მსგავსად, მთელ ხალხს აწვდის როგორც კარგს, ისე ცუდს. შენ ყოველთვის, დიდი ცხოვრებისეული გამოცდილების გარეშეც, შესანიშნავი მრჩეველი იქნები ყოველი მეფისათვის შენი სრულყოფილი განსწავლულობის გამო, ანდა ამ განსწავლულობის გარეშეც, ესოდენი გამოცდილების წყალობით“. ჩემო მორ, - მიპასუხა მან, - შენ ორჯერ შეცდი: ჯერ ერთი, ჩემს გამო, და მეორეც, საკითხის არსში. მე არა მაქვს ის ღირსებები, რომელთაც მომაწერ და, კიდევ რომ მქონდეს და შევეწირო ამ საქმეს, მაინც ვერავითარ სარგებელს ვერ მოვუტან სახელმწიფოს, პირველ ყოვლისა, ყველა მეფე უმრავლეს შემთხვევაში მთელ თავის დროს უფრო დიდი სიამოვნებით მხოლოდ სამხედრო საქმეებს უთმობს (მე კი ამის არავითარი გამოცდილება არ მაქვს და არც მინდა მქონდეს), ვიდრე ქვეყნის სასიკეთო საქმეებს; ამას გარდა, მეფენი უფრო დიდი სიამოვნებით ზრუნავენ იმაზე, როგორმე კანონიერი ან უკანონო გზებით ხელში ჩაიგდონ ახალ-ახალი სამეფოები, ვიდრე იმაზე, როგორ უკეთ მართონ უკვე მოპოვებული. ამასთან, მეფეთა მრჩეველებს შორის არ მეგულება არავინ ისეთი, მართლაც ჭკვიანი, სხვისი რჩევა არ სჭირდებოდას, ანდა ვისაც საკუთარი თავი ისე ბრძენი ეგონოს, სხვისი აზრის მოწონება არ ეგებოდას, არის გამონაკლისიც, როცა ისინი მლიქვნელურად და მდაბლად უხრიან თავს მეფესთან დაახლოებულ იმ პირთა სულელურ აზრებს, რომლებიც ხელმწიფის კეთილგანწყობით სარგებლობენ და ამ მლიქვნელობით ცდილობენ მათ მომადლიერებას. რასაკვირველია, ბუნებისაგან ისეა მოწყობილი, რომ ყველას თავისი ქმნილება მოსწონს, როგორც ყვავს თავისი ბაზალა და მაიმუნს - თავისი ნაშიერი.

ამიტომ, თუკი ამგვარ პირთა წრეში, რომელთაც სხვისი შურთ და მხოლოდ საკუთარს აძლევენ უპირატესობას, ვინმე გამოჩნდება და რაიმე ამბავს ამოიკითხავს შორეული წარსულიდან, ან სხვა ქვეყნებში ნანახს მოყვება, მსმენელები შეშინდებიან, თითქოს მათ სიბრძნეს დაკნინების საფრთხე ემუქრება და ამის შემდეგ უმეცრად გამოაცხადებენ, თუ ვერ მოახერხეს, მთხრობელს რაიმე მოუგონონ და სახელი გაუტეხონ. თუ სხვა ვერაფერი იღონეს, ისინი ამ აზრს მოიმარჯვებენ: ყველაფერი ეს ჩვენს წინაპრებს მოსწონდათ და ჩვენ ვისურვებდით მათ სიბრძნეშიც გავტოლებოდითო. ამით ისინი მშვიდდებიან, რადგან მიაჩნიათ, რომ ამგვარი შენიშვნით თავი შესანიშნავად დაიცვეს. თითქოსდა რაღაც საშინელი მოხდება, თუ ვინმე რომელიმე საქმეში თავის წინაპრებზე ჭკვიანი აღმოჩნდება. სინამდვილეში კი ყველაფერი, რასაც ისინი ასე მოხერხებულად დაადგენენ და რაშიც ჩვენ ასე აუღელვებლად ვეთანხმებით, ცხოვრებაში ფეხს იკიდებს და მკვიდრდება, მაგრამ თუკი რაიმე საბაბით შეიძლება რაღაც გონივრულის მოფიქრება, ჩვენ მაშინვე გატაცებით ვეჭიდებით ამ საბუთს, მაგრამ ადრე დადგენილსაც აღარ ვეშვებით. ასეთ მაღალფარდოვან, უაზრო და ჭირვეულ მოსაზრებებს არაერთხელ შევხვედრივარ სხვაგან, მაგრამ ერთხელ ინგლისშიც წავაწყდი.

„მიტხარი, გეთაყვა, - ვკითხე მე, - მაშ შენ ნამყოფი ხარ ჩვენთან?“ „დიახ, - მიპასუხა, - და იქ რამდენიმე თვე გავატარე დასავლეთ ინგლისელთა დამარცხების შემდეგ მეფის წინააღმდეგ გაჩაღებულ სამოქალაქო ომში, რომელშიც თვითონვე უმოწყალოდ განადგურდნენ[31]. ამასთან ერთად დიდად დავალეებული დავრჩი ღრმად პატივცემული მამა იოანე მარტონისგან[32], კერტენბერის არქიეპისკოპოსისა და

კარდინალისაგან, რომელიც მაშინ ინგლისის კანცლერიც იყო. ეს კაცი, ჩემო პეტრე (მორისათვის ცნობილი ამბავი უნდა მოგიტხრო) დიდ პატივისცემას იმსახურებდა როგორც თავისი მდგომარეობით, ისე კეთილგონიერებითა და სათნოებით. ტანად საშუალო კაცი იყო, საკმაო ხნისაც, მაგრამ ასაკს ვერ მოეხარა. მისი სახე მოწიწების გრძნობას იწვევდა და არა შიშს. ურთიერთობაში მძიმე კი არ იყო, არამედ დინჯი და ზვიადი. მას ხანდახან უჩნდებოდა სურვილი, მეტად მკაცრად მოქცეოდა მთხოვნელებს, მაგრამ მათთვის ზიანის მიუყენებლად, რათა ამით გამოეცადა როგორი მოსაზრებულობით, სულის სიმტკიცით იყო დაჯილდოვებული ყოველი მათგანი.

მათ სიმამაცეში, რომელსაც საერთო არაფერი ჰქონდა თავხედობასთან, იგი დიდ სიამოვნებას პოულობდა, ვინაიდან ეს თვისება მისთვის ნაცნობი იყო და ასეთ ადამიანს საქმეში გამოსადეგად თვლიდა. მისი საუბარი დახვეწილი და გულშიჩამწვდომი იყო. სამართლის შესანიშნავი მცოდნე, დაჯილდოებული იყო ენამახვილობით, იშვიათი მეხსიერებით. ეს შესანიშნავი ბუნებრივი თვისებები მან სწავლით და ვარჯიშით განივითარა. მეფე სავსებით ენდობოდა მის რჩევებს (ჩემი იქ ყოფნისას), ისე ჩანდა, თითქოს სახელმწიფოც კი ეყრდნობოდა მათ. სიყრმიდანვე, პირდაპირ სკოლის მერხიდან მოხვდა სამეფო კარზე, მთელი ცხოვრება მნიშვნელოვანი საქმეების გარემოცვასა და ბედის ტრიალში გაატარა. მრავალჭირნახულმა დიდი შიშის ფასად შეიძინა ესოდენი სახელმწიფოებრივი გამოცდილება (რომელიც არცთუ ისე მალე იკარგება, როცა ასეთი გზითაა დაგროვილი).

როცა ერთ დღეს, ბედნიერი შემთხვევის წყალობით, მის სუფრაზე მოვხვდი, აქვე შევხვდი ერთ ერისკაცს, თქვენი კანონების მცოდნეს. არ მახსოვს, რა საბაბით მონახა მან ხელსაყრელი შემთხვევა იმ მკაცრი მართლმსაჯულების ქებისათვის, რომელსაც მაშინ ქურდების მიმართ იყენებდნენ. თურმე ქურდებს, როგორც იგი ჰყვებოდა, ზოგჯერ ოც-ოცად ჰკიდებდნენ ერთ სახრჩობელაზე. მისი სიტყვებით, მით უფრო გასაკვირი იყო ის, რომ თუ უმნიშვნელო უმცირესობა ხანდახან დაუძვრებოდა სასჯელს, რაღაც ბოროტი ძალის გავლენით, ბევრი მაინც განაგრძობდა ავაზაკობას. მაშინ გავბედე და თავისუფლად დავიწყე ლაპარაკი კარდინალის თანდასწრებით: „აქ არაფერია გასაკვირი. ქურდების ამგვარი დასჯა სცილდება სამართლიანობას და არც სახელმწიფოს მოუტანს რაიმე კარგს. იგი მეტად შემადრწუნებელია ქურდობისათვის, სასჯელად მაინც უსუსურია მის აღმოსაფხვრელად. მართლაც, უბრალო ქურდობა არცთუ ისე დიდი დანაშაულია, რომ ქურდს თავი მოჰკვეთონ, ხოლო, მეორე მხრივ, არც ერთი სასჯელი არ არის იმდენად ძლიერი რომ ძარცვა-გლეჯვას გადააჩვიოს ისინი, ვისაც სარჩოს შოვნის არავითარი სხვა საშუალება არ გააჩნია. ამ მხრივ თქვენ, ისევე როგორც ადამიანთა უმრავლესობა მთელ ქვეყნიერებაზე, ალბათ ცუდ მოძღვართ ჰბამავთ, რომლებიც უფრო დიდი სიამოვნებით წკეპლავენ თავიანთ მოსწავლეებს, ვიდრე ასწავლიან. მართლაც, ქურდს მძიმე და მკაცრ სასჯელს ადებენ, მაშინ როდესაც უკეთესი იქნებოდა ეზრუნათ მათთვის ცხოვრების სახსრების აღმოსაჩენად, რათა არავინ იყოს განწირული ისეთი მკაცრი აუცილებლობისათვის, ჯერ მოიპაროს და შემდეგ დაიღუპოს“. ამაზე სამართლის მცოდნემ მიპასუხა: „ამ მხრივ საკმაოდ არის მიღებული ზომები; არსებობს ხელობები, არსებობს მიწათმოქმედება; მათი საშუალებით შეიძლება თავის გატანა, თუკი ადამიანები თვითონ არ მოისურვებენ ცუდ გზაზე დადგომას“. მე ვუპასუხე: „არა, ასე ადვილად

ვერ მოგეშვებით. თავი დავანებოთ პირველ რიგში იმათ, ვინც სხვა ქვეყნებთან ლაშქრობიდან ან სამოქალაქო ომიდან სახლში ხშირად ხეიბრად ბრუნდება, როგორც ეს თქვენთან ახლახან მოხდა კორნუელთან და ცოტა უფრო ადრე[33] - გალიასთან ბრძოლის შემდეგ. სახელმწიფოსა და მეფისათვის ომში დასახიჩრების შემდეგ მათ აღარ ძალუძთ ძველ საქმიანობას დაუბრუნდნენ, ხოლო ასაკი ახლის შესწავლის საშუალებას აღარ იძლევა, მაგრამ თავი დავანებოთ ამას, რადგან ომები მაინც დროის გარკვეულ მონაკვეთში ხდება ხოლმე. მოდი განვსაჯოთ ის, რაც ყოველდღიურია. ჯერ ერთი, არსებობს წარჩინებულთა უმრავლესობა. ისინი მამალი ფუტკრებივით უქმად, სხვისი შრომით ცხოვრობენ სახელდობრ, თავიანთი მამულების იჯარადართა ხარჯზე, რომლებსაც შემოსავლის გადიდების მიზნით ტყავს აძრობენ. აქ ასეთ სასტიკ სიძუნწეს იჩენენ ეს ადამიანები, ისე კი გალატაკებამდე ხელგაშლილები არიან. ეს კიდევ არაფერი, ისინი გარშემო იკრებენ პირად მცველთა უზარმაზარ ბრბოს[34], რომელსაც არასდროს არსად არ უსწავლიათ სარჩოს მოპოვების არანაირი ხერხი. მაგრამ საკმარისია ბატონი მოკვდეს ან ეს მსახურები დასნეულდნენ, მათ მაშინვე გარეთ ისვრიან; ბატონები უსაქმურებს უფრო დიდი სიამოვნებით ინახავენ, ვიდრე ავადმყოფებს. ხშირად გარდაცვლილის მემკვიდრეს არ ძალუძს მამისეული ჯალაბის რჩენა. და, აი, ისინი განწირულნი არიან შიმშილისთვის, თუ ყაჩაღობაზე არ გადავიდნენ. მართლაცდა, რაღა დარჩენიათ მათ? როცა ისინი უქმად ხეტიალში რამდენიმე ხელ ტანსაცმელს გაცვეთენ და ზედ თავის ჯანმრთელობასაც მიაყოლებენ, მაშინ დასნეულებულთა და დამონძილთა მიღებას კეთილშობილნი არ მოისურვებენ, გლეხები კი ვერ გაბედავენ. ამ უკანასკნელმა კარგად უწყიან ისინიც, ვინც აზიზად არიან გაზრდილნი უსაქმურობასა და ფუფუნებაში, მიჩვეულნი არიან დაშნას ცალ გვერდზე და ფარს მეორე ხელში, ამაყად უმზერენ მეზობლებს და საკუთარ თავთან შედარებით სხვები ჩირადაც არ უღირთ. ასეთი ადამიანი სულაც არ არის იმისთვის მზად, რომ წერაქვითა და სახნისით ხელში მცირე გასამრჯელოსა და მწირი საქმიანობისათვის ემსახუროს ღარიბებს“. ამაზე სამართლის მცოდნემ მოგვიგო: „ჩვენ განსაკუთრებით უნდა შევუწყოთ ხელი ამგვარ ხალხს, მათში ხომ, როგორც უფრო ამაღლებული და კეთილშობილი განწყობილების ხალხში, უფრო მეტად, ვიდრე მიწის მუშებსა და ხელოსნებში (იმ შემთხვევაში, თუ საქმე ომამდე მივა), თავმოყრილია ლაშქრის მთავარი ძალა და სიმტკიცე!“.

„რასაკვირველია, - ვუპასუხე მე, - მაშინ ასევე შეგიძლიათ თქვათ, რომ ომის მხარდასაჭერად საჭიროა ქურდების ხელისშეწყობაც, რასაც ვერასოდეს დააღწევთ თავს, სანამ ეს ხალხი გეყოლებათ, რატომ ავაზაკებს არ შეუძლიათ გახდნენ ჯარისკაცები, ხოლო ჯარისკაცებს ავაზაკები, იმდენად ბევრი რამ აქვს საერთო ამ ორ საქმიანობას? თქვენში ქურდობის გავრცელების მიუხედავად, ეს მანკიერება არ წარმოადგენს თქვენს განმასხვავებელ თავისებურებას: იგი საერთოა თითქმის ყველა ხალხისათვის. რაც შეეხება გალიას[35], მას აღატაკებს კიდევ ერთი ჭირი: მთელი ქვეყანა მშვიდობიანობის დროსაც კი (თუკი ამას მშვიდობიანობა ჰქვია) სავსეა და გარშემორტყმულია დაქირავებული ჯარისკაცებით, რომლებიც მოწვეულნი არიან იმავე რწმენის ძალით, რომლის გავლენითაც თქვენ საჭიროდ ჩათვალეთ აქ, ამ უსაქმო მსახურების დაქირავება. მართლაცდა, ამ ჭკვიანი უგუნურების აზრით, სახელმწიფოს კეთილდღეობა მდგომარეობს იმაში, რომ ყოველთვის მზად ჰყავდეს ძლიერი და მტკიცე თავდაცვა, რომელიც ძირითადად ვეტერანებისაგან შედგება. ეს ვაი-მოღვაწენი არ ენდობიან ახალწვეულებს. ამიტომ მათ უხდებათ, ომის საბაბის ძებნა, თუნდაც იმისთვის, რომ ჯარისკაცებს გამოცდილება შესძინონ, ანდა საერთოდ

ჰყავდეთ ხალხი ხოცვა-ჟლეტვისთვის მზად. სხვაგვარად (სალუსტიუსის[36] გონებამახვილური ნათქვამისა არ იყოს) მათი გონება და სული უმოქმედობისაგან გახევდება.

გალიამ საკუთარ უბედურებაზე გამოსცადა, თუ რამდენად დამღუპველია ასეთი ურჩხულების შენახვა. ამასვე ამტკიცებენ რომაელთა კართაგენელთა, სირიელთა და საერთოდ სხვა მრავალი ხალხის მაგალითები. ამ ხალხთა მუდმივმა ჯარებმა სხვადასხვა მიზეზით გაანადგურეს არა მარტო მათი უმაღლესი ხელისუფლება, არამედ შთანთქეს დიდი სივრცეები და თვით ქალაქებიც. თუ რამდენად არ არის ეს აუცილებელი, კარგად ჩანს შემდეგი მაგალითიდან: თვით გალიელი ჯარისკაცებიც კი, ბრძოლებში ბავშვობიდან გამობრძმედილნი, თქვენს ახალწვეულებთან შეტაკებისას ხშირად ვერ დაიკვებნიან გამარჯვებას. თუმცა მე აღარ გავაგრძელებ ამაზე საუბარს თქვენი თანდასწრებით, რათა მლიქვნელობაში არ ჩამომართვათ. მაგრამ არა მგონია თქვენთანაც არისტოკრატთა უქმი მცველები მაინცდამაინც დიდი შიშის ზარს სცემდნენ ქალაქის ხელოსნებს ანდა უბრალო და მოუქნელ მიწათმოქმედთ, გარდა ზოგიერთისა, ვინც თავისი აგებულებით, განსაკუთრებული ფიზიკური ძალითა და სიჩაუქით არ გამოირჩევა, ანდა ვისი სიმხნევეც სიღარიბეს გაუტეხია. ამიტომ არავითარი საფუძველი არა გვაქვს გვეშინოდეს, რომ ეს ფიზიკურად ძლიერი ადამიანები (არისტოკრატის წამხდარ ყურადღებას ხომ მხოლოდ რჩეულნი იმსახურებენ), რომლებიც ახლა უსაქმურობით ანდა თითქმის დიაცის შესაფერისი საქმიანობით მისუსტებულან, ვერ დადგებიან ვაჟკაცები, თუკი სასარგებლო ხელობას ისწავლიან ან კაცურ საქმეში ჩაებმებიან. ყოველ შემთხვევაში სულაც არ მიმაჩნია სახელმწიფოებისათვის სასარგებლოდ ამგვარ ადამიანთა ურიცხვი ბრბოს შენახვა მხოლოდ იმ ომის მოლოდინში, რომელიც არასოდეს გექნებათ თქვენ ნება-სურვილის გარეშე, ისინი ზიანს აყენებენ მშვიდობას, რომლისთვისაც, ვფიქრობ, გაცილებით მეტი ზრუნვაა საჭირო, ვიდრე ომისთვის. მაგრამ ეს მაინც არ არის ქურდობის ერთადერთი მიზეზი. არის მეორე მიზეზი, რომელიც, როგორც ვფიქრობ, უფრო მეტადაა დამახასიათებელი თქვენთვის“.

რომელი? - იკითხა კარდინალმა. „თქვენი ცხვრები, - ვუპასუხე მე, - ჩვეულებრივ ასეთი უწყინარი და მცირედიტაც კმაყოფილნი, ახლა (როგორც ამბობენ) კი ისეთი გაუმაძღარნი და დაუოკებელნი გამხდარან, რომ ადამიანებსაც ჭამენ, ანადგურებენ და მუსრს ავლებენ მინდვრებს, ხალხს, ქალაქებს. სახელდობრ, სამეფოს იმ ნაწილში სადაც უფრო ნაზ და ამიტომ ძვირფას მატყლს ამუშავებენ, წარჩინებული არისტოკრატები და თვით ზოგიერთი აბატიც კი, წმინდა მამა, არ სჯერდებიან იმ ყოველწლიურ შემოსავალს და ნამატს, რომელიც ჩვეულებრივ იზრდებოდა მათი წინაპრების მამულების შემოსავლის ხარჯზე. არ კმაყოფილდებიან იმით, რომ მათ უსაქმო და ფუფუნებაში ცხოვრებას არათუ არავითარი სარგებლობა აღარ მოაქვს საზოგადოებისათვის, კიდევაც ზიანს აყენებს მას. ამიტომ თავიანთ მამულებში ისინი აღარაფერს ტოვებენ სახნავად - ყველაფერს საძოვრებად აქცევენ, სპობენ სახლებს, ანგრევენ ქალაქებს, ტაძრებს კი მხოლოდ ცხვრების სადგომად ტოვებენ. ეს „უწყინარი“ ადამიანები ყოველგვარ დასახლებას და დამუშავებული მიწის თითოეულ გოჯს უდაბნოდ აქცევენ, თითქოს უამისოდ თქვენთან ცოტა მიწა იკარგებოდეს ნადირთა სადგომებისა და სამხეცეთათვის. ამრიგად, მას შემდეგ[37], რაც მხოლოდ ერთი ღორმუცელა, ქვეყნის გაუმაძღარი და სასტიკი წყლული ანადგურებს მინდვრების საზღვრებს, ერთიანი ღობით ფარგლავს რამდენიმე ათას აკრს, იგი ქუჩაში ყრის ზოგიერთ იჯარადარს, მოტყუებით ან ძალადობით ართმევს

მას საკუთარ ქონებასაც კი, ანდა შეურაცხყოფილს აიძულებს გაყიდოს იგი. ყველა შემთხვევაში ხდება გაუბედურებული უსახლკაროების - კაცების, ქალების, ქმრების, ცოლების, ობლების, ქვრივების, მცირეწლოვან შვილებიანი მშობლების გადასახლება თავისი მრავალრიცხოვანი ჯალაბით - ხვნა-თესვა ხომ დიდძალ მუშახელს მოითხოვდა. ისინი, ვიმეორებ, იძულებულნი არიან აიყარონ ნაცნობი და შეჩვეული ადგილებიდან და გადაიხვეწონ უცხო მხარეში. მთელ თავიანთ ღარიბულ ავლადიდებას მაშინაც კი, მყიდველი რომც იყოს და შეიძლებოდეს, ისინი ჩალის ფასად ყიდიან, რადგან იძულებულნი არიან მოიცილონ იგი და როცა ხეტიალში უცებ ესეც დაეხარჯებათ, სხვა რაღა რჩებათ, თუ არა ქურდობა და დამსახურებულად სახრჩობელაზე მოხვედრა, ანდა წაწალი და მათხოვრობა? თუმცა ამ შემთხვევაშიც, როცა მაწანწალები ციხეში ხვდებიან უქმად ხეტიალისათვის, მათ მარჯვენას არავინ ქირაობს, მიუხედავად იმისა, რომ ისინი თავგამოდებით სთავაზობენ თავიანთ თავს ყველას. სოფლის სამუშაოებს კი, რომელსაც ისინი ბავშვობიდანვე არიან შეჩვეულნი, რა უნდა იქ, სადაც არაფერს თესავენ. საკმარისია მხოლოდ ერთი ნაგაზის ან მეცხვარეს გამოჩენა, რომ ის მიწა, რომლის დასათესად და სათანადოდ დასამუშავებლად ამდენი მუშახელი იყო საჭირო, სამოვრად გადაიქცეს. ამის გამო ბევრგან უსაშველოდ გაიზარდა აგრეთვე პურის ფასი. გარდა ამისა, თვით მატყლის ფასმაც მოიმატა, რომ მისი შესყიდვა სრულიად შეუძლებელი გახდა იმ ღარიბი ხალხისათვის, ვინც მისგან ტანსაცმლის დამზადებას მისდევდა. ამიტომ მათი უმრავლესობაც ამ საქმეს თავს ანებებს და უსაქმურების რიცხვს ემატება. საქმე ისაა, რომ სამოვრების გაზრდის შემდეგ ცხვრის რაოდენობა ძალიანაც რომ გაიზარდოს, მატყლის ფასი მაინც არ დაეცემა, ვინაიდან თუკი მის გაყიდვას არ შეიძლება მონოპოლია ეწოდოს, რადგან მას მხოლოდ ერთი პიროვნება არ მისდევს, მაშინ ყოველ შემთხვევაში, ოლიგოპოლია[38] მაინცაა. ეს საქმე ხომ მცირერიცხოვან და, ამასთან მდიდარ ადამიანთა ხელში მოხვდა, რომლებსაც არავითარი აუცილებლობა არ აიძულებს გაყიდონ ცხვარი უფრო ადრე ვიდრე ეს მათთვის ხელსაყრელი არ იქნება. მათ კი ეს არ მოესურვებათ ვიდრე მათთვის ხელსაყრელი იქნება. მათ კი ეს არ მოესურვებათ, ვიდრე მათთვის ხელსაყრელი დრო არ დადგება. იგივე მიზეზი იწვევს საქონლის სხვა ჯიშების ერთნაირ სიძვირესაც, და თანაც მით უფრო, რომ მამულთა რღვევისა და ხვნა თესვის შეზღუდვასთან ერთად აღარ რჩება არავინ, ვინც საქონლის მომატებაზე იზრუნებდა. მდიდრები არც ბატკნებს ზრდიან და არც ხბოებს, ისინი ყიდულობენ მათ სხვაგან იაფად, ასუქებენ თავიანთ სამოვრებზე და შემდეგ ძვირად ყიდიან. მე ვფიქრობ, ამგვარი მდგომარეობის მთელი სიმძიმე სათანადოდ ჯერ კიდევ არ იგრძნობა, ვინაიდან ეს პირები საქონლის სიძვირეს მხოლოდ იქ ქმნიან სადაც ყიდიან მას, მაგრამ როდესაც გაიტანენ შესყიდვის ადგილიდან უფრო სწრაფად, ვიდრე ის გამრავლებას შეძლებს, მაშინ მისი მარაგი იქაც თანდათანობით შემცირდება და ძალაუნებურად მისი ნაკლებობა მეტად საგრძნობი გახდება.

ამრიგად, ერთი მუჭა ადამიანების გაუმადლობამ თქვენი კუნძულის დამლუპველად აქცია სწორედ ის, რის გამოც იგი განსაკუთრებით ბედნიერი ჩანდა. პურის ეს სიძვირე იმის მიზეზი გახდა, რომ ყველა გარეთ აგდებს რაც შეიძლება მეტ ადამიანს, მაგრამ საკითხავია, განა ეს სილატაკისკენ ან, რაზედაც უფრო ადვილად თანხმდებიან კეთილშობილი პირები, ძარცვა-გლეჯისკენ არ უბიძგებს მათ?

ამასთანავე ამ საცოდავ სილატაკესა და სიბეჩავეს ემატება უსაზღვრო ფუფუნება. დიდკაცების მსახურებსაც, ხელოსნებსაც, და თვით გლეხებსაც კი, ერთი სიტყვით

ყველა წოდების ხალხს ტანსაცმელსა და ჭამა-სმაში ზედმეტი ფუფუნება ეტყობა. განა პირდაპირ მარცვა-გლეჯისაკენ არ უბიძგებენ თავიანთ თაყვანისმცემლებს მათი საფულეების წინასწარ და სწრაფად დაცარიელების შემდეგ ეს სამიკიტნოები, სარდაფები, მემავთა სახლები და ისევ სამემავოები ღვინისა და ლუდის ჯიხურების სახით? და ბოლოს ამდენი უწესო თამაში-ზარი, ბანქო, დისკო და სხვა?

მოიცლიეთ ეს დამღუპველი წყლულები, დააწესეთ, რომ ფერმერებისა და სოფლების გამანადგურებლებმა ან ალაღვინონ ისინი, ანდა დააცადონ მათ, ვისაც სურს აღდგენა და აშენება. შეუზღუდეთ მდიდრებს შესყიდვის უფლება, აუკრძალეთ თვითნებობა, რომელიც მონოპოლიაში გადადის. ნაკლები მუქთახორა არჩინეთ. ალაღვინეთ მიწათმოქმედება, განაახლეთ მატყლის დამუშავება, დაე, ის საპატიო საქმედ იქცეს! დაე, სარგებლობა მოჰქონდეს მას უსაქმური ბრბოსათვის, იმათთვის, ვინც აქამდე სიღარიბემ ქურდებდად აქცია, ან იმათთვის, ვინც ახლა მაწანწალაა და უსაქმური მსახური-ორივე ხომ მომავალი ქურდია. თუ თქვენ ვერ უმკურნალებთ ამ სატკივარს მაშინ ტყუილ უბრალოდ დაიტრახხებით ქურდობის დასჯაში გამოცდილი თქვენი მართლმსაჯულებით, რომელიც უფრო გარეგნულად არის შთამბეჭდავი, ვიდრე სამართლიანი და სასარგებლო. თუ რომელიმე თქვენგანი ადამიანებს აძლევს შესანიშნავ აღზრდას, თანდათანობით სიყრმიდანვე აფუჭებს მათ ზნეობას, ხოლო სასჯელის ღირსად მათ თვლით მხოლოდ მაშინ როდესაც ისინი მოწიფულ ასაკში, სამარცხვინო საქმეებს სჩადიან, მაგრამ ეს ხომ მათგან თავიდანვე იყო მოსალოდნელი. ასეთი ქცევით თქვენ ხომ ქურდებს კიდევაც ქმნით და იმავე დროს კიდევ სჯით?“

ამ ჩემი სიტყვის პასუხად ზემოთხსენებული სამართლის მცოდნე გულმოდგინედ მოემზადა და გადაწყვიტა მიემართა მსჯელობის იმ ჩვეულებრივი ხერხისათვის, როცა უფრო დიდი გულმოდგინებით იმეორებენ მოწინააღმდეგის მტკიცებას, ვიდრე პასუხს სცემენ მათ; ასეთ მოპასუხეთა დამსახურების საწინდარი, პირველ რიგში მათი კარგი მახსოვრობაა. „შენ, რა თქმა უნდა ლამაზად ილაპარაკე, - თქვა მან, - მაგრამ ადვილია იმის მიხვედრა, რომ შენ უცხოელი ხარ, რომელსაც უფრო ადვილად შეეძლო რაიმე ყურმოკრულად სცოდნოდა ამ საქმეების შესახებ, ვიდრე მათზე რაიმე ზუსტი ცნობა ჰქონოდა, ამას სულ ადვილად დაგიმტკიცებ. პირველ რიგში თანმიმდევრობით ჩამოვთვლი ყველა შენს მოსაზრებას, შემდეგ კი გიჩვენებ, რომელ პუნქტში შეცდი ჩვენი საქმეების არცოდნის გამო და, ბოლოს, გავანადგურებ შენს ყველა დებულებას. დაპირებისამებრ, დავიწყებ პირველიდან: შენ, როგორც მომეჩვენა, ოთხ პუნქტში.“ „გაჩუმდი, - შეაწყვეტინა კარდინალმა, - რადგან შენ ასე იწყებ, ჩანს, მოკლედ არ აპირებ პასუხის გაცემას. ამიტომ ჩვენ გაგათავისუფლებთ ამჟამად ამ მძიმე პასუხისაგან, მაგრამ ამ ამოცანას გადასაწყვეტად მთლიანად გიტოვებთ ჩვენი მორიგი შეხვედრისათვის. მე ვისურვებდი ამ შეხვედრას ხვალვე, თუკი არაფერი შეგიშლით ხელს არც შენ და არც რაფაელს. ამასთანავე, ჩემო რაფაელ, მე დიდი სიამოვნებით მოვისმენდი შენგან რატომ არ მიგაჩნია საჭიროდ ქურდობის დასჯა სასჯელის უმაღლესი ზომით და რას დააწესებდი მის მაგივრად. ხომ არ მიგაჩნია ქურდობა მოსათმენად? და თუკი ახლა ადამიანები სიკვდილის დასჯის მიუხედავადაც ქურდობენ, ამ საშიშროების მოსპობის შემთხვევაში რა ძალა დააკავებთ ბოროტმოქმედთ? სასჯელის შემსუბუქებას ისინი ალბად ისე შეხედავენ როგორც ხელშეწყობასა და ბოროტმოქმედებისაკენ მიპატიჟებას“.

„ყოველ შემთხვევაში, მოწყალეო მეუფეო, - ვუპასუხე მე - ჩემი აზრით, სრულიად უსამართლოა ფულის წართმევისათვის ადამიანს სიცოცხლე წაართვა. მიმაჩნია, რომ ერთი ადამიანის სიცოცხლეს არ შეიძლება შეედაროს მთელი ქვეყნიერების სიმდიდრეს, ხოლო თუკი მეტყვიან რომ ეს სასჯელი არის შურისძიება არა ფულისთვის არამედ სამართლიანობის შებღალვისათვის, კანონების დარღვევისათვის, მაშინ რატომ არ შეიძლება ამ უმაღლეს სამართალს უმაღლესი უსამართლობა უწოდოთ. მართლაც როგორ შეიძლება მოვიწონოთ მანლიუსის კანონები[39], რომლებიც მოგვიწოდებენ მახვილის აღმართვას წესრიგის უმნიშვნელო დარღვევისათვისაც კი, და გასაკიცხია სტოელთა[40] ის დებულებანიც, რომლებიც ყოველგვარ შეცოდებას იმდენად ერთნაირად თვლიან, რომ, მათი აზრით, არავითარი განსხვავება არ არის ადამიანის მოკვლასა და მისთვის გროშის მოპარვას შორის. სინამდვილეში კი ეს ორი დანაშაული თუ ოდნავ მაინც მიუკერძოებლად განვიხილავთ არაფრით არ ჰგავს ერთმანეთს. ღმერთი ხომ სასტიკად კრძალავს ადამიანის მოკვლას, ვინც არ უნდა იყოს იგი, ჩვენ კი ასე ადვილად ვუსწრაფებთ სიცოცხლეს მას უმნიშვნელო ფულადი თანხის წართმევისათვის. ხოლო თუ ვინმე მოინდომებდა ამის ახსნას ისე, თითქოს ღვთის ეს შეგონება კრძალავს მკვლელობას ყველა შემთხვევაში, გარდა ისეთისა როდესაც იგი დაშვებულია ადამიანური კანონებით, მაშინ რაღა უშლით ხელს ადამიანებს ზუსტად ასევე შეუთანხმდნენ ერთმანეთს გარყვნილების, აღვირახსნილობისა და ფიცის დარღვევის შესახებ? ღმერთმა წაგვართვა არა მარტო სხვისი მოკვლის უფლება არამედ საკუთარი თავისაც კი. მაშ განა ადამიანთა მიერ მიღებულ შეთანხმებას ერთმანეთის მოკვლის შესახებ რომელიც გარკვეულ სამართლებრივ პირობებში მიიღეს, ისეთი ძალა აქვს რომ მის შემსრულებლებს ათავისუფლებს ღვთის ამ შეგონებისაგან? ისინი ხომ ღმერთის ყოველგვარი მითითების გარეშე კლავენ მას, ვისაც განაჩენი ადამიანთა მსჯავრმა გამოუტანა? ხომ არ იქნება ღვთის ეს შეგონება უფლებამოსილი მხოლოდ იმდენად რამდენადაც ამას ადამიანური სამართალი დაუშვებს? ეს თუ ასეა, ადამიანებს ამგვარადვე შეუძლიათ საერთო დადგენილების მიღება იმაზე თუ რამდენადაა საჭირო ღვთის სხვა მცნებათა შესრულება. დასასრულ, მოსეს კანონიც, მთელი მისი უმოწყალობისა და სიმკაცრის მიუხედავად (ის ხომ მონათა და თანაც ჯიუტ მონათა წინააღმდეგ იყო გამოცემული), ქურდობისათვის მაინც ფულადი გადასახდელით სჯიდა ადამიანს და არა სიკვდილით. არ უნდა ვიფიქროთ, რომ მოწყალების ახალ კანონში, რომელშიც ღმერთი ისე გვარიგებს, როგორც მშობელი შვილებს, იგი მეტ თავისუფლებას გვაძლევს ერთმანეთის წინააღმდეგ გასალაშქრებლად.

ამიტომ მიმაჩნია, რომ სიკვდილით დასჯა დაუშვებელია, ხოლო თუ რამდენად უაზროა და დამლუპველიც სახელმწიფოსათვის ქურდისა და მკვლელის ერთნაირად დასჯა, ეს, მგონი ყველასათვის გასაგებია. რაკი მძარცველმა იცის რომ მარტო ქურდობისათვის მას იგივე სასჯელი ელის, რაც მკვლელობისათვის ესეც უბიძგებს მას იმის მოკვლისკენ ვისაც მხოლოდ გამარცვავდა სხვა გარემოებაში. მართლაც დაჭერის შემთხვევაში საფრთხე მისთვის სრულიადაც არ იზრდება, ხოლო მკვლელობის შემთხვევაში მცირდება კიდევ, ვინაიდან დანაშაულის მოწმის მოსპობის მერე დამალვა უფრო ადვილია. ამიტომ ქურდებს მეტისმეტი დაშინების სურვილით კარგი ადამიანების მოსპობისაკენ უფრო უბიძგებთ.

რაც შეეხება ჩვეულებრივ შემდეგ კითხვას თუ როგორი სასჯელია უფრო შესაფერისი იმაზე პასუხის გაცემა ჩემი აზრით გაცილებით ადვილია, ვიდრე იმაზე, თუ როგორი

სასჯელი შეიძლება იყოს უფრო სასტიკი, რატომ უნდა დაგვაეჭვოს ჩვენ დანაშაულისათვის მიგებული, იმ სასჯელის საკმარისობამ რომელსაც როგორც ვიცით, ასე დიდი ხანია მიმართავდნენ რომაელები. სახელმწიფოს მართვის ამოდენა გამოცდილება რომ ჰქონდათ, დიდ ბოროტმოქმედებს ქვის სამტეხლოებსა და საბადოებში გზავნიდნენ, თანაც სამუდამო ბორკილებს ადებდნენ.

თუმცა ესეც უნდა ითქვას, რომ, ამ მხრივ, არსად არ შევხვედრივარ უკეთეს წესებს, ვიდრე ეს სპარსეთში[41] მოგზაურობისას ვნახე. აქ ცხოვრობს ერთი, არც თუ ისე პატარა, სავსებით მოწესრიგებული ხალხი - პოლილერიტები[42]. იმ ხარკის გარდა რომელსაც ყოველწლიურად უხდის სპარსეთის მეფეს ეს ხალხი თავისუფალია და მხოლოდ საკუთარ კანონებს ემორჩილება. პოლილერიტები ზღვისაგან მოშორებით ცხოვრობენ, თითქმის ყოველმხრივი მთებით გარშემორტყმულ ადგილზე. ისინი სჯერდებიან თავიანთი ქვეყნის მოსავალს, რომელიც არც ისე მწირია, თვითონაც იშვიათად დადიან სხვაგან და არც სტუმრები ჰყავთ ხშირად; უძველესი ეროვნული ჩვეულებისამებრ ისინი არ ცდილობენ თავიანთი საზღვრების გაფართოებას, დაცვით კი კარგად იცავენ მთებისა და იმ გადასახადის წყალობით, რომელსაც თავიანთ მბრძანებელს უხდიან. თვითონ სრულიად თავისუფალნი არიან სამხედრო სამსახურისაგან. მართალია, პოლილერიტები ფუფუნებაში ვერ ცხოვრობენ, მაგრამ ბედნიერად კი გრძნობენ თავს. იმდენად წყნარად და უშფოთველად მიდის მათი ცხოვრება, რომ მათი არსებობა მხოლოდ ახლო მეზობლებმა თუ იციან.

პოლილერიტები თავიანთ ქვეყანაში ნაქურდალს პატრონს უბრუნებენ და არა მეფეს როგორც ეს ჩვეულებრივ ხდება სხვაგან. მათი აზრით, მეფეს იმდენივე უფლება აქვს ნაქურდალ ნივთზე, რამდენიც ქურდს. თუ ნაქურდალი დაიკარგება შეფასების შემდეგ მის ღირებულებას ქურდების ქონებიდან გამოქვითავენ, დანარჩენს კი მთლიანად უტოვებენ მათ ცოლ-შვილს. თვით ქურდებს საზოგადოებრივად სასარგებლო შრომა ეკისრებათ. თუ ქურდობა არ არის დამძიმებული სხვა დანაშაულით, მაშინ მძარცველებს არ სვამენ ციხეში, არც ბორკილებს ადებენ, ისინი თავისუფლად მუშაობენ, მაგრამ თუ დამნაშავენი თავს არიდებენ შრომას ან მათ უგულობას შეამჩნევენ მაშინ ცემით უფრო აიძულებენ საქმის გაკეთებას, ვიდრე ბორკილებით. იმას ვინც ბეჯითად იშრომებს არავინ არ შეურაცხყოფს. მათ ღამდამობით სათითაოდ ამოწმებენ და საკნებში შეჰყავთ. გარდა იმისა, რომ მუდმივი შრომა აქვთ მისჯილი მათი ცხოვრება სხვა მხრივ არ არის აუტანელი. ისინი ცუდად არ იკვებებიან: სახელმწიფოს სასარგებლოდ ვინც შრომობს სახელმწიფოს ხარჯზეა, სხვა შემთხვევებში კი სხვადასხვაგვარად. ზოგჯერ მათი ხარჯებისათვის ფული შემოწირულობათა სახით იკრიბება. მართალია ეს გზა არც თუ ისე საიმედოა, მაგრამ, ამ ხალხისათვის დამახასიათებელი გულმოწყალობის გამო, იგი სხვაზე უკეთეს შედეგს იძლევა. სხვაგან ამ დანიშნულებისათვის გამოყოფენ გარკვეულ საზოგადოებრივ შემოსავალს, ზოგან კი საყოველთაო გადასახადს აწესებენ. არის ისეთი ადგილებიც, სადაც დამნაშავენი არავითარ საზოგადოებრივ შრომას არ ასრულებენ, მაგრამ თუ ამა თუ იმ კერძო პირს ესაჭიროება დაქირავებული მუშები იგი ქირაობს ბაზარზე ნებისმიერ მათგანს გარკვეული საფასურით და შედარებით იაფად, ვიდრე თავისუფალ ადამიანს. გარდა ამისა მონა (ასე უწოდებენ დამნაშავეს) სიზარმაცისათვის მათრახითაც შეიძლება დაისაჯოს.

საბოლოოდ ქურდები არასოდეს არ არიან თავისუფალნი შრომისაგან და, საკუთარი თავის შესანახად მიღებული გასამრჯელოს გარდა, მათ შეაქვთ კიდევ გარკვეული თანხა სახელმწიფოს სალაროში. მონებს ერთი რომელიმე ფერი ტანსაცმელი აცვიათ, თმას მათ არ პარსავენ, მხოლოდ კრეჭენ ყურებზე ცოტა ზემოთ, ერთ-ერთ ყურს კი ოდნავ უმოკლებენ. მეგობრებს შეუძლიათ ყოველ მათგანს მიაწოდონ საკვები, სასმელი და შესაფერისი ტანსაცმელი, მაგრამ ფულის მიცემა მათთვის სისხლის სამართლის დანაშაულად ითვლება, როგორც იმისათვის ვინ მისცემს, ისე იმისათვის ვისაც აძლევენ. თავისუფალი ადამიანისათვის არანაკლებ სახიფათოა ფულის მიღება დამნაშავისაგან. გარდა ამისა მონებს ეკრძალებათ იარაღის ტარება. თითოეული ოლქი თავის მონებს განსაკუთრებული ნიშნით განასხვავებს, მისი უგულებელყოფა სისხლის სამართლის დანაშაულად ითვლება, ისევე როგორც საკუთარ საზღვრებს იქით გამოჩენა და სხვა ოლქის მონასთან საუბარი. გაქცევაზე ფიქრიც კი ისევე სახიფათოა, როგორც თვით გაქცევა. ამგვარ გადაწყვეტილებაში თანამონაწილეობისათვის მონას მიესჯება სიკვდილი, თავისუფალს-მონობა, მაცნეს კი - ჯილდო, ამასთანავე, თავისუფალს - ფული, მონას - თავისუფლება, თანაც ორივეს - შეწყალება და არავითარი სასჯელი თანამონაწილეობისათვის; ამრიგად, ავი განზრახვის შესრულებისა და თუნდაც გაფიქრებისათვის საფრთხე ერთნაირია. კანონები და წესები ქურდებისათვის კი ისეთია, როგორც ზემოთ აღვნიშნე. ადვილი შესამჩნევია, რამდენად ჰუმანური და მისაღებია ისინი. განრისხება აქ მკლავდება იმდენად, რამდენადაც საჭიროა მანკირებათა აღმოსაფხვრელად; თვითონ ადამიანები კი უვნებლად რჩებიან და ირგვლივ ისეთი პირობებია შექმნილი, რომ მათთვის აუცილებელი ხდება გამოსწორება და დარჩენილი სიცოცხლის მანძილზე იმ ბოროტების გამოსყიდვა, რომელიც სხვებს მიაყენეს. არც იმის არავითარი საშიშროება არის, რომ ისინი თავიანთ ძველ საქმეს დაუბრუნდებიან. უფრო მეტიც, აქ მგზავრები თავს უშიშრად მაშინ გრძნობენ როცა მათი გამყოლები სწორედ ეს მონები არიან; მონებს კი ისინი რამდენჯერმე იცვლიან სხვადასხვა ოლქში. მართლაც და, მარცვა-გლეჯისათვის მოენები ვერავითარ ხელშეწყობას ვერ ხედავენ: იარაღი არ აქვთ, ფულს მათთვის მხოლოდ უბედურება მოაქვს, დაჭერის შემთხვევაში კი სიკვდილი არ ასცდებათ, არც სადმე გაქცევის არავითარი იმედი აქვთ. ანდა როგორ შეიძლება შეუმჩნევლად და ფარულად გაიქცეს ადამიანი, რომლის ტანსაცმელი ამდენად გამოირჩევა სხვებისაგან. შიშველი ხომ არ გაიქცევა? მაგრამ ამ შემთხვევაშიც გაქცეულს მისი ყური გასცემს. დასასრულ, შეიძლება კიდევ შეიქმნას იმის საშიშროება რომ ისინი მოინდომებენ სახელმწიფოს წინააღმდეგ შეთქმულების მოწყობას, თითქოს და რომელიმე ცალკეულ ოლქს შეიძლება გაუჩნდეს ასეთი სურვილი წინასწარ სხვა ოლქების მონებთან შეუთანხმებლად და დაუკითხავად. მაგრამ არათუ შეთქმულება მოაწყონ, მათ მისაღმებაც და სასაუბროდ შეკრებაც აკრძალული აქვთ. აქვე უნდა ვაღიაროთ, რომ ისინი უშიშრად გაანდობენ თავიანთ ამხანაგებს მხოლოდ ისეთ გეგმას რომლის დაფარვაც, როგორც ცნობილია, სახიფათოა ხოლო გაცემა - ძალიან ხელსაყრელი. მეორე მხრივ არცერთ მონას არ დაუკარგავს იმის იმედი რომ თუ იგი მორჩილი და თავმდაბალია თავის შეცდომის გამოსწორებას ცდილობს, შეიძლება თავისუფლება დაუბრუნონ. სწორედ ასე აჯილდოებენ ყოველწლიურად რამდენიმეს. მათი მოთმინებისადმი პატივისცემის ნიშნად“, - ვთქვი და თან დავუმატე, რომ ვერ ვხედავ იმის საფუძველს, თუ რატომ არ შეიძლება ასეთმა მოქმედებამ გაცილებით მეტი ნაყოფი გამოიღოს ინგლისშიც, ვიდრე იმ სამართალმა, რომელსაც ასეთ ქება-დიდებას ასხამდა ხსენებული სჯულის მცოდნე. მაშინ ამ უკანასკნელმა შენიშნა: „არასოდეს არ შეიძლება მსგავსი რამის

შემოღება ინგლისში, რადგან ამით სახელმწიფოს უდიდესი საფრთხე დაემუქრება“, - თქვა და თავი გადაიქნია, ტუჩი აიბზუა და გაჩუმდა. ყველა იქ მყოფი მაშინვე დაეთანხმა მის სიტყვებს. მაშინ კარდინალმა თქვა: „ძნელია განჭვრეტა, მოჰყვება თუ არა ამას წარმატება, რადგან არავითარი წინასწარი ცდა არ ჩატარებულა. მაგრამ თუ სასიკვდილო განაჩენის გამოტანისას მეფე ბრძანებს სიკვდილით დასჯის გადადებას, მაშინ შესაძლებელია მათი ჩვეულების გამოყენება და თავშესაფრების უფლებების შეზღუდვა. და, აი, აქ, თუ კი საქმის შედეგი მის სარგებლობას დაამტკიცებს სწორი იქნებოდა ამ წესის შემოღება; წინააღმდეგ შემთხვევაში იმათი დამსახურებული სიკვდილით დასჯა, ვინც უკვე განკიცხულია, ისევე სასარგებლო იქნებოდა სახელმწიფოსათვის და ისევე სამართლიანი, თითქოს იგი ადრევე მომხდარიყოს. ამასთან, ამას არავითარი საფრთხე არ შეიძლება მოჰყვეს. კიდევ მეტიც, ჩემი აზრით, ასეთი ზომების გამოყენება დიდი წარმატებით შეიძლება მაწანწალების მიმართაც. თორემ მრავალრიცხოვანი კანონების გამოცემის მიუხედავად, ჩვენ ვერავითარ შედეგს ვერ მივაღწიეთ მათ ალაგმვაში“.

როგორც კი კარდინალმა თქვა ეს, ყველამ ერთხმად მოიწონა მისი აზრი, მე კი უფრო ადრე ვთქვი იგივე, მაგრამ ჩემს ნათქვამს ათვალისწინებით შეხვდნენ. განსაკუთრებით მოიწონეს კარდინალის აზრი მაწანწალებზე, ვინაიდან ეს უკვე მისი საკუთარი დამატება იყო.

არ ვიცი, უკეთესი ხომ არ იქნება გავჩუმდე იმაზე რაც შემდეგ მოხდა. ეს სასაცილოა, მაგრამ მაინც გიამბობთ, რადგან არცთუ ისე ურიგო ამბავია და გარკვეული კავშირიც აქვს ამ საგანთან.

ჩემი კამათის დროს შემთხვევით იქ იდგა ერთი მუქთახორა, რომელსაც, როგორც ჩანს, სულელად უნდოდა მოეჩვენებინა თავი, მაგრამ ვაი, რომ მართლაც ძალიან ჰგავდა მას. მისი ხუმრობა რომლითაც საზოგადოების გაცინებას ცდილობდა, იმდენად უკბილო იყო, რომ მასზე უფრო ეცინებოდათ, ვიდრე მის სიტყვებზე. მაგრამ, წარმოიდგინეთ, ზოგჯერ მაინც წამოსცდებოდა ხოლმე რაიმე ჰკვიანური, ხომ გაგიგონიათ, ცდა ბედის მონახვერეაო[43]. ერთ-ერთმა სტუმარმა შენიშნა, რომ მე ჩემს სიტყვაში სათანადო ზომები მივიღე ქურდობის საწინააღმდეგოდ, კარდინალმა მაწანწალები ახსენა და ახლა სახელმწიფოს ისღა დარჩენია, მხოლოდ იმათზე იზრუნოს, ვინც სილატაკემდე ავადმყოფობამ ან სიბერემ მიიყვანა და საკუთარი თავის რჩენის უნარი აღარ აქვს. მაშინ ზემოხსენებულმა მუქთახორამ შენიშნა: „ნება მომეცით და ამასაც კარგად მოვაგვარებ. ძალიან მინდა თავიდან მოვიცილო ასეთი ხალხი. ისინი ხშირად მაბეზრებენ თავს ფულის გაუთავებელი თხოვნით და შესაწყალბელი ოხვრით, მაგრამ მათ წუწუნს ჩემთვის გროშიც არ დაუცინცლავს. ყოველთვის ორიდან ერთი გამოდიოდა: ან მე არ მინდოდა მიმეცა, ანდა არც შემემძლო, რადგან არაფერი გამაჩნდა. ამიტომ ახლა მათ ჰკუა იხმარეს და, როცა ხედავენ, რომ მოვდივარ, თავს აღარ იწბილებენ და ჩუმად მატარებენ. ისინი არაფერს გამოელიან ჩემგან, თითქოს მღვდელი ვიყო და, აი, შემომაქვს კანონი, რომ ყველა ეს მათხოვარი განაწილდეს და მოთავსდეს ბენედიქტინელთა მონასტრებში[44] - მამაკაცები ბერებად, ხოლო ქალები - მონაზვნებად“. კარდინალმა გაიღიმა რადგან ეს ხუმრობად მიიღო, დანარჩენებმა კი სინამდვილედ ჩათვალეს.

მაგრამ მღვდლებისა და მონაზვნების შესახებ ამ შენიშვნამ განსაკუთრებით გაამხიარულა ერთი სწავლული ღვთისმეტყველი, თანაც ისე, რომ მასაც მოუხდა

გახუმრება, თუმცა მეტად პირქუში იყო. „მაგრამ ამ შემთხვევაშიც კი, - შენიშნა მან, - თავიდან ვერ მოიშორებ მათხოვრებს, თუ არ იფიქრებ ჩვენზე - ბერებზე“. „მე ხომ უკვე გათვალისწინებულა, - მიუგო მუქთახორამ - კარდინალმა საუცხოოდ იზრუნა თქვენზე, როდესაც გამოიტანა დადგენილება მაწანწალათა დაკავებასა და შრომაში ჩაბმაზე. თქვენ ხომ მთავარი მაწანწალები ბრძანდებით“. ამ სიტყვებზე ყველამ კარდინალს შეხედა და შეამჩნიეს, რომ იგი არც ცდილობდა ამის უარყოფას. ბერის გარდა ეს შენიშვნა ყველამ დიდი სიამოვნებით მიიღო, იგი კი (რაც არცაა გასაკვირი), გაოცებული ასეთი ენამწარობით, გაშმაგდა და იმდენად გაწიწმატდა თავი ვეღარ შეიკავა და მოჰყვა ლანძღვას. მან მოწინააღმდეგეს ცულლუტი, არამზადა, ცილისმწამებელი და წაწყმედის ნაშიერი უწოდა, თანაც საშინელი მუქარის სიტყვებს იშველიებდა საღვთო წიგნიდან. მაშინ მასხარამ თავისი ხელობა მთლიანად მოიმარჯვა და ნამდვილ ხუმრობაზე გადავიდა: „ნუ განრისხდები კეთილო ძმაო, - მიუგო მან, - საღვთო წერილში ნათქვამია: მოთმინებითა თქვენითა მოიპოვეთ სული თქვენიო“. ამაზე ბერმა (ზუსტად დავიმოწმებ მის სიტყვებს) ასე უპასუხა: „მე არ ვბრაზობ, გაიმვერავე; ყოველ შემთხვევაში არ ვცოდავ. მეფსალმუნეც ამბობს: რისხავდეთ, მაგრამ არა სცოდავდეთ[45]“. შემდეგ კარდინალმა მორიდებულად ურჩია ორივეს შეეკავებინათ თავი. მაშინ ბერმა შენიშნა: „არა, მეუფეო, მე ისე ვლაპარაკობ, როგორც უნდა ვლაპარაკობდე, კეთილი განზრახვით“. წმინდანებს ხომ კეთილი განზრახვა ჰქონდათ, ამიტომაც ნათქვამი: შენს სახელზე ექვიანობამ შემეჭამაო[46], ეკლესიებშიც ხომ გალობენ: „ელისეს ვინ დასცინოდა, როს ტაძარში შედიოდა“. მათ შენიშნეს მელოტი ელისეს[47] თავგამოდება, - ისევე როგორც ალბათ ეს დამცინავი, მასხარა და უზრდელი ამბობს. „შენ, - უპასუხა კარდინალმა, - ალბათ კეთილი სურვილები გამოძრავებს, მაგრამ უფრო სწორად, ყოველ შემთხვევაში, უფრო გონივრულად მოიქცევი, თუკი არ მოინდომებ სულელ და სასაცილო ადამიანთან გაპაექრებას“. „არა, მეუფეო, - უპასუხა მან, - მე არ მოვიქცეოდი უფრო გონივრულად. თვით უბრძნესი სოლომონიც ხომ ამბობს: „სულელს მისი სისულელის მიხედვით უპასუხეო[48]“. „სწორედ ასე ვიქცევი ახლა და მივუთითებ მას ორმოზე, რომელშიც მალე აღმოჩნდება, თუ კარგად არ გაუფრთხილდა თავს. და თუკი ელისეს მრავალმა მასხარად ამგდებმა ამ ერთადერთი მელოტის თავგამოდება შენიშნა მაშინ რამდენად უფრო ძლიერად იგრძნობს ამას თავისი ურიცხვი ძმის ერთი მასხარად ამგდები ძმებისა, რომელთა შორის ბევრია მელოტი? ამასთან ჩვენ პაპის ბულა გვაქვს, რომლის მიხედვით, ყველა ვინც ჩვენ დაგვცინის განიკვეთება ეკლესიიდან“. კარდინალმა იგრძნო, რომ ყველაფერს ამას მალე არ მოელებოდა ბოლო, მუქთახორას თავი დაუკრა, გაისტუმრა და საუბარი ოსტატურად გადაიტანა სხვა თემაზე, ხოლო ცოტა ხნის შემდეგ სუფრიდან წამოდგა, ჩვენც გამოგვემშვიდობა და მთხოვნელ ხელქვეითთა საქმეებში გაერთო.

„აი, ჩემო მორ, რა გრძელი ამბით მოგაბეზრე თავი; ძალიან მერიდებოდა ასე დიდხანს მასლაათი, მაგრამ, ერთი მხრივ, შენ ძალიან გინდოდა ეს, ხოლო მეორე მხრივ, ვამჩნევდი როგორ ხარბად მისმენდი. მაგრამ მე, თუნდაც ძალიან მოკლედ, უნდა მომეყოლა ეს შენთვის ვინაიდან იმავე პირებმა რომლებმაც უარყვეს ჩემ მიერ გამოთქმული აზრი მაშინვე მოიწონეს იგი კარდინალის დადებითი შეფასების შემდეგ. ისინი ელაქუცებოდნენ მას იმ ზომამდე, რომ ეპირფერებოდნენ თვით მისი მუქთახორის მონაჩმახსაც კი, რომელიც, თუმცა კარდინალმა ხუმრობად მიიღო, მათ კინაღამ მნიშვნელოვნად მიიჩნიეს, აქედან შენ შეგიძლია განსაზღვრო თუ რა ფასი გვექნებოდა მე და ჩემს აზრებს კარისკაცთა თვალში“.

რა თქმა უნდა, ჩემო რაფაელ - ვუპასუხე მე, - დიდად მასიამოვნე, იმდენად გონივრული და იმავე დროს დახვეწილი იყო შენი სიტყვები, გარდა ამისა შენი საუბრის დროს თავი სამშობლოში მეგონა, თითქოს ბავშვობა დამიბრუნდა კარდინალის გახსენებაზე, მე ხომ მის კარზე ვიზრდებოდი. ჩემო რაფაელ, თუმცა ყოველთვის ძალიან ძვირფასი იყავ ჩემთვის, არ დაიჯერებ ახლა კიდევ რამდენი მოგემატა ჩემს თვალში იმის გამო, რომ ასეთი მოწიწებით ეპყრობი იმ კაცის ხსოვნას. მაგრამ, მაინც, ჯერ არავითარ შემთხვევაში არ შემიძლია აზრის შეცვლა. სახელდობრ, თუკი გადაწყვეტ, არ მოერიდო ხელმწიფეთა სასახლეებს, მაშინ შენი რჩევებით ძალიან დიდი სარგებლობის მოტანა შეგიძლია საზოგადოებისათვის. ამიტომ ამის შესრულება გევალება, პირველ ყოვლისა, როგორც პატიოსან ადამიანს. შენი პლატონიც ხომ ფიქრობს, რომ სახელმწიფოში, მხოლოდ მაშინ დაისადგურებს ბედნიერება როცა ფილოსოფოსები დაიწყებენ მეფობას, ან მაშინ, როცა მეფენი გაფილოსოფოსდებიან. არც თუ მალე დადგება ეს ბედნიერი დღე, ჩემო რაფაელ, თუ ფილოსოფოსები არ ისურვებენ თავიანთი რჩევები გაუზიარონ“. „არა, - მიპასუხა რაფაელმა, - ფილოსოფოსები არც იმდენად უმადურები არიან, რომ ეს დიდი სიამოვნებით არ გააკეთონ. პირიქით, ბევრმა უკვე შეასრულა კიდევ ეს თავისი წიგნების გამოცემით, ოღონდ კი ძლიერნი ამა ქვეყნისანი მისდევნებოდნენ მათ რჩევებს. მაგრამ პლატონი უჩქველია კარგად ხედავდა რომ თუ მეფენი თვითონ არ გახდებიან ფილოსოფოსები მაშინ ისინი, ბავშვობიდანვე მცდარი აზრებით გამსჭვალულნი და დაავადებულნი, ბოლომდე არასოდეს მოიწონებენ ფილოსოფოსთა გეგმებს. ეს თვით პლატონმა გამოსცადა დიონისიონისის კარზე[49]. როგორ, შენ ერთი წუთით მაინც ფიქრობ, რომ თუკი მე რომელიმე მეფეს შევთავაზებ გონივრული კანონების პროექტს და შევეცდები აღმოვფხვრა ბოროტი და დამღუპველი თესლები მის კარზე, დაუყონებლივ არ გამაგდებენ და მასხარად არ ამიგდებენ? წარმოიდგინე, რომ გალიის მეფის კარზე[50] ვარ, მის მრჩევლად ვითვლები და მეტად საიდუმლო თათბირზე რომელსაც თვით მეფე ხელმძღვანელობს უჩქვიანეს ადამიანთა წრეში გულდასმით ვიხილავთ საკითხს, თუ რა საშუალებებითა და ხრიკებით შეუძლია მეფეს მედიოლანუმის[51] შენარჩუნება, ხელიდან გამსხლტარი ნეაპოლის[52] კვლავ დაბრუნება, ხოლო შემდეგ ვენეტების დარბევა[53], მთელი იტალიის დამორჩილება[54], ძალაუფლების მოპოვება ფლანდრიაზე, ბრაბანტზე, ბოლოს მთელ ბურგუნდიაზე[55] და, გარდა ამისა სხვა ხალხებზე, რომელთა სამეფოებს ის ფიქრით უკვე არაერთხელ დასხმია თავს. აქ ერთ-ერთი მრჩეველი წინადადებას აძლევს მეფეს ვენეტებთან დაამყაროს კავშირი, რაც მანამ დარჩებოდა ძალაში, სანამ ხელსაყრელი იქნებოდა მეფისთვის, შეატყობინოს მათ თავიანთი გეგმები დაუტოვონ კიდევ მათთვის ნადავლის გარკვეული ნაწილი, რათა უკანვე მოსთხოვონ საქმის სასურველად დაბოლოების შემთხვევაში; მეორე სთავაზობს მეფეს გერმანელთა დაქირავებას[56], მესამე - ჰელვეტთა ფულით მოსყიდვას, მეოთხე აცხადებს, რომ ფულის ძლიერებით შეარბილონ მისი უდიდებულესობა იმპერატორის[57] რისხვა, მეხუთეს აუცილებლად მიაჩნია საქმის მოგვარება არაგონიის მეფესთან[58] და მშვიდობის საზღაურად უარის თქმა უცხო ნავარის სამეფოზე[59], მეექვსე სთავაზობს კრებას რაღაც საქორწინო იმედებით გააბრუნონ კასტილიის მეფე[60] და გარკვეული ყოველწლიური გადასახადით გადმოიბირონ თავის მხარეზე თუნდაც რამდენიმე წარჩინებული კარისკაცი. აქ წამოიჭრა მთავარი დაბრკოლება - როგორი გადაწყვეტილება მიიღონ ინგლისის მიმართ. გამოთქვა აზრი, რომ ყოველ შემთხვევაში, საჭიროა მასთან მოლაპარაკება მშვიდობის საკითხზე და ასეთი არამყარი კავშირის განმტკიცების საიმედო

კავშირით, საჭიროა ინგლისელებს მეგობრები ვუწოდოთ, მაგრამ უნდა გვახსოვდეს რომ ისინი არ არიან მეგობრები. ამიტომ ყოველთვის შემართული უნდა გყავდნენ სკოტები[61] და ოდნავ ამომრავებისთანავე მიუსიოთ ისინი ინგლისელებს. ამისათვის საჭიროა ფარულად (ამის აშკარა განხორციელებას სამოკავშირეო ხელშეკრულებანი უშლის ხელს) დაუჭიროთ მხარი რომელიმე წარჩინებულ დევნილს, რომელიც ამტკიცებს, რომ ეს სახელმწიფო მას ეკუთვნის, და ამ საშუალებით დავთრგუნოთ ჩვენთვის საეჭვო ხელისუფალი. ასე რომ, როგორც ვთქვი, თუკი ასეთ დამაბულ ვითარებაში როდესაც ამდენი გამოჩენილი მრჩეველი ერთმანეთს არ აცლის თავისი საომარი გეგმების შეთავაზებას, უცებ ავდგები და შევთავაზებ იალქნები უკულმა შემოაბრუნონ, ვურჩევ თავი დაანებონ იტალიას და ვეტყვი, რომ საჭიროა სახლში ჯდომა, რადგან მარტო გალიის სახელმწიფოც მეტისმეტად დიდია იმისათვის, რომ მას სათანადოდ მართავდეს ერთი ადამიანი, და ამიტომ მეფემ უარი უნდა თქვას სხვა მიწების დაპყრობაზე, როგორ ფიქრობთ, როგორ მომეცეოდნენ მე?! შემდეგ შემემლო მათი ყურადღება მიმეცია და მომეყვანა მაგალითი ახორიელთა[62] ცხოვრებიდან, გამეცნო ხალხი რომელიც უტოპიის კუნძულის პირდაპირ, მისგან სამხრეთ-აღმოსავლეთით ცხოვრობს. სწორედ ისინი აწარმოებდნენ ოდესღაც ომს. რათა თავიანთი მეფისათვის დაეპყროთ სხვა სამეფო, რომელიც, როგორც იგი ამტკიცებდა, მემკვიდრეობით ეკუთვნოდა ძველისძველი ნათესაური კავშირების ძალით. როცა, ბოლოსდაბოლოს, დაიპყრეს ეს სამეფო, სულ მალე იგრძნეს, რომ მისი შენარჩუნება არანაკლებ ძალებს მოითხოვდა ვიდრე მის მოპოვებაზე დაიხარჯა. ახალი ქვეშევრდომნი შინაგანად მუდამ უკმაყოფილონი იყვნენ ან უცხოელთა დარბევის მსხვერპლი ხდებოდნენ. ამიტომ გამუდმებით საჭირო იყო ბრძოლა ან მათ წინააღმდეგ, ან მათ დასაცავად, რის გამოც ვერასდროს ვერ ახერხებდნენ ჯარის დათხოვნას, ამავე დროს კი ახორიელნი თვითონ მარცვავდნენ საკუთარ თავს - ფული საზღვარგარეთ გადიოდა, ისინი კი სისხლს ღვრიდნენ უმაქნისი და ამავე დროს უცხო დიდებისათვის. ბოლოს მიხვდნენ, რომ მშვიდობა ასე ვერ განმტკიცდებოდა, ომმა წაბილწა ზნეობა მთელ სახელმწიფოში, მოსახლეობა მარცვა-გლეჯას შეეჩვია, ხელი მიჰყვეს მკვლელობას, აბუჩად იგდებდნენ კანონებს, ამავე დროს მეფე, რომლის ყურადღება ორ სახელმწიფოს შორის ნაწილდებოდა, აღარ შეეძლო რომელიმე ერთზე ეზრუნა გამორჩეულად. როცა უკვე აშკარა გახდა, რომ ამ დიდ გასაჭირს ბოლო არ უჩანდა მოითათბირეს და შესთავაზეს მეფეს თავისთვის რომელიმე ერთი ქვეყანა დაეტოვებინა, რომელიც სურდა, ვინაიდან ორი ქვეყნის მართვის ძალა არ შესწევდა. ისინი ამბობდნენ, რომ მეტად ბევრი არიან იმისათვის, რომ მათი მართვა შეეძლოს ნახევარ მეფეს, ხოლო, მეორე მხრივ, ნეტა ვინ დაყაბულდება იმაზე, რომ თუნდაც საქონლის მწყემსიც კი სხვასთან საზიარო ჰყავდეს? ამრიგად ეს კეთილი მონარქი იძულებული გახდა ახალი სამეფო დაეთმო თავისი ერთი მეგობრისათვის (რომელიც იქიდან მალე განდევნეს) და თვითონ ძველს დასჯერებოდა. გარდა ამისა, მე რომ მერჩია მეფისათვის, რომ ყველა ეს საომარი წამოწყება, რომლებსაც არევ-დარევა შეაქვთ ხალხის ცხოვრებაში, გააღატაკებს მის სალაროს, ქვეშევრდომებს და რაიმე შემთხვევითობის გამო შეიძლება სულაც უშედეგოდ დამთავრდეს და შემეთავაზებინა მისთვის ეზრუნა მამა-პაპათაგან მემკვიდრეობით ნაბომებ სამეფოზე, შეძლებისდაგვარად აეყვავებინა იგი, შეეყვარებინა თავისი ქვეშევრდომნი, დაემსახურებინა მათი სიყვარული, ეცხოვრა მათთან ერთი ცხოვრებით, ემართა ისინი ღმობიერად და თავი დაენებებინა სხვა ქვეყნებისათვის, ვინაიდან ის, რაც მას ერგო, საკმარისზე მეტია თავისი მოცულობით, - როგორ ფიქრობ, ჩემო მორ, როგორი განწყობილებით მიიღებდნენ

ისინი ამგვარ სიტყვებს?“ „რა თქმა უნდა, არცთუ დიდი სიამოვნებით“, - მიუგე მე. „მაშინ წავიდეთ წინ, - თქვა მან. - დავუშვათ, რომ რომელიმე მეფის მრჩეველნი მასთან საუბარში განიხილავენ და იგონებენ საშუალებებს განძის გასამდიდრებლად. ერთი წინადადებას იძლევა გაზარდონ მონეტის ღირებულება[63], როდესაც ფულის გადახდა იქნება საჭირო, და დასცენ მისი ფასი, როცა საჭირო იქნება ფულის შეგროვება, - ამრიგად შესაძლებელი გახდება დიდი თანხის გადახდა ფულის მცირე რაოდენობით და პატარა თანხით დიდის შესყიდვა. მეორე სთავაზობს მეფეს ომისათვის მოწვევებით მზადებას და ამ გზით ფულის შეგროვებას, ხოლო ამ მიზნის მიღწევის შემდეგ საზეიმო ზავის დადებას წმინდა მღვდელმსახურების თანხლებით და ამ გზით უბრალო ხალხში ისეთი წარმოდგენის შექმნას ვითომდა კეთილმა მეფემ ადამიანებზე ზრუნვის გამო შეწყვიტა სისხლისღვრა[64]; მესამემ, ვთქვათ ამოქექა, რომელიღაც ძველისძველი ჭიანჭამი კანონები[65], უქმად ყოფნისაგან მოძველებულნი და რადგან აღარავის ახსოვს მათი არსებობა, ყველა არღვევს მათ და ამიტომ საჭიროა ჯარიმის გადახდევინება; აქედან მიღებული შემოსავალი უფრო უხვი და საპატიო იქნება, ვიდრე სხვა გზით მიღებული, რადგან იგი სამართლიანობის ნიღბით იქნება დაფარული; მეოთხის აზრით, დიდი ჯარიმის შიშით საჭიროა ისეთი ბევრი რაიმის აკრძალვა, რაც ხალხის ინტერესებს ეწინააღმდეგება, ხოლო შემდეგ მიღებული ფულის განაწილება მათ შორის, ვის მოგებასაც განსაკუთრებით ზღუდავს ეს კანონი; ამრიგად, შესაძლებელია ხალხის გულის მოგება და ორგვარი სარგებლის მიღება: ერთი მხრივ ჯარიმდებიან მხოლოდ ისინი, ვინც ამ ბედში მოგებისადმი სიხარბემ მოაქცია, ხოლო მეორე მხრივ, პრივილეგიების მაღალი საფასური სრულიად ეთანხმება მშვენიერ ზნეობრივ თვისებებს იმ მეფისას, რომელიც ძნელად თუ აჩუქებს რომელიმე კერძო პირს ისეთ რამეს, რაც ხალხის ინტერესებს ეწინააღმდეგება, და ისიც მხოლოდ მაღალი საფასურით; მეხუთე არწმუნებს მეფეს, რომ საჭიროა მოსამართლეთა მიმხრობა, ისინი ყოველგვარი საქმის გადაწყვეტისას მეფის უფლებებს მიიღებენ მხედველობაში, გარდა ამისა საჭიროა მათი თავმოყრა სასახლეში და საქმეთა გარჩევა მეფის თანდასწრებით; მაშინ მეფის არცერთი საქმე არ იქნება იმდენად უსამართლო, რომ რომელიმე მოსამართლემ ან წინააღმდეგობის სურვილით ან იმის სირცხვილით, რომ იგივე არ გაიმეოროს, ანდა მბრძანებლის კეთილგანწყობის მოპოვებით დაბრმავებულმა ვერ მოძებნოს ამ საქმის განხილვაში რაიმე ხვრელი რომელიც შარის მოდების საშუალებას არ იძლეოდეს. ამრიგად მოსამართლეთა აზრის სხვადასხვაობისას თავისთავად სრულიად ნათელი საქმე იწვევს აზრთა გაცვლა-გამოცვლას, ხოლო ჭეშმარიტება მოითხოვს კამათს და სწორედ ეს აძლევს მეფეს საშუალებას, რომ კანონი თავის სასარგებლოდ გამოიყენოს; სხვები ეთანხმებიან მას ან სირცხვილის ან შიშის გამო, ამიტომ ამის შედეგად აუცილებლად ცხადდება შესაბამისა განაჩენი; მეფისათვის ხმის მისაცემად ხომ ყოველთვის მოიძებნება საბაბი; ამისათვის საკმარისია მის მხარეზე იყოს ან სამართლიანობა, ან კანონი, ანდა დოკუმენტის დახლართული აზრი, ან, ბოლოსდაბოლოს, ის, რაც პატიოსან მოსამართლეთა თვალში კანონებზე მაღლა დგას - ხელმწიფის უცილობელი უპირატესობა[66]. ყველა ეს მრჩეველი ერთხმად აღიარებს კრასუსის[67] მცნების სისწორეს იმის შესახებ, რომ ოქრო რაც არ უნდა ბევრი გქონდეს მაინც მისი არავითარი რაოდენობა არ ეყოფა მეფეს რომელსაც ჯარი ჰყავს შესანახი, და კიდევ, მეფე ვერასდროს ვერ მოიქცევა უსამართლოდ, ამისი დიდი სურვილიც რომ ჰქონდეს, ვინაიდან ყველა და ყველაფერი მას ეკუთვნის, ხოლო ყოველ ადამიანს აქვს იმდენი რამდენიც მეფემ დაუტოვა და არ ჩამოართვა თავისი გულმოწყალების გამო.

ამასთანავე მეფისათვის დიდი მნიშვნელობა აქვს იმას, რომ ასეთი საკუთრება არც შეიძლება ნაკლები იყოს ვინაიდან მისი ძალაუფლების მთავარი დასაყრდენი ისაა, რომ არ მისცეს ხალხს სიმდიდრისა და თავისუფლებისაგან განეზივრების საშუალება: ასეთი მდგომარეობის დროს ადამიანები არცთუ ისე ადვილად ურიგდებიან სასტიკ და უღმობელ ბრძანებებს, იმ დროს, როდესაც, პირიქით სილატაკე და უკმარობა აჩლუნგებს განწყობილებას, აჩვევს მოთმინებას და დამონებულთ მეამბოხის კეთილშობილ სულს უსპობს. და, აი, აქ თუ ისევ ავდგები და დავიწყებ კამათს იმაზე, რომ ყველა ეს რჩევა მეფისათვის უღირსიცაა და დამღუპველიც, ვინაიდან არა მარტო მისი ღირსება, არამედ მისი უსაფრთხოებაც კი უფრო ხალხის კეთილდღეობაზეა დამოკიდებული, ვიდრე მეფის საკუთარ სალაროზე, შემდეგ აუხსნი, რომ ისინი მეფეს ირჩევენ თავისთვის და არა თვითონ მისთვის. სწორედ იმიტომ, რომ მეფის შრომისა და კეთილგანწყობის წყალობით კეთილად და უწყინარად იცხოვრონ და მეფესაც უფრო შეეფერება ხალხის კეთილდღეობაზე ზრუნვა, ვიდრე საკუთარ თავზე, ისევე როგორც მწყემსის მოვალეობა[68], რამდენადაც ის საქონელს მწყემსავს, უფრო საქონლის გამოკვებაა, ვიდრე საკუთარი თავისა; თუ ვიტყვი, რომ მრჩეველები მწარედ სცდებიან, როცა ამბობენ, რომ ხალხის სილატაკე მშვიდობის დაცვას ემსახურება - მართლაცდა სად ხდება უფრო მეტი აყალმაყალი, თუ არა ღატაკთა შორის? ვინ უფრო მეტად ისწრაფვის გადატრიალებისაკენ, თუ არა ის, ვისაც სრულიადაც არ მოსწონს არსებული წესწყობილება? ბოლოს, ვის უფრო უჩნდება თავხედური მოთხოვნილება, არევ-დარევა გამოიწვიოს იმის იმედით, რომ რასმე გამორჩეს, ვიდრე იმას, ვისაც აღარაფერი აქვს დასაკარგი? თუ დავამტკიცებ, რომ როცა რომელიმე მეფე თავის ქვეშევრდომებში ისეთ ზიზღსა და სიძულვილს იწვევს, რომ მათი მორჩილებაში ყოლა მხოლოდ შეურაცხყოფით, მარცვა-გლეჯითა და აღკვეთით ხალხის გალატაკებად მიყვანის გზით შეუძლია, მაშინ, რა თქმა უნდა, მან უმჯობესია უარი თქვას სამეფოზე, ვიდრე შეინარჩუნოს იგი ისეთი საშუალებებით რომელთა დროსაც, თუ კი ის მაინც ახერხებს მბრძანებლის სახელის შენარჩუნებას, ყოველ შემთხვევაში კარგავს თავის დიდებულებას. მეფის ღირსებას არ შეეფერება ძალაუფლების გამოყენება ღატაკთა მიმართ, ეს დასაშვებია უფრო მდიდართა და შეძლებულთა მისამართით. სწორედ ეს აღნიშნა მაღალი და კეთილშობილი გონების ადამიანმა ფაბრიციუსმა[69] თავის პასუხში - რომ ის არჩევს მდიდართა მართვას და არა მდიდრად ყოფნას. და, რა თქმა უნდა, იმის დაშვება, რომ ერთნი ფუფუნებასა და განცხრომაში ცხოვრობდნენ, ხოლო მეორენი კვნესოდნენ და ტიროდნენ, ნიშნავს იყო ციხის და არა სამეფოს მცველი; დასასრულ, თუ ვიტყვი, რომ სრულიად უმეცარია ექიმი, რომელსაც ავადმყოფის მკურნალობა მხოლოდ ავადმყოფობითვე შეუძლია, ასევე მან, ვისაც სხვა გზით არ შეუძლია მოქალაქეთა ცხოვრების წარმართვა, თუ მათ ცხოვრების სიკეთე არ წაართვა, უნდა აღიაროს თავისი უსუსურობა თავისუფალ ადამიანთა ცხოვრების მართვის საქმეში, უფრო მეტიც მან უარი უნდა თქვას ახირებულობაზე ან მედიდურობაზე: ამ ნაკლით ის ხალხში იწვევს ან ზიზღს ან სიძულვილს; მას სხვისთვის ზიანის მოუტანლად უნდა იცხოვროს საკუთარი სახსრებით და ერთმანეთს შეუფარდოს შემოსავალი და გასავალი, ალაგმოს ბოროტმოქმედება რათა ქვეშევრდომთა სამართლიანი გაძლიერებით უფრო აღმოფხვრას ბოროტმოქმედებანი, ვიდრე გაძლიერების საშუალება მისცეს მათ, იმ მიზნით რომ შემდეგ ამისათვის დასაჯოს სხვები; თუ დავიწყებ მტკიცებას, რომ საჭირო აღარ არის იმ კანონთა აღდგენა, რომლებიც ცხოვრებამ უკუაგდო, განსაკუთრებით ისეთებისა, რომლებიც დიდი ხანია მოძველდა და არც თავის დროზე ყოფილა დიდად სასურველი. არასოდეს ჯარიმის მომიზეზებით არ შეიძლება

ისეთი რაიმის მიღება რის ნებასაც მოსამართლე არ მისცემდა არცერთ პატიოსან ადამიანს, როგორც უსამართლობითა და მოტყუებით მოპოვებულისას; და ბოლოს თუ განუმარტავ და შევთავაზებ აქ მაკარიელთა[70] კანონს, რომლებიც აგრეთვე უტოპიის მახლობლად ცხოვრობენ?! - მათმა მეფემ ტახტზე ასვლის პირველსავე დღეს მსხვერპლმეწირვის საზეიმო აღსრულების შემდეგ, ფიცი დადო არასოდეს ჰქონოდა ერთდროულად სალაროში ათას გირვანქაზე მეტი ოქრო ან ამ ოქროს ღირებულების შესაბამისი ვერცხლი. ამბობენ, რომ ეს კანონი დააწესა ერთმა შესანიშნავმა მეფემ, რომელიც სამშობლოს კეთილდღეობაზე უფრო ზრუნავდა, ვიდრე თავის გამდიდრებაზე. ეს კანონი დაბრკოლებას უნდა წარმოადგენდეს ისეთი დიდი თანხების დაგროვების წინააღმდეგ, რამაც ხალხში მათი ნაკლებობა შეიძლება გამოიწვიოს. მეფე ხედავდა, რომ ეს თანხა საკმარისი იქნებოდა იმისათვის, თუ მას მოუხდებოდა ბრძოლა მეამბოხეებთან, ანდა მის სახელმწიფოს დასჭირდებოდა მტრის თავდასხმის მოგერიება. მაგრამ ეს თანხა საკმარისი არ იქნებოდა იმისათვის, რათა შესაფერისი განწყობილება შექმნილიყო სხვის სამფლობელოებზე თავდასასხმელად. აი, ეს იყო კანონის გამოცემის უმთავრესი მიზეზი. მეორე მიზეზი, მეფის აზრით, ის იყო, რომ ხალხში ყოველდღიურად საბრუნავი ფულის ნაკლებობა დაეძლიათ, ხოლო ვინაიდან მეფე ვალდებულია გასცეს ყველაფერი, რაც სალაროში დაგროვდა კანონით დადგენილი ოდენობის ზევით, ამის გამო მას არ დასჭირდებოდა საბაბის მოძებნა ქვეშევრდომთათვის წყენის მისაყენებლად. ასეთი მეფე შიშის ზარს დასცემს ბოროტმოქმედთ და კარგი მოქალაქეების სიყვარულს დაიმსახურებს. ასე რომ, თუკი ამ და ამგვარ ზემოთჩამოთვლილ დებულებებს თავს მოვახვევ სრულიად საწინააღმდეგო აზრის მქონე ადამიანებს, მაშინ ყრუთა წინაშე მქადაგებელს ხომ არ დავემსგავსებთ?“

„რა თქმა უნდა, - ვუპასუხე მე, - თანაც როგორ ყრუთა წინაშე! მართალი გითხრათ, სულაც არ მაკვირვებს ეს, და უნდა ვაღიარო, აუცილებლადაც არ მიმაჩნია ამგვარი აზრების თავს მოხვევა და ისეთი რჩევების მიცემა, რომლებსაც, როგორც შენა ხარ დარწმუნებული, არასოდეს მიიღებენ. მართლაც, რა სარგებლობა უნდა მოუტანოს ან როგორ უნდა მოახდინოს გავლენა ასეთმა უცნაურმა გამოსვლამ იმათ განწყობილებაზე, ვის გულშიც ადრევე დაიბუდა სრულიად საწინააღმდეგო მოსაზრებამ? ახლო მეგობართა შორის გამართულ სასიამოვნო საუბრისას ამგვარი სქოლასტიკური ფილოსოფია[71] შეიძლება სასიამოვნო აღმოჩნდეს, მაგრამ მეფეთა სათათბიროებში სადაც მეტად მნიშვნელოვანი და მეტად ავტორიტეტული საქმეები წყდება, ამის ადგილი არ არის“. „ზუსტად ამასვე ვამბობდი: მეფეებს არ სცალიათ ფილოსოფიისათვის - მეთქი“. ვუპასუხე მე, - იმ სქოლასტიკური ფილოსოფიისათვის, რომელსაც მიაჩნია, რომ იგი გამოსადეგია ყველგან და ყოველთვის მაგრამ არის სხვა ფილოსოფიაც უფრო საჭირო, რომელმაც იცის თავისი ადგილი და მის ხელთ მყოფ პიესაში თავის როლს ბოლომდე კეთილსინდისიერად ასრულებს. აი, შენ სწორედ ასეთი ფილოსოფია უნდა გამოიყენო. აი, დავუშვათ, რომ იდგმება პლავტუსის[72] რომელიმე კომედია, სადაც საცოდავი მონები ერთმანეთზე სისულელეებს ჩმახავენ, შენ კი უცებ მოველინები ფილოსოფოსის მოსასხამით სცენაზე, წარდგები ყველაზე წინ და დაიწყებ „ოქტავიადან[73]“ იმ ადგილის კითხვას, სენეკა რომ ნერონს ეკამათება. განა უკეთესი არ არის გამოხვიდე და ხმა არ ამოიღო, ვიდრე შეუფერებელი ტექსტის კითხვით ასეთი ტრაგიკომედია მოაწყო! შენ ხომ გააფუჭებ და დაამახინჯებ ამ პიესას, აურ-დაურევ ყველაფერს მაშინაც კი, თუ შენი დამატებანი დედანზე უკეთესი იქნება. გახსოვდეს რაც შეიძლება უკეთესად ითამაშე ის პიესა,

რომელიც ხელთა გაქვს და ნუ დაანაგვიანებ მას ასე საშინლად იმით, რაც გაგახსენდება თუნდაც უფრო სრულყოფილი პიესიდან.

ასეთი მდგომარეობაა როგორც სახელმწიფოში, ისე მეფეთა თათბირებზეც. თუ არ შეიძლება ძირფესვიანად ამოიძირკვოს არასწორი აზრები, თუ გულწრფელად ხარ დარწმუნებული, რომ არ შეგიძლია განკურნო ასე მტკიცედ ფესვადგმული მანკიერებანი, შენ მაინც არ უნდა მიატოვო სახელმწიფო საქმეები, ისევე როგორც არ შეიძლება ხომალდის მიტოვება ქარიშხალში იმ მიზეზით, რომ შენ ქარებს მაინც ვერ გაუმკლავდები. მაგრამ არც ის შეიძლება, ძალით მოახვიო თავს ახალი და უცნაური აზრები ხალხს, რომელიც პირიქით ფიქრობს, ვინაიდან ამ ახალ აზრებს მისთვის არავითარი ფასი არ ექნება; შენ როგორმე სხვა გზით უნდა ეცადო შეძლებისამებრ ყველაფერი კარგად შეასრულო, ხოლო ის, რის მობრუნებაც კარგისაკენ არ შეგიძლია, შეეცადე ოდნავ მაინც გააკეთილშობილო, ხომ არ შეიძლება ყველაფერი კარგად იყოს მოწყობილი, ყველა ადამიანი ხომ არ არის აუცილებლად კარგი. არა მგონია, რომ ეს სულ რამდენიმე წელში მოხდეს“.

„ამ საშუალებიდან სხვა არაფერი გამოვა, - მიპასუხა რაფაელმა, - გარდა იმისა, რომ თუ ვცდები განკურნო სხვათა სიშმაგე, თვით დავკარგავ გონებას მათთან ერთად. რაკი სიმართლის თქმა მინდა, აუცილებლად უნდა ვილაპარაკო, თუმცა არ ვიცი, ფილოსოფოსის საქმეა თუ არა სიცრუის ლაპარაკი, მაგრამ ყოველ შემთხვევაში ჩემი საქმე სიმართლის თქმაა. მართალია ჩემი სიტყვა არასასიამოვნო და მძიმე იქნება მოწინააღმდეგეებისათვის, მაგრამ მაინც ვერ ვხვდები რატომ უნდა მოგვეჩვენოს იგი სისულელემდე უცნაურად. დაუშვათ ვიტყვოდი იმას, რასაც ფიქრობს პლატონი თავის „სახელმწიფოში“, ანდა რასაც აკეთებენ უტოპიელები თავიანთ ქვეყანაში; მართალია, ჩვენთვისაც უკეთესი იქნებოდა ის, რაც იქ სინამდვილეშია, მაგრამ მაინც უცხოოდ მოგვეჩვენებოდა, ვინაიდან აქ ყველას აქვს კერძო საკუთრება, იქ კი ყველაფერი საერთოა. რაც შეეხება ჩემს სიტყვას იგი გვაფრთხილებს და მიგვითითებს ამაზე, ამიტომ იგი შეიძლება უსიამოვნო იყოს მხოლოდ იმათთვის, ვინც საწინააღმდეგო მხარეზე სიარულისას უფსკრულში საკუთარ თავთან ერთად სხვების გადაჩეხვასაც ლამობს. სხვაგვარად რა იყო ჩემს სიტყვებში ისეთი რისი თქმაც ყველგან არ შეიძლებოდა ან სასურველი არ იყო? მართლაც, თუკი როგორც უცხო და სულელური, უნდა გამოვრიცხოთ ყველაფერი ის, რასაც ადამიანთა მანკიერმა ზნე-ჩვეულებებმა არაჩვეულებრივი სახე მისცეს, მაშინ ქრისტიანებთანაც უნდა დავფართო ბევრი რამ ქრისტეს მოძღვრებიდან, იგი კი არამარტო კრძალავს ამის დამალვას, არამედ მოგვიწოდებს კიდევ აშკარად, ხმამაღლა ვიქადაგოთ ის, რაც ქრისტემ მათ ყურში ჩასჩურჩულა. ყველაფერი ამის უდიდესი ნაწილი უფრო უცხოა თანამედროვე ზნე-ჩვეულებებისათვის, ვიდრე ჩემი სიტყვა იყო. მართლაც, მქადაგებლები, ცბიერი ადამიანები მისდევენ შენს რჩევას და ხედავენ, რომ ადამიანებისათვის ძნელია თავიანთი დანაშაულის მისადაგება ქრისტეს მოძღვრებისადმი. მათ მისი მოძღვრება ისევე მიუსადაგეს ადამიანთა ზნე-ჩვეულებებს, როგორც მოქნილი ტყვიის სახაზავი, რათა ოდნავ მაინც შეუფუონ ისინი ერთმანეთს. როგორც ვხედავ, ამით მხოლოდ ცუდმა ადამიანებმა ისარგებლეს და უზრუნველ ცხოვრებას მიაღწიეს. და მე, რა თქმა უნდა, მეფეთა სათათბიროებში ასევე დიდ შედეგებს მივალწევ. ანდა ჩემი აზრების საწინააღმდეგო მოსაზრება რომ გავიაზრო, ეს იგივე არ იქნება, რომ არავითარი აზრი არ გამაჩნდეს? თუ ისე ვიფიქრებ, როგორც წინათ, ტერენციუს მიკიონის[74] სიტყვებით რომ ვთქვათ, რას წარმოადგენს ის სხვა გზები, რომლებითაც, შენი

აზრით, უნდა ვეცადო ყველაფრის მოწესრიგებას? სასურველ მხარეს მაინც უნდა შევაბრუნო იგი და რამდენადაც შესაძლებელია გადავაქციო ნაკლებ ბოროტებად. იქ არაა ადგილი იმისთვის, რომ ვიმაღლებოდე ან ზერელედ მოვეკიდო ყველაფერს; საჭიროა აშკარად მოვიწონო მცდარი აზრები და ხელი მოვაწერო ყველაზე ცუდ გადაწყვეტილებებს. მაგრამ უღირსი დადგენილებების ძუნწად შექებაც კი ხომ მხოლოდ ჯაშუშის ან უბრალოდ გამცემის საქმე იქნებოდა. შემდგომ, იმ გარემოში მოხვედრისას, სადაც უფრო ადვილია შესანიშნავი ადამიანის წახდენა, ვიდრე ამ გარემოს გამოსწორება შენ ვერ გააკეთებ ვერაფერს ისეთს, რითაც შეძლებდი რაიმე სარგებლობის მოტანას. ასეთი საზოგადოების მახინჯი წეს-ჩვეულებანი შენც დაგამახინჯებენ, ანდა, დარჩები რა უცოდველი და უბიწო, შენ სხვისი სისულელის დამფარველად გამოხვალ. აქ ლაპარაკიც კი ზედმეტია ამგვარი გზით რაიმე წარმატების მიღწევაზე. ამიტომ პლატონი მეტად ლამაზი შედარებით წარმოგვიდგენს, თუ რამდენად სწორია ფილოსოფოსთა მიერ სახელმწიფო საქმეებში ჩარევისაგან თავის შეკავება. ფილოსოფოსები ხედავენ, რომ ქუჩაში გამოსული ხალხი კოკისპირულ წვიმაში მოჰყვა, მაგრამ არ შეუძლიათ აიძულონ ისინი სახურავის ქვეშ შევიდნენ და თავი შეაფარონ, აი, ფილოსოფოსებმა იციან, თუ ქუჩაში გამოვლენ ვერაფერს მიაღწევენ, გარდა იმისა, რომ ხალხთან ერთად თვითონაც დასველდებიან, და ამიტომ ისინი რჩებიან სახლში და კმაყოფილდებიან იმით, რომ რადგან არ ძალუძთ სხვისი სისულელის შველა, თვითონ მაინც არ გაისულელეს თავი და დარჩნენ მშრალები. ო, ჩემო მორ, თუ გინდა იცოდე ჩემი ნამდვილი აზრი, მე ასე მგონია, რომ იქ, სადაც ბატონობს კერძო საკუთრება, სადაც ყველაფერი ფულით იზომება, თითქმის შეუძლებელია სახელმწიფო საქმეთა სწორად და წარმატებით მართვა. სხვაგვარად, ასეთ საზოგადოებაში გამართლებულად უნდა ჩაითვალოს ის გარემოება, რომ ყველაფერი საუკეთესო ყველაზე უფრო უღირსთ ხვდებათ, ანდა ის, რომ ყველაფერი მხოლოდ ხალხის ძალიან მცირე ნაწილს აქვს განაწილებული და, წარმოიდგინე, ისინიც ვერ ცხოვრობენ როგორც საჭიროა, დანარჩენებს კი სრულ სილატაკეში სძვრებათ სული.

ამიტომ აქ, ერთი მხრივ, საკუთარ თავთან მარტო დარჩენილი განვიხილავ უტოპიელთა ზედმიწევნით ბრძნულ და წმინდა წამოწყებებს, რომელთა მეშვეობითაც სახელმწიფოს მართვა შესაძლებელია კანონთა სულ მცირე რაოდენობით, მაგრამ ეს ისე კარგად კეთდება, რომ სიკეთე სათანადო შეფასებას იმსახურებს და, მიუხედავად ქონების თანასწორობისა, ყველაფერში შეიმჩნევა საერთო კეთილდღეობა. მეორე მხრივ, პირიქით, მათ ზნე-ჩვეულებებს ვაძარებ ბევრი სხვა ხალხის ცხოვრებას, რომლებიც სულ მუდამ იმის ცდაში არიან, როგორმე წესრიგი დაამყარონ, მაგრამ ამაოდ. თითოეული იქ თავის საკუთრებას უწოდებს ყველაფერს, რაც მოხვდება. ესენი ყოველდღიურად ურიცხვ კანონს სცემენ, მაგრამ არ ძალუძთ მათი მიღწევა, დაცვა. ამას კი ნათლად ადასტურებს უთავბოლო და დაუსრულებელი უთანხმოებანი. ასე რომ, ვიმეორებ, როდესაც ჩემთვის დავფიქრდები ამაზე, უფრო მეტ სამართლიანობას ვიჩენ პლატონისადმი და ნაკლებად მაკვირვებს მისი უარი იმ ხალხებისათვის რაიმე კანონების მიცემაზე, რომლებმაც უარყვეს წესდება ყოველგვარი ცხოვრებისეული სიკეთის თანაბრად განაწილებისა. ამ ბრძენმა ადვილად შენიშნა, რომ ერთადერთი გზა საზოგადოების კეთილდღეობისაკენ არის ქონებრივი თანასწორობის გამოცხადება, ხოლო ეს ძნელად თუ განხორციელდება იქ, სადაც ყველას კერძო საკუთრება აქვს და თუ ყოველი მათგანი თუნდაც კანონიერ საფუძველზე შეეცდება მითთვისოს იმდენი, რამდენსაც

შემდეგს, მაშინ როგორც დიდიც არ უნდა იყოს დოვლათი, იგი მთლიანად მაინც მხოლოდ უმცირესობას ხვდება წილად. დანარჩენების ხვედრი კი მხოლოდ სილატაკეა. ჩვეულებრივ ისე ხდება, რომ მტაცებლები, უპატიოსნო და უმაქნისი ადამიანები იმარჯვებენ თავმდაბალ და უბრალო ადამიანებზე, რომლებსაც ყოველდღიური შრომით საზოგადოებისათვის უფრო მეტი სარგებლობა მოაქვთ, ვიდრე საკუთარი თავისათვის. ამიტომ მტკიცედ ვარ დარწმუნებული, რომ სახსრების განაწილება თანაბარი და სამართლიანი წესით და საერთო-სახალხო საქმეთა ჭეშმარიტად აღსრულება შესაძლებელია მხოლოდ კერძო საკუთრების სრული მოსპობის პირობებში, ხოლო თუ იგი მაინც დარჩება, კაცობრიობის საუკეთესო და უდიდესი ნაწილი ვერასოდეს მოიშორებს სილატაკის, მძიმე ტვირთს. მართალია, დასაშვებად მიმაჩნია, რომ იგი გარკვეული მოცულობით შეიძლება შემცირდეს კიდევ, მაგრამ გადაჭრით ვამტკიცებ, რომ სრულიად შეუძლებელია მისი მოსპობა. მაგალითად, შესაძლებელია დავადგინოთ შემდეგი: არავის არ უნდა ჰქონდეს გარკვეულ ოდენობაზე მეტი მიწის საკუთრების უფლება, თითოეულის ფულადი ქონების მოცულობა შესაძლებელია კანონით შეიზღუდოს; უნდა გამოიცეს გარკვეული კანონები, რომლებიც აუკრძალავს მეფეს მისი ხელისუფლების ბოროტად გამოყენებას, ხოლო ხალხს - ზედმეტ თავნებობას; შესაძლებელია აიკრძალოს თანამდებობათა შეძენა შესყიდვით ან ქრთამით. ამ თანამდებობებზე მუშაობას არ უნდა ერთვოდეს თან ხარჯები, ვინაიდან ეს ხელსაყრელ პირობებს შექმნის იმისათვის, რათა ეს ფული შემდეგ მოტყუებისა და ძარცვის გზით იქნეს ამოღებული და წარმოიქმნება იმის აუცილებლობა, რომ ამ თანამდებობებზე დაინიშნონ მდიდარი ადამიანები, მაშინ როდესაც ჭკვიანები გაცილებით უკეთ გაართმევენ თავს. ამგვარ კანონებს, ვიმეორებ ძალუმთ გააადვილონ და შეამსუბუქონ ეს უბედურებანი ზუსტად ისევე, როგორც საფენებს, რომლებითაც ჩვეულებრივ აყურებენ უიმედო ავადმყოფის ტკივილებს. მაგრამ სანამ თითოეულს აქვს კერძო საკუთრება, გამოჯანმრთელებისა და სხეულის მდგომარეობის გაუმჯობესების არავითარი იმედი არ არის. კიდევ მეტიც, ერთი რომელიმე ნაწილის გამოჯანმრთელებაზე ზრუნვისას შენც სხვა ნაწილების ჭრილობებსაც აღიზიანებ. ამრიგად, ერთის მკურნალობა იწვევს მეორის დაავადებას, რაკი არ შეიძლება ერთს მივუმატოთ რაიმე ისე, თუ მეორეს არ წავართვით“.

„მე კი პირიქით მეჩვენება, - შევეპასუხე რაფაელს, - არასოდეს არ შეიძლება მდიდრულად ცხოვრება იქ, სადაც ყველაფერი საერთოა. როგორ შეიძლება მივალწიოთ საზოგადოების სიუხვეს თუკი თითოეული თავს აარიდებს სამუშაოს, ვინაიდან მას აღარ იზიდავს კერძო მოგება, ხოლო მეორე მხრივ, სხვისი შრომის იმედი სიზარმაცეს უწყობს ხელს? მაშინ კი, როდესაც ხალხს დააშინებს სახსართა ნაკლებობა და ვერავითარი კანონი ვერ დაიცავს თითოეული მათგანის შენამენს, როგორც კერძო საკუთრებას ხომ არ შეწუხდებიან ადამიანები მუდმივი სისხლისღვრითა და არეულობით? და ეს მოხდება მით უფრო, რომ გაქრება ყოველგვარი პატივისცემა და მოწიწება ხელისუფლებისადმი, წარმოდგენაც არ შეიძლება იმისა, თუ რა ადგილი მოინახებოდა მათთვის ისეთ ადამიანებთან, რომელთა შორის არავითარი განსხვავება არ არის“.

„მე არ მიკვირს, - მიპასუხა რაფაელმა, - შენ რომ ასეთი აზრისა ხარ, ვინაიდან სრულიად არ შეგიძლია ასეთი მდგომარეობის წარმოდგენა, ანდა მას მცდარად წარმოიდგენ. მაგრამ შენ რომ ჩემთან ერთად ყოფილიყავი უტოპიაზე და თვითონ გაცნობოდი მათ ზნე-ჩვეულებებს და კანონებს, ისე როგორც გავაკეთე, მე რომელმაც იქ ხუთი წელი ვიცხოვრე და

არასოდეს წამოვიდოდი იქიდან, რომ არ მქონოდა სურვილი, ყველასათვის მეამბნა ამ ახალი სამყაროს შესახებ, შენ ადვილად აღიარებდი, რომ არსად სხვა ადგილას არ გინახავს სახელმწიფოს უკეთესი წესწყობილება ვიდრე იქაა“.

„რა თქმა უნდა, - შენიშნა პეტრე ეგიდიუსმა, - შენ ძნელად დამარწმუნებ იმაში, რომ ხალხისათვის უკეთესი წეს-წყობილებაა იმ ახალ სამყაროში ვიდრე ჩვენთვის ნაცნობში. ჩემი აზრით, აქ გონებაც უფრო ნაკლებად როდი უჭრით, სახელმწიფოებიც უფრო ძველია, ვიდრე იქ ხანგრძლივმა გამოცდილებამაც ბევრი სიკეთე შესძინა ხალხს ცხოვრების გასაუმჯობესებლად; აღარაფერს ვამბობ ზოგიერთ ჩვენს შემთხვევით აღმოჩენაზე რომლის გამოგონებასაც არავითარი გონება არ ეყოფოდა“.

„რაც შეეხება იმ სახელმწიფოების სიძველეს, - მიუგო რაფაელმა, - შენ უფრო სწორად განსჯიდი, თუ წაიკითხავდი იმ ქვეყნების ისტორიას, და თუ მას დაეჯერებ, მაშინ მათ ქალაქები გაცილებით უფრო ადრე ჰქონიათ, ვიდრე ჩვენს ხალხს. შემდგომ იქაც და აქაც შეიძლებოდა ყველაფერი ისე ყოფილიყო, რაც აქამდე გამოიგონა გონებამ ანდა შემთხვევით აღმოჩნდა. თუმცა, ვვარაუდობ, რომ, როგორც ჩვენ აღვემატებით მათ ნიჭიერებით, ისე ისინი გვისწრებენ თავიანთი გულმოდგინებითა და შრომისმოყვარეობით. მათი მატრიანების ცნობით, ჩვენი გემების ჩასვლამდე მათ არასოდეს არაფერი გაუგიათ ჩვენს საქმეებზე (ისინი ჩვენ ბუნობის ხაზს იქით მცხოვრებთ გვიწოდებენ). ჰო, მართლა, ოდესღაც ათას ორასი წლის წინათ, ერთი ხომალდი, რომელიც იქ ქარიშხლის გამო მოხვდა, უტოპიის კუნძულთან დაიღუპა; ნაპირზე გამოირიყნენ ვიღაც რომაელები და ეგვიპტელები, რომლებიც იქიდან აღარ დაბრუნებულან. დაუკვირდი, რა მოხერხებულად გამოიყენეს ეს შემთხვევა უტოპიელებმა. გამორიყული უცხოელებისაგან მათ შეისწავლეს ყოველგვარი ხელოსნობა, რაც კი რომის იმპერიაში არსებობდა და რასაც რაიმე სარგებლობის მოტანა შეეძლო; ანდა გაიცნეს რა ამ ხელოსნობის მხოლოდ ჩანასახები, მათ ხელმეორედ გამოიგონეს ისინი. უტოპიელებს კარგად გამოადგათ ის გარემოება, რომ ზოგიერთი ჩვენგანი მხოლოდ ერთხელ მოხვდა მათთან. ადრე რომ ასეთ შემთხვევას ჩვენთან მოეყვანა რომელიმე იქაური, ეს ისევე აღმოიფხვრებოდა ჩვენი მეხსიერებიდან, როგორც ალბათ, ჩვენს შემდგომ თაობებს დაავიწყდებათ ოდესღაც ჩემი აქ ყოფნა, და ისევე როგორც მათ პირველივე შეხვედრის შემდეგ შეითვისეს ყველაფერი რაც ჩვენს მიერ ასე კარგად იყო მოფიქრებული. ვფიქრობ, დიდი დრო გავა, სანამ შევიტყობდეთ რამეს მათი წამოწყებების შესახებ, თუნდაც ისინი ჩვენსას აღვმატებოდეს. ამის მიზეზი, ჩემი აზრით, მხოლოდ ისაა, რომ, მართალია, ჩვენ არ ჩამოუვარდებით მათ არც ჭკუით და არც საშუალებებით, მათ მაინც ჩვენთან შედარებით სახელმწიფოს მართვის უკეთესი ხერხები აქვთ და ხალხიც უფრო ბედნიერად ცხოვრობს“.

„ამიტომ, ჩემო რაფაელ, - ვუთხარი მე, - დაჟინებით გთხოვ აგვიწერე ეს კუნძული ენაწყლიანად, ნუ გამოიჩენ სიტყვაძუნწობას, დაწვრილებით მოგვიყევი ყველაფერი მისი მიწების, მდინარეების, ქალაქების, მოსახლეობის, ზნე-ჩვეულებების, დაწესებულებების, კანონებისა და, ბოლოს, ყველაფერი იმის შესახებ, რის გაცნობასაც ჩვენთვის სასურველად მიიჩნევ. შენ ხომ იცი, რომ ჩვენ ყველაფერი გვანტერესებს, რაც ახალი და უცნობია ჩვენთვის“.

„დიდი სიამოვნებით შევასრულებ ამას, - მიპასუხა მან, - რადგან ყველაფერი კარგად მახსოვს. მაგრამ ამას თავისუფალი დრო დასჭირდება“.

„მაშინ წავიდეთ, - ვთქვი მე, - ვისადილოთ, ხოლო შემდეგ კი

სურვილისამებრ გავანაწილოთ დრო“. ამაზე შევთანხმდით. ჩვენ შევედით სახლში სასადილოდ. სადილის შემდეგ კი დავბრუნდით, იმავე სკამზე ჩამოვსხედით და ვუბრძანეთ მსახურებს არავის შევეწუხებინეთ. მე და პეტრე ეგიდიუსმა დავიყოლიეთ რაფაელი, შეესრულებინა დანაპირები. როდესაც რაფაელმა დაინახა, როგორ ვიქეცით სმენად, ცოტა ხნის დუმილისა და ჩაფიქრების შემდეგ ასე დაიწყო:

პირველი წიგნის დასასრული

მეორე წიგნი

მეორე წიგნი საუბრისა, რომელიც გამართა რაფაელ ჰითლოდეცმა სახელმწიფოს საუკეთესო წყობილების თაობაზე ლონდონელ მოქალაქესა და ვიკონტან ტომას მორთან.

უტოპიელთა კუნძულის[75] შუა - ყველაზე უფრო განიერი ნაწილი ორას მილზეა გადაჭიმული, შემდეგ კი კარგად დიდ მანძილზე სიგანეში ცოტათი კლებულობს, ხოლო თავსა და ბოლოში თანდათანობით ვიწროვდება, რაც კუნძულს ნამგალა მთვარის სახეს აძლევს. ამ ბოლოების ფარგლით შემოხაზვა რომ შეიძლებოდეს, ხუთას მილიან გარშემოწერილობას მივიღებთ. მის რქებს შორის შეჭრილია დაახლოებით თერთმეტ მილიანი სიგრძის ყურე. მთელ ამ უზარმაზარ სივრცეზე ყოველი მხრიდან ხმელეთით გარშემორტყმული, ქარებისაგან დაცული წყალი დიდ ტბას წააგავს, რომელიც უფრო მდორეა, ვიდრე ბობოქარი. ამ ქვეყნის თითქმის მთელი შიდა ნაწილი ერთი დიდი ნავთსაყუდელია, რომელიც აქ მაცხოვრებელთა სარფიანი მოგებისათვის სულ სხვადასხვა მხარეს უშვებს ხომალდებს. ყურის შესასვლელი მეტად სახიფათოა, ერთის მხრივ, მეჩეჩების ხოლო მეორეს მხრივ, ფრიალო კლდეების გამო. თითქმის შუა გზაზე წყლიდან ამოშვერილია ერთი უხიმათო კლდე და მასზე აღმართულია კოშკი რომელშიც საგუმაგოა მოთავსებული. დანარჩენი კლდეები წყლითაა დაფარული და იქ ხიფათია ჩასაფრებული. მათ შორის გასასვლელეები მხოლოდ უტოპიელებმა იციან და ამიტომ შემთხვევით არ არის, რომ ვერც ერთი უცხოელი ვერ შევა ყურეში უტოპიელი გამყოლის დაუხმარებლად. ზოგჯერ თვით უტოპიელთათვისაც სახიფათოა იქ შესვლა და მაშინ ზოგიერთი ნიშანს ნაპირიდან აძლევენ მათ. თუ საჭიროების დროს ასევე სხვა ადგილებიდანაც ანიშნებენ, მაშინ ადვილად შეიძლება მოწინააღმდეგის ურიცხვი ხომალდთვრებულის განადგურება. კუნძულის მეორე მხარეს ბევრზე ბევრი ნავსადგურია. მაგრამ ხმელეთთან მისასვლელი ყველგან ისეა გამაგრებული ან ბუნებრივად, ან ხელოვნურად, რომ ხმელეთზე მყოფ მცირერიცხოვან დამცველებსაც კი შეუძლიათ მტრის ურიცხვი ლაშქრის უკუგდება.

როგორც თქმულებები გადმოგვცემენ და თვით ხმელეთის ფორმაც გვიჩვენებს ეს ქვეყანა ყოველთვის როდი ყოფილა ზღვით გარშემორტყმული, მაგრამ უტოპუსმა, რომლის მძლეეთამძლე სახელსაც ატარებს კუნძული, ადრე რომ აბრაქსა[76] ერქვა, გამარჯვებისთანავე ბრძანა გაეთხარათ თხუთმეტი მილი იქ სადაც ეს ქვეყანა კონტინენტს უერთდებოდა, და ხმელეთს გარშემო ზღვა შემოარტყა. ამავე უტოპუსმა თავისი მოუქნელი და ველური ბრბო განსწავლისა და განათლების ისეთ დონეზე აიყვანა, რომ ახლა იგი ამ მხრივ თითქმის ყველა სხვა მოკვდავთ აღემატება. ეს

სამუშაო რომ ვინმეს სამარცხვინოდ არ მიეჩნია, უტოპუსმა თავისი ჯარისკაცებიც ჩართო შრომაში. ერთდროულად შრომა მრავალ ადამიანზე რომ განაწილდა, იგი არნახული სისწრაფით დასრულდა. უტოპიელთა წარმატებამ განაცვიფრა და თანაც შეადრწუნა მეზობლები, რომლებიც თავიდან დასცინოდნენ ამ ვითომ უსარგებლო წამოწყებას.

კუნძულზე ორმოცდათოთხმეტი ქალაქია[77], ყველა ვრცელი და დიდებული; ენა, ზნე-ჩვეულებები, დაწესებულებები და კანონები მათ სავსებით ერთნაირი აქვთ. მათი მდებარეობაც ასევე ერთნაირია და ერთნაირადვე გამოიყურება, რამდენადაც ამის საშუალებას იძლევა ადგილმდებარეობა. ქალაქები ერთმანეთისაგან ოცდაოთხი მილითაა დაშორებული. ამავე დროს არცერთი ქალაქი არ არის ისე მოწყვეტილი, რომ მეორე ქალაქამდე ერთ დღეში არ შეიძლებოდეს ფეხით მისვლა.

ყოველი ქალაქიდან ყოველწლიურად სამი მოხუცი და გამოცდილი მოქალაქე ამაუროტში[78] იკრიბება კუნძულის საერთო საქმეთა განსახილველად. ამ ქალაქს უპირატესობა ენიჭება, ვინაიდან იგი ქვეყნის შუაგულში მდებარეობს და ამდენად მოსახერხებელია ყოველი მხრიდან მივლინებულთათვის მისადგომად. ქალაქებს შორის მინდვრები იმდენად მარჯვედაა განაწილებული, რომ თითოეულს ცალ-ცალკე ყოველი მხრიდან არანაკლებ ოცი მილი მიწა აკრავს, ხოლო ერთი მხრიდან გაცილებით მეტიც კია, და ეს სწორედ იმ მხრიდან, საიდანაც ქალაქები უფრო მეტად არიან დაშორებული ერთმანეთს. არცერთ ქალაქს არა აქვს თავისი საზღვრების გავრცობის სურვილი ვინაიდან მისი მკვიდრნი საკუთარ თავს მიწათმოქმედებად უფრო მიიჩნევენ, ვიდრე ამ სამფლობელოს ბატონ-პატრონებად. სოფლებში ყველგან მოხერხებულად არის განლაგებული სახლები, სადაც სოფლის მეურნეობისათვის საჭირო იარაღები ინახება. იქვეა დასახლებული მაცხოვრებლები, რომლებსაც მორიგეობით უწევთ იქ ცხოვრება. არცერთი სოფლის ოჯახის შემადგენლობა არ არის ორმოც კაცზე ნაკლები, მათ რიცხვში შედის აგრეთვე ორი მიწერილი მონა. ოჯახის სათავეში დგანან ოჯახის მამა და დედა, პატივცემული და ხანდაზმული ადამიანები, ხოლო ყოველი ოცდაათი ოჯახის სათავეში - ერთი ფილარქოსი[79]. თითოეული ოჯახიდან ოც-ოცი კაცი ყოველწლიურად ბრუნდება საცხოვრებლად ქალაქში. ეს ისინი არიან, ვინც სოფელში ორი წელი გაატარეს. მათ ადგილს იჭერენ ქალაქიდან ჩამოსულები რათა ხელმძღვანელობა გაუწიონ იმათ ვინც სოფელში ერთი წელი იცხოვრეს და ამიტომ უფრო მეტი გამოცდილება აქვთ სოფლის მეურნეობის საქმეებში. ამ ჩამოსულებმა შემდეგ წელს უნდა ასწავლონ სხვებს, რათა მოსავლის მოწევაში რაიმე შეცდომა არ მოხდეს, რაკი ყველა ერთნაირად ახალბედა და გამოუცდელი იქნება. თუმცა მიწათმოქმედთა გადახალისების ეს ხერხი საყოველთაოდ მიღებულია, რათა არავის არ მოუხდეს ნება-სურვილის გარეშე მეტად ხანგრძლივად ცხოვრება სოფლად, მკაცრ პირობებში, მაინც ისე ხდება, რომ ისინი, ვისაც ბუნებრივი მიდრეკილება აქვს სოფელში ცხოვრებისადმი, თავის მხრივ, იქ დარჩენას უფრო მეტ ხანს ითხოვს. მიწათმოქმედნი ამუშავენენ მიწას, კვებავენ პირუტყვს, იმარაგებენ შემას და ჩააქვთ ქალაქში როგორც მოეხერხებათ - ხმელეთით ან ზღვით. ისინი განუსაზღვრელი რაოდენობით, საოცრად უნარიანად ზრდიან წიწილებს. გამოსაჩეკად[80] კვერცხებს ქათმებს კი არ უწყობენ, არამედ ათასობით ცალს ერთად ათბობენ თანაბარი სითბოთი და ისე გამოჩეკენ. როგორც კი წიწილები გამოიჩეკებიან, ისინი უკვე უკან დასდევენ ადამიანებს, როგორც დედას, და, წარმოიდგინეთ, ცნობენ კიდევ მათ.

უტოპიელებს ძალიან ცოტა ცხენი ჰყავთ, თანაც მხოლოდ ფიცხნი და ისიც მხოლოდ ჯირითში ახალგაზრდობის გასაწვრთნელად[81]. მთელი სამიწათმოქმედო და ტვირთსაზიდი შრომა ხარებს ეკისრებათ. უტოპიელებს მიაჩნიათ რომ ხარები სირბილში მართალია, ჩამოუვარდებიან ცხენებს, მაგრამ გამძლეობით სჯობნიან მათ. გარდა ამისა, ხარებს ნაკლებად ემართებათ ავადმყოფობა, უფრო ადვილი შესანახი არიან და, როცა სამუშაოდ აღარ ივარგებენ, შეიძლება მათი საკვებად გამოყენება.

მარცვლეულიდან უტოპიელები მხოლოდ პურს ამზადებენ, ხოლო ღვინოს ყურძნისას ან მსხლისას მიირთმევენ, ბოლოსდაბოლოს, ხანდახან მხოლოდ სუფთა წყალს ხშირად კი თაფლის ან ალაოს ფესვის ნაყენს სვამენ. თუმცა მათ კარგად იციან (და თანაც მეტად ზუსტადაც), თუ რამდენი პური სჭირდება ქალაქს და მის მდებარე ოლქს, მაინც უფრო მეტი ნათესები აქვს და საქონელსაც მეტს ზრდიან, რადგან ვარაუდობენ, რომ ზოგს მეზობლებს შესთავაზებენ. ყველაფერს რაც მათ ესაჭიროებათ და რაც სოფლად არ არის, ისინი ქალაქიდან ღებულობენ, თანაც ძალიან ადვილად, ყოველგვარი სამაგიერო გაცვლის გარეშე. ქალაქში ისინი ყოველთვიურად თავს იყრიან დღესასწაულებზე როდესაც მოსავლის ალების დღე დგება, მიწათმოქმედთა ფილარქოსები შეატყობინებენ ქალაქის ხელისუფალთ, თუ რამდენი მოქალაქის გამოგზავნაა საჭირო და რადგან მუშაკთა ეს ლაშქარი დროზე და ზუსტად ვადაზე ცხადდება, ისინი თითქმის ერთ მზიან დღეში ამთავრებენ მოსავლის აღებას.

ქალაქებისა და უპირატესად ამაუროტისათვის

ის, ვინც გაეცნობა უტოპიის ერთ ქალაქს, უნდა ჩათვალოს, რომ დანარჩენებსაც გაეცნო, იმდენად ჰგვანან ისინი ერთმანეთს (ამას ხელს არ უშლის სხვადასხვა ადგილმდებარეობა) და რადგან ასეა, მეც აღვწერ ერთ რომელსამე მათგანს (დიდი მნიშვნელობა არც აქვს სახელდობრ რომელს). მაგრამ, აბა სხვა რომელია ამაუროტზე უკეთესი? არცერთი ქალაქი არაა მასზე ღირსეული, სხვები მას კიდევ ჩამოუვარდებიან, როგორც სენატის ადგილსამყოფელს; ამასთან არცერთ ქალქს არ ვიცნობ მასზე უკეთ, რადგან იქ ზედიზედ ხუთი წელი გავატარე.

ამაუროტი მთის დამრეც ფერდობზეა გაშენებული და თითქმის კვადრატის ფორმა აქვს. დაწყებული ბორცვის მწვერვალიდან ცოტა ქვემოთ, იგი სიგანეზე გადაჭიმულია ორ მილზე, მდინარე ანიდრუსამდე, მის ნაპირების გასწვრივ კი ქალაქის სიგრძე ცოტა უფრო მეტია. ანიდრუსი სათავეს იღებს ამაუროტიდან ოთხმოციოდე მილის ზევით, პატარა წყაროდან, რომელიც თანდათან იზრდება სხვა მდინარეთა შენაკადებით (მათგან ორი საშუალო სიდიდისაა). შემდეგ ანიდრუსი ზედ ქალაქის მისადგომებთან ნახევარ მილამდე ფართოვდება, კიდევ უფრო იზრდება და სამოც მილს რო გაივლის ოკეანეს უერთდება. მთელ ამ სიგრძეზე ქალაქსა და ზღვას შორის ქალაქის ზემოთ რამდენიმე მილზე ყოველ ექვს საათში ერთმანეთს ენაცვლება ზღვის მოქცევა და უკუქცევა. მოქცევის დროს ზღვა უკუაგდება მდინარეს და ანიდრუსის მთელ კალაპოტს ოცდაათი მილის მანძილზე თავისი ტალღებით ავსებს. აქ და ცოტა უფრო შორსაც იგი მლაშე წყლით ამღვრევს მდინარის ნაკადს; უკუქცევისას ისევ მტკნარი წყალი იმარჯვებს და ქალაქში უკვე სუფთად მიედინება თითქმის ზედა შესართავამდე.

მდინარის გაღმა-გამოდმა გაშენებულ ქალაქს აერთებს შესანიშნავ ქვის თაღებზე და არა ბოძებსა და ხიმინჯებზე გადებული ხიდი. იგი მოწყობილია ქალაქის იმ მხარეს, რომელიც ყველაზე უფრო დაშორებულია ზღვას, რომ ხომალდებს ხელი არ შეუშალოს. აქ მეორე მდინარეც არის, მართალია, პატარა, მაგრამ ლივლივა და ლამაზი. იგი იმავე მთაზე იწყება, რომელზედაც ქალაქია გაშენებული, მის ფერდობებზე მიედინება და ანიდრუსს უერთდება. რადგან ეს მდინარე ქალაქიდან არც თუ ისე შორიახლოს მოედინება, ამაუროტის მცხოვრებლებმა იგი ქალაქში შემოიყვანეს და ჯებირებით გაამაგრეს, რომელიმე მტრის თავდასხმის შემთხვევაში რომ არც წყლის გადაგდება შეიძლებოდეს და არც კალაპოტის შეცვლა ან დაბინძურება. აქედან აგურის მიღებით წყალი სხვადასხვა მიმართულებით მიედინება ქალაქის ქვედა ნაწილებში. იქ, სადაც ბუნებრივი პირობები ამის საშუალებას არ იძლევა, დიდ საცავებში აგროვებენ წვიმის წყალს, რომელიც ასევე გამოსადეგია.

ქალაქს მაღალი და ფართო გალავანი არტყია, კედლებში კოშკები და სათოფურებია ჩატანებული. სამი მხრიდან სიმაგრეები გარემოცულია უწყლო, მაგრამ ფართო, ღრმა და კვრინჩხნარით შემოღობილი თხრილით. მეოთხე მხრიდან თხრილს თვით მდინარეც ცვლის. მოედნები მოხერხებულადაა განლაგებული როგორც მგზავრობისათვის, ისე ქარისაგან დასაცავად. თვალში გეცემა სუფთა ქათქათა შენობების გრძელი უსასრულო რიგი, რომელიც მთელ ქუჩას გასდევს. მნახველის ყურადღებას იპყრობს სახლების გარეგნული იერი; კვარტალებს შუაზე ჰყოფს ოცი ფუტის სიგანის ქუჩა. სახლების უკანა მხარეს კი ქუჩის მთელ სიგრძეზე ფართო და ყოველი მხრიდან შემოღობილი ბაღებია. აქ ვერ ნახავთ ვერცერთ სახლს, ორი ორფრთიანი კარი რომ არ ქონდეს, ერთი წინიდან - ქუჩაში და მეორე უკნიდან - ბაღში გამავალი. ყველა კარი ადვილად იღება მსუბუქი მიწოლით და შემდეგ თვითონვე იხურება, შესვლა კი ყველას შეუძლია[82], იმდენად უცხოა კერძო საკუთრება. თვითონ სახლებსაც კი ისინი ყოველ ათ წელიწადში იცვლიან კენჭისყრით.

ბაღებს ამაუროტელები დიდად აფასებენ. აქ მოჰყავთ, ყურძენი, ნაირნაირი ხილი, ბაღებს ამშვენებს ბალახი და ყვავილები. ყველაფერი იმდენად კარგად არის მოვლილი და ისე გამოიყურება, რომ სხვაგან არსად მინახავს მსგავსი სიუხვე და სილამაზე. ისინი ასეთ გულმოდგინებას იჩენენ არა მარტო იმიტომ, რომ ეს სიამოვნებას ჰგვრით, არამედ იმიტომაც, რომ ქუჩები ერთმანეთს ეჯიბრებიან საკუთარი ბაღების მოვლაში. ყოველ შემთხვევაში ქალაქში უფრო საჭიროსა და თან ლამაზს ვერაფერს ნახავთ. ეტყობა, ქალაქის დამაარსებელი არაფერზე ისე არ ზრუნავდა, როგორც ამ ბაღებზე.

ამბობენ, ქალაქის მთელი ეს გეგმა თავიდანვე უტოპუსმა შეადგინაო, მაგრამ მოსაკაზმავი და სხვა მოსართავი საქმეები, რასაც, როგორც თვითონაც გრძნობდა, არ ეყოფოდა ერთი ადამიანის სიცოცხლე, მან თავის შთამომავლებს დაუტოვაო. ამიტომ მათ მატიანებში, რომლებსაც ისინი გულმოდგინედ ადგენენ და ფაქიზად ინახავენ დაწყებული კუნძულის დაპყრობიდან 1760 წლის მანძილზე, ნათქვამია, რომ წინათ აქ დაბალი სახლები იდგა და ქოხებსა და გომურებს წააგავდა, შენდებოდა განურჩევლად ყოველგვარი ხისაგან, კედლები თიხით იყო შელესილი, წვეტიანი სახურავები - თივით დაფარული. ახლა კი ყოველი სახლი თავისი ფორმით იპყრობს ყურადღებას, სამსართულიანია, კედლები ქვის ან აგურისაა, შიგნით კი ცარიელი

ადგილები მსხვილი ღორღითაა ამოვსებული. ბრტყელი სახურავები დაფარულია რაღაც საცხით, რომელიც, მართალია, იაფფასიანია, მაგრამ ისეთი შედეგნილობისაა, რომ არ ეშინია ცეცხლისა, ხოლო ავდარში ტყვიაზე უფრო გამძლეა. ფანჯრებს ქარისაგან იცავს მინა[83], რომელიც აქ ბევრზე ბევრია, ზოგჯერ მას თხელი ცხიმით პოხავენ ან ქარვის[84] ფენით ფარავენ. ეს ორმხრივ სასარგებლოა ჯერ ერთი, მეტ სინათლეს ატარებს და, მეორეც, ქარიც ვერ ატანს.

თანამდებობის პირთათვის

ყოველი ოცდაათი ოჯახი თავის მხრივ ყოველწლიურად ირჩევს თანამდებობის პირს, რომელსაც ადრე სიფოგრანტუსი[85] ერქვა, ხოლო ახალ ენაზე ფილარქოსი ჰქვია. ყოველ ათ ჰიფოგრანტუსს თავის ოჯახებიანად მეთაურობს კაცი, რომელსაც ძველებურად ტრანიბორუსი ერქვა, ახლა პროტოფილარქოსად იწოდება[86].

ყველა სიფოგრანტუსი, სულ ორასი კაცი, ფიცის დადების შემდეგ იმის თაობაზე, რომ აირჩევს ყველაზე ღირსეულს, ფარული კენჭისყრით შეარჩევს თავადს (ბატონს), სახელდობრ, ერთ-ერთს იმ ოთხი პიროვნებისაგან, რომლებსაც მათ ხალხი შესთავაზებს. ქალაქის მოსახლეობის ყოველი მეოთხედი ირჩევს ერთ ტრანიბორუსს და შუამდგომლობას უწევს სენატში. თავადის თანამდებობა უცვლელია მთელი მისი ცხოვრების მანძილზე, თუკი რაიმე მიდრეკილებას არ გამოავლენს, ტირანიისადმი. ტრანიბორუსები ყოველ სამ დღეში, ზოგჯერ, თუ გარემოება მოითხოვს, უფრო ხშირადაც დადიან სათათბიროდ თავადთან. ისინი ბჭობენ საზოგადო საქმეებზე და მყისვე შეწყვეტენ ხოლმე ყოველგვარ კერძო კამათს, თუკი ასეთი რამ წამოიჭრება. სიფოგრანტუსებიდან სენატში ყოველთვის უნდა იყოს ორი, თანაც ყოველდღე სხვადასხვა. არსებობს დადგენილება, რათა იმ საქმეთაგან რომლებიც რესპუბლიკას ეხება, არცერთი არ გადაიჭრას მანამ სანამ არ განიხილავს სენატი გადაწყვეტილების მიღებამდე სამი დღით ადრე. სისხლის სამართლის დანაშაულად ითვლება საზოგადო საქმეებზე გადაწყვეტილების მიღება სენატის ან სახალხო კრების გარეშე. ამბობენ, რომ ეს ღონისძიება შემოღებულია იმ მიზნით, რომ არავინ გაბედოს სახელმწიფო წყობილების შეცვლა თავადისა და ტრანიბორუსების შეთქმულებით ან ხალხის დამორჩილება ტირანიით. ამიტომ ყოველგვარი საქმე, რომელსაც რაიმე მნიშვნელობა აქვს, სიფოგრანტუსთა კრებას მოხსენდება, ისინი თავის მხრივ აცნობენ მას თავთავიანთი განყოფილებების ოჯახებს, შემდეგ ერთმანეთში ითათბირებენ და თავის გადაწყვეტილებას სენატს აცნობებენ[87]. ზოგჯერ საქმე გადააქვთ მთელი კუნძულის კრებაზე. სენატს, გარდა ამისა, აქვს ასეთი წესიც: არცერთი წინადადება არ გაარჩიონ იმ დღეს, როდესაც იგი პირველად შევა, და გადადონ სენატის მორიგ თათბირამდე, რათა არავინ არ წამოროშოს, რაც ენაზე მოადგება. ასე რომ არ იყოს, მაშინ კაცი იმაზე იფიქრებს, თუ როგორ დაიცვას თავისი პირველი გადაწყვეტილება და არა იმაზე, თუ რა უფრო არგებს სახელმწიფოს. მახინჯი და ცრუ პატივმოყვარეობის გამო იგი უფრო ადრე დათმობს საზოგადოებრივ კეთილდღეობას, ვიდრე, საკუთარ ნათქვამს, საკუთარ წარმოდგენას, ვითომდა მან ნაკლები იზრუნა იმაზე, რაზეც უნდა ეზრუნა, სახელდობრ - ელაპარაკა უფრო დინჯად და დაფიქრებულად, ვიდრე სულსწრაფად და ნაჩქარევად.

ყველა ქალსა და კაცს ერთი საქმე აქვს - მიწათმოქმედება, რომლისგანაც არავინ თავისუფლდება. პირიქით, მას ყველა სწავლობს ბავშვობიდანვე, ნაწილობრივ სკოლაში მოძღვრების დაუფლებების გზით, ნაწილობრივ კი ქალაქის ახლომახლო მინდვრებზე, სადაც ბავშვები თითქოსდა სათამაშოდ გაჰყავთ, მაგრამ ისე გამოდის, რომ იქ ისინი არამარტო აკვირდებიან გარემოს, არამედ ფიზიკური ვარჯიშის სახით მუშაობენ კიდევ.

მიწათმოქმედების გარდა (რასაც, როგორც უკვე ვთქვი, ყველა მისდევს), თითოეული სწავლობს ერთ რომელიმე საკუთარ ხელობას, ჩვეულებრივ ეს ან მატყლის დართვა ან სელის გამოყვანა, ან ქვისმთლელთა, მელითონეთა და ხის ოსტატთა ხელობა. შეიძლება ითქვას, რომ ამის გარდა მათ არა აქვთ სხვა რაიმე ისეთი, რომელიც აღნიშვნის ღირსი იყოს. რაც შეეხება ტანსაცმელს იმის გარდა, რომ იგი გარეგნულად განსხვავებულია სხვადასხვა სქესის პირთათვის, როგორც მარტოხელათათვის, ისე დაქორწინებულთათვის, მისი შეკერილობა ყოველთვის ერთნაირი, უცვლელი და მუდმივია, შესახედავად სავსებით მოსაწონი, მოძრაობისათვის მოსახერხებელი და სიცივესა და სიცხესთან შეფარდებული. და, აი, ამ ტანსაცმელს თითოეული ოჯახი თვითონვე იმზადებს. სხვა ხელობებიდან ისინი სწავლობენ კიდევ ერთ რომელიმეს, თანაც სწავლობენ არა მარტო კაცები არამედ ქალებიც. ქალები, როგორც შედარებით სუსტები, უფრო ადვილი საქმით არიან დაკავებულნი: ჩვეულებრივ ამუშავებენ მატყლს ან სელს. მამაკაცებს ეკისრებათ სხვა უფრო ძნელი ხელობები. ხშირად ახალგაზრდები მამის ხელობას მისდევენ, უმრავლესობას მისკენ ბუნებრივი მიდრეკილება აქვს. მაგრამ თუ ვინმეს სხვა საქმიანობისაკენ აქვს მისწრაფება, მათ ისეთ ოჯახს მიაშვილებენ, რომლის საქმიანობისადმიც იჩენს სიყვარულს. ასეთ შემთხვევაში არა მარტო ამ ახალგაზრდის მამა, არამედ ხელისუფლებაც ზრუნავს იმაზე, რომ იგი დარბაისელსა და კეთილშობილ ოჯახის უფროსს ჩააბარონ. გარდა ამისა თუ ვინმე ერთი ხელობის შესწავლის შემდეგ მოინდომებს მეორის შესწავლასაც, ამის ნებართვას ისევ იმავე გზით იღებს. როცა იგი ორივე ხელობას დაეუფლება, აირჩევს სამუშაოდ იმას რომელიც თვითონ უნდა, თუ, რა თქმა უნდა, სახელმწიფოს უფრო სხვა არ ესაჭიროება.

სიფოგრანტუსთა უმთავრესი და თითქმის ერთადერთი საქმიანობაა ზრუნვა და დაკვირვება იმაზე, რომ არავინ იჯდეს უქმად, თითოეული მუშაობდეს თავისი ხელობის მიხედვით, მაგრამ არა ადრე დილიდან გვიან ღამემდე[88], რათა საქონელივით არ დაიქანცოს, თორემ ასეთი მძიმე შრომა ხომ მონების ხვედრსაც კი აღემატება, თუმცა ასეთ ცხოვრებას ეწევიან მუშები ყველგან, გარდა უტოპიისა. უტოპიელები დღე-ღამეს ოცდაოთხ თანაბარ ნაწილად ყოფენ და სამუშაოს აქედან მხოლოდ ექვს საათს უთმობენ: პირველ სამ საათს შუადღემდე მუშაობენ, რის შემდეგაც სასადილოდ მიდიან, სადილის შემდეგ ნაშუადღევს ორ საათს ისვენებენ და ისე განაგრძობენ მუშაობას მეორე სამ საათს. სამუშაო დღეს ვახშმით ამთავრებენ ვინაიდან უტოპიელები პირველ სამ საათს შუადღიდან ითვლიან, დაახლოებით რვა საათისათვის უკვე დასაძინებლად მიდიან. ძილისთვის გამოყოფილი აქვთ რვა საათი. მთელი დრო რომელიც მუშაობას ძილსა და ჭამას შორის რჩება, თითოეულს შეუძლია საკუთარი შეხედულებისამებრ გამოიყენოს, მაგრამ არა განცხრომისა და მცონარობისათვის, არამედ იმისათვის, რომ, თავისი ხელობისაგან თავისუფალმა

აზრიანად, სარგებლიანად გამოიყენოს ეს საათები რაიმე სხვა საქმისათვის. ამ დროს უტოპიელთა უმრავლესობა მეცნიერების შესწავლას უთმობს[89]. ისინი ჩვეულებრივ ყოველდღიურად გარიჟრაჟამდე[90] აწყობენ საჯარო კითხვას. ეს საქმე მინდობილი აქვს მხოლოდ იმას ვინც საგანგებოდაა შერჩეული მეცნიერებისათვის. ამათ გარდა, ყველა წოდების როგორც კაცები, ისე ქალები, დიდ-დიდ ჯგუფად იკრიბებიან და მიდიან ზოგნი ერთ, ზოგნი კი მეორე საჯარო კითხვაზე დასასწრებად, იმის მიხედვით თუ რომლისკენ აქვთ მისწრაფება. თუმცა ისიც ხდება, რომ თუკი ვინმე არჩევს ეს დრო ისევე თავის ხელობას დაუთმოს, და ასეთი კი ბევრია, ვისაც რომელიმე მეცნიერების დაუფლების სურვილი არა აქვს, - მას არავინ უშლის ხელს ამაში, უფრო მეტიც ასეთი პიროვნება ქებასაც იმსახურებს, როგორც სახელმწიფოსათვის სარგებლობის მომტანი.

ნავახშმევს უტოპიელები ერთ საათს გართობაში ატარებენ: ზაფხულში ბაღებში, ზამთარში კი საერთო დარბაზებში, სადაც სადილობენ. აქ ისინი ან მუსიკას უსმენენ, ან სასიამოვნო საუბრებს მართავენ. რაც შეეხება კამათლებით თამაშსა და ამგვარ უაზრო და დამღუპველ გასართობებს, წარმოიდგინეთ მათ უტოპიელები არც კი იცნობენ. თუმცა მათთან გავრცელებულია ორი თამაში, რომელიც რაღაცით წააგავს ჭადრაკს. ერთი - ეს ციფრების ბრძოლა სადაც ერთი ციფრი იჭერს მეორეს, და მეორე თამაში, როდესაც მანკიერებანი სამხედრო წესით ებრძვიან ღირსებებს. ამ თამაშში მეტად მოხერხებულადაა მითითებული როგორც მანკიერებათა შორის არსებულ განხეთქილებაზე ისე მათ ერთსულოვნებაზე ღირსებების წინააღმდეგ ბრძოლაში, აგრეთვე იმაზე თუ რომელი მანკიერება რომელ ღირსებას უპირისპირდება, როგორ ძალებს უცხადებენ ისინი აშკარა ბრძოლას, როგორ ხრიკებით ეპარებიან შეფარვით, თავის მხრივ, რის დახმარებით ასუსტებენ ღირსებანი მანკიერებათა ძალებს, როგორი ხერხებით არიდებენ ისინი თავს თავდასხმას და, ბოლოს, როგორ იმარჯვებს ესა თუ ის მხარე.

მაგრამ აქ შემდგომი გაუგებრობის თავიდან ასაცილებლად აუცილებელია უფრო დაწვრილებით განვიხილოთ ერთი საკითხი. სახელდობრ, თუ მხოლოდ ექვსი საათი ეთმობა სამუშაოს, მაშინ აქედან როგორც ჩანს, შეიძლება ვივარაუდოთ, რომ ამის შედეგად პირველი მოთხოვნილების საგნების გარკვეული ნაკლებობა შეიმჩნევა. მაგრამ სინამდვილეში ეს ასე როდია; უფრო მეტიც, სამუშაო დროის ეს რაოდენობა არამარტო სავსებით საკმარისია ცხოვრებისათვის აუცილებელი მარაგის შესაქმნელად არამედ გარკვეულ დანაზოგსაც იძლევა. ეს გასაგები გახდება თუ თქვენ უფრო ღრმად ჩაუკვირდებით იმას, თუ სხვა ხალხების მოსახლეობის რა უზარმაზარი ნაწილი ცხოვრობს უსაქმოდ: ჯერ ერთი, ასე ცხოვრობს თითქმის ყველა ქალი - საერთო მასის ნახევარი, ხოლო თუ სადმე ქალები მუშაობენ ივარაუდება, რომ მაშინ იქ მამაკაცები ხვრინავენ. ამასთან, წარმოიდგინეთ, რა ვეებერთელა და რა უსაქმურ ბრბოს შეადგენენ მღვდლები და ეგრეთ წოდებული ბერები. ამას დაუმატეთ კიდევ მდიდრები, განსაკუთრებით მემამულეები, რომლებსაც, ჩვეულებრივ, კეთილშობილებსა და წარჩინებულებს უწოდებენ; მიუმატეთ მათი ჯალაბი, აღკაზმული უსაქმურების მთელი ეს ხროვა, ბოლოს ჯანმრთელი და საღ-სალამათი მათხოვრები, რომლებიც რაიმე ავადმყოფობის მომიზეზებით უსაქმურად ცხოვრობენ - და იძულებული გახდებით საბოლოო ჯამში აღიაროთ, რომ იმათი რაოდენობა, ვისი შრომითაც იქმნება ყოველივე ის, რითაც მოკვდავნი სარგებლობენ, გაცილებით ნაკლებია, ვიდრე თქვენ გეგონათ. დაფიქრდით ახლა, ამ მართლა

მშრომელი ადამიანებიდან რა ცოტანი არიან დაკავებული საჭირო და აუცილებელი საქმით. სახელდობრ, რადგან ჩვენ ყველაფერს ფულით ვზომავთ გარდაუვალია ბევრი ისეთი საქმიანობის გამოყენება სრულიად უაზრო და ზედმეტისა, რომლებიც მხოლოდ ფუფუნებასა და უზნეობას ემსახურება. მართლაც, მთელი ეს ბრბო რომელიც დაკავშირებული სამუშაოთი, რომ განაწილდეს იმ მეტად მცირერიცხოვანი ხელობების მიხედვით, რაც საჭიროა ბუნებრივ მოთხოვნილებათა სათანადოდ დასაკმაყოფილებლად, მაშინ ასეთი უხვი წარმოებისას რომელიც უეჭველად უნდა მოჰყვეს ამას შრომის ფასი, ცხადია, გაცილებით ნაკლები იქნება იმაზე, რაც მუშებს სჭირდებათ თავიანთი არსებობისათვის. მაგრამ ავიღოთ ყველა ის პიროვნება, რომელიც ახლა უსარგებლო ხელობებით არის დაკავებული და კიდევ ეს უსაქმურობისა და მცონარობისაგან დასავათებული ხალხის რიცხვი, რომელთაგან თითოეული სხვისი შრომით შექმნის იმდენ სანოვაგეს ნთქავს, რაც მის ორ დამამზადებელს ეყოფოდა. ასე რომ, ვიმეორებ, თუკი ამ პიროვნებათა მთელ ერთობლიობას სამუშაოს მივუჩინებთ და თანაც სასარგებლოს, ადვილად შევამჩნევთ, თუ რა ცოტა დრო იქნებოდა საჭირო ყველაფერი იმის საკმაოდ და უფრო ჭარბი რაოდენობით, საწარმოებლად, რასაც სარგებლიანობისა და მიზანშეწონილობის პრინციპები მოითხოვს (ამას მიუმატებთ კიდევ სიამოვნებანი, ოღონდ ნამდვილი და ბუნებრივი).

ყოველივე ამას უტოიპიაში ცხადად ადასტურებს თვით სინამდვილე. სახელდობრ, იქ მთელ ქალაქში თავისი ოლქიანად, იმ მამაკაცებისა და ქალებისაგან, რომლებიც თავიანთი ასაკითა და ძალ-ღონით შრომისათვის ვარგისი არიან, მხოლოდ ხუთასი კაცი თუა განთავისუფლებული. მათ შორის სიფოგრანტუსები, რომლებსაც, მართალია, კანონით აქვთ უფლება არ იმუშაონ, მაგრამ მაინც არ არიდებენ შრომას თავს, რათა თავისი მაგალითით დანარჩენებს შრომის ხალხის შემატონ. ამავე შეღავათით სარგებლობენ ისინი ვისაც ხალხი სასულიერო წოდების შუამდგომლობით და სიფოგრანტუსთა ფარული კენჭისყრით სამუდამოდ უბოძებს თავისუფლებას მეცნიერების საფუძვლიანად შესასწავლად. თუ რომელიმე ამ პირთაგან არ გაამართლებს მასზე დამყარებულ იმედს, მას უკან აბრუნებენ ხელოსნებთან და, პირიქით, ხშირად ხდება, რომ რომელიმე მუშა ისე ბეჯითად მეცადინეობს ზემოთ აღნიშნულ თავისუფალ საათებში და ისეთი სიბეჯითით გამოირჩევა რომ, მას ათავისუფლებენ თავისი ხელობიდან და მეცნიერთა თანრიგში გადაჰყავთ.

მეცნიერთა ამ წოდებიდან ირჩევენ ელჩებს, სასულიერო პირებს, ტრანიბორუსებს და, ბოლოს, თვით სახელმწიფოს მეთაურს, რომელსაც თავიანთ უძველეს ენაზე ბარზანს[91] უწოდებენ, ხოლო ახალზე - ადემუსს[92]. ვინაიდან უქმად თითქმის არავინ არ არის და ყველა სასარგებლო ხელობას მისდევს ადვილად გამოსათვლელია თუ რამდენ საჭირო საგანს ქმნიან ისინი და რა მცირე დროში. ჩემ მიერ მოტანილ მოსაზრებებს განამტკიცებს ის გარემოებაც, რომ აუცილებელ ხელობათა უმრავლესობა მათ გაცილებით ნაკლებ დროს ართმევს, ვიდრე სხვა ხალხებს. აი, მაგალითად, ავიღოთ მშენებლობის საქმე. შენობათა აგება ან შეკეთება ყველა ქვეყანაში ძალიან ბევრი მუშახელის განუწყვეტელ შრომას მოითხოვს, რადგან მფლანგველი მემკვიდრე თანდათან ანადგურებს მამის დანატოვარს, ამრიგად ის, რისი შენარჩუნებაც მინიმალური დანახარჯებით შეიძლებოდა მემკვიდრემ უნდა აღადგინოს დიდძალი თანხით. ესეც არ კმარა, ხშირად განებივრებული გემოვნების

ადამიანი უსაფუძვლოდ იწუნებს სახლს, რომელიც სხვას აურაცხელი თანხა დაუჯდა, და როდესაც შეუკეთებლად დარჩენილი ეს სახლი მოკლე დროში ინგრევა, პატრონი იშენებს სხვაგან მეორეს და ამაზე დიდ ფულს ხარჯავს. უტოპიელებს კი, რომლებსაც ყველაფერი მოწესრიგებული აქვთ და რომელთა სახელმწიფოც კეთილმოწყობით გამოირჩევა, ძალიან იშვიათად უხდებათ ახალი ნაკვეთის შერჩევა სახლების ასაშენებლად. მუშები არამარტო სწრაფად აღადგენენ უკვე დაზიანებულ შენობას, არამედ ისე აგებენ, რომ შეკეთება ნაადრევად აღარ დასჭირდეს. ამიტომ შრომის სულ მცირე დანახარჯებით შენობები ძალიან დიდხანს ძლებს და ამ ხელობის მუშები ძნელად შოულობენ სამუშაოს, თუ არ ჩავთვლით იმას, რომ ისინი იღებენ ბრძანებას, მასალა დროებით სახლში დაამზადონ, მაგალითად, გათალონ და გააპრილონ ქვები, რათა საქმე წინ წაიგდონ.

და კიდევ, მიაქციეთ ყურადღება იმას, თუ რა მცირე შრომა სჭირდებათ მათ საკუთარი ტანსაცმლის დასამზადებლად. ჯერ ერთი, ვიდრე ისინი სამუშაოზე არიან, ზერელედ იფარავენ ტანს ტყავით ან ბეწვით, რომელიც მათ თითქმის შვიდ წელს ჰყოფნით. როდესაც ისინი ქუჩაში გამოდიან, ზემოდან იცვამენ გრძელ მოსასხამს, რომელიც ზემოაღნიშნულ უხემ ტანსაცმელს ფარავს. ამ მოსასხამის ფერი ერთნაირია მთელს კუნძულზე და ამასთან ესაა შალის ბუნებრივი ფერი. ამიტომ აქ არა მარტო ყველაზე უფრო ნაკლები მაუდი იხარჯება, ვიდრე სადმე სხვაგან, მისი დამზადებაც გაცილებით ნაკლებ ხარჯებს მოითხოვს. სელის დამზადებაზე ხომ კიდევ უფრო ნაკლები შრომა იხარჯება და ამიტომ მას უფრო ფართოდ იყენებენ. მაგრამ ტილოში უპირატესობას პირველყოვლისა სითეთრეს ანიჭებენ, ხოლო შალის ქსოვილში - მხოლოდ და მხოლოდ სისუფთავეს. უფრო ნატიფ ნამუშევარს აქ არავითარი ფასი არა აქვს. ამის შედეგად მათთან თითოეული კმაყოფილდება ერთი ხელი ტანსაცმლით და ამასთან ჩვეულებრივ ორი წლის განმავლობაში ყოფნის. სხვა ქვეყნებში კი ერთ ადამიანს არ ყოფნის ოთხი ან ხუთი ხელი შალი ზედა ტანსაცმელი და ისიც ნაირფერი, და ამასთან ერთად აქვთ კიდევ ამდენივე აბრეშუმის პერანგი, ზოგიერთ ნებიერას კი ათიც არ ჰყოფნის. უტოპიელს არავითარი საფუძველი არ აქვს ტანსაცმელზე მოთხოვნილებისათვის: რამდენიმე ხელი ტანსაცმელი უკეთ ვერ დაიცავს სიცივისაგან და არც სხვაზე უფრო მორთულ-მოკაზმულად ჩაითვლება.

ვინაიდან უტოპიელები სასარგებლო შრომით არიან დაკავებული და მის შესასრულებლად საკმარისია მხოლოდ მცირე შრომა, მათ ყველაფერი უხვად აქვთ. ამის შედეგად მოსახლეობის დიდ რაოდენობას დრო რჩება და ხანდახან ქალაქგარეთ უხდება გასვლა გზების შესაკეთებლად, თუ ისინი გაფუჭებულია. ძალიან ხშირად, როცა არ არის რაიმე ამგვარი სამუშაო, სახელმწიფო აცხადებს სამუშაო საათების ნაკლებ რაოდენობას. ხელისუფლებას სულაც არ სურს იძულებით ამუშაოს ხალხი უფრო მეტ ხანს ვიდრე საჭიროა. ამ მოვალეობის დაწესება პირველ ყოვლისა იმ მიზანს ემსახურება, რომ რამდენადაც ეს შესაძლებელია საზოგადოებრივი საჭიროების თვალსაზრისით, ყოველი მოქალაქე უზრუნველყოფილი იყოს დროის მაქსიმალური ოდენობით, რათა ფიზიკური მონობის შემდეგ დრო გამოიყენოს სულიერი სიამოვნებისა და განათლებისათვის. ამაშია მათი აზრით, ჰარმონია, ცხოვრების ბედნიერება.

ახლა კი ვფიქრობ, უკვე დროა მოგიყვეთ, თუ როგორი ურთიერთობა აქვთ ცალკეულ მოქალაქეებს ერთმანეთში, რანაირია მთელი ხალხის ურთიერთკავშირი და როგორ ნაწილდება მათთან ყველა საგანი. პირველ ყოვლისა ვილაპარაკებ ქალაქებზე. ყოველი ქალაქი შედგება ოჯახებისაგან: ეს ოჯახები უმრავლეს შემთხვევაში აერთიანებენ ნათესავებს. სათანადო ასაკს მიღწეული და გათხოვილი ქალები საცხოვრებლად ქმრის სახლში გადადიან, ხოლო ვაჟიშვილები და შემდეგ შვილიშვილებიც ოჯახში რჩებიან და ნათესავთა შორის უხუცესს ემორჩილებიან, თუკი მისი გონებრივი შესაძლებლობანი არ შესუსტდა სიბერის გამო (მაშინ მას ცვლის მისი მომდევნო ოჯახის წევრი ასაკის მიხედვით).

ქალაქების მეტისმეტად მეჩხერად დასახლების ან ჭარბი მოსახლეობის თავიდან ასაცილებლად მიღებული სიფრთხილის ასეთი ზომა: ყოველ ოჯახში, რომელთა რაოდენობა თითოეულ ქალაქში, მიდამოთა გარდა, ექვს ათასს შეადგენს, არ უნდა იყოს ათზე ნაკლები და თექვსმეტზე მეტი მოზრდილი. რაც შეეხება ბავშვებს, მათი რაოდენობა არავითარ აღრიცხვას არ ექვემდებარება. ამ ზომების დაცვა ადვილია მცირერიცხოვან ოჯახებში იმათი გადაყვანით, ვინც ზედმეტია მრავალრიცხოვანებში. ხოლო თუ ქალაქის გაზრდა საერთოდ დაარღვევს სათანადო ზღვრებს, უტოპიელები ამის ხარჯზე შეავსებენ სხვა ქალაქების მცირერიცხოვნობას. თუ ხალხის რაოდენობა ძალიან გაიზრდება მთელს კუნძულზე, ისინი ირჩევენ მოქალაქეებს ყოველი ქალაქიდან და თავიანთი კანონების მიხედვით აწყობენ კოლონიას უახლოეს მატერიკზე, სადაც კი უცხოელებს ზედმეტი და თანაც დაუმუშავებელი მიწა აქვთ. ამასთან უტოპიელები მოიხმობენ უცხოელთ და ეკითხებიან, თანახმანი არიან თუ არა, მათთან ერთად იცხოვრონ. თანხმობის შემთხვევაში უტოპიელები ადვილად ეთვისებიან მათ, სარგებლობენ რა ერთი და იმავე წესითა და ჩვეულებებით. ეს კი სასიკეთოა როგორც ერთი, ისე მეორე ხალხისათვის. თავიანთი წესებით უტოპიელები აღწევენ იმას, რომ ის მიწა, რომელიც ადრე მწირი და ხრიოკი ეჩვენებოდათ, ახლა ორივესთვის მსუყედ იქცევა. ხოლო იმ შემთხვევაში, თუ ადგილობრივი მკვიდრნი უარს ამბობენ უტოპიელთა წესების მიხედვით ცხოვრებაზე, ეს უკანასკნელნი განდევნიან მათ თავისთვის არჩეული საზღვრებიდან. წინააღმდეგობის შემთხვევაში უტოპიელები ომს იწყებენ. მათ ომისათვის სავსებით სამართლიან მიზეზად მიაჩნიათ ის შემთხვევა როდესაც რომელიმე ხალხი, რომელიც ტყუილად და უმაქნისად ფლობს მიწა-წყალს, არც თვითონ სარგებლობს და არც სხვას ასარგებლებს, უარს ეუბნება სარგებლობასა და გამოყენებაზე იმათ, ვინც ბუნების კანონით მისგან უნდა იკვებებოდეს. თუ რაიმე უბედური შემთხვევის გამო თვით უტოპიელთა ზოგიერთი ქალაქის მოსახლეობა შემცირდება იქამდე, რომ მისი შევსება არ ხერხდება კუნძულის სხვა ნაწილებიდან (ეს კი, როგორც ამბობენ სულ ორჯერ მოხდა სასტიკი და მძვინვარე შავი ჭირის შემდეგ), იგი შეივსება კოლონიიდან უკან გადმოსახლებულ მოქალაქეთა ხარჯზე. უტოპიელებს ურჩევნიათ კოლონიებს შეელიონ, ვიდრე კუნძულის რომელიმე ქალაქი დასუსტდეს.

ისევ ვუბრუნდები მოქალაქეთა ერთად ცხოვრების წესებს. როგორც უკვე ვთქვი, ოჯახს სათავეში უდგას უხუცესი. ცოლები ემსახურებიან ქმრებს[93], შვილები - მშობლებს და საერთოდ - უმცროსები უფროსებს. ყოველი ქალაქი დაყოფილია ოთხ თანაბარ ნაწილად. თითოეული ნაწილის შუაგულში არის ბაზარი, სადაც ყველაფერია. თითოეული ოჯახის ნახელავი მიაქვთ იქ, საგანგებო სახლებში, და

სახეობათა მიხედვით ცალობით ანაწილებენ საწყობებში. იქიდან კი თითოეული ოჯახის უფროსი ითხოვს, რაც სჭირდება, და უფულოდ ყოველგვარი სასყიდლის გარეშე მიაქვს შინ. რატომ უნდა უთხრან მას უარი? ჯერ ერთი, ყველაფერი ხომ საკმაოდ უხვადაა და, მეორეც, არ არსებობს იმის არავითარი საფრთხე, რომ ვინმე მოითხოვს იმაზე მეტს, რაც სჭირდება. რატომ უნდა ვიფიქროთ, რომ ზედმეტს მოითხოვს ის, ვინც დარწმუნებულია, რომ არასდროს არაფერი დააკლდება? მართლაც და, ყოველ ცოცხალ არსებაში და მით უმეტეს ადამიანში ხომ სიხარბე და მტაცებლობა იმიტომ იღვიძებს, რომ სიღარიბისა ეშინია ანდა ეამაყება, როცა თავისი ქონებით სხვებს აღემატება. აი, ასეთი რამ უცხოა უტოპიელებისათვის.

ჩემ მიერ აღნიშნულ ბაზრებს მიეკუთვნება სურსათის ბაზრები, სადაც არა მარტო ბოსტნეული, ხილი და პური გამოაქვთ, არამედ თევზიცა და ხორცეულიც - ოთხეფხა პირუტყვისა და ფრინველის საჭმელად ვარგისი ყველა ნაწილი. საინტერესოა, რომ უტოპიელებს ქალაქგარეთ მოწყობილი აქვთ საგანგებო ადგილები, სადაც მდინარის წყალი ჩარეცხავს ყოველგვარ ჭუჭყსა და სიბინძურეს. მათ იქიდან ჩამოაქვთ ხორცეული მას შემდეგ, რაც მსახურები დაკლავენ და გაატყავებენ პირუტყვს. უტოპიელებს აკრძალული აქვთ საქონლის დაკვლა - გატყავება ადგილებზე, ვინაიდან ამით, მათი აზრით, თანდათანობით ქრება გულმოწყალება, ჩვენი ბუნების ყველაზე უფრო ადამიანური გრძნობა. გარდა ამისა, კრძალავენ ქალაქში ყოველგვარი სიბინძურისა და ჭუჭყის შემოტანას, რადგან ლპობა აბინძურებს ჰაერს და შეიძლება სხვადასხვა ავადმყოფობაც გამოიწვიოს.

გარდა ამისა ყველა ქუჩაზე დგას ერთმანეთისაგან ტოლი მანძილით დაშორებული ფართო სასახლე. ყოველ მათგანს თავისი სახელი ჰქვია. მათში სიფოგრანტუსები ცხოვრობენ. თითოეულ ამ სასახლეზე მიწერილია ოცდაათი ოჯახი, თხუთმეტ-თხუთმეტი ორივე მხრიდან. ამ ოჯახებმა აქ უნდა ისადილონ. თითოეული სასახლის სამზარეულოს გამგე გარკვეულ საათებში მიდის ბაზარში და მოაქვს მათთვის საკმარისი საკვები.

უტოპიელები პირველ რიგში ზრუნავენ ავადმყოფებზე რომლებსაც საზოგადოებრივ დაწესებულებებში მკურნალობენ. მათ ოთხი საავადმყოფო[94] აქვთ ქალაქიდან მცირე მანძილის დაშორებით. ეს საავადმყოფოები იმდენად დიდებია, რომ ამდენსავე დაბას შეიძლება გაუთანაბრდეს. ეს იმიტომ, რომ, ჯერ ერთი, ავადმყოფებმა, რაც არ უნდა ბევრნი იყვნენ, ვიწროდ და ამიტომ მოუხერხებლად არ იგრძნონ თავი, ხოლო მეორეც ის, რომ გადამდები დაავადებით შეპყრობილნი რაც შეიძლება შორს იყვნენ ჯანმრთელებისაგან. საავადმყოფოები შესანიშნავადაა მოწყობილი, აღჭურვილია ყველაფრით, რაც კი ჯანმრთელობის აღსადგენადაა საჭირო; მოვლა აქ მეტად სათუთი და გულმოდგინეა, ავადმყოფებს თავს დასტრიალებენ ყველაზე უფრო გამოცდილი ექიმები. ამიტომ, მართალია, აქ არავის არ გზავნიან იძულებით, მაგრამ მთელ ქალაქში არ მოიძებნება ვინმე, რომელსაც ავადმყოფობის შემთხვევაში იქ ყოფნა არ ერჩივნოს სახლში წოლას.

მას შემდეგ, რაც საავადმყოფოს სამზარეულოს გამგეები მიიღებენ საკვებს ექიმთა დანიშნულების მიხედვით, ყველაფერი საუკეთესო თანაბრად ნაწილდება სასახლეებზე, სიფოგრანტუსთა რაოდენობის შესაბამისად, მათ შორის იგულისხმება აგრეთვე თავადი, მღვდელმთავარი, ტრანიბორუსები, ელჩები და ყველა უცხოელი

(თუკი ასეთები არიან; ჩვეულებრივ კი ისინი ცოტანი არიან და თანაც იშვიათად; მაგრამ როდესაც კი გამოჩნდებიან, მათთვისაც აქვთ კეთილმოწყობილი სახლები).

სასახლეებში სადილისა და ვახშმისათვის დადგენილ საათებში იკრიბება მთელი სიფოგრანტია, მათ სპილენძის საყვირი მოუხმობს (გარდა ჰოსპიტალებში ან სახლებში მწოლიარე ავადმყოფებისა). არავის არ ეკრძალება სასახლეში სადილობის შემდეგ ბაზრიდან საკვების მოტანა სახლისათვის, რადგან ყველამ იცის, რომ არავინ არ აკეთებს ამას ტყუილუბრალოდ. მართლაც და, თუმცა არავის არ ეკრძალება სახლში სადილობა, არავინ არ აკეთებს სიამოვნებით, ვინაიდან უზნეობად და სისულელედ ითვლება დროის დახარჯვა უარესი საკვების დამზადებაზე, როდესაც სასახლეში, რომელიც ასე ახლოსაა, მზადაა მდიდრული და უხვი სუფრა. ამ სასახლეში ყველა სამუშაოს, უფრო ჭკუყიანსა და ძნელს მონები ასრულებენ. მაგრამ საკვების მომზადება და აგრეთვე საერთოდ მთელი სადილის გაძლოლა ეკისრებათ მხოლოდ ქალებს, თანაც მორიგეობით ყოველი ოჯახიდან. სადილის დროს მეინახენი შემოუსხდებიან სამ ან მეტ მაგიდას, იმის მიხედვით, რამდენი არიან. მამაკაცები სხდებიან შიგნითა მხარეს, კედლის გასწვრივ, ხოლო ქალები - მოპირდაპირე მხარეს, რათა იმ შემთხვევაში თუ მათ რაიმე შეემთხვათ მოულოდნელად (ეს კი ხანდახან ემართებათ ორსულებს), შეეძლოთ ადგომა და მიძებთან წასვლა სხვების შეუწყუხებლად.

მიძები ცალკე სხედან ჩვილ ბავშვებთან ერთად საგანგებოდ გამოყოფილ სასადილოში, სადაც ყოველთვის არის ცეცხლი და სუფთა წყალი, ზოგჯერ კი აკვნებიც დგას რათა შეიძლებოდეს იქ ჩვილ ბავშვთა ჩაწვენა ან, სურვილისამებრ, სხვებისაგან გამოხსნა, ცეცხლთან ახლოს დასვენება, გართობა. ყოველი დედა თვითონ კვებავს თავის შვილს, სანამ ცოცხალია ან ავადმყოფობა არ შეუშლის ხელს. თუ ასეთი რამ მოხდება, სიფოგრანტუსთა ცოლები ეძებენ ძიძას, რაც არაა ძნელი: ქალები რომლებსაც ამ მოვალეობის შესრულება შეუძლიათ, უფრო დიდი სიამოვნებით ასრულებენ მას, ვიდრე სხვა რომელიმე სამუშაოს, რადგან ყველას ქებას იმსახურებენ თანაგრძნობისათვის და აღზრდილიც თავის ძიძას დედად მიიჩნევენ. ძიძათა თავშესაფარშია ყველა ბავშვი რომელსაც ჯერ ხუთი წელი არ შესრულებია. რაც შეეხება დანარჩენ არასრულწლოვანებს, რომელთა შორისაც ირიცხება ორივე სქესის ყველა ახალგაზრდა, რომელსაც საქორწინო ასაკი არ შესრულებია, ისინი ან ემსახურებიან სუფრის წევრებს, ანდა, თუკი მათ ეს თავიანთი წლოვანების გამო არ შეუძლიათ, იქ მდუმარედ დგანან. ისინი იკვებებიან იმით, რასაც მათ მაგიდებთან მსხდომნი მიაწოდებენ, რადგან სხვა გარკვეული დრო არა აქვთ გამოყოფილი ჭამისათვის. პირველი მაგიდის შუა ადგილი უმაღლესად ითვლება და, ვინაიდან ეს მაგიდა სასადილო ოთახის ბოლოში გარდიგარდმო დგას, იქიდან მოჩანს მთელი შეკრება. აქ სხედან სიფოგრანტუსი და მისი ცოლი, მათ გვერდით ზის ორი უხუცესი რადგან ყველა მაგიდასთან ოთხ-ოთხნი სხედან. თუ ამ სიფოგრანტიაში ტაძარიც არის, მაშინ მღვდელი და მისი მეუღლე სხდებიან სიფოგრანტუსთან, ისე რომ ისინი სუფრის თავში მოხვდნენ. სუფრას ორივე მხრიდან უზის ახალგაზრდობა, შემდეგ ისევ მოხუცები სხედან და ამგვარად, მთელ სახლში ტოლები ერთად არიან თავმოყრილი და თანაც შეთვისებული სხვა ასაკის ადამიანებთან. ამ ჩვეულების მიზეზი, როგორც ამბობენ, არის შემდეგი: ვინაიდან სუფრასთან დაუმვებელია რაიმე ისეთის გაკეთება ან თქმა, რაც არ შეეფერება უხუცესთა საზოგადოებას, მათი დარბაისლობისა და მათდამი პატივისცემის გამო, ეს აკავებს ახალგაზრდობას

უადგილო და უხემ სიტყვა-პასუხის ან უკადრისის ქცევებისაგან. აქ კერძები რიგდება არა მიყოლებით, დაწყებული პირველი ადგილიდან, არამედ ყველაფერ საუკეთესოს პირველ რიგში მიაერთმევენ უხუცესებს, რომელთა ადგილები საგანგებოდაა შერჩეული, ხოლო შემდეგ თანაბრად მიუტანენ სხვებსაც. უხუცესნი, თავის მხრივ, თავიანთი შეხედულებისამებრ ურიგებენ გარშემო მსხდომთ ნუგბარს, როცა მარაგი შედარებით ნაკლები აქვთ და უნდათ ყველას ამყოფინონ. ამრიგად, ხანდაზმულებს შენარჩუნებული აქვთ მათი კუთვნილი პატივისცემა და ყველანი კმაყოფილნი რჩებიან.

ყოველი სადილი და ვახშამი იწყება რაიმე დამრიგებლური ხასიათის, თანაც ძალიან მოკლე კითხვით, რათა თავი არავის მოაბეზრონ. ამის შემდეგ უფროსები გააბამენ დინჯ საუბარს, არც უსიამოვნო მოსასმენს და არც გონებამახვილობას მოკლებულს. ისინი სულაც არ ანდომებენ ჭამის მთელ დროს გრძელ-გრძელი ამბების თხრობას, პირიქით, უფრო დიდი სიამოვნებით უსმენენ ახალგაზრდებს და იწვევენ კიდევაც მათ საუბარში. ამით მათ სურთ გაიგონ თითოეულის შესაძლებლობანი და ნიჭიერება, რაც სუფრასთან ძალდაუტანებელ ურთიერთობაში უფრო მყდავნდება. სადილი საკმაოდ ხანმოკლეა, ვახშამი კი უფრო ხანგრძლივი, რადგან პირველს მოსდევს შრომა, ხოლო მეორეს - ძილი, მოსვენება, რაც უტოპიელთა შეხედულებით უფრო სასარგებლოა საჭმლის მონელებისათვის. აქ არც ერთი ვახშამი არ ტარდება მუსიკის გარეშე, სადილზე დასაყოლებლად ყოველთვის აქვთ ტკბილეული. ისინი ანთებულ სურნელოვან საკმევებს ასხურებენ ირგვლივ და საერთოდ ყველაფერს აკეთებენ, რასაც ჭამის დროს მხიარული განწყობის შექმნა შეუძლია. უტოპიელები განსაკუთრებული მონდომებით იზიარებენ იმ მოსაზრებას, რომ არ შეიძლება არც ერთი სახის სიამოვნების აკრძალვა, თუ იგი რაიმე უსიამოვნების მიზეზი არ გახდება.

აი, როგორ არის მოწყობილი უტოპიელთა თანაცხოვრება ქალაქებში; სოფლებში კი სადაც ოჯახები უფრო შორ-შორს არიან ერთმანეთისაგან, თითოეული ოჯახი თავის სახლში სადილობს და ვახშმობს. აქ სურსათის ნაკლებობაზე ლაპარაკიც არ შეიძლება - სოფელი ხომ თვითონ კვებავს ქალაქს.

უტოპიელთა მოგზაურობისათვის

თუ რომელიმე უტოპიელი მოისურვებს სხვა ქალაქებში მცხოვრები მეგობრების მონახულებას ან უბრალოდ ამ ადგილების დათვალიერებას, ამაზე თანხმობას ადვილად მიიღებს თავისი სიფოგრანტუსისა და ტრანიბორუსისაგან, რა თქმა უნდა, რაიმე ხელისშემშლელი მიზეზი თუ არ იქნა. მოქალაქეთა გარკვეული ჯგუფები ერთდროულად გადიან სამოგზაუროდ. გამგზავრებისათვის გამგებლის ნებადამრთველი ბარათით, რომელშიც დაბრუნების დღეცაა აღნიშნული, ისინი ღებულობენ ოთხთვალას და სახელმწიფო მონას რათა მან გარეკოს ხარები და მოუაროს მათ. თუ მოგზაურთა შორის ქალები არ არიან, ოთხთვალას, როგორც ზედმეტ ბარგს უკან აბრუნებენ. თუმცა სამოგზაუროდ წასულებს თან არაფერი მიაქვთ, მაინც უზრუნველად არიან, ვინაიდან თავს ყველგან ისე გრძნობენ როგორც საკუთარ სახლში. თუ რომელიმე ადგილზე ისინი ერთ დღეზე მეტხანს შეყოვნდებიან, თითოეული ხელს კიდებს თავის ხელობას და ამავე ხელობის მასპინძლებისაგან დიდ მოწონებას იმსახურებს. მაგრამ თუ ვინმე საკუთარი

სურვილით გადალახავს თავის საზღვარს, მაშინ მმართველის ნებართვის უქონლობის გამო დაკავებულს ყოველნაირად არცხვენენ; მას, როგორც გაქცეულს, აბრუნებენ და სასტიკად სჯიან, და თუ მეორედ გაბედავს წასვლას - მონად აქცევენ.

თუ ვინმე თავისი ქალაქის შემოგარენში ხეტიალს მოისურვებს, არავინ დაუშლის, ოღონდ ნებართვა ქონდეს ოჯახის უფროსისაგან და თანხმობა მეუღლისაგან. ეს, კია, რომელ სოფელშიც უნდა მივიდეს, არსად არ გაუმასპინძლებიან, სანამ ნახევარი დღის სამუშაოს არ შეასრულებს (ანდა იმდენს, რამდენის გაკეთებაც არის დათქმული სამხრობამდე). ამ პირობით მას თავისი ქალაქის ახლომახლო ყველგან შეუძლია გასვლა, რადგან ნაკლები სარგებლობა როდი მოაქვს ქალაქისათვის, ვიდრე შინ რომ დარჩენილიყო.

როგორც ხედავთ, უსაქმურობისა და სიზარმაცისათვის უტოპიელებს არავითარი საბაზი არ გააჩნიათ. იქ არ არის არც ერთი სამიკიტნო, არც ერთი ლუდხანა, სამეძაო, არ ყოფილა მოსყიდვის არცერთი შემთხვევა, ნაძირალათა არც ერთი ბუდე, არც ერთი უკანონო თავყრილობა. ისინი ერთად არიან და ამიტომ დროს ჩვეულებისამებრ მუშაობაში ან გონივრულ დასვენებაში ატარებენ.

ამ დაკანონებული ჩვეულების ბუნებრივი შედეგია ის, რომ ამ ხალხს ყოველთვის ჭარბი საქონელი აქვს, და რადგან თითოეულ კაცზე ყველაფერი ნაწილდება. გაჭირვებული და ღარიბი საბოლოოდ აღარავინ რჩება. როგორც კი ამაუროტის სენატში (რომლის შემადგენლობაში, როგორც აღვნიშნეთ, ყოველწლიურად თითოეული ქალაქიდან სამ-სამ წარმომადგენელს ირჩევენ) შეიტყობენ, რომ რაიმე სანოვავე სადღაც ზედმეტია ან, პირიქით ნაკლები, ცდილობენ მდგომარეობა გააწონასწორონ. ეს კეთდება უანგაროდ - სანაცვლოდ არაფერს ითხოვენ მათგან, ვისაც რაიმეს აჩუქებენ. რაკი თავიანთ ნამეტს რომელიმე ქალაქს აძლევენ და სამაგიეროს არ იღებენ, საჭიროების შემთხვევაში ისინი სხვა ქალაქებიდან ღებულობენ ყველაფერს, თანაც ასევე უანგაროდ. ამგვარად, მთელი კუნძული თითქოსდა ერთ ოჯახად ცხოვრობს.

როდესაც უტოპიელები თავიანთთვის საკმარისად გაირჯებიან (და ამას ორი წლის სურსათის მარაგის დაგროვების შემდეგ მიიჩნევენ საჭიროდ, რადგან არ იციან, როგორი მოსავალი ექნებათ გაისად), დარჩენილი ჭარბი საქონელი - ხორბალი, თაფლი, მატყლი, სელი, ხე-ტყე, მოწეულის ქსოვილები და ტანსაცმელი, ცვილი, ქონი, ტყავი და კიდევ დამატებით დიდძალი პირუტყვი სხვა ქვეყნებში გააქვთ. ამ საქონლის მეშვიდედ ნაწილს ისინი იქაურ უქონელ მცხოვრებთ უტოვებენ საჩუქრად, დანარჩენს კი ზომიერ ფასად ყიდიან. ასეთი ვაჭრობის შედეგად მათ თავიანთ ქვეყანაში შეაქვთ არა მხოლოდ ის საქონელი, რომელიც სჭირდებათ (ასეთი კი მხოლოდ და მხოლოდ რკინაა), არამედ დიდძალი ოქრო და ვერცხლი. ამ წესის ხანგრძლივად დამკვიდრების შედეგად უტოპიელებს ყველგან ურიცხვი რაოდენობით აქვთ განძეულობა. ამიტომ ახლა უკვე ისინი ნაკლებ ყურადღებას აქცევენ, თუ როგორ გაყიდიან საქონელს - ნაღდ ფულზე თუ სესხით, დიდ ფულს ხელშეკრულების საფუძველზე ვალში აბანდებენ. ამ ხელშეკრულების დადების დროს გარკვეული წესების შესრულებისას უტოპიელები კერძო პირთა თავდებობას კი არ მოითხოვენ, არამედ მთელი ქალაქისას. თავის მხრივ კი ქალაქი, როგორც კი მოვა გადახდის დრო, კერძო პირებისაგან ითხოვს ვალის დაფარვას, ფული ხაზინაში შეაქვს და მანამ სარგებლობს ამ თავნის ნამატით, სანამ უტოპიელები უკან არ

მოითხოვენ. უტოპიელები კი უმეტეს შემთხვევაში არ თხოულობენ ფულს, რადგან, სანამ არ დასჭირდებათ, უსამართლობად მიაჩნიათ მისი წართმევა. სხვათაშორის ისინი ფულს მხოლოდ იმ შემთხვევაში თხოულობენ უკან, როცა აუცილებელი ხდება ფულის განსაზღვრული ნაწილის მიცემა სხვა ხალხისათვის, ან როცა ომი გარდაუვალია. ასეთი შემთხვევისათვის ისინი თავიანთ საგანძურს ინახავენ რათა მოულოდნელი საშიშროებისას გამოიყენონ, უფრო კი იმისათვის, რომ ნებისმიერი თანხის ფასად დაიქირაონ უცხოელი ჯარისკაცები, რომლებსაც უფრო ადვილად იმეტებენ ხიფათისათვის, ვიდრე თავისიანებს. უტოპიელებმა იციან, რომ დიდი თანხით თვით მტრების მოსყიდვაც შეიძლება, რომლებიც მზად არიან არა მარტო უღალატონ, არამედ აშკარად ებრძოლონ ერთმანეთს. ამისათვის უტოპიელები აურაცხელ ოქრო-ვერცხლს საგანძურად კი არ ინახავენ, არამედ ისე იყენებენ, რომ მრცხენია კიდევ ამაზე ლაპარაკი. თანაც, ვშიშობ, ჩემს სიტყვებს არ დაიჯერებთ. ვშიშობ იმიტომ, რომ ყოველთვის ეს ჩემთვისაც ძნელი დასაჯერებელი იქნებოდა, საკუთარი თვალით რომ არ მენახა და მხოლოდ სხვისგან გამეგონა. თითქმის ყოველთვის ასეა: რამდენადაც უცხოა ესა თუ ის მოვლენა სხვისი ადათ-წესებისათვის, იმდენად დაუჯერებელია. მართალია, უტოპიელთა ცხოვრების წესის დანარჩენი მხარეებიც მკვეთრად განსხვავდებიან ჩვენეულისაგან და იმიტომ ის, ვინც გონივრულად შეაფასებს მდგომარეობას, ნაკლებად გაოცდება რომ ოქროსა და ვერცხლის[95] მოხმარება მათ საკუთარ ჩვევებს უფრო შეესაბამება ვიდრე ჩვენსას. ისინი ხომ ფულით თვითონ არ სარგებლობენ, ფულს მხოლოდ რაღაც შემთხვევისათვის ინახავენ რომელიც ან მოხდება ან არა.

ოქროსა და ვერცხლს რომლისგანაც მზადდება ფული, უტოპიელები ისე ეკიდებიან, რომ იმაზე მეტად არავინ შეაფასოს, ვიდრე ბუნებრივად უნდა ღირდეს. ოქრო-ვერცხლი თავისი ღირსებით ხომ ბევრად ჩამორჩება რკინას? რკინის გარეშე, ისევე როგორც უცეცხლოდ და უწყლოდ, ადამიანს არსებობა არ შეუძლია. ამასთან ერთად, ბუნებამ ოქროსა და ვერცხლს არ მიანიჭა ისეთი თვისებები, ურომლისოდაც ჩვენ იოლად წასვლა გაგვიჭირდებოდა, მაგრამ ადამიანმა თავისი სისულელით მათ ფასი იშვიათობის გამო დაადო. გარდა ამისა, ბუნებამ, როგორც მზრუნველმა დედამ, ყველა საუცხოო თვისება ჰაერს, წყალსა და თვით მიწას უბოძა, ხოლო ამო და უსარგებლო საგნები სიღრმეში ჩამალა. დაუშვათ, რომ უტოპიელებმა ეს ლითონები რომელიმე კოშკში გადამალეს, მაშინ ბრბოს უგუნურების წყალობით მმართველსა და სენატს ეჭვის თვალით დაუწყებენ ცქერას, თითქოსდა მათ სურთ გაიძვერობით მოატყუონ ხალხი და ამით თვითონ რაიმე მოგება ნახონ. ვივარაუდოთ, რომ დაიწყეს ამ ლითონებისაგან თასების და სხვა ნაკეთობების ხელმარჯვედ დამზადება, შემდეგ კი შემთხვევითი ჯარისკაცების დაქირავების თანხის გასასტუმრებლად კვლავ დასჭირდათ მათი გადადნობა; მაშინ, შესაძლებელია იმისი ვარაუდი, რომ ძნელად დათმობენ მას, რაც ერთხელ გასართობად მიიჩნიეს. სწორედ ამის საწინააღმდეგოდ მათ თავიანთი ცხოვრების შესაბამისი ხერხი მოიგონეს, რომელიც ძალიან განსხვავდება ჩვენეულისაგან, სადაც ოქროს ასე დიდად აფასებენ და გულმოდგინედ იცავენ. ვისთვისაც ეს ხერხი ცნობილია, ის ნამდვილად დამიჯერებს. უტოპიელები, მართალია, იაფფასიანი, მაგრამ ოსტატურად ნახელავი თიხისა და მინის ჭურჭლიდან ჭამენ და სვამენ. ოქროსა და ვერცხლისაგან არა მარტო საერთო სასახლეებში, არამედ კერძო სახლებშიც ღამის ქოთნებს და სიბინძურისათვის განკუთვნილ ჭურჭელს ამზადებენ[96]. ამასთან, ამ ლითონებისაგან უტოპიელები ჭედავენ ჯაჭვებსა და ხუნდებს, რომლებსაც მონებს ადებენ. ყველა დამნაშავეს ყურზე ოქროს რგოლს

კიდებენ, თითებზე ბეჭდებს უკეთებენ, ყელზე ოქროს მძივებს, თავზე ოქროს სალტეს აჭდობენ. ამგვარად, ისინი ყოველგვარი საშუალებით ცდილობენ, ოქრო და ვერცხლი მათთან სამრახის საგნებად ითვლებოდნენ. გამოდის, რომ უტოპიელები არავითარ ზარალს არ ნახავენ, თუნდაც ერთ მშვენიერ დღეს გამოიყენონ ლითონების მთელი მარაგი რომლის დახარჯვაც სხვა ხალხს ისეთ ტანჯვას მიაყენებდა, ვით საკუთარი შიგნეულის წეწვა. უტოპიელებმა სულ ერთიანად რომ დახარჯონ ოქროს მთელი მარაგი, ამით არავის არაფერი დააკლდება. გარდა ამისა, ისინი ზღვის ნაპირზე აგროვებენ მარგალიტს, კლდეებში - ალმასს და ლალს, მაგრამ განა თავს იკლავენ მათი ძებნით, არა, შემთხვევით ნაპოვნს ამუშავებენ. ამ „ძვირფასეულობით“ რთავენ ბავშვებს, რომლებიც პატარაობისას ამგვარი სამკაულებით ტრახახობენ და ამაყობენ, მაგრამ როგორც კი მოიზრდებიან და დაინახავენ, რომ ყველაფერი ეს მხოლოდ ბავშვთა გასართობია, მშობლების ყოველგვარი შეხსენების გარეშე სირცხვილით გვერდზე აწყობენ. ჩვენი ბავშვები კი, როდესაც წამოიზრდებიან, მარტო კოჭებს, ბურთებს და თოჯინებს ანებებენ თავს. ამგვარი, სხვა ხალხებისაგან მკვეთრად განსხვავებული წეს-ჩვეულებანი წარმოშობს განსხვავებულ სოფლმხედველობას, რაშიც განსაკუთრებით ნათლად დამარწმუნა ანემოლიელი ელჩების[97] ერთმა შემთხვევამ.

უტოპიაში ჩემი ყოფნის პერიოდში ანემოლიელები ამაუროტში ჩამოვიდნენ ერთი საჭირო საქმის გასარჩევად. უტოპიელებმა წინასწარ სხვადასხვა ქალაქიდან სამ-სამი წარმომადგენელი გამოგზავნეს. მეზობელი ხალხების ელჩებმა, რომლებიც იქ უწინაც ჩადიოდნენ, კარგად იცოდნენ უტოპიელთა ადათ-წესები, მათ გაგონილი ჰქონდათ, რომ მათთან ძვირფასი სამოსი არ ფასობდა, ფარჩეულობას აბუჩად იგდებდნენ, ხოლო ოქროს სამკაულების ასხმას სამრახისად მიიჩნევდნენ. ამიტომ ისინი, ჩვეულებრივ, ძალზე მოკრძალებული სამოსით ჩავიდნენ. მაგრამ მოშორებით მცხოვრებმა ანემოლიელებმა, რომლებსაც უტოპიელებთან იშვიათად თუ ჰქონიათ ურთიერთობა, როდესაც გაიგეს, რომ უტოპიელებს ერთი და იგივე თანაც უხეში ტანსაცმელი აცვიათ, იფიქრეს, რაც არა აქვთ, რას ჩაიცმევნო და გადაწყვიტეს, უფრო ქედმაღლურად ვიდრე ბრძნულად, ღმერთების სახით, მთელი ბრწყინვალეობით წარმდგარიყვნენ და „საწყალი“ უტოპიელებისათვის თავიანთი ჩაცმულობის ელვარებით თვალი მოეჭრათ. ასე მიადგა მათ სამი ელჩი ასი თანამგზავრის თანხლებით, ყველანი სხვადასხვაგვარ სამოსში, უმეტესობა ფარჩეულში გამოწყობილი. თვით ელჩები (ვინაიდან საკუთარ ქვეყნებში ცნობილ პიროვნებებად ითვლებოდნენ) ოქრომკედით ნაქარგ მოსასხამებში იყვნენ გამოწყობილი, დიდი ყელსაბამები და ოქროს საყურეები ეკეთათ, თითები ოქროს ბეჭდებით ჰქონდათ დამშვენებული. მათ ქუდებს ამკობდა მარგალიტებითა და ძვირფასი ქვებით მოოჭვილი მძივები. ერთი სიტყვით, ისინი იმით იყვნენ მორთულ-მოკაზმული, რითაც უტოპიელები მონებს სჯიან, ანდა სამრახისად და ბავშვთა გასართობ ნივთებად მიიჩნევენ. ერთ ნახვად ღირდა, თუ როგორ იფხორებოდნენ ანემოლიელები, როდესაც თავიანთ ჩაცმულობას უტოპიელებისას ადარებდნენ (მით უმეტეს ამ დროისათვის ხალხი უკვე მოედანზე გამოეფინა). მეორე მხრივ, არანაკლებ სასიამოვნო იყო იმის ხილვა, თუ როგორ მწარედ გაუცრუვდათ იმედი და მოლოდინი ანემოლიელებს და რა შორს აღმოჩნდნენ ისინი სავარაუდო მისაგებელი პატივისცემისაგან. და მართლაც თითქმის ყველა უტოპიელის აზრით, ზოგიერთების გარდა, რაღაც შემთხვევის წყალობით ნანახი ჰყავდათ სხვა ხალხები, მთელი ეს ბრწყინვალე სამოსი მეტად სამარცხვინო იყო. ისინი დიდებულთა ნაცვლად ყოველ

მდაბიოს მოწიწებით ესალმებოდნენ, ხოლო ოქროს ჯაჭვებით დამშვენებული ელჩები მონებად მიიჩნიეს და მათდამი არავითარი პატივისცემა არ გამოიჩინეს. გარდა ამისა, იმასაც დაინახავდი, თუ როგორ უდიერად თამაშობდნენ უტოპიელი ბავშვები მარგალიტებითა და ძვირფასი ქვებით. როცა ეს ნივთები ელჩების ქუდებზე შენიშნეს მუჯლუგუნს წაკრავდნენ დედას და ასე ეუბნებოდნენ: „აი, დედა, რა დიდი რეგვენია, ის ბიჭუნასავით ჯერ კიდევ მარგალიტებითა და ქვებით ერთობა!“ ხოლო მშობელი მთელი სიდინჯით უპასუხებდა: „ჩუმად, შვილო, ეს ალბათ ელჩთა რომელიმე მასხარათაგანია...“ სხვები ზემოხსენებულ ოქროს ჯაჭვებზე ამბობდნენ, რომ ისინი ყველაფერში გამოუსადეგარია, ვინაიდან იმდენად წვრილია რომ მონა ადვილად შეძლებს მის გაწყვეტას, თანაც იმდენად ხალვათია, რომ მას როცა მოეხასიათება, შეუძლია მოიგლიჯოს და გაიქცეს, სადაც მოესურვება შეუბორკავი და თავისუფალი.

ორიოდე დღის შემდეგ ელჩებმა იქ ოქრო უზომო რაოდენობით იხილეს და მიხვდნენ, რომ უტოპიელთათვის მათ ფასი არ ჰქონდა და იმდენად სამარცხვინო იყო რამდენადაც ამათთვის პატივისცემი. ანემოლიელებმა ისიც დაინახეს, რომ ერთი ლტოლვილი მონის ჯაჭვებსა და ხუნდებზე უფრო მეტი ოქრო და ვერცხლი იყო დახარჯული, ვიდრე სამივე ელჩის მთელ ალკაზმულობაზე. ამიტომ ელჩებს მოეკეცათ ფრთები, განსაკუთრებით მაშინ, როდესაც უტოპიელებს მეგობრულად გაესაუბრნენ და მათი ადათ-წესები და შეხედულებები შეიტყვეს, ანემოლიელებმა იმ წამსვე ზიზღით მოიშორეს ყველაფერი ის, რითაც აქამდე ქედმაღლურად ტრიახობდნენ. უტოპიელებს სწორედ რომ აოცებთ, თუ როგორ შეუძლია მოკვდავთაგან ვინმეს ციციქნა მარგალიტის ან ბრჭყვიალა ქვის საეჭვო ელვარებით აღფრთოვანდეს მაშინ, როცა მას არავინ უშლის შეხედოს რომელიმე ვარსკვლავს და, ბოლოსდაბოლოს, თვით მზის ჭვრეტაც ნებადართულია. განა შეიძლება ვინმე იმდენად უჭკუო იყოს, რომ თავისი თავი კეთილშობილად წარმოიდგინოს იმის გამო, რომ ნაზი შალისაგან დამზადებული ქსოვილის სამოსს ატარებს? რაც არ უნდა ნაზი მატყლისაგან იყოს დამზადებული ამ მატყლს ხომ ოდესღაც ცხვარი ატარებდა და იგი არასოდეს სხვა არაფერი ყოფილა, თუ არა ცხვარი. უტოპიელთათვის ისიც გასაოცარია, რომ ოქროს, რომელიც თავისი ბუნებით გამოუსადეგარია, ამჟამად დედამიწის ზურგზე ისეთი დიდი ფასი ადევს, რომ თვით ადამიანი, რომლის სარგებლობისთვისაც მიიღო მან ასეთი ფასი, გაცილებით იაფია ოქროზე. საქმე იქამდე მიდის, რომ რომელიმე ყვეყნს, რომელსაც ჭკუა კუნძუზე მეტი არა აქვს და რომელიც იმდენადვე ურიცხვია, რამდენადაც სულელი, მონობაში ჰყავს ბევრი კარგი და ჭკვიანი ადამიანი მხოლოდ და მხოლოდ იმ მიზეზით, რომ მას ოქროს მონეტების დიდი გროვა ხვდა წილად, ხოლო თუ ბედი ან კანონთა რაიმე ფანდი (რომელსაც ბედზე ნაკლებად არ ძალუძს ყველაფრის ყირამალა ატრიალება) ოქროს ამ გროვას ხსენებულ ბატონს, მთელ მის ჯალაბს წაართმევს და ყველაზე საცოდავ და დამცირებულ უსაქმურს არგუნებს, ამის შედეგად ცოტა მოგვიანებით ბატონი, როგორც ფულზე დანამატი და დანაწონი, ყოფილი მსახურის კუთვნილებად იქცევა. მათ უტოპიელებს გაცილებით აოცებთ და ეზიზღებათ ისინი, ვინც თითქმის ღვთიურ პატივს მიაგებს იმ მდიდრებს, რომელთაც მათი არც არაფერი მართებთ და არც არაფრით არიან დავალებული. ისინი ასე მხოლოდ მათი ქონებისადმი პატივისცემით იქცევიან, თუმცა ამავე დროს მათ უკიდურეს ძუნწებად და ხარბებად მიიჩნევენ და მტკიცედ არიან დარწმუნებული, რომ ამ მდიდართა სიცოცხლეში მათი ურიცხვი ფულიდან გრომიც კი არასოდეს ერგებათ.

ამგვარი აზრები უტოპიელებმა ბავშვობიდანვე შეითვისეს - ისინი ხომ ისეთ სახელმწიფოში აღიზარდნენ, რომლის წეს-ჩვეულებანიც შორსაა ყოველგვარი მსგავსი სიბრყველისაგან, ნაწილობრივ კი ეს წიგნებიდანაც ისწავლეს. მართალია, თითოეულ ქალაქში ძალიან ცოტაა ისეთი, რომელიც განთავისუფლებულია ყოველგვარი შრომისგან და თავს მხოლოდ მეცნიერებას სწირავს (ეს ის ადამიანებია, რომლებმაც ბავშვობაში ამა თუ იმ მეცნიერებების დაუფლების არნახული უნარი გამოიჩინეს), მაგრამ უტოპიაში ხომ ყველა ბავშვი სწავლობს და ადამიანთა დიდი ჯგუფები, კაცები და ქალები, შრომისაგან თავისუფალ მთელ დროს მეცნიერების დაუფლებას ახმარენ. ისინი სწავლობენ მშობლიურ ენაზე, რომლის სიტყვების მარაგი ღარიბი როდია, არც კეთილხმოვანებასაა მოკლებული და აზრსაც სხვაზე ნაკლებს როდი გადმოსცემს. თითქმის იგივე ენა (მეტ-ნაკლებად დამახინჯებული ფორმით) სამყაროს უდიდეს ნაწილშია გავრცელებული. ჩვენს ჩასვლამდე მათ ყურიც არ ჰქონდათ მოკრული იმ ფილოსოფოსების სახელებისათვის[98], რომლებიც ჩვენთვის ცნობილ სამყაროში საკმაოდ განთქმულნი არიან, მაგრამ მუსიკაში, დიალექტიკაში[99], ათვისა და ზომის მეცნიერებების შესწავლა-დაუფლებაში მათ იმდენივეს მიაღწიეს, რამდენსაც ჩვენმა წინაპრებმა. უტოპიელები რამდენადაც ყველაფერში უტოლდებიან ძველ ხალხებს, იმდენად ჩამორჩებიან ახალ დიალექტიკოსთა[100] ყველა მოგონებას, რამეთუ მათ არც ერთი შორსმჭვრეტელურად მოფიქრებული წესი არ შეუქმნიათ შემოფარგვლის, გაფართოებისა და შენაცვლების შესახებ, რომლებსაც აქ ყველგან ასწავლიან ბავშვებს „მცირე ლოგიკაში[101]“. რაც შეეხება „მეორე ინტენციებს[102]“, ისინი ისე შორს არიან მისი სრულყოფილი კვლევისაგან, რომ ვერც ერთმა მათგანმა ვერ შეძლო დაენახა „თვით ადამიანი საერთოდ“, თუმცა ის, როგორც იცით, ნებისმიერ გოლიათზე დიდია, ჩვენ კი მისი ჩვენება თითოთაც კი შეგვიძლია. სამაგიეროდ, უტოპიელები ციური სხეულების ფრენასა და მოძრაობაში კარგად არიან გათვითცნობიერებული. უფრო მეტიც, მათ ოსტატურად გამოიგონეს სხვადასხვა სახის მოწყობილობა, რომელთა დახმარებითაც ძალზე კარგად იჭერენ მზის, მთვარის, აგრეთვე სხვა მნათობთა მოძრაობას, რომლებიც მათი ცის კამარაზე ჩანან. მაგრამ პლანეტების მეგობრობასა და განხეთქილებაზე, აგრეთვე ვარსკვლავების მიხედვით ცრუ წინასწარმეტყველებაზე სიზმარშიაც არ ფიქრობენ. ქარს, წვიმას და ამინდის სხვა ცვლილებებს ისინი ხანგრძლივი გამოცდილებიდან კარგად ცნობილი ზოგიერთი ნიშნის მიხედვით წინასწარმეტყველებენ; მაგრამ ყველა ამ მოვლენის მიზეზზე და ზღვის მოქცევის, მისი სიმლაშის და საერთოდ ცისა და სამყაროს წარმოშობისა და ბუნების შესახებ ისინი წინაპართა მსგავსად მსჯელობენ. ახალი დასკვნების გამოტანისას კი არც უტოპიელები ეთანხმებიან ერთმანეთს, ისინიც დაობენ და ყველაფერში ვერ თანხმდებიან.

ფილოსოფიის იმ ნაწილში, რომელიც ზნეობას ეხება, უტოპიელები ჩვენსავით მსჯელობენ, იკვლევენ სულიერ, ხორციელ და გარეგნულ სიკეთეს, შემდეგ კი დაობენ იმაზე, მხოლოდ სულიერი ღირსებებისათვისაა ნიშანდობლივი სიკეთის მცნება, თუ ყველა ამათთვის ერთად. ისინი კამათობენ სათნოებასა და სიამოვნებაზე, თუმცა მათთვის უპირველესი და ძირითადია დავა იმის თაობაზე თუ რაში მდგომარეობს ადამიანური ბედნიერება - რაიმე ერთში, თუ ბევრში. ამ საკითხში, ვფიქრობ, ისინი მეტისმეტად ემხრობიან სხვადასხვაგვარი სიამოვნებათა მომხრეების დაჯგუფებას[103]. მათი აზრით ადამიანის ბედნიერება სიამოვნებაშია.

შენ კიდევ უფრო გაგაკვირვებს ის, რომ ამ სასიამოვნო შეხედულებებისათვის ისინი რელიგიას იშველიებენ, რომელიც სასტიკი, მკაცრი და, ჩვეულებრივ, სევდიანი და შეუვალია. უტოპიელები ხომ ბედნიერებაზე ისე არასოდეს ლაპარაკობენ, თუ არ დაუკავშირეს იგი რელიგიიდან ან ფილოსოფიიდან აღებულ რაიმე საწყისს, რომელიც იყენებს გონების მოსაზრებებს. ისინი ვარაუდობენ, რომ ამის გარეშე თავისთავად ნამდვილი ბედნიერების კვლევა უსუსური და უძლური იქნება. ეს საწყისები კი ასეთია: სული უკვდავია და ღვთის ნებით ბედნიერებისთვისაა გაჩენილი, სათნოებისა და კეთილი საქმეებისათვის ჩვენთვის ჯილდოა დაწესებული. უკეთურებისათვის - სასჯელი, თუმცა ეს რელიგიას ეხება, ისინი მაინც ფიქრობენ, რომ გონება იქამდე მიგიყვანს, რომ ეს დავიჯეროთ და ვაღიაროთ.

უტოპიელები ყოველგვარი ყოყმანის გარეშე აცხადებენ, რომ თუკი თავიდან ავიცილებთ ამ საწყისებს, მაშინ შეუძლებელი იქნება ისეთი ბრიყვის ნახვა, რომელიც ვერ მიხვდება, რომ საჭიროა, სამართლიანად თუ უსამართლოდ, სიამოვნებისაკენ სწრაფვა; მხოლოდ ერთი რამის უნდა გვეშინოდეს: მცირე სიამოვნებამ ხელი არ შეუშალოს დიდს და რომ არ ესწრაფვოს იმას, რისთვისაც ტანჯვით უნდა აგო პასუხი. ისინი ამბობენ, რომ დიდი უგუნურებაა მკაცრი და ძნელი სიკეთისაკენ სწრაფვა და არა მარტო ტკბილი ცხოვრების უარყოფა, არამედ საკუთარი ნებით ტანჯვის ატანა. რომლისაგანაც ვერავითარ სარგებლობას ვერ ეღიროს (რა სარგებლობაზე შეიძლება იყოს ლაპარაკი, თუკი სიკვდილის შემდეგ ვერაფერს მიიღებ, მთელ ცხოვრებას კი სიამოვნების გარეშე, ე.ი უბედურად გაატარებ).

ახლა კი ისინი ფიქრობენ, რომ ბედნიერება ყოველგვარ სიამოვნებაში კი არა, პატიოსან და წესიერ სიამოვნებაშია. რამეთუ მისკენ, როგორც უმაღლესი სიკეთისაკენ, თვით სათნოებაც იზიდავს ჩვენს ბუნებას და მოწინააღმდეგეთა ჯგუფიც [104] ბედნიერებას მხოლოდ და მხოლოდ სათნოებაში პოვებს. უტოპიელები ხომ სათნოებას განსაზღვრავენ როგორც ბუნების შესაფერისად ცხოვრებას, და სწორედ ხომ ამისათვის მოგვავლინა ჩვენ ღმერთმა. იმისათვის თუ რისკენ ვისწრაფვით და რისკენ არა - უნდა მივდიოთ ბუნების იმ ლტოლვას, რომელიც გონებას ემორჩილება.

მეორე მხრივ, გონება მოკვდავთ, უწინარეს ყოვლისა, უღვივებს ღვთაებრივი სიდიადის სიყვარულსა და მოწიწებას, რომელსაც უნდა ვუმაღლოდეთ იმას, რომ ვარსებობთ და გვაქვს უნარი ვიყოთ ბედნიერნი. მეორე კი გონება გვასწავლის, რომ ჩვენ თვითონაც რაც შეიძლება მშვიდად და ბედნიერად ვიცხოვროთ. სხვა დანარჩენებსაც მეგობრულად დავეხმაროთ, რათა იმავეს მიაღწიონ, რასაც ჩვენ, რადგან იგი არასოდეს არ ყოფილა სათნოების ისეთი მკაცრი და სასტიკი ქომაგი და სიამოვნების ისეთი მოძულე, რომელიც მხოლოდ შრომაზე, ურვასა და სევდაზე მიგითითებდა შენ და ამასთან არ დაგაკისრებდა შეძლებისდაგვარად სხვისი სიღარიბისა და გაჭირვების შემსუბუქებას. იგი ქების ღირსად ჩათვლიდა იმ ადამიანურ თვისებებს, რომ ადამიანმა უნდა იზრუნოს მეორე ადამიანის კეთილდღეობასა და ნუგეშისცემაზე! თუკი ყველაზე ადამიანურია სხვათა ურვის შემსუბუქება და მწუხარების დაძლევის შემდეგ მათი მობრუნება ცხოვრების სიტკბოებისაკენ, ე.ი სიამოვნებისაკენ (არ არსებობს ადამიანისათვის უფრო მეტი ჩვეული სათნოება), ბუნება რატომ არ აგულიანებს თითოეულს, საკუთარი თავისათვის იგივე გააკეთოს? ალბათ ტკბილი ცხოვრებაა ცუდი ე.ი ის რომელიც

სიამოვნებას გვანიჭებს, და თუკი ასეა, შენ არა მარტო უნდა დაეხმარო სხვას, არამედ რაც შეიძლება უნდა ეცადო ყველას ააცილო ის თავიდან, როგორც მავნე და მომაკვდინებელი, ანდა შენ არა მარტო შეგიძლია, არამედ ვალდებულიც ხარ, სხვები ამგვარ ცხოვრებაზე, როგორც სიკეთეზე დაითანხმო, მაშინ რატომ არ უნდა დაიყოლიო ჯერ საკუთარი თავი? საკუთარი თავი შენ სხვაზე არანაკლებად უნდა შეიწყალო, როდესაც ბუნება შთაგაგონებს სხვებისადმი კეთილი იყო, იგი როდი გიბრძანებს პირიქით, შენი თავისადმი იყო მკაცრი და უმოწყალო. გამომდინარე ქედან, ამბობენ ისინი, ტკბილ ცხოვრებას ანუ სიამოვნებას, ვითარცა ყველა ჩვენი მოქმედების საბოლოო მიზანს, თვით ბუნება გვიმზადებს. ცხოვრება ბუნების ნებით - ასე განსაზღვრავენ ისინი სათნოებას და რაკი ბუნება მოკვდავთ სთავაზობს, დაეხმარონ ერთმანეთს რათა უფრო მხიარულად იცხოვრონ (იგი ამას ძალზე სამართლიანად აკეთებს, რამეთუ არავინ ისე არ მაღლდება ადამიანთა მოდგმის ხვედრზე, რომ ბუნება მხოლოდ მასზე ზრუნავდეს. იგი ერთნაირად მოწყალეა ერთ სახეობად გაერთიანებულთა მიმართ), ის რა თქმა უნდა გვიბრძანებს კიდევ, თვალყური ადევნო, რათა შენთვის ხელსაყრელი პირობების შექმნით სხვას ზიანი არ მიაყენო.

ამიტომ უტოპიელები ფიქრობენ, რომ საჭიროა არა მარტო კერძო პირებს შორის დადებული შეთანხმებების, არამედ საზოგადოების კანონების დაცვა, რომელიც გამოსცა კეთილმა ხელისუფალმა, ან ერთხმად მიიღო ხალხმა, რომელსაც არ განუცდია ტირანიის უღელი და არ მოტყუებულა ცხოვრებისეული კეთილდღეობის, ანუ სიამოვნების საფუძვლების განაწილების შესახებ კანონის გაიძვერობით. ამ კანონების დაცვასთან ერთად საკუთარ სარგებლობაზე ფიქრი კეთილგონიერი საქმეა, ხოლო ამასთან საზოგადოების ინტერესებზე ზრუნვა - ღვთისმოსაობის ნიშანი. მაგრამ საკუთარი სიამოვნებისათვის სხვისი სიამოვნების მითვისება უსამართლობაა. და, პირიქით, ადამიანურობისა და სიკეთის ვალია, მოაკლო საკუთარ თავს და მისცე სხვას, ეს მოვალეობა იმდენს არაფერს გვაკლებს რამდენსაც გვმატებს, რამეთუ მაღლით გვიბრუნდება უკან, და თვით სიკეთის შეცნობა და მათი სიყვარულისა და კეთილგანწყობის გახსენება ვისაც შენ სიკეთე გაუკეთე მეტ სიამოვნებას მიანიჭებს სულს, ვიდრე ის ხორციელი სიამოვნება, რომლისაგანაც შენ თავი შეიკავე. და ბოლოს (ჩვენ ვინც ამაზე სიამოვნებით ვთანხმდებით, ადვილად ვრწმუნდებით რელიგიითაც), ხანმოკლე და მცირე სიამოვნებისათვის ღმერთი სამაგიეროს დიდი და სამარადისო სიხარულით იხდის. უტოპიელებმა გულდასმით მოიფიქრეს და აწონ-დაწონეს ყოველივე და მიაჩნიათ, რომ ჩვენი მოქმედებანი და მათ შორის თვით სათნოებანიც საბოლოო მიზნად სიამოვნებასა და ბედნიერებას გულისხმობენ.

სიამოვნებას უტოპიელები სულისა და სხეულის ყოველგვარ მოძრაობასა და მდგომარეობას ეძახიან. როდესაც სული და სხეული ბუნების ნებით შეხამებულად მოძრაობს, ადამიანი სიამოვნებას ღებულობს. ისინი ბუნებრივ მიდრეკილებას შემთხვევით არ ამატებენ, რამეთუ ბუნებრივად ყველაფერი სასიამოვნოა, რისკენაც მისწრაფვის ადამიანი უსამართლობის ჩარევის გარეშე, რასაც სხვა უფრო სასიამოვნო არ ეწირება, ყველაფერი რასაც ტანჯვა არ მოსდევს, რასაც არა მარტო გრძნობა, არამედ კეთილგონიერებაც ესწრაფვის. არსებობს არაბუნებრივი სიამოვნებანიც. მოკვდავნი ამაოდ ფიქრობენ, რომ ეს სიამოვნებანი ტკბილია (თითქოს ადამიანებს შეუძლიათ შეცვალონ საგნები, ისევე როგორც მათი სახელწოდებანი). უტოპიელების აზრით, ყველაფერ ამას ბედნიერებისაკენ სულაც არ

მიყვარტ და უმეტეს შემთხვევაში მას ხელსაც კი უშლის, რადგან აღმოჩნდა, რომ ვისთანაც კი ამ სიამოვნებებმა ერთხელ გაიდგა ფესვი, იქ ჭეშმარიტი და ნამდვილი სიხარულისათვის აღარ დარჩა ადგილი. მისი სული კი მთლიანად სავსეა სიამოვნების ცრუ გაგებით. ხომ ბევრი რამაა ისეთი, რასაც თავისი ბუნებით საამო არაფერი გააჩნია პირიქით, მის მნიშვნელოვან ნაწილს სიმწარე ახლავს, და მაინც ბიწიერი სურვილები გვაცდუნებენ, მივიჩნით ისინი არა მარტო უდიდეს სიამოვნებად, არამედ ცხოვრების ერთ-ერთ უპირველეს ღირსებად. ამ სახის ცრუ სიამოვნებას, უტოპიელების აზრით, განიცდიან ისინი, ვინც ზემოთ მოვიხსენიე: ადმიანები, რომელთაც ეჩვენებათ, რომ რაც უფრო კარგად აცვიათ, მით უკეთესები არიან. ამ ერთ საკითხში ისინი ორ შეცდომას უშვებენ, რამეთუ არანაკლებ ცდებიან, როდესაც ფიქრობენ, რომ მათი ტანსაცმელი მათზე უკეთესია. თუკი ვიფიქრებთ ტანსაცმლის სარგებლობაზე, რატომაა, რომ წვრილი ნართისაგან მოქსოვილი შალი მსხვილისაგან მოქსოვილზე უკეთესია? თუმცა ადამიანები ისე იფხორებიან, თითქოს კი არ ცდებიან, არამედ მართალი არიან, თანაც დარწმუნებულებიც ბრძანდებიან, რომ ამით მათ ფასი ემატებათ. ამის გამო ისინი (თითქოს ძვირფასი ტანსაცმელი, მათ ამის უფლებას აძლევთ) ესწრაფვიან პატივისცემას, რომელზედაც ვერც კი გაბედავენ ოცნებას, ნაკლებად რომ ყოფილიყვნენ ჩაცმული, ხოლო, თუკი მათ ყურადღებას არ აქცევენ, - ბრაზობენ.

ასეთივე უგუნურების ნიშანი ხომ არ არის სწრაფვა ფუჭი და უსარგებლო პატივისაკენ? რა ბუნებრივ და ჭეშმარიტ სიამოვნებას მიიღებ თუკი ვინმემ ქუდი მოგიხადა ან დაიჩოქა შენს წინაშე? განა ეს მოგიჩინებს მუხლის ტკივილს? ანდა გაგკურნავს უგუნურებისაგან? ასეთივე ყალბი სიამოვნების აღქმისას საოცრად სულელურად ნეტარებენ ისინი, ვინც ტრაბახობს და თავი მოაქვს თავისი წარჩინებულობით, აგრეთვე იმით, რომ წილად ხვდა ყოფილიყო იმ შტოს შთამომავალი, რომელიც მდიდრად ითვლებოდა, იმიტომ, რომ მიწები ჰქონდა (ახლა ხომ წარჩინებულობა სწორედ ასე ესმით). ასეთმა ადამიანებმა არც კი იციან, რომ მათ დიდგვაროვნებას ოდნავადაც არ დააკლდებოდა რაიმე იმ შემთხვევაშიც კი, თუკი წინაპრები არაფერს დაუტოვებდნენ ან თვითონვე გაფლანგავდნენ დარჩენილ მემკვიდრეობას. მათ რიცხვს მიაკუთვნებენ იმათაც, ვინც, როგორც ვთქვი, ძვირფასეულობისა და თვალმარგალიტის ტყვეობაშია, ვისაც თავი თითქმის ღმერთად წარმოუდგენია, რადგან ხელში ჩაიგდო რომელიმე სანუკვარი ქვა, განსაკუთრებით ისეთი რომელიც ამ დროს ამ ქვეყანაში ყველაზე მეტი ღირს (რამეთუ ერთი და იგივე რამ ყველგან და ყოველთვის ერთნაირად არ ფასობს). ადმიანები ასეთ ქვებს მხოლოდ იმ შემთხვევაში იყიდნიან, თუკი ოქროს რკალიდან ამოღებულია და გამყიდველი დაიფიცებს და დაარწმუნებს, რომ მარგალიტი ან ქვა ნამდვილია. სხვაგვარად მათ ეშინიათ ვაითუ ყალბი ქვა ნამდვილისაგან ვერ გაარჩიონ. მაგრამ ყალბმა ქვამ ნამდვილზე ნაკლები სიამოვნება რატომ უნდა მოგანიჭოს, მითუმეტეს, რომ თვალთ ერთმანეთისაგან ვერც კი არჩევ? ჰერკულესს ვფიცავ, ერთიც და მეორეც შენთვის ისეთივე ძვირფასი უნდა იყოს როგორც ბრმისათვის. განა ისინი, რომლებიც ჭარბ სიმდიდრეს ინახავენ ისე, რომ ამ გროვით სულაც არ სარგებლობენ და მხოლოდ ჭვრეტით ტკბებიან, ნამდვილ სიამოვნებას განიცდიან, თუ, უფრო სწორად, თავს ცრუ სიამოვნებებით იწყნარებენ? ან ისინი ვინც დაავადებულია სხვაგვარი მანკით და ოქროს ინახავს რომელსაც არასოდეს გამოიყენებს და რომელიც შესაძლოა ველარც კი იხილოს. განა ეს ასე არ არის, თუკი მოაკლებ შენს თავს (და შეიძლება ყველა მოკვდავს) ოქროთი სარგებლობის საშუალებას და მას მიწას მიაბარებ? ჩაფლავ თუ

არა მიწაში განძს მშვიდდები და ხარობ. თუკი ვინმე მოგპარავს და ათი წლის შემდეგ შენ ისე მოკვდები, რომ განძის დაკარგვას ვერც კი გაიგებ, რა მნიშვნელობა ექნება შენთვის იმ ათი წლის განმავლობაში რომელიც შენ იცხოვრე განძის დაკარგვის შემდეგ, იგი მოპარულია თუ საიმედოდ დაცული?

ასეთივე შეუფერებელ სიამოვნებას მიაკუთვნებენ უტოპიელები კოჭით თამაშს[105] (ამ უფუნურების შესახებ მათ მხოლოდ სმენიათ), ნადირობასა და ჩიტბადეობას[106]. მათ ვერ გაუგიათ რა სიამოვნებაა დაფაზე კოჭების დაყრა. შენ კი ეს იმდენჯერ გაქვს გაკეთებული, რომ ამაში რაიმე სიამოვნებაც რომ ყოფილიყო, იმდენჯერ გითამაშია, შეიძლება მოგბეზრდა კიდეც. ანდა რა სიამოვნებაა ძაღლების ყეფისა და ყმუილის მოსმენა? ეს უფრო საზიზღრობაა. ანდა მეტია სიამოვნება, როცა ძაღლი მისდევს კურდღელს, ვიდრე ძაღლი - ძაღლს? თუკი შენ სირბილი განიჭებს სიხარულს, ორივე შემთხვევაში ხომ ერთი და იგივე ხდება - სირბილი.

თუკი შენ მკვლელობა გიზიდავს მწევარ-მეძებრებით ნადირობამ, რომელიც შენს თვალწინ ხდება, იმის ხილვა თუ როგორც გაგლეჯს ძაღლი კურდღელს, სუსტს - უფრო ძლიერი, მშიშარასა და მხდალს - დაუნდობელი, და ბოლოს, უდანაშაულოს - სასტიკი, ამან შენში უფრო თანაგრძნობა არ უნდა გამოიწვიოს? ამიტომ ყოველგვარი ნადირობა, როგორც თავისუფალი ადამიანისათვის უკადრისი საქმე, უტოპიელებმა ყასბებს გადააბარეს (ზემოთ მე ვთქვი, რომ ეს საქმე მათთან მონებს ევალებოდათ). უტოპიელები ფიქრობენ, რომ ნადირობა ყასბების საქმიანობის ყველაზე მდაბალი მხარეა. ამ საქმიანობის სხვა მხარე უფრო საპატიო და საჭიროა, რამდენადაც მათ უფრო მეტი სარგებლობა მოაქვთ და კლავენ პირუტყვს მხოლოდ და მხოლოდ იმიტომ, რომ აუცილებელია. მონადირე კი საბრალო ცხოველის მწევარ-მეძებრებით დევნასა და მოკვლაში მხოლოდ სიამოვნებას ეძებს. უტოპიელები ფიქრობენ, რომ სიკვდილის, თუნდ ნადირის სიკვდილის ხილვის დაუოკებელი სურვილი სულის სისასტიკიდან, ანდა ამ ველური სიამოვნების მუდმივი განცდიდან წარმოიშობა, ამას კი ბოლოს და ბოლოს გულქვაობა მოსდევს.

მიუხედავად იმისა, რომ ამას და სხვა ამგვარ რამეებს (ისინი კი საკმაოდ ბევრია) ადამიანები სიამოვნებად მიიჩნევენ, უტოპიელები, რა თქმა უნდა მაინც ფიქრობენ, რომ რამდენადაც ამათში ბუნებრივად არაფერია სასიამოვნო, იმდენად მათ ჭეშმარიტ სიამოვნებასთან არაფერი აქვთ საერთო. ის, რომ ეს მანკიერებანი ავსებს გრძნობას სასიამოვნოთი (სწორედ ამას მიიჩნევენ ადამიანები სიამოვნებად), უტოპიელებს სულაც არ აიძულებს თავიანთ შეხედულებებზე უარი თქვან. ამის მიზეზი თვითონ ბუნება კი არ არის, არამედ ადამიანების მახინჯი ჩვევები. ამ მანკიერების გამოა, რომ ადამიანებს მწარე ტკბილად ეჩვენებათ, ისევე როგორც ფეხმძიმე ქალებს თავიანთი წამხდარი გემოს გამო ფისი და ქონი თაფლზე ტკბილი ჰგონიათ. ავადმყოფობით ან ჩვევებით დამახინჯებული ვისიმე მსჯელობა არ ცვლის არც სხვა საგნებისა და არც სიამოვნების ბუნებას.

უტოპიელებს მიაჩნიათ, რომ არსებობს სხვადასხვაგვარი სიამოვნება, რომლებსაც ისინი ჭეშმარიტ სიამოვნებად მიიჩნევენ. ისინი ზოგიერთს - სულს, ზოგიერთს კი სხეულს აკუთვნებენ. სულს მიაწერენ გაგებას და იმ სიამოვნებას, რომლებსაც ჭეშმარიტების ჭკრეტა წარმოშობს. მასვე ეკუთვნის კარგად გავლილ ცხოვრებაზე სასიამოვნო მოგონება და მომავალი კეთილდღეობის უეჭველი იმედი. ხორციელ სიამოვნებას ისინი ორ სახედ ყოფენ. პირველი ისაა, რომელიც გრძნობას აშკარა

სიამოვნებით ავსებს, ეს ხდება იმ ნაწილების აღდგენისას, რომელიც ჩვენი შინაგანი სიმბურვალით შთაინთქა. იგი საკვებითა და სასმელით აღდგება. მეორე სახის სიამოვნება კი იმის გამოდევნაა, რამაც ჩვენი სხეული გადატვირთა. ეს ხდება მაშინ, როდესაც ვითავისუფლებთ სტომაქს ანდა ვძაბავთ ძალებს მშობიარობისათვის, ანდა სხეულის რომელიმე ნაწილის ქავილს ხელის წასმითა და ფხანით ვიწყნარებთ.

ზოგჯერ სიამოვნება აღიძვრება და არ იძლევა იმას, რასაც ჩვენი სხეულის ნაწილები თხოულობს, არ აყუჩებს მათ ტკივილებს, თუმცა ეს სიამოვნება აღიზიანებს და აღელვებს ჩვენ გრძნობებს იზიდავს თავისკენ რაღაც იდუმალი ძალით, შესამჩნევი მოქმედებებით. ასეთ სიამოვნებას ადამიანებს მუსიკა ანიჭებთ.

ხორციელი სიამოვნების სხვა სახეობა, ფიქრობენ უტოპიელები, სხეულის მშვიდი და აუღელვებელი მდგომარეობაა, ესაა თითოეულისათვის ყოველგვარი ავადმყოფებისაგან თავისუფალი ჯანმრთელობა. მართლაც თუკი ადამიანს არაფერი არ ტკივა ჯანმრთელობა თავისთავადაა სიამოვნება იმ შემთხვევაშიც, როცა არავითარი გარედან მიღებული სიამოვნება არ ახლავს მათ, თუმცა ეს ნაკლებ შესამჩნევეა და გრძნობას ნაკლებად აღელვებს ვიდრე ჭამა-სმის დაუოკებელი სურვილი. მაინც ბევრი თვლის, რომ ჯანმრთელობა უდიდესი სიამოვნებაა, ამასთან ერთგვარი საფუძველი და საწყისი ყველაფრისა, რასაც კი იძლევა ცხოვრების მშვიდი და სასურველი პირობები. ხოლო როდესაც კაცი ჯანმრთელად არ არის, როგორი სიამოვნებაც არ უნდა მიანიჭო, იგი მაინც ვერ შეიტკბობს, რამეთუ როცა რამე არ სტკივათ მაგრამ არც ჯანმრთელად არიან, ისინი ამას უფრო უგრძნობლობას ეძახიან ვიდრე სიამოვნებას.

გულმოდგინე მსჯელობის შემდეგ უტოპიელებმა უკვე დიდი ხანია უარყვეს იმათი აზრი, ვისაც არ მიაჩნდა, რომ სიამოვნება მტკიცე და ურყევ ჯანმრთელობაშია. ისინი ამბობდნენ, რომ თუ ეს სიამოვნება არსებობს, მისი შეგრძნება მხოლოდ რაღაც გარეგანი მოძრაობის დროს შეიძლება. ახლა კი, პირიქით, თითქმის ყველა უტოპიელი იმ აზრს იზიარებს, რომ სიამოვნებისათვის ყველაზე მნიშვნელოვანი ჯანმრთელობაა. ისინი ამბობენ, რომ თუკი ავადმყოფობას ახლავს ტანჯვა, რომელიც სიამოვნების ისეთივე შეურიგებელი მტერია, როგორიც ჯანმრთელობისა - ავადმყოფობა, მაშინ ურყევი ჯანმრთელობა თავის თავში რატომ არ უნდა შეიცავდეს სიამოვნებას? მათ მიაჩნიათ, რომ აქ სულაც არაა მნიშვნელოვანი - ავადმყოფობაა ტანჯვა თუ ტანჯვაა ავადმყოფობისათვის დამახასიათებელი - ორივე შემთხვევაში ერთი და იგივე გამოდის. თუკი ჯანმრთელობა სიამოვნებაა ანდა ის აუცილებლად წარმოშობს სიამოვნებას, როგორც ცეცხლი სითბოს, მაშინ, რა თქმა უნდა ორივე შემთხვევაში გამოდის, რომ სიამოვნებას მოკლებული არ შეიძლება იყოს ის ვინც ჯანმრთელია.

გარდა ამისა უტოპიელები ამბობენ: სხვა რა ხდება ჭამის დროს თუ არა ბრძოლა ჯანმრთელობისა (რომელიც ნელ-ნელა ირყევა) შიმშილთან? (ამასთან, საკვები აქ ჯანმრთელობის თანამებრძოლია). სანამ ჯანმრთელობა ამ ბრძოლაში თანდათან ძალებს იკრებს, ამ წარმატებას ჩვეულ სიძლიერემდე მიჰყავს სიამოვნება, რომელიც ჩვენ ესოდენ მოგვწონს. ნუთუ ჯანმრთელობა, რომელსაც ამხნევებს ბრძოლა, არ გაიხარებს, როცა გაიმარჯვებს? ნუთუ ის უგრძნობი გახდება, როდესაც ბედნიერად დაიბრუნებს ძველ ძალას, რომელსაც ის ასე ესწრაფვოდა მთელ ამ ბრძოლის განმავლობაში? არ შეიცნობს თავის კეთილდღეობას და არ დააფასებს მას?

უტოპიელები ფიქრობენ, რომ გამოთქმა - ჯანმრთელობის შეგრძნება შეუძლებელია, ძალზე შორსაა ჭეშმარიტებისაგან. ვინ არ გრძნობს თავს ჯანმრთელად, კითხულობენ ისინი, თუკი მხნედ არის და თუკი ის მართლაც ჯანმრთელია? ვისზე მოქმედებს უგრძობლობა და ლეთარგია ისე, რომ არ აღიაროს, რა ტკბილი და სასიამოვნოა მისთვის ჯანმრთელობა? და რა არის სიტკბოება, თუ არა სიამოვნების სხვა სახელწოდება?

უტოპიელები უფრო აფასებენ სულიერ სიამოვნებას (ისინი მას მთავარ და უპირველეს სიამოვნებად თვლიან). მისი უმნიშვნელოვანესი ნაწილი, ფიქრობენ ისინი, სათნოებაში ვარჯიშით და ცხოვრების კეთილდღეობის შეცნობით წარმოიშობა: იმ სიამოვნებიდან, რომლებსაც სხეული გვანიჭებს, პირველობა ჯანმრთელობას ეკუთვნის, რაც კი ადამიანს ამგვარად ახარებს, საჭიროა სწრაფვა, სწრაფვა მხოლოდ ჯანმრთელობისაკენ! რამეთუ ყველაფერი ეს სასიამოვნოა, არა თავისთავად, არამედ იმიტომ, რომ იგი ჩუმად შემოპარულ სენს ეწინააღმდეგება, რამდენადაც ბრძენისათვის უფრო ნიშანდობლივია გაექცეს ავადმყოფობას, ვიდრე ეძიოს მისგან განკურნების საშუალება - ავადმყოფობის თავიდან აცილება სჯობს მის შემსუბუქებას, ასევე უტოპიელებიც ფიქრობენ, სჯობს ამგვარ სიამოვნებას არ საჭიროებდე, ვიდრე მათი განკურნებით სიამოვნებას ღებულობდე. თუკი ვინმე ფიქრობს, რომ განიცდის ამგვარ ნეტარებას, მაშინ უნდა აღიაროს კიდევ, რომ უდიდეს ბედნიერებას ის მხოლოდ მაშინ ეწევა, თუ მას წილად ხვდება იცხოვროს მუდმივ შიმშილში, წყურვილში, ქავილში, ჭამაში, სმასა და ფხანაში. მაინც ვინ ვერ მიხვდება, რომ ამგვარი ცხოვრება არა მარტო საშინელი არამედ შესაბრალისიცაა? რა თქმა უნდა ეს სიამოვნებანი როგორც ყველაზე ნაკლებად ჭეშმარიტნი, ყველაზე უფრო მდაბალია და ისინი მხოლოდ საწინააღმდეგო განცდებთან ურთიერთობაში მჟღავნდებიან, რამეთუ ჭამისაგან მიღებულ სიამოვნებას შიმშილი უკავშირდება, ისიც სხვადასხვა ზომით, რამეთუ ტანჯვა რაც უფრო ძლიერია, მით უფრო ხანგრძლივია. ის სიამოვნებაზე ადრე წარმოიშვება და არ ქრება სანამ მასთან ერთად სიამოვნებაც არ მოკვდება.

უტოპიელები ფიქრობენ, რომ ამგვარი სიამოვნებანი, თუკი მხოლოდ აუცილებლობამ არ გამოიწვია, ძალა არ უნდა დავაყენოთ. მაინც უტოპიელები ამით ბედნიერნი არიან და მადლობას სწირავენ დედა-ბუნებას, რომელიც უნაზესი სიტკბოებით ეწევა თავის შთამომავლობას იქითკენაც კი, რაც საჭიროა, აუცილებელია და მუდმივად კეთდება. რა საშინელი იქნებოდა ცხოვრება, რომ მსგავსად სხვა დაავადებებისა, რომლებიც შედარებით იშვიათად გვაწუხებენ, შიმშილისა და წყურვილისაგან გამოწვეული უსიამოვნებანიც უხამებითა და მწარე წამლებით მოგვემორებინა?

უტოპიელები ყოველნაირად ცდილობენ შეინარჩუნონ სილამაზე ძალა და სიმკვირცხლე - ბუნების ეს სასიამოვნო და განსაკუთრებული საჩუქარი. უფრო მეტიც, იმ სიამოვნებებს, რომლებიც აღიქმება ყურის, თვალის, ცხვირის საშუალებით და რაც ბუნებამ ადამიანს მიანიჭა როგორც მისი თვისება და თავისებურება (რამეთუ არ არსებობს სხვა ცოცხალი არსება, რომელსაც აღელვებს სამყაროს ხილვა და მშვენიერება, ანდა ატკობს სუნი - სხვა ცოცხალ არსებებს ეს გრძნობა მხოლოდ საკვების მიმართ აქვთ და ვერ არჩევენ განსხვავებას თანამყდერ და განსხვავებულ ბგერებს შორის), - ყველაფერ ამას ვამბობ მე, უტოპიელები ცხოვრების ერთგვარ სასიამოვნო საკაზმად მიიჩნევენ, ოღონდ ყველაფერ ამაში მათ ასეთი შეზღუდვა

აქვთ: მცირე სიამოვნებამ ხელი არ უნდა შეუშალოს დიდს, სიამოვნებას არ უნდა მოსდევდეს რაიმე ტანჯვა, რომელიც გარდაუვალია, თუკი სიამოვნება უზნეოა.

უტოპიელები ფიქრობენ, რომ სილამაზის შეძულება, ძალების მოდუნება სიმკვირცხლის სიზარმაცედ გადაქცევა, სხეულის დაუძღვრება მარხულობით, ჯანმრთელობის ვნება და ბუნების სხვა სიკეთის უარყოფა უდიდესი უგუნურებაა, შენი თავის დაუნდობლობა და ბუნებისადმი შენი დიდი უმადურობაა. ეს ნიშნავს უარყო შენი ვალდებულებანი, თავიდან აიცილო ყველა მისი სიკეთე. მხოლოდ ზოგიერთს შეუძლია უარყოს თავისი უპირატესობანი და უფრო მხურვალედ იზრუნოს სხვა ადამიანებსა და საზოგადოებაზე იმ იმედით, რომ ამ გარჯისათვის ღმერთი მას უფრო დიდ სიამოვნებას მიანიჭებს. სხვა შემთხვევაში ეს ნიშნავს ეწამო სათნოების ფუჭი მოჩვენებისათვის, რომელიც არც არავისთვის არის სასარგებლო და არც იმისათვის, რომ ნაკლები წვალებით გადაიტანო ტანჯვა, რომელიც შესაძლოა არასოდეს შეგხვდეს.

ასე მსჯელობენ უტოპიელები სათნოებასა და სიამოვნებაზე. მათ სწამთ, რომ თუკი ზეციდან მოვლენილი რელიგია ადამიანს რაიმეს უფრო წმინდას არ შთააგონებს, მაშინ ადამიანის გონების დახმარებით უფრო სარწმუნო რამის გამონახვა შეუძლებელია. ჩვენ ახლა დრო არ გვაძლევს საშუალებას, გავარჩიოთ სწორად ფიქრობენ თუ არა ისინი ამაზე. ჩვენ მხოლოდ მათი საფუძვლების გაცნობა ვიკისრეთ და არა დაცვა.

ასეა თუ ისე, ღრმად ვართ დარწმუნებული, რომ როგორც არ უნდა იყოს მათი დებულებები, უკეთესი ხალხი და უფრო ბედნიერი სახელმწიფო არსად მეგულება. სხეულით ისინი ღონიერნი არიან; ძალები მოსალოდნელზე მეტი აქვთ, თუ ვიმსჯელებთ მათი სიმაღლის მიხედვით, თუმცა იგი არცთუ ისე მცირეა. მიუხედავად იმისა, რომ უტოპიელების მიწები ყველგან ნოყიერი არ არის და ჰავაც არასაკმარისად ჯანსაღია, ცუდი ამინდის წინააღმდეგ ისინი თავს იკაჟებენ ზომიერი კვებით, ხოლო მინდვრებს გულმოდგინედ ამუშავებენ. ასე რომ, არც ერთ სხვა ხალხს არა აქვს ასეთი დიდი მოსავალი და არა ჰყავს ასე მრავალრიცხოვანი საქონელი, არ არსებობს სხვა უფრო ძლიერი და ჯანმრთელი ხალხი. შენ იქ შეხვდები არა მარტო მიწათმოქმედთა ჩვეულებრივ საქმიანობას, როდესაც ბუნებით უნაყოფო ნიადაგს ეხმარებიან თავისი ხელოვნებითა და შრომით, არამედ ნახავ, რომ ხალხს ტყე ერთი ადგილიდან ხელით გადააქვს მეორე ადგილზე. ამ შემთხვევაში მათ ის კი არ აწუხებთ, მიწა უფრო ნაყოფიერი იყოს, არამედ ის, რომ შრომა გაუადვილდეთ - შემა ახლოს იყოს ზღვასთან, მდინარეებთან, ანდა თვით ქალაქებთან, რადგან ხმელეთით დიდ მანძილზე პურის გადაზიდვა უფრო ადვილია, ვიდრე შეშისა. ხალხი გულდია და მხიარულია, გონებამკვირცხლი და გართობის მოყვარული[107]. ხოლო როცა ეს აუცილებელია, შრომასაც საკმაოდ იტანს. სხვა საქმეებს ისინი მაინცდამაინც არ ეტანებიან, მაგრამ გონებრივი მისწრაფებებით დაუცხრომელნი არიან. როდესაც მათ ვესაუბრეთ ბერძნული ლიტერატურისა და მეცნიერების შესახებ[108], საოცარი იყო, რა თავგამოდებით მოინდომეს, რომ ნება დაგვერთო ჩვენი ახსნა-განმარტებებით შეესწავლათ ისინი (რამეთუ ლათინურში[109], მათი აზრით, ისტორიისა და პოეზიის გარდა არაფერი იმსახურებს დიდ მოწონებას), ამიტომ ჩვენ დავთანხმდით, თუმცა წარმატების იმედი არ გვქონდა. დავთანხმდით უფრო იმიტომ, რომ არ მოჩვენებოდით, თითქოს ამ შრომაზე უარს ვამბობდით. მაგრამ როგორც კი საქმე წინ

წავიდა, მათმა გულმოდგინებამ დაგვარწმუნა, რომ ჩვენი შრომა უქმად არ ჩაივლიდა. უტოპიელებმა ძალიან ადვილად დაიწყეს ასოების გამოხატვა და ძალზე მოხერხებულად გამოთქვამდნენ სიტყვებს, ადვილად იმახსოვრებდნენ მათ, ისე ზუსტად დაიწყეს თარგმნა, რომ ჩვენ ეს საოცრებად გვეჩვენებოდა, თუკი არ ჩავთვლით იმას, რომ ვინც სწავლას შეუდგა, მათი უმრავლესობა საამისოდ არამარტო საკუთარი სურვილით, არამედ სენატის ბრძანებითაც აღეგზნო. ესენი იყვნენ განსაკუთრებული ნიჭის მქონე მოსწავლეები და მოწიფული ასაკის მქონე ხალხი, ამიტომ ენის მხრივ სამ წელზე უფრო ადრეც მათთვის უკვე არავითარი სიძნელე არ არსებობდა. ისინი შეუფერხებლად კითხულობდნენ საინტერესო მწერლებს. ზოგჯერ მათ ხელს მხოლოდ ტექსტის დაზიანებული ადგილები უშლიდათ. სწორი გითხრათ, ვფიქრობ, რომ ისინი ადვილად დაეუფლნენ ამ მეცნიერებებს იმის გამო, რომ რაღაც ჰქონდათ საერთო. მგონი ეს ტომი ბერძნებიდან მოდის, რადგან მათ ენაში, რომელიც, სხვათაშორის ძალიან ჰგავს სპარსულს, ქალაქებისა და თანამდებობის პირთა სახელებს ბერძნულის რაღაც კვალი აქვს შემონახული. შემდგომში მე მათ ჩავუტანე პლატონის ბევრი თხზულება, უფრო მეტი არისტოტელესი, აგრეთვე თეოფრასტეს[110] წიგნი მცენარეებზე - სამწუხაროა, რომ ბევრ ადგილას ის დაზიანებული იყო. (როდესაც მეოთხედ გავემგზავრე სამოგზაუროდ, სხვა ბარგის მაგივრად წიგნების საკმაოდ დიდი შეკვრა წავიღე, რადგან მტკიცედ გადავწყვიტე, რომ ჩქარა დაბრუნებას სჯობდა არასდროს დავბრუნებულიყავი. სანამ ზღვაში ვიყავით, თეოფრასტეს წიგნი, ჩემი დაუდევრობით, ხელთ ჩაუვარდა მაიმუნს[111], რომელმაც თამაშსა და გართობაში სხვადასხვა ადგილიდან რამდენიმე ფურცელი ამოხია და დაგლიჯა. გრამატიკის წიგნებიდან უტოპიელებს მხოლოდ ლასკარის[112] წიგნი აქვთ, თეოდორეს ნაშრომები არ ჩამიტანია, ისევე როგორც არ ჩამიტანია არც ერთი ლექსიკონი, გარდა ჰესიხიოსისა და დიოსკორიდუსის[113]. უტოპიელებს ძალიან უყვართ პლუტარქეს[114] წიგნები, მოსწონთ აგრეთვე ლუკიანეს დაცინვები და ხუმრობები[115]. პოეტებიდან მათ აქვთ არისტოფანე[116], ჰომეროსი[117], აგრეთვე ევრიპიდე[118], შემდეგ სოფოკლე[119], დაბეჭდილი ალდუსის[120] მინუსკულით. ისტორიკოსებიდან აქვთ თუკიკიდე და ჰეროდოტე[121], აგრეთვე - ჰეროდოტე[122]. გარდა ამისა, სამედიცინო წიგნებიდან ჩვენმა ამხანაგმა ტრიციანუს აპინატუსმა[123] თან ჩაიტანა ჰიპოკრატეს[124] რამდენიმე მცირე თხზულება, გალენუსის[125] „მცირე ხელოვნება“. ეს წიგნები მათთვის ძალიან ძვირფასი აღმოჩნდა და მიუხედავად იმისა, რომ უტოპიელებს მედიცინა სხვა ხალხებთან შედარებით ყველაზე ნაკლებად სჭირდებათ[126], ის მაინც არსად არ ფასდება ამ დონეზე, თუნდაც მარტო იმ მიზეზით, რომ მის ცოდნას ისინი ფილოსოფიის საუკეთესო და ძალზე სასარგებლო ნაწილად მიიჩნევენ. როდესაც ამ ფილოსოფიის დახმარებით იკვლევენ ბუნების საიდუმლოებებს, მათ ეჩვენებათ, რომ ისინი არა მარტო სიამოვნებას ღებულობენ, არამედ მისი შემქმნელისა და შემოქმედის მფარველობაში ექცევიან. ისინი ფიქრობენ, რომ სხვა შემოქმედთა მსგავსად ღმერთმა სამყარო ადამიანს შესაცნობად და საჭვრეტად წარმოუდგინა. (მხოლოდ და მხოლოდ ადამიანს მიაჩნია მან ამის უნარი). ამიტომ შემოქმედისათვის უფრო ძვირფასია ბეჯითი და ყურადღებიანი დამკვირვებელი, მისი ქმნილების ქომაგი, ვიდრე ის ვინც გონებით სუსტი ცხოველის მსგავსად, თავისი სიბრიყვით და უგუნურებით ამ დიადასა და უჩვეულო სანახაობას არაფრად აგდებს.

ამის გამო უტოპიელთა მეცნიერებაში გაწაფულ გონებას საოცარი უნარი აქვს შექმნას ნიმუშები, რომელთა შემწეობითაც ცხოვრება უფრო მყუდრო და უკეთესი ხდება.

უტოპიელები ჩვენგან ორი რამით არიან დავალებულნი. ესენია წიგნის ბეჭდვა და ქალაქის დამზადება[127]. თუმცა ამას მარტო ჩვენ კი არა, უფრო მეტად თავის თავს უნდა უმაღლოდნენ, ვიანიდან, როდესაც ჩვენ მათ ვაჩვენებთ ალდუსის ქალაქის წიგნებში დაბეჭდილი ასოები და ვუამბეთ, თუ რისგან მზადდებოდა ქალაქი და როგორ შეიძლებოდა ასოების ბეჭდვა, ჩვენ მხოლოდ ვსაუბრობდით ყოველივე ამაზე, რადგან არც ერთი ჩვენგანი არც ერთში და არც მეორეში არ ერკვეოდა. უტოპიელები კი მაშინვე ძალზე გონივრულად მიხვდნენ, რაში იყო საქმე. ადრე მხოლოდ პერგამენტზე, ხის ქერქსა და პაპირუსზე წერდნენ, ახლა კი ქალაქის დამზადებას და ასოების დაბეჭდვას შეეცადნენ. თავიდან არც ისე კარგად გამოსდიოდათ, მაგრამ გულმოდგინე მეცადინეობის შემდეგ წარმატებას მიაღწიეს როგორც ერთ, ისე მეორე საქმეში და ბერძენ ავტორთა ყველა წიგნი რომ ჰქონოდათ, მათი ასლების ნაკლებობას ვეღარ იგრძნობდნენ. ახლაც მათ მეტი არაფერი აქვთ, რაც ჩამოვთვალე მაგრამ ბეჭდავენ წიგნებს და, რაცა აქვთ მათ ათასობით ავრცელებენ.

უტოპიელები სიამოვნებით იღებენ ყველას, ვინც მათი ქვეყნის სანახავად მიდის, თუკი გამოირჩევიან რაიმე ნიჭით, ანდა ხანგრძლივი მოგზაურობის გამო ბევრ ქვეყანას იცნობენ (ამიტომ იყო მათთვის სასიამოვნო ჩვენი იქ მისვლა). ისინი ხალისით ისმენენ რაც ქვეყანაზე ხდება, თუმცა მათთან სავაჭროდ არც ისე ხშირად მიდიან. ანდა რა უნდა ჩაიტანონ რკინის, ოქროსა და ვერცხლის გარდა, რომლებიც ყველას სურს აქედან გაიტანოს. უტოპიელებს ურჩევნიათ, ის, რის გატანაც საჭიროა, თვითონ გაიტანონ, ვიდრე სხვას შემოატანინონ, რადგან მიაჩნიათ, რომ სხვა ხალხებს ასე უკეთესად გაიცნობენ, თანაც ნაოსნობის ჩვევებს არ დაივიწყებენ და გამოცდილებას გაიმდიდრებენ.

მონათათვის

უტოპიელები მონებად არ თვლიან არც ომში დატყვევებულებს, იმათ გარდა ვისაც ბრძოლის ველზე თვითონვე შეიპყრობენ, არც მონათა შვილებს და არც სხვა ხალხების მონობაში მყოფთ, რომელთა ყიდვაც შეუძლიათ. ისინი მონებად აქცევენ იმათ, ვინც უტოპიაში სამარცხვინო დანაშაულს ჩაიდენს, ან კიდევ ვისაც სხვა ქვეყნებში ბოროტმოქმედებისათვის სიკვდილი აქვს მისჯილი (მსგავსი ადამიანები კი ძალიან ხშირად გვხვდება). ასეთებს უტოპიელები ზოგჯერ ძალიან იაფად იძენენ, უფრო კი მუქთად შოულობენ. ამგვარი მონების ხვედრია მუდამ ჟამს მუშაობა და ბორკილები. მონებად ქცეულ თანამოქალაქეებს უტოპიელები უფრო მკაცრად ეპყრობიან რადგან მიაჩნიათ, რომ მათ უარესიც ეკუთვნით რადგან, მიუხედავად იმისა, რომ კარგად იყვნენ აღზრდილნი, შესანიშნავად ჰქონდათ შეთვისებული სიკეთე და სათნოება, ბოროტმოქმედებისაგან თავი მაინც ვერ შეიკავეს.

არსებობს მონობის სხვა სახეობაც, როცა სხვა ქვეყნის რომელიმე შრომისმოყვარე და ღარიბი მუშაკაცი თავისი ნებით იტვირთავს ხოლმე მათ სამსახურს. ასეთებს უტოპიელები კარგად ექცევიან, არანაკლებ, ვიდრე თავიანთ მოქალაქეებს, ოღონდ ცოტა მეტ სამუშაოს აძლევენ, რადგან თვითონ მონები არიან ამას მიჩვეული. თუკი ასეთი მონა უტოპიიდან წასვლას მოისურვებს (რაც იშვიათად ხდება), ძალით მას არც დააკავებენ და არც ხელცარიელს გაისტუმრებენ.

როგორც უკვე აღვნიშნე უტოპიელები ავადმყოფებზე რაღაც განსაკუთრებულად ზრუნავენ, არაფერს იშურებენ, რომ არც წამლები დააკლდეთ და არც საკვები. უფრო მეტიც, უკურნებელი სენით შეპყრობილთ ისინი თავით უსხედან, ესაუბრებიან, ანუგეშებენ და ცდილობენ ოდნავ მაინც მოჰგვარონ შვება. მაგრამ თუ უკურნებელი სენი ავადმყოფს გაუთავებლად ტანჯავს და აწამებს, მაშინ მღვდლები და მოხელეები ურჩევენ, რომ მისთვის უმჯობესია საიქიოს გამგზავრება, რადგან არავითარი სასიცოცხლო მოვალეობის შესრულება აღარ ძალუძს, თავი მოსძულებია, სხვას აწევს მძიმე ტვირთად, თვითონ კი თითქმის უკვე გადასახლებულია იმქვეყნად, თვითონაც ხომ უკვე დარწმუნებულია რომ სიცოცხლე მისთვის ტანჯვაა და სხვა არაფერი. კეთილი იმედით ნუგეშდებულმა, დაე, თვითონ იხსნას თავი ამ გამწარებული სიცოცხლისაგან, სისასტიკისა და საპყრობილისაგან, ან არადა სხვას დართოს ნება გაარიდოს იგი ამ ქვეყანას. ეს მეტად გონივრული საქციელია, რადგან სიკვდილით შეწყდება წამება და არა ბედნიერი ცხოვრება; გონივრულია იმიტომაც, რომ თუ ღვთის ნების გამომხატველი მღვდლების რჩევას დაჰყვება, მისი საქციელი წმინდა და ღვთის საამებელი იქნება. ვინც კი ამაში დარწმუნდება, იგი საკუთარი ნებით ისწრაფავს სიცოცხლეს ან შიმშილით, ან სამუდამო დამინებით; ასეთ დროს ისინი სიკვდილის მიახლოებას ხომ ვერც კი გრძნობენ ხოლმე, ისე აღესრულებიან. ავადმყოფის სურვილის საწინააღმდეგოდ უტოპიელები ავადმყოფს როგორ მოკლავენ და ან მასზე ზრუნვას როგორ შეანელებენ. ისინი დარწმუნებულნი არიან, რომ მხოლოდ ავადმყოფის ნებართვით არის საიქიოს წასვლა საპატიო. მაგრამ თუ სხვა შემთხვევაში ვინმე საკუთარ თავზე ხელს აღმართავს და მღვდლებსა და სენატს ამის გამომწვევ მიზეზს ვერავინ განუმარტავს, მაშინ გარდაცვლილს არც მიწას აღირსებენ, არც ცეცხლზე დაწვავენ, ისე გადააგდებენ სამარცხვინოდ სადმე ჭაობში[128].

ქალი თვრამეტ წელზე ადრე არ თხოვდება, მამაკაცი კი ამ ასაკზე ოთხი წლით უფროსი მაინც უნდა იყოს. თუ ქორწინებამდე[129] ქალი და მამაკაცი საიდუმლო კავშირით შეერთდებიან, ორივეს სასტიკად სჯიან. ასეთებს საერთოდ ეკრძალებათ ქორწინება, თუ მმართველი მათზე მოწყალებას არ მოიღებს. იმ ოჯახის უფროსებს, სადაც ეს დანაშაული მოხდა საშინელი შერცხვენა ელით, რადგან ცუდი მეთვალყურეობის გამო თავისი მოვალეობა ვერ შეასრულეს. უტოპიელები ამ ბოროტმოქმედებას ასე მკაცრად იმიტომ სჯიან, რომ ზრუნავენ მომავალზე. თუ ადამიანებს არ უკრძალავენ შემთხვევით კავშირებს, ცოლ-ქმრობაში სიყვარული იშვიათად იხარებს, არადა მთელი ცხოვრება ხომ ერთად უნდა გაატარონ და მოუწევთ უსიყვარულო ურთიერთობის მთელი სიმძიმის გადატანა.

მეუღლის არჩევისას ისინი მკაცრად მისდევენ, ჩვენის აზრით ერთ მეტად სულელურსა და სასაცილო ადათს: ქალიშვილსაც და ქვრივ ქალსაც ვინმე ღირსეული და დარბაისელი მანდილოსანი სასიძოს შიშვლად წარუდგენს; ასევე, რომელიმე პატივცემული მამაკაცი ქალიშვილს საქმროს შიშველს წარუდგენს. როცა ჩვენ სიცილით დავგმეთ ეს უცნაური ჩვეულება, უტოპიელებმა, პირიქით გაოცება გამოთქვეს სხვა ხალხთა იშვიათი სისულელის გამო და აღნიშნეს: კვიციის შეძენისას ისინი მცირე საფასურს იხდიან, სიფრთხილეს კი დიდს იჩენენ და, თუმცა კვიცი ისედაც თითქმის შიშველია, უნაგირსა და აღკაზმულობას მაინც ხდიან, ქვეშ რაიმე წყლული არ იფარებოდესო. მეუღლის არჩევისას კი, რამაც ადამიანს მთელი ცხოვრების მანძილზე ან ბედნიერება უნდა მიანიჭოს ან უბედურებას გადაჰკიდოს,

ისე ქარაფშუტულად იქცევინ, რომ მთელი სხეული ტანსაცმლითაა დაფარული და ქალის ღირსებას მხოლოდ სახის მიხედვით განსაზღვრავენ (რადგან მხოლოდ სახელა მოუჩანს). ქორწინება მათთვის საკმაოდ სახიფათოა, რადგან ადვილად შეიძლება გაუბედურდნენ (თუკი მოგვიანებით რაიმე იჩენს თავს). ყველა ხომ ისეთი ბრძენი არ არის, მხოლოდ ზნეობრივი თვისებებით დაკმაყოფილდეს. თვით ბრძენიც კი ქორწინებისას სულიერ ღირსებებთან ერთად გარეგნობას მაინც აქცევენ ყურადღებას. მოკლედ რომ ვთქვათ, ამ წამოსასხამებს შეუძლიათ დაფაროს აუტანელი სიმახინჯე, ეს კი ადამიანს ცოლს შეაძულებს, თავის დაღწევა კი უგვე გვიანი იქნება. თუ ერთი მხარე ქორწინების შემდეგ რაიმე მიზეზით დამახინჯდება, ეს ხვედრი ორივემ უნდა ზიდოს. მაგრამ სანამ ეს მოხდებოდეს, ვინმე რომ ხაფანგში არ გაებას, საჭიროა კანონმდებლობით თავის დაზღვევა. ამაზე ისინი დიდი მონდომებით ზრუნავენ - იქაურ ქვეყნებში მხოლოდ უტოპიელები სჯერდებიან ერთ ცოლს[130]. განქორწინება იქ იშვიათია, ცოლ-ქმარს უმეტეს წილად მხოლოდ სიკვდილი თუ დააშორებს. გამონაკლისია მაშინ, თუ მეუღლემ დალატი ჩაიდინა ან აუტანელად მძიმე ხასიათი გამოამჟღავნა. დაზარალებულ მხარეს სენატი მეუღლის შეცვლის უფლებას აძლევს, ხოლო მიტოვებული მხარე სამუდამოდ შერცხვენილი რჩება და მეორედ დაქორწინების უფლება წართმეული აქვს. სხვა შემთხვევაში უდანაშაულო ცოლის ნება-სურვილის საწინააღმდეგოდ მისი განდევნა არ შეიძლება, გარდა იმ შემთხვევისა თუ სხეულზე რაიმე ნაკლი გამოაჩნდება, რადგან უტოპიელებს სისასტიკედ მიაჩნიათ ადამიანის მიტოვება, მაშინ, როცა იგი ყველაზე მეტად საჭიროებს ნუგეშისცემას. მათი აზრით, სიბერისაგან ხომ ვერავის იხსნი, რადგან სიბერე ადამიანს აძაბუნებს, თან მოაქვს სნეულებები და თვითონაც საშინელი სნეულებაა.

მაგრამ თუ ცოლ-ქმარი ერთმანეთს ვერ ეთვისება და ორივე იპოვის თავისთვის უფრო შესაფერს, ვისგანაც მეტ სიტკბობას მიიღებს მაშინ ორივე მხარის თანხმობით შესაძლებელია მათი განქორწინება და ხელახლა ქორწინება, მაგრამ მხოლოდ და მხოლოდ სენატის ნებართვით, რომელიც არ დაუშვებს განქორწინებას, სანამ საქმეს სრული ყურადღებით არ განიხილავს და ადვილად არც მაშინ თანხმდება, რადგან მშვენივრად იცის, რომ ხელახალი ქორწინების იმედი და ადვილად ხელმისაწვდომი უფლება არ შეუწყობს ხელს ცოლქმრული სიყვარული განმტკიცებას.

ცოლქმრული კავშირის შემაგინებლებს უმძიმესი მონობით სჯიან და თუ თითოეული მათგანი ცალ-ცალკე ქორწინებაში იმყოფება მაშინ მათი შეურაცხყოფილი მეუღლეები (თუკი მათ ეს სურთ) მოლაღატეს უარყოფენ და ერთმანეთს შეირთავენ ან მათთვის სასურველ პიროვნებაზე დაქორწინდებიან. მაგრამ თუ რომელიმე შეურაცხყოფილს თავისი მეუღლე მაინც უყვარს მაშინ კანონი არ ეწინააღმდეგება მონობაში თან ახლდეს თანამეცხედრეს. ისეც ხდება ხოლმე, რომ ერთის მონაწილეობა და მეორის გულმოდგინება მმართველს გულს მოულობს ხოლმე და დამნაშავეს თავისუფლებას ანიჭებენ, მაგრამ ასეთი საქციელის ხელმეორედ ჩამდენი უკვე სიკვდილით ისჯება.

სხვა ბოროტმოქმედებისათვის არ არსებობს კანონით გათვალისწინებული რაიმე გარკვეული სასჯელი, მაგრამ თუ ვინმე სასტიკ, მიუტევებელ დანაშაულს ჩაიდენს, სასჯელი სენატმა უნდა განსაზღვროს. ისე კი ცოლები ქმრებმა უნდა აღზარდონ, შვილები - მშობლებმა. გარდა იმ შემთხვევისა, როცა ვინმე ისეთ დანაშაულს ჩაიდენს, რისთვისაც სახალხოდ უნდა დაისაჯოს, თითქმის ყველა დანაშაულისათვის

უტოპიელები ადამიანებს მონობით სჯიან. მათ მიაჩნიათ, რომ ეს არ არის მცირე სასჯელი ბოროტმოქმედებისათვის; სახელმწიფოსათვის იგი უფრო ხელსაყრელია, ვიდრე აჩქარება და დამნაშავეს სიკვდილით დასჯა. მონის შრომა ხომ მეტ სარგებლობას მოიტანს, ვიდრე მისი მოკვლა. მისი მაგალითი კი სხვებს დიდხანს ემახსოვრებათ. თუ დამნაშავე არც ასეთი მოპყრობის შემდეგ გამოსწორდება და წესრიგს ისევ დაარღვევს, მაშინ მას ბოლოს და ბოლოს კლავენ, როგორც მძვინვარე მხეცს, რადგან არც ციხემ უშველა და არც ბორკილებმა. მომთმენი მონებისათვის კი ყველა იმედი არ არის გადაწურული. თუ ხანგრძლივი ტანჯვა მათ მოათვინიერებს და მონანიება კი ცხადყოფს, რომ მათ დანაშაული უფრო ემძიმება ვიდრე სასჯელი, მაშინ მმართველის უპირატესობა ან სახალხო კენჭისყრა მათ მონობას უმსუბუქებს ან საერთოდ ათავისუფლებს.

გარყვნილებისაკენ წაქეზება არანაკლებ საშიშია ვიდრე თვით გარყვნილება და საერთოდ დანაშაულის განზრახ ჩადენის მცდელობას უტოპიელები ბოროტმოქმედებას უტოლებენ. დანაშაული თუ არ მოხდა, ეს არ უნდა იყოს გასამართლებელი საბუთი იმათთვის, ვინც მას წინ არ გადაეღობა.

მასხარები უტოპიელებს გასართობად ჰყავთ. დიდ სირცხვილად ითვლება მათი შეურაცხყოფა, მათი სისულელეებით თავის გართობა კი არავის ეკრძალება. ფიქრობენ, რომ ეს ისევ მასხარებისთვისაა სასარგებლო. თუ რომელიმე პიროვნება იმდენად კუმტი და პირქუშია, რომ არც რაიმე საქციელი მგვრის სიცილს და არც ნათქვამი, ასეთ მასხარაზე ზრუნვას არ დაავალდებენ, შიშობენ რომ იგი საჭირო შემწყნარებლურ დამოკიდებულებას ვერ გამოიჩენს მისდამი, რადგან ამისაგან ვერავითარ სიამოვნებას და სარგებლობას ვერ მიიღებს (ხოლო მასხარათა ერთადერთი ნიჭი გართობაა). სიმახინჯისა და ავთვალადობის დაცინვა უტოპიელებს სამარცხვინოდ მიაჩნიათ სწორედ იმისათვის, ვინც დასცინის და არა იმისათვის, ვისაც დასცინიან, რადგან რეგვენობაა, უკიჟინო ადამიანს ის ნაკლი, რომლისგანაც თავის დაღწევა მას არ შეუძლია.

უტოპიელები ფიქრობენ, რომ ადამიანები ბუნებრივ სილამაზეს სიზარმაცისა და სიზანტის გამო უარყოფენ; ფერუმარილის ხმარების მიზეზად მათ სამარცხვინო ქედმაღლობა მიაჩნიათ, რადგან საკუთარი გამოცდილებით იციან, რომ ვერავითარი გარეგნული სილამაზით ვერ მოიგებს ქალი ქმრის გულს ისე, როგორც სათნო ბუნებითა და თავმდაბლობით. მართალია, ზოგიერთს მხოლოდ გარეგნული სილამაზე იტაცებს, მაგრამ ცოლი ქმარს მთელი ცხოვრების მანძილზე მხოლოდ სათნოებითა და მორჩილებით ინარჩუნებს.

უტოპიელები ადამიანებს ბოროტმოქმედებისაგან განარიდებენ არამარტო დასჯის შიშით, არამედ საყოველთაო პატივისცემითაც, რაც სიკეთისაკენ მოუწოდებს მათ. ვაჟკაცებს, რომლებსაც უდიდესი დამსახურება მიუძღვით ქვეყნის წინაშე, მოედნებზე ძეგლს უდგამენ, მათი გმირობის სადიდებლად და მომავალი თაობისათვის წინაპართა სასახელო მაგალითის საჩვენებლად. ვისაც ცბიერებით სურს რაიმე თანამდებობის მიღება, მას ყოველგვარ იმედს უსპობენ. უტოპიელები შეხმატკბილებულად ცხოვრობენ, რადგან იქ თანამდებობის პირები არ ქედმაღლობენ და მათი შიში არც არავის აქვს, მათ მამებს უწოდებენ და ისინიც ყველას მამობრივი მზრუნველობით ეპყრობიან. მათ ღირსების შესაბამისად ექცევიან: პატივს ნებაყოფლობით მიაგებენ და არა ძალდატანებით. თვით მმართველი სხვებისაგან არ

განსხვავდება განსაკუთრებული ჩაცმულობით ანდა გვირგვინით, მას მხოლოდ თავთავების კონით გამოარჩევენ, ისევე როგორც მღვდელთმთავარს - ცვილის სანთლით, რომელიც მის წინ მიაქვთ.

უტოპიელებს ძალზე ცოტა კანონები აქვთ. ასეთი მოწესრიგებული ურთიერთობის ადამიანებს მეტი არც სჭირდებათ. მათ არ მოსწონთ, სხვა ხალხებს რომ კანონების მთელი ტომებიც კი არ ყოფნით თავისი განმარტებებიანად. უდიდეს უსამართლობად მიაჩნიათ ადამიანთა შეზღუდვა ისეთი კანონებით, რომელთა წაკითხვაც კი შეუძლებელია მათი უზომო რაოდენობის, ხოლო გაგება - მეტისმეტი ჩახლართულობის გამო. უტოპიელები საერთოდ უარყოფენ ვეჟილებს, რომლებიც საქმეს ეშმაკურად არჩევენ და კანონებს მოხერხებულად განმარტავენ. უტოპიელთ უფრო სწორად მიაჩნიათ, რომ ადამიანს თავისი საქმე თვითონვე მიჰყავდეს და მოსამართლეს იმასვე უამბობდეს, რასაც დამცველს ეტყოდა. ასე უფრო ადვილია ბუნდოვანების თავიდან აცილება და ჭეშმარიტების დადგენა. სანამ ილაპარაკებდეს ადამიანი, რომლისთვისაც არც ერთ დამცველს თვალთმაქცობა არ უსწავლებია, მოსამართლე აწონ-დაწონის წვრილმანებს და შედარებით მიაშიტებს გაუადვილებს გაქნილთა ცილისწამების თავიდან აცილებას. ამას სხვა ხალხები ვერ მოახერხებენ, რადგან მათ საოცრად დახლართული კანონების მთელი გროვა აქვთ. უტოპიელები კანონებში კარგად ერკვევიან რადგან, როგორც აღვნიშნე, მათი რაოდენობა ძალზე მცირეა. ამასთან, რაც უფრო ადვილად გასგებია კანონი, მით უფრო სამართლიანად მიიჩნევა. უტოპიელები კანონს იმისთვის ქმნიან, რომ თითოეულს თავისი მოვალეობა შეახსენონ. ძირფესვიანად მის ახსნას ცოტა ვინმე თუ შეძლებს, მაშინ როცა კანონების უფრო სადა და ნათელი აზრი ყველასათვის გასაგებია. უბრალო ხალხისთვის კი, რომლებიც რაოდენობით მეტნი არიან და სხვებზე მეტად სჭირდებათ სწავლება და ახსნა-განმარტება, სულერთია, სულ არ გამოსცემენ კანონებს თუ მათ ისე ჩახლართავენ რომ დიდი ნიჭი და ხანგრძლივი განსჯა იქნება საჭირო მათი აზრის ამოსაცნობად. ამას კი ვერ შეძლებს უბრალო ადამიანთა უბირი გონება და არც დრო ეყოფათ საამისოდ, რადგან მთელ სიცოცხლეს საზრდოს მოპოვებაში ატარებენ.

უტოპიელების ასეთი მაღალი ზნეობა იზიდავს მეზობელ ხალხებს, რომლებიც თავისუფალნი არიან და საკუთარ ნებას ემორჩილებიან. მათი უმრავლესობა უტოპიელებმა იხსნეს ტირანიისაგან. ისინი სთხოვენ უტოპიელებს გაუგზავნონ მათ მოხელეები, ზოგი ერთი, ზოგი - ხუთი წლით. როცა ვადა თავდება - მათ დიდი პატივითა და ქება-დიდებით ისტუმრებენ უკან და მათი შემცველელები მიჰყავთ. ეჭვი არ არის, ეს მეზობელი ხალხები შესანიშნავად და სამაგალითოდ ზრუნავენ საკუთარ სახელმწიფოზე. თუ მათი ცხოვრების კარგი და ავი მოხელეთა კეთილზნეობაზე დამოკიდებული, რასაკვირველია, უტოპიელებზე უკეთესს ვერავის ნახავენ, ვისაც ვერავითარი გასამრჯელო ვერ აცდუნებს (ეს უაზრობა იქნებოდა, უტოპიელები ხომ მალე უკან უნდა დაბრუნდნენ). მოხელეებს მოქალაქეები არ იცნობენ და ამიტომ მათ არ შეუძლიათ რომელიმე მათგანის მხარეზე დადგომა ბოროტი მიკერძოების ან მტრობის განზრახვით. როგორც კი მართლმსაჯულებაში დაისადგურებს ბოროტების ორი სახეობა - სიხარბე და მიკერძოება, ირღვევა ყოველგვარი სამართლიანობა - სახელმწიფოს უმთავრესი ბურჯი. უტოპიელები მოკავშირეებს უწოდებენ იმ ხალხებს, რომლებიც მათ მმართველობას სთხოვენ, ხოლო მეგობრებად თვლიან იმათ, ვისაც სიკეთეს უკეთებენ.

უტოპიელები არ დებენ ხელშეკრულებებს სხვა ხალხებთან, განსხვავებით იმათგან, რომლებიც უთვალავჯერ დებენ შეთანხმებებს, არღვევენ მათ და შემდეგ ისევ განაახლებენ. რა საჭიროა შეთანხმებები? - კითხულობენ უტოპიელები, - ბუნება ხომ უფრო უკეთ აკავშირებს ადამიანებს. და თუ ვინმე ამ ბუნებრივ კავშირს უარყოფს, ის სიტყვებს უერთგულებს? ამ აზრზე უფრო იმიტომ დგანან, რომ მიმდგომ მხარეებში მმართველთა შეთანხმებები და შეკავშირებები ჩვეულებრივ არცთუ პატიოსნად ხდება ხოლმე.

ევროპაში, განსაკუთრებით კი იმ ადგილებში, სადაც ქრისტიანული რწმენა და რელიგიაა გავრცელებული შეთანხმებები წმიდათაწმიდაა და ურღვევი, როგორც მმართველთა სამართლიანობისა და სიკეთის, ისე უმაღლესი მღვდელმთავრისადმი შიშისა და მოწიწების მეოხებით. ისინი ხომ არც თვითონ იკისრებენ ისეთ რამეს, რასაც ზუსტად ვერ შეასრულებენ და ყველა სხვა მმართველისაგანაც მოითხოვენ დანაპირების ყოველმხრივ დაცვას. ვინც ამას თავს არიდებს, მას პასტორული სიმკაცრით მოძღვრავენ. უტოპიელებს სამარცხვინოდ მიაჩნიათ და სავსებით სამართლიანადაც, შეთანხმების ღალატი, განსაკუთრებით ერთგულად მიჩნეული ადამიანებისა.

მაგრამ იმ ახალ სამყაროში რომლისგანაც ეკვატორი გვყოფს, და გვყოფს არა იმდენად მანძილით, რამდენადაც ცხოვრების განსხვავებული წესით და ზნეობით შეთანხმებებს სულ არ ენდობიან. ასეთი შეთანხმებები ხომ რაც უფრო მეტი ლოცვა-კურთხევა ახლავს, მით უფრო სწრაფად ირღვევა. სიტყვების კორიანტელში ადვილია სუსტი ადგილის გამოძებნა, შეთანხმებები კი ხომ განზრახ ეშმაკურადაა დაწერილი, მათ შორის ძნელია მტკიცე კავშირის დამყარება და ამიტომ შეთანხმების ერთგულებისაგან თავის დაღწევა ყოველთვის ხერხდება, ასეთი ფანდი, ხრიკი და ეშმაკობა შემთხვევით კერძო პირთა გარიგებაში რომ აღმოაჩინონ ქედმაღლურად დაიწყებენ ყვირილს, რომ ეს სახრჩობელის ღირსი მკრეხელობაა, ისინი კი ვინც მმართველებს ამგვარ რჩევას აძლევენ, კიდევ ტრაბახობენ ამით.

და გამოდის ისე, რომ სამართლიანობა სხვა არაფერია, თუ არა მდაბიოთა ქველობა, რომელიც მეფური დიდებისაგან საკმაოდ შორს დგას. ან არადა, ორი სამართლიანობა მაინც არსებობს რომელთაგან ერთი მდაბიო ხალხს შეეფერება და ქვეითად დაიარება, მიწაზე დახობავს, ღობეს ვერ გადაახტება, რადგან გზა ყოველმხრივ შეკრული აქვს; და მეორე - ღირსება მეუფეთა, რომელიც უფრო დიდებულია, ვიდრე ხალხისა, უფრო თავისუფალიც, რადგან მისთვის აკრძალული არაფერია, გარდა იმისა რაც მას თავად არ სურს.

ვგონებ მეუფეთა ასეთი ზნე, შეთანხმებათა ასეთი ორჭოფობაა იმის მიზეზი, რომ უტოპიელები არავითარ შეთანხმებას არ დებენ. ისინი რომ აქ ცხოვრობდნენ, შესაძლოა, ამ საკითხზე აზრიც შეცვლოდათ. თუმცაღა მათ ჰგონიათ, რომ შეთანხმებები კიდევაც რომ ზუსტად სრულდებოდეს, მაინც ცუდია მათი წესად შემოღება. გამოდის, რომ სულ მცირე მანძილით, ნაკადულით ან გორაკით დაშორებულ ხალხებს ერთმანეთთან ბუნებრივად დაკავშირებულად არ მიაჩნიათ თავი. მათ ჰგონიათ, რომ მტრებად და მოწინააღმდეგეებად დაიბადნენ და ერთმანეთს სამართლიანად გაჟლეტენ, თუკი ამას წინ შეთანხმება არ ელობება. უფრო მეტიც, შეთანხმების დადება მათ შორის მეგობრულ კავშირს კი არ ამყარებს არამედ ძარცვის თავისუფლებას იძლევა, რადგან შეთანხმების შედგენისას უგუნურების გამო

მის პირობებში არაფერი იყო ჩაწერილი, რაც ამას ხელს შეუშლიდა. უტოპიელები კი, პირიქით, ფიქრობენ, რომ მტრად არავინ არ უნდა ჩათვალო, თუ მან დაჩაგვრა არ დაგიპირა. შეთანხმების ნაცვლად ბუნებაში უნდა არსებობდეს ძმობა, ის უფრო კარგად და მტკიცედ შეაკავშირებს ადამიანების სულსა და გულს, ვიდრე ლიტონი სიტყვები.

სამხედრო საქმისათვის

უტოპიელებს ომი უკიდურესად სძაგთ, როგორც ნამდვილად მხეცური მოქმედება. თუმცა რომელი მხეცი იბრძვის ისე გაუთავებლად როგორც ადამიანი. თითქმის ყველა სხვა ხალხისაგან განსხვავებით, უტოპიელებს არაფერი არ მიაჩნიათ ისე სამარცხვინოდ როგორც ომით მოპოვებული დიდება. მაგრამ განსაზღვრულ დღეებში ისინი მაინც ბეჯითად ატარებენ საომარ ვარჯიშებს. ვარჯიშობენ როგორც მამაკაცები ისე ქალები, რათა საჭიროების შემთხვევაში ომს მოუმზადებლად არ შეხვდნენ. ომს კი ტყუილუბრალოდ არ იწყებენ. ისინი ომში ებმებიან მხოლოდ მაშინ, როცა საკუთარ საზღვრებს იცავენ ან მომხდურ მტერს ერეკებიან, ან ტირანიით დაჩაგრულ სხვა ხალხებს საკუთარი ძალებით ათავისუფლებენ მონობისა და ტირანთა უღლისაგან (ამას ისინი კაცთმოყვარეობით სჩადიან).

მეგობრებს უტოპიელები არა მარტო იცავენ, არამედ შურსაც კი იძიებენ ხოლმე მათთვის მიყენებული შეურაცხყოფისათვის. ასე მხოლოდ მაშინ იქცევიან თუ ისინი თხოვნით მიმართავენ ომის დაწყების წინ, და თანაც მხოლოდ მაშინ ესხმიან თავს უთანხმოების წამომწყობთ, როცა ყველაფერს შეამოწმებენ, ახსნა-განმარტებას მოითხოვენ და ვერ მიიღებენ. ასევე იქცევიან არა მარტო მაშინ, როცა მტერი მათ დაარბევს და ნადავლს წაიღებს, არამედ მაშინაც, და უფრო სასტიკადაც, როცა მეგობარი ხალხების ვაჭრებს სამართლიანობის ნიღბით სამართლიანი კანონების დამახინჯებით და არახელსაყრელი კანონების მოშველიებით უსამართლოდ დასწამებენ ცილს. სწორედ ეს იყო იმ ომის მიზეზიც, რომელშიც იყვნენ ჩაბმულნი უტოპიელები ჩვენს ჩასვლამდე, - ისინი იბრძოდნენ ალაოპოლიტების წინააღმდეგ ნეფელოგეტების[131] დასაცავად.

ალაოპოლიტებს მიაჩნდათ, რომ კანონიერად იქცეოდნენ, სინამდვილეში კი უსამართლოდ მოექცნენ ნეფელოგეტელ ვაჭრებს. სამართლიანად იყო თუ უსამართლოდ ამას მოყვა სასტიკი ომი, რომლის დროსაც ორივე მხარის საკუთარ ძალებსა და სიძულვილს დაემატა მეზობელ ტომთა თავგამოდება და სახსრები (თანხები), ისე რომ ზოგი ხალხის ბედნიერი ცხოვრება შეირყა, ზოგი კი საშინლად გაწამდა. ბოროტება ბადებდა ახალ ბოროტებას და ალაოპოლიტებისათვის ყველაფერი დამთავრდა იმით, რომ ისინი ნეფელოგეტების ძალაუფლებას დამორჩილდნენ (უტოპიელები ხომ თავიანთთვის არ იბრძოდნენ). ალაოპოლიტებს კი ვერავინ შეებოდა, როცა მათი საქმე წარმატებით მიდიოდა.

უტოპიელები მათი მეგობრებისადმი მიყენებული ფინანსური ზარალისათვის სასტიკად იძიებენ ხოლმე შურს, საკუთრისათვის კი ნაკლებად. თუ მათ ვინმე მოატყუებს და ქონებას წაჰგლეჯს (სხეულის დაზიანების გარეშე), სანამ არ აუნაზღაურებენ ზარალს, განრისხებული უტოპიელები მათთან აღარ ვაჭრობენ. ეს

იმიტომ კი არ ხდება რომ საკუთარ მოქალაქეებზე ნაკლებად ზრუნავენ ვიდრე მოკავშირეებზე. სრულიადაც არა. მაგრამ როცა სხვებს ართმევენ ფულს, უტოპიელებს ამის ატანა უფრო უჭირთ, რადგან მეგობარი ხალხების ვაჭრები პირად თანხას კარგავენ და ეს დანაკარგი მათთვის უფრო მეტად მძიმეა. უტოპიელები კი კარგავენ საერთო სახელმწიფო ქონების მხოლოდ ნაწილს, თანაც ისეთი ქონებისას, როგორც სახლში ისედაც უხვად აქვთ, ჭარბადაც კი. სხვა შემთხვევაში ამის გატანა სახელმწიფოდან ძნელიც იქნებოდა, ასე რომ დანაკარგი თითქოს არავისთვის არ არის საგრძნობი, იმიტომ მათ მიაჩნიათ, რომ ზარალისათვის ადამიანების დახოცვით სამაგიეროს გადახდა მეტისმეტი სისასტიკეა. არცერთ მათგანს მიყენებული ზარალის გამო არც ცხოვრების წესი დარღვევია, არც კვების მხრივ რაიმე შეფერხება მოსვლია. მაგრამ თუკი რომელიმე უტოპიელს უსამართლოდ დაასახიჩრებენ ან მოკლავენ სულერთია, რომელიმე კერძო პირის თუ მთელი სახელმწიფოს მიზეზით, უტოპიელები ელჩების საშუალებით საქმეს გამოიძიებენ და მანამ არ მოისვენებენ სანამ დამნაშავეებს მატ არ გადასცემენ. წინააღმდეგ შემთხვევაში ამ ქვეყანას ომს გამოუცხადებენ. გადმოცემულ დამნაშავეებს კი ისინი ან სიკვდილით დასჯიან, ან სამუდამო მონობას მიუსჯიან.

სისხლიანი გამარჯვებები უტოპიელების მარტო სიბრაზეს კი არ იწვევს, არამედ სირცხვილსაც. მათ მიაჩნიათ, რომ მეტისმეტი საფასურით თვით უძვირფასესი საქონლის შეძენაც უგუნურებაა. თუ უტოპიელები მტერზე ეშმაკობითა და მოხერხებულობით [132] გაიმარჯვებენ ამით ძალიან ამაცობენ და, თითქოს დიდი გამირობა ჩაედინოთ სახელმწიფო ტრიუმფს აწყობენ და ქანდაკებებს დგამენ. ისინი ტრაბახობენ, რომ იმამაცეს და ომი ვაჟკაცურად გადაიხადეს რადგან ადამიანის გარდა არც ერთ სულიერს არ ძალუძს გონების ძალით გამარჯვება. დათვები, ლომები, ტახები, მგლები, ძაღლები და სხვა ცხოველები ფიზიკური ძალის მეოხებით იბრძვიან. ზემოჩამოთვლილთა უმრავლესობა ადამიანს ძალ-ღონითა და მძვინვარებით სჯობნის, მაგრამ გონიერებითა და გამჭრიახობით ჩამორჩება.

ომის დროს უტოპიელები პირველ რიგში იმის მიღწევას ცდილობენ, რომ ომის გაჩაღება საჭირო აღარ გახდეს. თუ ეს ვერ მოხერხდება მტერს ისინი სასტიკად სჯიან იმ იმედით, რომ მომავალში დაშინდებიან და სიავეს მეორედ აღარ ჩაიდენენო. ისინი გასაზღვრავენ თავიანთ მიზნებს და ცდილობენ სრულიად მიაღწიონ დასახულს, ისე რომ პირველ რიგში საფრთხისაგან თავის დაღწევაზე იზრუნონ და არა სახელისა და დიდების მოხვეჭაზე.

უტოპიელები ომის გამოცხადებისთანავე ცდილობენ მტრის ტერიტორიის ყველაზე თვალსაჩინო ადგილებში ფარულად და ერთდროულად გააკრან უტოპიელთა სახელმწიფო ბეჭდიანი უამრავი ფურცელი, რომლებშიც უდიდეს გასამრჯელოს პირდებიან იმათ ვინც მტრის მმართველს მოკლავს; შედარებით ნაკლებს მაგრამ მაინც საკმაო თანხას აწესებენ ისინი იმ ცალკეული პირების მოკვლისათვის, ვინც სიაში ჰყავთ შეყვანილი. ეს პიროვნებები, მათი აზრით, ყველაფერში მხარს უჭერენ მმართველს და იმიტომ მასავით დამნაშავენი არიან ომის გაჩაღებაში. გასამრჯელოს უორკვეცებენ იმას, ვინც სიაში შეყვანილი რომელიმე პირს ცოცხლად მოიყვანს. სიაში ჩაწერილებსაც მოუწოდებენ იმოქმედონ თავისივე ამხანაგების საზიანოდ, რის სანაცვლოდაც გასამრჯელოსა და ხელშეუხებლობას აღუთქვამენ.

ამიტომ სულ მალე მოწინააღმდეგეები ყველა მოკვდავს ეჭვის თვალით უყურებენ, ერთმანეთს აღარავინ ენდობა. ისინი შეპყრობილნი არიან საშინელი შიშით და საფრთხეში ვარდებიან, რადგან აღარავინ მიაჩნიათ ერთგულად, ხშირად ყოფილა შემთხვევა მმართველიც და სიაში შეყვანილი ადამიანებიც სწორედ იმას გაუყიდა, ვიზედაც ადრე უდიდეს იმედებს ამყარებდნენ. ასე უბიძგებს გასამრჯელო ადამიანს ნებისმიერი ბოროტებისაკენ. გასამრჯელოს კი უტოპიელები უხვად გასცემენ. მათ კარგად უწყიან რა საფრთხეშიც აგდებენ ადამიანს ამ დაპირებებით და ცდილობენ ნაკისრი საქმე აუნაზღაურონ საგრძნობი თანხით. ასევე პირდებიან ისინი პირად და მუდმივ მფლობელობაში საკმაოდ შემოსავლიან მამულებს ყველაზე უსაფრთხო ადგილებში, რომლებიც მათ მეგობრებს ეკუთვნის. დანაპირებს კი ზედმიწევნით საიმედოდ ასრულებენ.

სხვა ხალხები არ იწონებენ მტრების მოსყიდვის ამ ჩვეულებას და მას გადაგვარებული სულის ბოროტ გამოვლინებად თვლიან. უტოპიელები კი ამას ღირსებად მიითვლიან, რადგან ფიქრობენ, რომ შეტაკების ნაცვლად ამგვარად დაბოლოებული თვით ყველაზე დიდი ომიც კი უფრო გონივრულია. ასევე ადამიანურად და მოწყალედ მიაჩნიათ იმათი საქციელი, ვინც რამდენიმე დამნაშავეს სიკვდილის საფასურად იხდის ურიცხვი უდანაშაულო ადამიანის სიცოცხლეს (როგორც თავისიანის, ასევე მტრებისას), რომლებიც ბრძოლის ველზე უნდა დაღუპულიყვნენ. მტრის ურიცხვი მეომრები და უბრალო ხალხი უტოპიელებს საკუთარ მოქალაქეებზე ნაკლებად როდი ებრალებათ, მათ იციან, რომ ისინი თავის ნებით არ მიდიან საომრად, მათ მმართველთა უგუნურება ერეკება.

თუ ამგვარი ხერხით არაფერი გამოდის, მაშინ უტოპიელები გათიშვის პოლიტიკას მიმართავენ: ან მმართველის ძმას, ან რომელიმე დიდებულს ძალაუფლების იმედს უწერავენ. თუ ქვეყნის შიგნითა დაჯგუფებები შესუსტდება, მაშინ მათ წინააღმდეგ მეზობელ ხალხებს ამხედრებენ მათ შორის დადებული შეთანხმების რომელიმე ძველი მუხლის გამოჩხრეკით, შეთანხმებები ხომ ხელმწიფეებს არასოდეს არა აქვთ მოწესრიგებული.

ომისთვის განკუთვნილ ფულად სახსრებს უტოპიელები უხვად გაიღებენ ხოლმე, მაგრამ მოქალაქეებს ადვილად ვერ ელევინან; იმდენად ძვირფასია მათთვის თითოეული მათგანი, იმდენად აფასებენ ერთმანეთს, რომ არავითარი გაცვლა არ სურთ ხოლმე მტრების მმართველზე. ოქრო-ვერცხლს კი სწორედ ასეთი საჭიროებისათვის ინახავენ და დაუნანებლად ხარჯავენ, მით უმეტეს, რომ მთლიანადაც რომ გასცენ, მათი ცხოვრება ოდნავადაც არ დაზარალდება. სახლებში დაცული სიმდიდრის გარდა მათ აურაცხელი განძი აქვთ საზღვრებს იქით, რადგან, როგორც ადრე აღვნიშნე, ბევრ ქვეყანას აქვს მათი ვალი.

ომში ისინი ყოველი მხრიდან განსაკუთრებით ზაპოლეტელებისაგან^[133] დაქირავებულ ჯარისკაცებს აგზავნიან. ეს ხალხი მათგან აღმოსავლეთით ცხოვრობს, 500 მილის დაშორებით; ეს საშიში უხეში და ველური ადამიანები საცხოვრებლად ტყე-ღრეს ირჩევენ, ფიზიკურად ძლიერი, სიციხის, სიცივისა და შრომის ამტანნი არიან, მაგრამ მოკლებულნი ყოველგვარ სიხარულს. მიწას ისინი არ ამუშავებენ, ჩაცმაზე და სადგომზე არ ზრუნავენ, მხოლოდ საქონელს უვლიან. თავს უმთავრესად ნადირობისა და ძარცვით ირჩენენ. ისინი თითქოს მხოლოდ საომრად არიან გაჩენილები და ყოველთვის ცდილობენ იბრძოლონ. როგორც კი საომარ მიზეზს

იპოვიან, ხარბად დაემგერებიან და თავის საკმაოდ მრავალრიცხოვან ლაშქარს ჩალის ფასად სთავაზობენ ყველას, ვინც კარგ მეომარს დაეძებს. მათ მხოლოდ ერთი ხელობა იციან - სიკვდილის თესვა.

ისინი ვაჟკაცურად, მოუსყიდველი ერთგულებით ემსახურებიან დამქირავებლებს, მაგრამ არასოდეს იზღუდავენ თავს რაიმე გარკვეული ვადით და დგებიან მათ სამსახურში იმ პირობით, რომ თუ სხვა მეტს შემოსთავაზებს მეორე დღესვე მის მხარეს გადავლენ და ასევე მესამე დღეს უკანვე დაბრუნდებიან, თუ კი მეტ გასამრჯელოს მიიღებს.

იშვიათია, სადმე ომი დაიწყოს და რომელიმე მხარეს ზაპოლეტელთა საკმაოდ დიდი რაზმი არ იბრძოდეს. თითქმის ყოველდღე მეორდება შემთხვევები, როცა ბრძოლის ველზე ერთმანეთს მტრად ხვდებიან ნათესავები, რომლებიც აქამდე სიამტკბილობით ცხოვრობდნენ, ადრე ერთსა და იმავე მხარეს იბრძოდნენ, მაგრამ შემდეგ მოწინააღმდეგეთა ბანაკში აღმოჩნდნენ. მაშინ ერთმანეთს ისინი მტრულად დაერევიან ხოლმე, არ ახსოვთ არც მეგობრობა არც საერთო წარმოშობა; ამ სისხლისღვრას სხვა არავითარი მიზეზი არა აქვს, გარდა იმისა, რომ რაღაც გროშების საფასურად ისინი სხვადასხვა მმართველმა დაიქირავა. ზაპოლეტელები ისეთი არასანდოები არიან, რომ დღიურ ჯამაგირზე თუნდაც ერთი გროშის მომატებით ადვილად შეიძლება მათი გადაბირება მოწინააღმდეგის მხარეს. თუმცა კი ძვალ-რბილში გამჯდარ სიხარბეს მათთვის დიდი სარგებელი მაინც არ მოაქვს, რადგან სისხლით მოპოვებულს მაშინვე ხარჯავენ ქარაფშუტული ფუფუნებისათვის.

ეს ხალხი უტოპიელთა გულისთვის ნებისმიერი მტრის წინააღმდეგ იბრძვის, რადგან ესენი დაქირავებისას მათ გაცილებით მეტს უხდიან, ვიდრე სხვები. უტოპიელები ცდილობენ როგორც კარგი, ისე ცუდი ადამიანების გამოყენებას, ესენი მათ ბოროტი საქმეებისათვის ესაჭიროებათ. როცა კი ეს საჭირო ხდება, უდიდესი დაპირებებით მოხიბლულთ ისინი დიდ საფრთხეში აგდებენ, საიდანაც უმრავლეს შემთხვევაში ბევრი ვეღარც ბრუნდება დანაპირების მისაღებად. გადარჩენილებს ზედმიწევნით პატიოსნად მიუთვლიან ხოლმე კუთვნილ თანხას, რომ მათში მსგავსი სიმამაცე კვლავ გააღვივონ. უტოპიელებს სულაც არ ენაღვლებათ რამდენი ზაპოლეტელი დაიღუპება, რადგან მიაჩნიათ, რომ კაცობრიობა მათი მადლიერი იქნება, თუ კი ასეთი უღირსი და ბილწი ხალხი სულაც აღიგვება პირისაგან მიწისა. მათ შემდეგ უტოპიელები ჯერ იმ ქვეყნის ლაშქარს იყენებენ, ვისთვისაც იარაღს მოჰკიდეს ხელი, შემდეგ - სხვა მეგობრების დამხმარე რაზმებს სულ ბოლოს კი მათ შეუერთებენ საკუთარ მოქალაქეებს, რომელთაგან რომელიმე გამოცდილ მამაც ვაჟკაცს მთელი ლაშქრის სარდლად აცხადებენ. მას ორი შემცვლელი ჰყავს, მაგრამ სანამ იგი უვნებელია, ესენი კერძო პირებად ითვლებიან, ხოლო თუ მეთაურს რამე დაემართება - მოკლავენ ან დაატყვევებენ, მაშინ მას მემკვიდრეობით ერთ-ერთი ამათგანი შეცვლის, მას კი, საჭიროების და მიხედვით, - მესამე. ასე იმიტომ იქცევიან, რომ სარდლის საფრთხეში ჩავარდნამ ლაშქარი არ არიოს. ომის ბედი ხომ ყოველთვის სასწორზე ჰკიდია.

უტოპიელები ყოველ ქალაქში აგროვებენ მოხალისეებს, რომლებსაც ომში სურთ წასვლა. ძალით არავის ერეკებიან, საზღვარს მიღმა სამსახურად, რადგან ისინი დარწმუნებულნი არიან, რომ მხდალი ადამიანი ვერც თვითონ გამოიჩენს ვაჟკაცობას და ამხანაგებსაც შიშს გადასდებს. მაგრამ თუ სამშობლოს დაატყდება თავს ომი, მაშინ

ასეთ გაუბედავ მაგრამ ჯანმაგარ ადამიანებს ხომალდებზე საუკეთესო მოქალაქეებს შეურევნ. ან არადა აქა-იქ კედლებთან მიუჩენენ ადგილს, რომ გაქცევა ვერ შეძლონ. ამრიგად, თავისიანების წინაშე სირცხვილი, მტრის სიახლოვე და გაქცევის ყოველგვარი იმედის წარკვეთა მათში შიშს თრგუნავს და ხშირად ეს გამოუვალი მდგომარეობა ვაჟკაცობასაც კი აღვიძებს ხოლმე მათში. მაგრამ ძალით არავის ერეკებიან საზღვარს იქით საომრად. ქალებს რომლებსაც სურთ თან ახლდნენ ქმრებს სამხედრო სამსახურში, არა თუ უშლიან ამას, არამედ ხოტბას ასხამენ და ამისკენ მოუწოდებენ. ქალებს მწკრივში ქმრის გვერდით აყენებენ, შემდეგ მათი ბავშვები, ახლობლები და ნათესავები ახვევიან გარს, რომ უახლოესი თანაშემწენი ისინი იყვნენ, ვისაც თვით ბუნებამ დაუწესა ერთმანეთის მხარში ამოდგომა. უდიდეს სირცხვილად მიაჩნიათ უტოპიელებს, თუ ცოლი უქმროდ დაბრუნდება ბრძოლის ველიდან ან ვაჟი - უმამოდ. ამიტომ ხდება ისე რომ თუ საქმე ხელჩართულ ბრძოლამდე მიდის და მტერი მედგარ წინააღმდეგობას უწევს, ხანგრძლივი და მძიმე ბრძოლა ერთმანეთის სრულ განადგურებამდე გრძელდება.

უტოპიელები ყოველ ღონეს ხმარობენ, რომ თვითონ არ მოუხდეთ ბრძოლა და ცდილობენ ომი დაქირავებული ჯარისკაცების მეშვეობით გადაიხადონ. მაგრამ თუ ეს შეუძლებელი ხდება, მაშინ ისინი ისევე მამაცურად იბრძვიან, რამდენადაც გონივრულად გაურბოდნენ ამას, სანამ შესაძლებელი იყო. ისინი პირველი შემოტევისთანავე კი არ აენტებიან საბრძოლველად, არამედ თანდათანობით, ნელა და შეუპოვრად; და როცა გულს გაიმხნევენ მაშინ უფრო ადვილია მათი მოსპობა, ვიდრე უკუქცევა. უტოპიელებმა იციან, რომ სახლში ყველას აქვს საკვები, შთამომავლობაზე ფიქრი და დარდი არ აწუხებთ (ასეთი საზრუნავი ხომ ყველგან ახშობს კეთილშობილ მისწრაფებებს) და ამიტომ მათ მხნეობა ემატებათ და დამარცხებას ზიზღით ეკიდებიან. სამხედრო ხელოვნების ცოდნა მათებს მათ რწმენას. ხოლო სწორის განსჯის უნარი რაც მათ ბავშვობიდანვე აქვთ შეთვისებული სწავლითა და კეთილგონივრული სახელმწიფო წყობილებით, უნერგავს მამაცობას. ამიტომ მათ სიცოცხლე ფუჭად არ უღირთ, რომ ტყუილუბრალოდ ხარჯონ, მაგრამ არც ისე ძვირფასად მიაჩნიათ, რომ სამარცხვინოდ ჩაებლაუჭონ მას იმ შემთხვევაში, როცა სიკვდილი უფრო ღირსეულია.

ფიცხელი ბრძოლის დროს რამდენიმე რჩეული ახალგაზრდა, რომელთაც აღთქმა და ფიცი აქვთ დადებული, ორთაბრძოლაში იწვევს მტრის სარდალს. ესენი მას ყველას თვალწინ შეერკინებიან; ხან ჩაუსაფრდებიან, ხან შორიდან ებრძვიან, ხან პირისპირ შეეყრებიან, ხან კი თავს ესხმიან გრძელი და უწყვეტი სოლისებრი მწყობრით, რომელშიც ერთმანეთს ენაცვლებიან დაქანცული და ძალმოკრებილი მეომრები. ძალიან იშვიათია, რომ სარდალმა გაქცევა შეძლოს და ან ტყვედ არ ჩაბარდეს, ან არ დაიღუპოს.

თუ უტოპიელები გაიმარჯვებენ, ისინი ხოცვა-ჟლეტას მაშინვე წყვეტენ და გაქცეულების დახოცვას მათ დატყვევებას ამჯობინებენ. ისინი არასოდეს დაედევნებიან გაქცეულთ, თუ საბრძოლო მზადყოფნაში არა ჰყავთ ერთი რაზმი მაინც. თუკი მთელი ლაშქარი გაწყდა და ომი უკანასკნელმა რაზმმა მოიგო, მაშინ ურჩევნიათ მტერი გაექცეთ, ვიდრე მათ დაედევნონ და რაზმი აირ-დაიროს. მათ მშვენივრად უწყიან, თუ რა ცვალებადია ომის ბედი. თვითონაც ხშირად მოსვლიათ, რომ მათი ლაშქრის დიდი ნაწილი დამარცხებულა და გაჟლეტილა, მტერს კი თავი

გამარჯვებულად მიუჩნევია და ყოველი მხრიდან გამოსდგომია გაქცეულებს. თადარიგში მყოფი უტოპიელთა მცირე რაზმი კი მარჯვე შემთხვევას დალოდებია და მოულოდნელად თავს დასხმია მტრის გაფანტულ რაზმებს, რომლებიც უზრუნველად იქცეოდნენ და დროზე ადრე დაიგულეს თავი სამშვიდობოს. უეჭველი და ნაღდი გამარჯვება მტერს გამოეცლებოდა ხოლმე, თითქმის დამარცხებულნი კი იმარჯვებდნენ.

მნელია აიხსნას, როდის უფრო მოხერხებულნი და წინდახედულნი არიან უტოპიელები: ჩასაფრების მოწყობისას თუ მისი გვერდის ავლისას. როცა მოწინააღმდეგე ფიქრობს, რომ ისინი გასაქცევად არიან მზად, მათ ეს აზრადაც არ მოსდით, ხოლო როცა ისინი გაქცევას გადაწყვეტენ, ისე ჩანს, თითქოს ამაზე არც კი უფიქრიათო. თუ იგრძნობენ, რომ მტერი ან რიცხოვრივად, ან უფრო მოხერხებული განლაგებით სჯობნის მათ, უტოპიელები ღამით ბანაკს წყნარად აშლიან და რომელიმე საომარი ხერხის მომარჯვებით გაილაღებიან ხოლმე; ანდა დღისით შეუმჩნეველად იხევენ უკან ისე, რომ უკან დახევისას მათზე თავდასხმა კიდევ უფრო საშიშია, ვიდრე შეტევისას.

უტოპიელები ღრმა და ფართო თხრილით გულმოდგინედ ამაგრებენ ბანაკს. ამოთხრილ მიწას შიდა მხარეს ყრიან. ამ საქმისათვის დაქირავებულ მუშებს კი არ იყენებენ, არამედ თვით ჯარისკაცებს; ამ საქმეზე მუშაობს მთელი ლაშქარი, გუშაგების გარდა. ამდენი მუშახელის წყალობით დიდ სიმაგრეებს უტოპიელები საოცრად სწრაფად აგებენ.

შეტევის მოსაგერიებლად უტოპიელები ძლიერ იარაღს იყენებენ, რომლის ტარება მოსახერხებელია და მოძრაობისას ხელს არ უშლის. ცურვის დროსაც კი არავითარ სიმძიმეს არ გრძნობენ. აღჭურვილობით ცურვას ისინი სამხედრო სწავლების დასაწყისშივე ეჩვევიან. შორ მანძილზე საბრძოლველად იყენებენ ისრებს, რომლებსაც ძლიერად და ზუსტად ისვრიან ქვეითნიც და მხედრებიც. ხელჩართულ ბრძოლაში ხმლით კი არ იბრძვიან, მოწინააღმდეგეს ცულის პირით ან ყუით უპობენ თავს ან ჩეხავენ. უტოპიელები საოცარი მოხერხებულობით აგებენ სხვადასხვა საომარ მანქანას, რომელთაც გამოყენებამდე მალავენ, რომ სარგებლობის მოტანამდე დაცინვა არ დაიმსახურონ. ისე კი ცდილობენ, რომ ეს მანქანები ადვილად გადასაზიდი და მოხერხებულად სამართავი იყოს.

თუ მტერთან ზავს დადებენ უტოპიელები წმინდად იცავენ მას და არაფრით არ დაარღვევენ, კიდევაც რომ ვინმე ეცადოს ამას. მოწინააღმდეგის მიწა-წყალს არ არბევენ, ნათესებს არ წვავენ, უფრო მეტიც, რამდენადაც შესაძლებელია ცდილობენ, რომ ყველაფერი არ გადათელონ ცხენებმა და ადამიანებმა. უიარაღოებს ისინი არ ერჩიან, თუ ჯაშუშები არ არიან. თავისი სურვილით დანებებულ ქალაქებს იცავენ, ხოლო დაპყრობილებს არ ანგრევენ. ვინც ტყვედ დანებებას წინ აღუდგება, მას კლავენ, ქალაქის დანარჩენ დამცველებს კი მონებად აქცევენ. მშვიდობიან მოსახლეობას არ ერჩიან. თუ გაიგებენ რომ რომელიმე მათგანი სხვებს დანებებას ურჩევდა, ასეთებს დასჯილთა ქონებიდან წილს აძლევენ, დანარჩენ ნადავლს მოკავშირეებს უნაწილებენ. არცერთ უტოპიელს ნადავლი შინ არ მიაქვს.

ომის დამთავრებისას თავის ზარალს იმ მეგობრებს კი არ ანაზღაურებინებენ, ვისთვისაც იბრძოდნენ, არამედ დამარცხებულებს. ამ საბაბით ისინი მოითხოვენ

ფულს, რომელსაც შემდეგ ამგვარი ომებისათვის ინახავენ, აგრეთვე ძვირფას მამულებს, რომლებიც მათ სამუდამო მფლობელობაში გადადის. ამგვარი შემოსავალი ახლა ბევრი ხალხისაგან აქვთ, რაც წელიწადში 700 000 დუკატს აღემატება. იმ ქვეყნებში უტოპიელები ხაზინადრის ტიტულით აგზავნიან რომელიმე თავის მოქალაქეს იმისათვის, რომ იქ მდიდრულად იცხოვრონ და ელჩებად ითვლებოდნენ. მაგრამ ფული მაინც ბევრი რჩებათ და ის ხაზინაში შეაქვთ. ზოგჯერ უტოპიელები ამჯობინებენ ფული იმავე ხალხს ანდონ. ასე იქცევიან იმ დრომდე, სანამ იგი არ დასჭირდებათ. მაგრამ თითქმის არასოდეს არ თხოულობენ მთლიანად ყველაფერს. მამულების ნაწილი კი განეკუთვნება იმას ვინც მათივე წაქეზებით თავს იდებს იმ სახიფათო საქმეს რომლის შესახებაც ზემოთ გიამბეთ.

თუ რომელიმე მმართველი მათ იარაღით დამორჩილებას დაუპირებს, უტოპიელები მაშინვე მათ შესახვედრად გაემართებიან დიდძალი ლაშქრით, რადგან ალაღბედზე ისინი არ იბრძვიან თავიანთ მიწაზე და არასოდეს არაა იმის აუცილებლობა, რომ საკუთარ კუნძულზე მოკავშირეთა უცხო ჯარები შემოუშვან.

უტოპიელთა რელიგიისათვის

უტოპიელთა კუნძულის თითოეულ ქალაქს თავისი განსხვავებული რელიგია აქვს. ზოგი მზეს სცემს თაყვანს ზოგი - მთვარეს, ზოგი - რომელიმე ცდომილს. სხვებს მიაჩნიათ, რომ მარტო ღმერთები კი არაა, უზენაესი უფალიც კი ადამიანი იყო, რომელმაც ოდესღაც თავისი ღირსებების წყალობით მოიხვეჭა სახელი და შემდეგ განადიდეს. მაგრამ უტოპიელთა მომეტებული და უფრო გონიერი ნაწილი თვლის, რომ არა ის ღმერთები, არამედ რაღაც ერთიანი, მარადიული, იდუმალი, შეუცნობელი ღვთაებაა ქვეყნად განფენილი, თანაც არა თავისი სიდიდით არამედ თავისი ძალით. მას დამბადებელს უწოდებენ, მიაწერენ ყოველი არსის დასაბამს, ზრდას, მატებას, ცვლილებას, დასასრულს და მხოლოდ მას ეთაყვანებიან.

სხვა რწმენის მქონე უტოპიელებიც ეთანხმებიან მათ იმაში, რომ სამყარო, განგება და ადამიანები უზენაესმა არსებამ შექმნა. მშობლიურ ენაზე უტოპიელები მას მითრას უწოდებენ, მაგრამ ვერ შეთანხმებულან - იგი ყველა ხალხისათვის ერთია თუ სხვადასხვა. ცალ-ცალკე ყველა აღიარებს, რომ ვინც არ უნდა იყოს ეს უზენაესი ღვთაება, იგი ერთიანი ბუნებისაა და მხოლოდ მის ნება-სურვილისა და სიდიადეს მიაწერენ უფლებას ყოველთა არსთა ზედა. უტოპიელთა რელიგიურ შეხედულებებს შორის განსხვავება თანდათან ქრება და ყალიბდება ერთიანი რჯული, რომელიც გონიერებით ვგონებ სხვებს აღემატება. ყველა სხვა რელიგია აქამდე უეჭველად მოისპობოდა, მაგრამ საკმარისია ვინმემ რჯულის გამოცვლა დააპიროს და ბედმა ამ დროს რაიმე საქმეში ხელი მოუცაროს, შიში მაშინვე აფიქრებინებს, რომ ეს შემთხვევითი არაა, რისხვა ზეცით არის მოვლენილი და უარყოფილი. ღმერთი სჯის მას უკეთური განზრახვისათვის.

ხოლო როდესაც ჩვენ ვუამბეთ უტოპიელებს ქრისტეს მოძღვრების, მისი ცხოვრებისა და მის მიერ მოხდენილი სასწაულების შესახებ, როდესაც შეიტყვეს თუ წმინდა მოწამეთა სულიერმა სიმტკიცემ და დანთხეულმა სისხლმა ხანგრძლივი დროის განმავლობაში უზარმაზარ ტერიტორიაზე ადამიანთა რა ურიცხვი რაოდენობა

მოაქცია ჭეშმარიტების გზაზე, არ დაიჯერებ, რა მალე იწამეს მათ ქრისტეს რჯული. არ ვიცი, ეს რაიმე იდუმალი ღვთაებრივი ძალის მეოხებით მოხდა, თუ ეს რელიგია მათთან ყველაზე ძლიერ ერესს უახლოვდება. აქ მხედველობაში მისაღებია ისიც, რომ მათ ყური მოჰკრეს, ქრისტეს მოსწონდაო თავის მოწაფეებთან ერთად ცხოვრება და ეს წესი ახლაც შემონახულია ყველაზე თანმიმდევრულ ქრისტიანულ თემებში და, აი, - სულ ერთია რა მიზეზით მოხდა ეს - უტოპიელთა საკმაოდ დიდმა რაოდენობამ მიიღო ჩვენი რწმენა და მოინათლა.

ჩვენ ოთხნიდა დავრჩით (ორი კაცი სიკვდილმა გამოგვაცალა) და არც ერთი არ ვიყავით სამღვდლო პირი. ამიტომ უტოპიელები თუკი ქრისტიანობის ყველა საიდუმლოს გაეცნენ, მაინც ზოგ რამეს ვერ ეზიარნენ, რადგან მათი შესრულების უფლება ჩვენში მხოლოდ მღვდლებსა აქვთ. წარმოიდგინეთ, უტოპიელებმა ეს საიდუმლოებებიც კარგად შეიცნეს, მთელი სულითა და გულით მიიღეს. ისინი იმაზეც კი ბჭობდნენ, ხომ არ შეიძლებოდა მათთან ქრისტიანი ეპისკოპოსის დანიშვნის გარეშე ვინმე მღვდლად ეკურთხებინათ, და, ვგონებ, აპირებდნენ კიდევ ასეთის არჩევას, მაგრამ ჩემი წამოსვლისას საქმე ჯერ კიდევ არ ჰქონდათ მოთავებული.

ვინც ქრისტეს მცნებას არ იზიარებს, ისინი არც დევნიან ამის ამადიარებელთ და არც ცდილობენ სხვანი განარიდონ მას. თუმცა კი ერთი ჩვენგანი იქ ყოფნის დროს საკმაოდ დასაჯეს. იგი განწმენდის წესის შესრულების უმაღლეს სახალხოდ მსჯელობდა ქრისტიანობის თაობაზე, რასაც ჩვენ არ ვურჩევდით. მის მსჯელობაში გულფიცხოვა მეტი იყო, ვიდრე გონივრულობა. იგი, გაცხარებული, არა მარტო ჩვენს სალოცავებს აყენებდა სხვისაზე მაღლა, არამედ სხვებს საერთოდ უარყოფდა, უწოდებდა წარმართულს, რომლებსაც მხოლოდ უკეთურნი და მკრებელნი ეთაყვანებიან; და ამბობდა ისინი ჯოჯოხეთის ცეცხლზე უნდა დაინთქანო. დიდხანს ქადაგებდა იგი ასე, ვიდრე არ სტაცეს ხელი და გაასამართლეს. იგი დასაჯეს არა მისი რწმენისათვის, არამედ ხალხის აფორიაქებისათვის. უტოპიელთა უძველესი ადათის თანახმად მას განდევნა მიუსაჯეს, საკუთრივ რწმენის გამო, ხომ მათი აზრით არავის დასჯა არ შეიძლება.

როდესაც უტოპუსმა შეიტყო, რომ მის გამოჩენამდე კუნძულის მცხოვრებნი რელიგიის თაობაზე ერთმანეთს გამუდმებით ებრძოდნენ და სხვადასხვა სექტას სამშობლოს ცალ-ცალკე იცავდა, ისარგებლა ამით და ყველა დასძლია. მან უმაღვე დააკანონა რელიგიის თავისუფლება. თუ ვინმე შეეცდებოდა თავის რჯულზე სხვის მოქცევას, მას ეს დინჯად და გონივრულად, საკმაო დასაბუთებით უნდა გეკეთებინა; თუ რჩევით ვერაფერს გახდებოდა, ძალის გამოყენება სასტიკად ეკრძალებოდა და არც შეურაცხყოფის უფლება ჰქონდა. ვინც ამგვარ თემებზე გაცხარებული კამათობს, უტოპიელები მას განდევნიან ან მონად აქცევენ.

ამას რომ აწესებდა, უტოპუსი მარტო მშვიდობიანობაზე კი არ ფიქრობდა და მხოლოდ გამუდმებულ ომსა და შეურიგებელ მტრობას კი არ იცილებდა თავიდან, არამედ მიაჩნდა, რომ ეს თვით რელიგიას სჭირდებოდა, რომლის გარკვეულად ჩამოყალიბება მან ვერ გაბედა. იგი თითქოსდა ფიქრობდა, ხომ არ მოითხოვსო ღმერთი სხვადასხვა სახის მრვალნაირ თაყვანისცემას და ამიტომ ხომ არ უნერგავსო ადამიანებს განსხვავებულ რწმენას. უტოპუსს საოცარ სისულელედ მიაჩნდა ძალითა და მუქარით სხვების დარწმუნება საკუთარი რწმენის ჭეშმარიტებაში. კიდევ მეტი,

მან ადვილად განჭვრიტა, რომ ბოლოსდაბოლოს, ადრე თუ გვიან, ეს ჭეშმარიტება თვითონ გამოაშკარავდება (თუკი საქმეს დინჯად და გონივრულად წარმართავ). ხოლო თუ ჭეშმარიტებისათვის იარაღითა და ამბოხით იბრძოლებ მაშინ თვით საუკეთესო და უწმინდესი რელიგიაც მოისპობა, ფუჭი ცრურწმენების გამო, როგორც თავთავი ილუპება კვრინჩხებსა და ბუჩქებს შორის (უვარგისი ადამიანები ხომ ყველაზე ჯიუტნი არიან).

ამიტომ უტოპუსმა ეს საკითხი გადაუწყვეტლად დატოვა: ყოველ უტოპიელს დართონება ჰქონოდა რწმენა საკუთარი სურვილის მიხედვით, მაგრამ მკაცრად დაუდგინა არავის ისე არ დაეკარგა ადამიანური ღირსება, რომ დაეჯერებინა თითქოს სული სხეულთან ერთად კვდება და სამყაროს განგება კი არ მართავს, არამედ თავისთვის საითკენღაც მიექანებაო. ამიტომაც სჯერათ უტოპიელებს, რომ მიწიერი ცხოვრების შემდეგ ცოდვებისათვის სასჯელია დაწესებული, ხოლო სათნოებისათვის - ჯილდო. თუ ვინმე სხვაგვარად ფიქრობს, მას ადამიანად არ თვლიან, მაგრამ მან ამაღლებული სული თავის უღირს ცხოველურ სხეულამდე დაამდაბლა. ასეთი პიროვნება მათ არც მოქალაქედ მიაჩნიათ, რადგან მას შიში რომ არ თრგუნავდეს ხომ არაფრად ჩააგდებდა კუნძულის კანონებსა და ადათ-წესებს. განა საეჭვოა, რომ თუ არა კანონების შიში, იგი მხოლოდ საკუთარი სხეულის იმედზე იქნებოდა და განა არ შეეცდებოდა მალულად, თვალთმაქცობით დაერღვია ეს კანონები ანდა ძალა ეხმარა მათ წინააღმდეგ?

ამიტომ ამგვარ ადამიანებს უტოპიელები პატივს არ სცემენ, თანამდებობაზე არ ნიშნავენ და არავითარ მოვალეობას არ აკისრებენ, ასეთები ყველას ფუჭ და მდაბალ პიროვნებებად მიაჩნია. დასჯით კი არ სჯიან, რადგან დარწმუნებლნი არიან, რომ არავის ძალუმს სხვას რაიმე შეაგნებინოს. უტოპიელები არც მუქარით აიძულებენ ვინმეს აზრების დაფარვას და არც არსად აჭაჭანებენ თვალთმაქცობასა და სიცრუეს, რაც შორს არაა ღალატისაგან, რაც მათ საშინლად სძაგთ.

ამგვარად მოაზროვნე ადამიანებს უკრძალავენ თავისი აზრების სახალხოდ დაცვასა და მსჯელობას, მაგრამ დარბაისელ ხალხთან და საეკლესიო პირებთან საუბარს, პირიქით ურჩევენ, რადგან სწამთ, რომ გონიერება ბოლოსდაბოლოს სძლევს უმეცრებას.

უტოპიაში სხვა რიგის ხალხიც არსებობს და არცთუ მცირერიცხოვანი; მათ არ სდევნიან და ბრყვებად და უმეცრებად არ მიიჩნევენ. მათ სულ სხვაგვარი მანკიერი აზრი აქვთ, როცა ამბობენ პირუტყვის სულიც უკვდავიაო, თუმცა მათ სულიერი ღირსებების ადამიანთან გაიგივება არ შეიძლება და არც ცხოველები არიან შექმნილი ადამიანისნაირი ბედნიერებისათვისო. თითქმის ყველა უტოპიელს მტკიცედ სჯერა, რომ ადამიანათა სულებს უზომო სიამე ელით, ამიტომ ავადმყოფებს ისინი, მართალია, დასტირიან, მაგრამ არავის სიკვდილს არ დარდობენ, გარდა იმ შემთხვევისა, როცა ვინმე ამ ცხოვრებას ჭმუნვითა და საკუთარი სურვილის გარეშე ტოვებს. ეს მათ ცუდის მომასწავებლად მიაჩნიათ, რადგან ფიქრობენ, რომ საშინელია აღსასრული სასოწარკვეთილი სულისათვის, რომელმაც უწყის რაღაც ბოროტება და იდუმალად გრძნობს მოახლოებულ სასჯელს. უტოპიელთა აზრით არც ღვთისათვის იქნება საამო მიიღოს ისეთი ადამიანის სული, რომელიც მოხმობისთანავე სიხარულით კი არ გაეშურება, არამედ ჯიუტობს და ფეხები უკან რჩება. ასეთი ადამიანის სიკვდილი შემადრწუნებელია, მიცვალებულს სევდიანი დუმილით

აბარებენ მიწას და მოწყალე ღმერთს შეავედრებენ მის სულს, რათა მიუტევოს ეს სისუსტე. ხოლო ვინც სიხარულით, კეთილი იმედით აღსავსე აღესრულება მას არ დაიტირებენ, სიმღერით კრძალავენ და მის სულს ღმერთს ჩააბარებენ, ხოლო ცხედარს დიდი პატივით დაწვავენ, ამ ადგილზე სვეტს აღმართავენ და ზედ წარწერას ამოკვეთენ. შინ მობრუნებულნი იხსენებენ მიცვალებულის ღვაწლს, მის ღირსებებს და მომეტებული სიამოვნებით სწორედ მის სასიხარულო აღსასრულზე საუბრობენ.

უტოპიელები ფიქრობენ, რომ გარდაცვლილთა სულიერი სიმტკიცის ხსოვნა ცოცხალთათვის არის წამახალისებელი სათნოების გზაზე და რომ ეს ადათი თვითონ გარდაცვლილთათვისაა სასიამოვნო, უხილავად ისინიც ხომ მონაწილეობენ ამ საუბრებში (სუსტი მხედველობის გამო მოკვდავნი მათ ვერ ხედავენ). სულებისათვის მათი სურვილისამებრ გადასახლების შესაძლებლობის აღკვეთა არ შეესაბამება ბედნიერთა ხვედრს. მიცვალებულნი უმადურნი იქნებოდნენ თუ არ მოისურვებდნენ მეგობართა ნახვას, რომლებთანაც მთელი ცხოვრება სიყვარულსა და სიკეთეში გაუტარებიათ. კარგ ადამიანებს ხომ მშვენიერი თვისებები არ აკლდებათ, არამედ ემატებათ. სწამთ, რომ გარდაცვლილნი კვლავ ცოცხლებში ტრიალებენ, მათ სიტყვებსა და საქციელს აკვირდებიან. ასეთ დამცველებზე დაყრდნობით უტოპიელები ყოველგვარ საქმეს ენერგიულად კიდებენ ხელს და თავიანთ შორის წინაპართა სულის ყოფნის რწმენა უსინდისო საქციელის ფარულად ჩადენისაგანაც კი აკავებთ.

უტოპიელები ვერ იტანენ და დასცინიან კიდევ ფუჭი ცრუმორწმუნეობისაგან გამომდინარე მკითხაობას და ყოველგვარ წინასწარმეტყველებას, რაც სხვა ხალხებთან დიდ პატივშია. ბუნების ძალთა მონაწილეობის გარეშე მომხდარ სასწაულებს ისინი ღვთაებრივ ძალას მიაწერენ და მისი არსებობის დადასტურებად მიაჩნიათ. უტოპიელები ამბობენ, ასეთი რამ ხშირად ხდებაო და რთული და დიდი საქმეების ჟამს, ყველა ერთად, ღრმა რწმენით ადავლენს ხოლმე ლოცვას და მიზანსაც აღწევს.

ბუნების ჭკრეტა და მისი ქება ღვთის საამებელი საქმეა. რელიგიით აღტყინებულ უტოპიელთა ერთ, არცთუ მცირე ნაწილს მეცნიერებანი არაფრად მიაჩნია და ცოდნის შეძენისაკენ არ ისწრაფვის.

ისინი არასდროს არიან უქმად. მათ ირჩიეს მოიპოვონ ბედნიერება, რომელიც სიკვდილის შემდგომად მიიღწევა ღვაწლითა და სხვათათვის კეთილის ქმნით. ერთნი ავადმყოფებს უვლიან მეორენი გზებისა და ხიდების შეკეთებაზე მუშაობენ, თხრილებს წმენდენ, ბელტებს ჭრიან, ქვებს და ქვიშას თხრიან, ხეებს ჭრიან და ამუშავებენ, ქალაქებში საზიდრებით მიაქვთ შეშა, მარცვლეული და სხვა; ემსახურებიან არამარტო სახელმწიფოს, არამედ კერძო პირებსაც, ასე რომ მონებზე მეტსაც შრომობენ. ისინი მხიარულად და დიდი ხალისით იტვირთავენ მხოლოდ ყველაზე მძიმე და ჭუჭყიან საქმეს, რომელსაც ბევრი ზიზღით გაურბის, სხვების გართობა-სიამოვნებაზე ფიქრობენ, თვითონ კი დღენიდაგ შრომობენ და ამას არავის აყვედრიან, სხვებს არ დასცინიან და თავს არ იწონებენ. რაც უფრო ემსგავსებიან მონებს, სხვათა თვალში, მით უფრო მეტ პატივისცემას იმსახურებენ.

კუნძულზე ცხოვრების ორი განსხვავებული წესი არსებობს: მოქანდაკეთა ერთი ნაწილი უცოლოა. ისინი მარტო ვენუსის საქმეს კი არ ერიდებიან, არამედ ხორცსაც არ

ჰამენ. ზოგი მათგანი საერთოდ არ ეკარება ცხოველურ საკვებს. ისინი გაურბიან მიწიერი ცხოვრების ყოველგვარ სიამეს, როგორც რაიმე მავნეს, და ლოცვითა და მარხულობით ცდილობენ მალე ეწიონ იმქვეყნიურ ცხოვრებას. ეს იმედი მატებს მათ სიმხნევესა და ხალისს:

მეორენიც არანაკლებ შრომობენ, მაგრამ ურჩევნიათ ქორწინების სიამეზე უარი არ თქვან, თანაც მიაჩნიათ, რომ ბუნებისა და ქვეყნის წინაშე ვალდებულნი არიან შთამომავლობა იყოლიონ, არც არავითარ სიამოვნებას არ იკლებენ, თუკი ამით სამუშაოს არ მოსცდებიან. საქონლის ხორცს მშვენივრად მიირთმევენ, ფიქრობენ, რომ ამით მათ ძალა შეემატებათ და ყოველგვარი სამუშაოს შესრულებას შეძლებენ.

უტოპიელების აზრით ეს მეორე ნაწილი უფრო გონიერია, პირველი - უფრო ღვთისმოსავი. ვინც უცხოლობას ირჩევს და არა ქორწინებას, მკაცრ ცხოვრებას და არა განცხრომას, ამას რომ ჭკუის კარნახით ჩადიოდეს, მას სასაცილოდ აიგდებდნენ. მაგრამ რადგან ეს რწმენის საფუძველზე ხდება ამიტომ სხვების თვალში დიდ პატივისცემას იმსახურებს. უტოპიელები ხომ განსაკუთრებით ცდილობენ უკეთური არაფერი წამოსცდეთ არც ერთი რჯულის შესახებ. ამ ტიპის ადამიანებს თავიანთ ენაზე ისინი „ბუთრესკებს“^[134] უწოდებენ, რაც „წმინდანებს“ ნიშნავს.

რწმენის მსახურნი მეტისმეტი ღვთისმოსაობით გამოირჩევიან, ამიტომაც თითოეულ ქალაქში ისნი ძალზე ცოტანი არიან. ტაძართა რაოდენობა ყველგან თანაბარია და მღვდლები ცამეტნი არიან. თუ ომიანობა არ არის და ვინმე ომში არ წავა. ომიანობის დროს შვიდი მაინც მიდის და ამდენივე შეენაცვლება. ომის შემდეგ თითოეული თავის ადგილს უბრუნდება. მათი არყოფნის დროს ტაძარში დარჩენილნი თან ახლავან ხოლმე მღვდელმთავარს და ომში დაღუპულთა ადგილებს რიგრიგობით იკავებენ, მათ მღვდელმთავარი მეთაურობს. მღვდელს ხალხი ირჩევს ფარული კენჭისყრით - ისევე როგორც მოხელეებს - რათა ვინმე ვინმეს არ მიემხროს. არჩეულს სამღვდლო მძობა აკურთხებს.

მღვდლები ღვთისმსახურებას ასრულებენ, ისინი რწმენის დაცვასა და მრევლის ზნეობაზე ზრუნავენ. უტოპიელს დიდ სირცხვილად ეთვლება, თუ მას მღვდელი დაიბარებს და უპატიოსნო ცხოვრებისათვის გაკიცხავს.

მღვდელს ადამიანის რჩევა-დარიგება და დარწმუნება ევალება, მმართველსა და მოხელეებს კი - ბოროტმოქმედთა ალაგმვა და დასჯა. თუ მღვდლები ვინმეს უღირსად ცნობენ, მას ღვთისმსახურებაზე დასწრება აეკრძალება. უტოპიელებისათვის ამ სასჯელზე საშინელი რამ არ არსებობს, რადგან ამ დროს თავს უმძიმესი შერცხვენა ატყდებათ, გულს ფარული რელიგიური შიში უღრღნით და მათი სიცოცხლეც საფრთხეშია: თუ შეცოდებას მღვდელთან სასწრაფოდ არ მოინანიებენ, მათ ატუსაღებენ და სენატი სასჯელს მიუზღავს.

მღვდლები ბავშვებსა და მოზარდებს ასწავლიან. საგნების სწავლაზე არანაკლები ყურადღება ზნეობასა და სათნოებას ექცევა. ისინი ცდილობენ სახელმწიფოს საკეთილდღეოდ სასარგებლო და კეთილი აზრები ბავშვის ნაზ და ადვილად დამყოლ სულს თავიდანვე შეუსისხლხორცონ. ბავშვობაშივე ჩანერგილი ასეთი აზრები ადამიანს მთელი ცხოვრების მანძილზე გაჰყვება და უდიდეს სარგებლობას

მოუტანს სახელმწიფოს, რომელსაც სწორედ მცდარად წარმართული მსჯელობით გამოწვეული ცოდვები ღუპავს.

ქალთა სქესს დიდ პატივს სცემენ. მღვდლად ქალსაც ირჩევენ, ოღონდ შედარებით იშვიათად თანაც მხოლოდ ქვრივს ან დარბაისელ, ხანშიშესულ მანდილოსანს. მღვდლებსაც საუკეთესო ქალები ჰყავთ ცოლად.

არც ერთ თანამდებობის პირს არ მიაგებენ უტოპიელები ისეთ პატივს, როგორსაც მღვდლებს. რომელიმე მათგანმა დანაშაული რომ ჩაიდინოს საზოგადო სამართალს არ ექვემდებარება. მის განსჯას მხოლოდ ღმერთსა და მისსავე სინდისს მიანდობენ ხოლმე. უტოპიელებს შეუძლებლად მიაჩნიათ მოკვდავის ხელი შეეხოს მღვდელს, რომელმაც, მართალია, დანაშაული ჩაიდინა, მაგრამ ღმერთთან ისეა მიახლოებული, როგორც წმინდა ზვარაკი. ასეთი ადათის დაცვა მათთან ძალიან ადვილია, რადგან მღვდლები ცოტა ჰყავთ და დიდი სიფრთხილით ხდება მათი არჩევა. ამიტომ არცაა მოსალოდნელი, რომ ცოდვის ჩადენის ცდუნებამ დასძლიოს საუკეთესოთა შორის საუკეთესო ადამიანი, რომელიც ამდლებულია სწორედ თავისი ღვთისმოსაობითა და სათნოებით. მაგრამ რომც მოხდეს ასე (ადამიანის ბუნება ხომ ცვალებადია), ეს საშიში არ არის, ქვეყანა ამით არ დაიქცევა რადგან, მღვდლები ძალზე ცოტანი არიან და მინიჭებული პატივის გარდა არავითარი უფლება არ გააჩნიათ. უტოპიელებს იმიტომაც ჰყავთ ასე მცირერიცხოვანი მღვდლები, რომ საყოველთაო პატივისცემით გარემოსილი მათი ღირსება არ გაიფხვრება რაკი ბევრზე განაწილდება, თანაც ძნელია მღვდლად კურთხევის ღირსი ბევრი პიროვნების გამონახვა. ამ დროს ხომ უბრალო სათნოება საკმარისი არ არის.

უტოპიელთა მღვდლებს სხვა ხალხებიც თვით უტოპიელებზე ნაკლებად როდი აფასებენ და აი რატო: ომში, ბრძოლის ველზე მღვდლები შორიახლოს იმყოფებიან და დაჩოქილნი და ხელაპყრობილნი შესთხოვენ ღმერთს ჯერ საყოველთაო მშვიდობას და შემდეგ თავისიანების გამარჯვებას ორივე მხარეზე სისხლის დაუღვრელად; როცა უტოპიელები იმარჯვებენ, მღვდლები შუაგულ ბრძოლაში ჩაერევიან და აკავებენ თავისიანებს, რომლებიც გამბეზვარებულნი მისდევენ დამარცხებულებს. სიცოცხლე რომ იხსნას, მტრისათვის საკმარისია მხოლოდ მღვდლის მოხმობა. მღვდლის ტანსაცმლის აფრიალებულ კალთაზე შეხება იცავს მტრის ქონებას, ომით გამოწვეული ყოველგვარი ზარალისაგან.

სხვა ხალხები უტოპიელთა მღვდლებს ასეთ დიდ პატივს მიაგებენ და ქება-დიდებას ასხამენ კიდევ იმიტომ, რომ მათ მტრისაგან თავისიანებიც ხშირად უხსნიან. როდესაც მათი ლაშქარი უკან დახევას იწყებდა, მდგომარეობა იძაბებოდა და ამ უკუქცევისას მტერი მზად იყო ხოცვა-ჟლეტისა და მარცვა-გლეჯისათვის. სისხლისღვრას სწორედ მღვდლების ჩარევა შეწყვეტდა, მშვიდობა ჩამოვარდებოდა და სამართლიანი ზავი დაიდებოდა ხოლმე. არ ყოფილა შემთხვევა, თვით ყველაზე სასტიკსა და ველურ ხალხსაც არ შეეგნო, რომ უტოპიელი მღვდლები ხელშეუხებელი არიან.

უტოპიელები ყოველი თვისა და ყოველი წლის პირველსა და უკანასკნელ დღეს დღესაწაულობენ. თვეებს ისინი მთვარის ფაზებით, ხოლო წელიწადს - მზის მოქცევის მიხედვით ანგარიშობენ. დასაწყის დღეებს ცინემერულს[135] უწოდებენ,

ბოლოს კი - ტრაპემერუსს, რაც ჩვენებურად დაახლოებით „პირველ დღესასწაულს“ და „ბოლო დღესასწაულს ნიშნავს“.

მშენიერი სანახავია მათი ოსტატურად ნაგები ტაძრები, რომლებიც დიდძალ ხალხს იტევს, რაც ტაძართა მცირე რაოდენობით არის გამოწვეული. ნაგებობაში, ცოტა არ იყოს, ბნელა. როგორც აგვიხსნეს, ეს მშენებლობის ნაკლი კი არ არის, არამედ მღვდლების რჩევითაა გაკეთებული, რომლებსაც მიაჩნიათ, რომ ჭარბი სინათლე აზრებს ფანტავს, ზომიერი და ბინდშერეული კი - გულისყურის მოკრებას უწყობს ხელს და ღვთისმოსაობას აძლიერებსო.

თუმცა აქ ბევრნაირი რწმენა არსებობს, სიმრავლისა და მრავალფეროვნების მიუხედავად, სხვადასხვა საშუალებით ყოველი მათგანი საბოლოოდ ერთი მიზნისაკენ მიდის, ყველა ეთაყვანება ღვთაებრიობას. ტაძრებში არაფერია ისეთი, რაც ყველასათვის არ იყოს მისაღები. თუ რომელიმე რწმენას თავისი განსაკუთრებული სამსახური ახლავს, მორწმუნენი მას შინ ასრულებენ. საზოგადო ღვთისმსახურები კი ცალკეულ აღმსარებლობას არ ეწინააღმდეგება: ამიტომაც არ არის ტაძრების კედლებზე ღმერთის არავითარი გამოსახულება, ყოველ ადამიანს ნება აქვს ღვთის ხატება თვითონვე წარმოიდგინოს. ღმერთს ისინი მხოლოდ მითრას უწოდებენ და სხვანაირად არ მიმართავენ. მითრას მათთვის ნებისმიერი ღვთაებრივი სიდიადის ერთიანი ბუნების აღმნიშვნელია. უტოპიელთა ლოცვებში არაფერია ცალკეული მორწმუნის რელიგიის შეურაცხმყოფელი.

ბოლო დღესასწაულის დროს მთელი დღის ნამარხულევი ხალხი ტაძარში მიდის რათა ღმერთს მადლობა უძღვნას, კეთილად ჩავლილი თვის ან წლისათვის. მეორე დღეს დგება პირველი დღესასწაული და ხალხი დილიდანვე მიემშურება ტაძრებისაკენ, რომ ღმერთს ახლა ბედნიერი მომავალი თვე და წელი შესთხოვოს.

ბოლო დღესასწაულის დროს ტაძარში წასვლის წინ ცოლი ქმრის წინაშე იჩოქებს, შვილები - მშობლების წინაშე. მათ უნდა აღიარონ ჩადენილი შეცოდებანი და პატიება ითხოვონ. ოჯახში რომც ყოფილიყო რაიმე უკმაყოფილება მოსალოდნელი, ასეთი აღიარების შემდეგ საშიშროება გაქრება და ყველას შეეძლება სულგაწმენდილმა მიიღოს მონაწილეობა ღვთისმსახურებაში, რაც ადელვებულებს ეკრძალებათ და მკრეხელობად ეთვლებათ. ვინც გულში მტრობასა და სიძულვილს გრძნობს, მხოლოდ განწმენდისა და გულის დაწყნარების შემდეგ მიდის ტაძარში, რადგან უფროთხის სასტიკსა და სწრაფ შურისძიებას.

ტაძარში მამაკაცები მარჯვენა მხარეს იკავებენ, ქალები - მარცხენას. შემდეგ ისე განლაგდებიან, რომ ყოველი ოჯახის უფროსის წინ ამ ოჯახის მამაკაცები დასხდნენ, ხოლო დიასახლისის წინ - ამავე ოჯახის ქალები რადგანაც საზოგადო ადგილებში საჭიროა ყველას ოჯახის უფროსების მკაცრი თვალი დარაჯობდეს. ამასთანავე, აუცილებელია, რომ უმცროსები უფროსების გვერდით ისხდნენ, რადგან მეთვალყურეობის გარეშე დარჩენილი ბავშვები ცელქობაში გაფლანგავენ დროს, რომელიც მათში ღვთისადმი შიშის ჩანერგვას უნდა ხმარდებოდეს. ღვთის მოშიშობა ხომ სათნოების მისაღწევად ერთადერთი გზაა.

ღვთისმსახურების დროს უტოპიელებმა ცხოველების შეწირვა არ იციან, მათ მიაჩნიათ, რომ ღმერთმა ადამიანს სიცოცხლე სიკეთისათვის მიანიჭა და დასჯა და

სიკვდილი არ შეეფერება მას. ისინი საკმევლს და კეთილსურნელებას აფრქვევენ, ცვილის სანთლებს ანთებენ. განა მათ არ ესმით, რომ ღვთაებრივ ბუნებას სანთელი და ლოცვა ვერაფერს შემატებს, მაგრამ თაყვანისცემის ამგვარი სახე მოსწონთ და შინაგანად გრძნობენ ამ ადათ-წესებისა და სანთელ-საკმევლის მეშვეობით, როგორ მაღლდება ადამიანის სული და როგორ უჩნდება სურვილი მეტი სიხარულით ეთაყვანოს უზენაესს.

ტადარში ხალხი თეთრად შემოსილი მიდის. მღვდლის სამოსი არაჩვეულებრივად ფერადოვანი და ლამაზია, თუმცა კი არც ძვირფასი ნაჭრისაგან არის შეკერილი, არც ოქრომკერდითაა ნაქარგი, არც ძვირფასი ქვებით მოოჭვილი. იგი ისეთი ნატიფი ოსტატობითაა ნაქსოვი ჩიტის ბუმბულისაგან, რომ ხარისხით ყველა ძვირფას ქსოვილს აღემატება. თანაც ფრთოსანთა ბუმბულში და მათ გარკვეულ განლაგებაში ჩაქსოვილია რაღაც იდუმალი აზრი, რომელმაც მრევლს ღვთის წყალობა, მისადმი კრძალვა და მოყვასის წინაშე ვალი უნდა შეახსენოს.

როდესაც ამგვარად შემოსილი მღვდელი მრევლის წინაშე გამოდის, ყველა ძირს ემხობა და ისეთი სამარისებული სიჩუმე დგება, რომ ადამიანს შიში იპყრობს თითქოს ღმერთი გამოეცხადაო. ცოტა ხნის შემდეგ მღვდლის ნიშანზე ძირს გართხმულნი წამოდგებიან და ღმერთს გალობით მადლობას წირავენ, შიგა და შიგ რაღაც მუსიკალურ საკრავებზე უკრავენ, რომელთა ჟღერადობა გაცილებით სჯობია ჩვენსას, შედარებაც კი არ შეიძლება. ერთ რამეში კი ისინი ჩვენგან ძლიერ განსხვავდებიან - დაკვრაშიც და სიმღერაშიც ისინი საოცარი ბუნებრიობით ბაძავენ ადამიანურ გრძნობებს და გადმოსცემენ მათ. სასიხარულო შემრიგებლური, შფოთიანი, სევდიანი თუ რისხვით აღსავსე ლოცვის აღსრულებისას მუსიკის ჟღერადობა ისე ერწყმის შინაარსს, ჰანგი ისე შეესატყვისება აზრს, რომ არაჩვეულებრივ ზემოქმედებას ახდენს მსმენელებზე, აღფრთოვანებს და აღანთებს მათ გულებს.

ბოლოს მღვდელი ხალხთან ერთად საზეიმოდ იმეორებს სადღესასწაულო ლოცვებს. ლოცვის ტექსტი ისეა შედგენილი, რომ ერთად კი სრულდება, მაგრამ თითოეულს შეუძლია მხოლოდ თავისად იგულოს. ლოცვებში ღმერთს შემოქმედად, სამყაროს მმართველად, სიკეთის წყაროდ აღიარებენ და ყველა წყალობისათვის მადლს უძღვნიან. განსაკუთრებით კი იმისათვის ემადლიერებიან, რომ ასეთ ბედნიერ სახელმწიფოში მოახვედრა და ასეთ ჭეშმარიტ რჯულს აზიარა. თუ ღვთის მონა-მორჩილი ცდება და სადმე არსებობს ღვთისათვის უფრო საამო, უკეთესი რწმენა და სახელმწიფო, მაშინ იგი ევედრება ღმერთს მოიღოს მოწყალეობა და აღიაროს იქ მოხვედრა. იგი ხომ მზადაა უზენაეს ყველგან გაჰყვეს, ხოლო თუ უტოპიელთა სახელმწიფოა საუკეთესო და რწმენა უჭეშმარიტესი, დაე მისცეს მას ღმერთმა სიმტკიცე და შეაძლებინოს ღვთის ამგვარად შეცნობა, ცხოვრების ასეთ წესს კი სხვა მოკვდავნიც აზიაროს, თუ კი თვით ღმერთის მიუწვდომელ გონებას არ ახარებს რწმენათა ასეთი მრავალფეროვნება.

ბოლოს უტოპიელი ევედრება ღმერთს მალე მიიღოს მისი სული და აღირსოს უმტკივნეულო აღსასრულს, თუმც კი თვითონ უფლება არა აქვს განსაზღვროს, ადრე უნდა მოხდეს ეს თუ გვიან. ხოლო თუ ღმერთი არ განრისხდება, უტოპიელს ურჩევნია მიეახლოს მას ტანჯვით, სიკვდილის გზით, ვიდრე მისგან მოშორებულმა ბედნიერად იცხოვროს.

აღავლენენ რა ამ ლოცვას, ისინი კვლავ მიწაზე ემხოზიან, მერე მიდიან შინ და დარჩენილ დროს თამაშობებსა და სამხედრო ვარჯიშში ატარებენ.

აი, რამდენადაც შემიძლო სიმართლით აღვწერე უტოპიელთა სახელმწიფოს წყობილება, რომელიც მე პირადად საუკეთესოდაც მიმაჩნია და ერთადერთადაც, რომელსაც შეიძლება სამართლიანად ეწოდოს სახელმწიფო. სხვაგან შეიძლება ბევრს ლაპარაკობენ საზოგადოების კეთილდღეობაზე, მაგრამ მხოლოდ საკუთარ თავზე ზრუნავენ. აქ კი, სადაც პირადი არაფერი არსებობს, ყველა საზოგადო საქმეს ემსახურება. ცხადია თავისებურად ყველა მართალია.

სხვა ქვეყნებში ყოველმა ადამიანმა იცის, თვითონ თუ არ იზრუნებს საკუთარ თავზე, რაც არ უნდა ყვაოდეს სახელმწიფო, იგი მაინც შიმშილით მოკვდება. აუცილებლობა აიძულებს მას პირველ რიგში თავისთავზე იზრუნოს და არა ხალხზე ე.ი სხვა ადამიანებზე.

აქ კი, სადაც ქონება საერთოა, გაჭირვებაში ჩავარდნისა არავის ეშინია, თუ კი სახელმწიფო ბელის გავსებაზე იზრუნებს. რადგან დოვლათს ისინი თანაბრად ანაწილებენ და არ ძუნწობენ, აქ არ არსებობს ღარიბი და უპოვარი, და თუმც კი თითოეულს პირადი ქონება არ გააჩნია, მაინც ყველა მდიდარია.

განა უზრუნველი, უშფოთველი და სიხარულით აღსავსე ცხოვრება თავისთავად სიმდიდრე არ არის, რა საჭიროა ჭამა-სმაზე ზრუნავდე, ცოლის წუწუნი სტანჯავდე, ვაჟიშვილის მომავალ სიღარიბეზე და ქალიშვილის მზითვზე წუხდე. თითოეული უტოპიელი დარწმუნებულია, რომ მამდარი და ბედნიერი იქნება თვითონაც და მისი ახლობლებიც: ცოლი, შვილი, შვილიშვილები, შვილთაშვილები და მთელი მისი შთამომავლობა, რაზედაც კეთილშობილნი წინასწარ ზრუნავენ.

ახლა იმის შესახებ გიამბობთ, როგორ ზრუნავენ უტოპიელები მათზე, ვინც ადრე შრომობდა და ამჟამად დაუძღვრებულა, ვიდრე იმათზე ვინც ახლა ეწევა ცხოვრების ჭაპანს. კარგი იქნებოდა მათი ეს სიკეთე ვინმე სხვა ხალხების სამართლიანობისათვის შეედარებინა. თავს მოვიჭრი, თუ სხვაგან მსგავს რამეს, რაიმე კვალსაც კი იპოვნიან. სადაური სამართალია, რომელიმე დიდებული, ოქრომჭედელი მევახშე ან მისთანანი არაფერს აკეთებდნენ, ან მათი საქმიანობა სახელმწიფოს არაფერს რგებდეს, ცხოვრებას კი, უსაქმურობაში, გართობაში, ფუფუნებასა და განცხრომაში ატარებდნენ! ამ დროს მოჯამაგირე, მეეტლე, ხელოსანი, მიწის მუშა დღენიადაგ მუშაობს, იმდენს, რომ სახედარიც ვერ აიტანს, მათი შრომის გარეშე ხომ სახელმწიფო ერთ წელსაც კი ვერ იარსებებდა! და შიმშილით კი სული სძვრებათ, პირუტყვის მდგომარეობაც კი უკეთ მოგეჩვენება. საქონელიც კი ყველგან არ არის ასეთი მძიმე შრომაში, მათ საკვები ღარიბებისაზე ოდნავ ნაკლები თუა და მათ სავსებით შეეფერებათ. თანაც პირუტყვის ხომ მომავლის შიში არა აქვს. ადამიანს კი სტანჯავს ფუჭი, უნაყოფო შრომა და გულს უხეთქავს სიღარიბისა და სიბერის შიში. მისი დღიური გასამრჯელო ისე მცირეა, რომ არ ჰყოფნის და შავი დღისათვის ორიოდე გროშის გადანახვასაც ვერ ახერხებს.

შეიძლება სამართლიანად ჩაითვალოს ისეთი სახელმწიფო, რომელიც დოვლათს თავზე აყრის ეგრეთწოდებულ დიდებულებს, ოქრომჭედლებს ფუჭი გართობის მოყვარულ ყველა ჯურის მლიქვნელებსა და უსაქმურებს, ხოლო არავითარ

ყურადღებას არ აქცევს მიწათმოქმედს, მენახშირეს, მოჯამაგირეს, მეეტლესა და ხელოსანს, რომელთა გარეშეც იგი ვერც კი იარსებებდა?! სახელმწიფო ბოროტად იყენებს მშრომელების საუკეთესო წლებს, ხოლო როცა ისინი უძლურდებიან და ცხოვრება უჭირთ, მათ ნაღვაწს ივიწყებს, მათი სიკეთე აღარ ახსოვს და მაღლიერების ნაცვლად უბედურებს საცოდავ აღსასრულს უმზადებს.

კიდევ უფრო უარესი ისაა, რომ მდიდრები ღარიბთა დღიური სარჩოს გარკვეული ნაწილის გამოძალვას მარტო მოტყუებით კი არა, კანონის ძალითაც ახერხებენ. თუ წინათ უსინდისობად ითვლებოდა ქვეყნის წინაშე დიდი დამსახურების საზღაურად მცირე გასამრჯელოს მიცემა, ახლა ყველაფერი გაუკუღმართდა და ამ უსამართლობამ კანონის სახე მიიღო.

მე ყურადღებით ვაკვირდებოდი და ვსწავლობდი სხვადასხვა აყვავებულ სახელმწიფოს. პატიოსან სიტყვას გაძღვეთ, არაფერი დამინახავს, გარდა მდიდართა მისწრაფებისა სახელმწიფოს სახელით მხოლოდ საკუთარ გამორჩენაზე იფიქრონ. ისინი ათასგვარ ხრიკებს ეძებენ, რომ შეინარჩუნონ უკეთური გზებით შეძენილი ცხოვრება და მცირედი გასამრჯელოს ფასად ისარგებლონ ღარიბთა შრომით. ამგვარი საქმენი უკვე დაკანონდა, რადგან ერთხელ და სამუდამოდ დაადგინეს, სახელმწიფოს ე.ი. ღარიბთა სახელითაც.

და აი, ამ უკეთურმა, გაუმადლარმა ხალხმა ხელთ იგდო ყველაფერი ის რაც სხვებსაც ეყოფოდათ! რა უფსკრულია მათსა და ბედნიერ უტოპიელთა სახელმწიფოს შორის! ფულის მოსპობით უტოპიელებმა სიხარბეც ამოძირკვეს. განა ცნობილი არ არის, რომ ფულის მოსპობასთან ერთად მას თან გაჰყვება სიცრუე, ქურდობა, ძარცვა, შფოთი, განხეთქილება, აღშფოთება, გულისწყრომა, დავა, შუღლი, მკვლელობა, ღალატი, მოწამვლა, რომელთა გამოც დასაჯა შურისძიება უფროა, ვიდრე მათი ალაგმვის ცდა. ფულთან ერთად გაქრება შიში მღელვარება, ზრუნვა, უძილო ღამეები. სიღარიბეც კი რომელსაც ყველაზე მეტად სჭირდება ფული, მისი მოსპობისთანავე თავისთავად გაქრება.

ეს უფრო ცხადი გახდება თუ შენ წარმოიდგენ უნაყოფო და მოუსავლიან წელიწადს, რომელმაც უკვე ათასობით ადამიანი იმსხვერპლა. დაუფარავად შემძლია განვაცხადო: შიმშილობის დასასრულს მდიდართა ბელლები რომ გაესინჯათ, იმდენი პური აღმოჩნდებოდა, შიმშილით დაღუპულებისათვის დროზე რომ გაენაწილებინათ, ყველას ეყოფოდა. რა ადვილი იქნებოდა სარჩოს შოვნა, ეს ნეტარხსენებული ფული რომ არ არსებობდეს. იგი თითქოს საქმის გასაადვილებლად შემოიღეს, სინამდვილეში კი ლუკმა-პურის მოსაპოვებელ გზაზე ბორკილად იქცა.

ექვი არ მეპარება, ამას თვით მდიდრებიც გრძნობენ, მათაც მშვენივრად უწყიან, რომ სჯობს არაფერი გაგაჩნდეს ისეთი რაც არ არის აუცილებელი, ვიდრე ზედმეტი ქონდეს. რა სჯობია თავი დააღწიო უძრავ ფათერაკს თუ აურაცხელი სიმდიდრის მონად გადაიქცე?! უეჭველია, მთელი მსოფლიო დიდი ხანია გადაიღებდა უტოპიელთა კანონებს საკუთარი სარგებლობის გამოც და ქრისტე-მაცხოვრის გავლენითაც (რომლის სიბრძნეს არ შეიძლება არ სცოდნოდა, რა არის უმჯობესი, ხოლო კეთილმოწყალებას არ შესძლებოდა აერჩია ის, რაც არ იყო საუკეთესო), მაგრამ ამას წინ ეღობება ერთი რომ ურჩხული, სათავე ყველა განსაცდელისა - მედიდურობა! იგი ბედნიერებას საზღვრავს არა საკუთარი წარმატებებით, არამედ სხვისი მარცხით.

ზოგი გაღმერთებასაც კი არ მოისურვებს, თუ არ იარსებებენ უპოვარნი, რომლებზეც შეიძლება იბატონო და დაამცირო ისინი რათა საკუთარი ბედნიერება მათი უბედურების ფონზე უფრო გამობრწყინდეს და მისმა სიმდიდრემ ხაზი გაუსვას მათ სიღარიბეს. ავერნის გველივით[136] ბორკავს იგი მოკვდავთ სულს, რომ ისინი არ ისწრაფებოდნენ უკეთესი ცხოვრებისაკენ თავის მომაბეზრებლად უშლის მათ ხელს და ყველა გზას უღობავს.

მედიდურობა ადმიანთა სულში ისე მკვიდრად დაბუდებულია, რომ მისი ამოძირკვა ძნელია; მოხარული ვარ, რომ უტოპიელებს მაინც ერგოთ ისეთი სახელმწიფო, როგორსაც ყველას ვუსურვებდი. მათ ცხოვრების საუკეთესო ნორმები შეიმუშავეს და სახელმწიფო წყობას საფუძველად მარჯვედ და საიმედოდ დაუდეს. უტოპიელებმა სხვა მანკიერებებთან ერთად პატივმოყვარეობის ფესვებიც ამოძირკვეს. მათ არ ემუქრება, შინაური უთანხმოება, რამაც ბევრი კარგად დაცული მდიდარი ქალაქი დაღუპა. როცა შინაურობაში სრული თანხმობა სუფევს და სახელმწიფო წყობილება მყარია მას მეზობელი ქვეყნების ქიშპობა ვერ შეარყევს (კარგა ხანია უტოპიელთა მეზობლებმა სცადეს ეს მაგრამ არაფერი გამოუვიდათ). როდესაც რაფაელი ამას მიაშობდა, მომეჩვენა რომ ამ ხალხის ადათ-წესებში ბევრი რამ იყო ახირებული. ეს არა მარტო საომარ ხერხებს, წეს-ჩვეულებებსა და რწმენას ეხება, არამედ მათთვის ყველაზე მთავარს წეს-წყობილებაში - ერთად ჭამა-სმას და საერთო ცხოვრებას ყოველგვარი ფულის გარეშე. მარტო ესეც კი კმარა, რომ მოისპოს ყოველგვარი დიდგვაროვნება, წარჩინებულება, ბრწყინვალეობა, დიდებულება, რასაც ყველა სახელმწიფო ღირსებად და მშვენებად მიიჩნევს.

მაგრამ, როგორც შევატყვე, რაფაელი თხრობამ დაქანცა და შეკამათებისა და საწინააღმდეგოს თქმას ვერ აიტანდა, თანაც გამახსენდა როგორ კიცხავდა იი ადამიანებს, რომლებიც შიშობდნენ, საკმარისად ჭკვიანი არ გამოვჩნდებით. თუ კი სხვის აზრებში სასაცილოს ვერაფერს დავინახავთო. ამიტომ შევაქე უტოპიელთა წყობილება, მოვიწონე რაფაელის ნაამბობი და ვახშამზე მოვიწვიე, თან ვუთხარი, დრო ბევრი გვექნება, უფრო ღრმად განვსაჯოთ მოსმენილი და ვისაუბროთ ამ თემებზე-მეთქი. ო, ნეტავ ეს ნატვრა ოდესმე ამსრულებოდა!

მართალია ყველაფერში ვერ დავეთანხმები ამ უეჭველად განათლებული და გამოცდილი კაცის ნაამბობს, მაგრამ ვაღიარებ, რომ უტოპიელთა სახელმწიფოში ბევრი რამაა ისეთი, რასაც ჩვენს ქვეყნებს ვუსურვებდი, თუმცა კი ამ სურვილების აღსრულების არავითარი იმედი არა მაქვს.

მეორე წიგნის დასასრული

რაფაელ ჰითლოდევსის შუადღის საუბრის მეორე წიგნის დასასრული, აქამომდე მცირეთათვის ცნობილი უტოპიელთა კუნძულის წყობილებისა და კანონების შესახებ, გადმოცემული უგანათლებულესი და უკეთილშობილესი ვაჟკაცის, ლონდონელი მოქალაქისა და ვიკონტის ტომას მორის მიერ.

სქოლიო

[1] პეტრე ეგიდიუსი (petrus Agidius ან Cillius, 1486-1533). ტომას მორისა და ერაზმ როტერდამელის (1466-1536) მეგობარი, ნიდერლანდელი ჰუმანისტი, ანტვერპენის ქალაქის საბჭოს წევრი, ანტიკური ლიტერატურის, ბერძნული და ლათინური ენებისა და სამართლის მცოდნე, ესოპეს იგავების ლათინურ ენაზე მთარგმნელი.

[2] სახელი უტოპია შედგენილია ბერძნ. უარყოფითობის ნაწილაკის და „ადგილის“ აღმნიშვნელი სიტყვის შეერთებით: „უტოპია“ - არარსებული ადგილი.

[3] ნაუცბადევი და მოუმზადებელი... - კვინტილიანუსი თავის თხზულებაში „ორატორის აღზრდა“ აღნიშნავს, რომ ორატორმა უნდა შესძლოს მოუმზადებლად სიტყვის წარმოთქმა.

[4] იოანე კლემენტი - ჯონ კლემენტი (Clement John, გარდაიც. 1572 წელს) - აღიზარდა ტომას მორის სახლში და ცოლად შეირთო მისი შვილობილი. მუშაობდა ოქსფორდის უნივერსიტეტში ბერძნული ენის კათედრაზე, შემდეგ კი ექიმად - ლონდონში.

[5] სახელი „ჰითლოდევისი“ შექმნილია ბერძნული სიტყვებიდან - „ყბედობა“, „ლაქლაქი“ და - „გამოცდილი“, რაფაელ ჰითლოდევისის სახელით ტომას მორი გაბედულად გადმოგვცემს საკუთარ აზრებს.

[6] ამაუროტი - სახელწოდება მომდინარეობს ბერძნ. სიტყვიდან - „შეუცნობელი“ „ბნელი“. ამ სახელით მორი უარყოფს სინამდვილეში მსგავსი ქალაქის არსებობას და ამ სახელწოდებაში ამავე დროს გულისხმობს ნისლიან ლონდონს, რომლის დამახასიათებელ ნიშნებსაც ამაუროტის აღწერის დროს ჩამოთვლის.

[7] ანიდრუსი - მომდინარეობს ბერძნ. სიტყვიდან „უწყლო“, ე.ი. „უწყლო მდინარე“, მაგრამ, როგორც აღწერიდან ჩანს, მორი აქ მდინარე ტემზას გულისხმობს.

[8] დამჯდარი ერთს აქებს, ფეხზე წამომდგარი - მეორეს... - ციტატა „ციცერონის წინააღმდეგ ინვექტივებიდან“, რომელიც სალუტიუს მიეწერება: „...ფეხზე მდგომი რესპუბლიკის შესახებ ერთს ფიქრობს, დამჯდარი მეორეს“.

[9] შენს მეუღლესთან ერთად... - იგულისხმება პეტრე ეგიდიუსის მეორე ცოლი კორნელია სანდრი.

[10] მეფე ჰენრი - ჰენრი VIII ტიუდორი, ინგლისის მეფე (1509-1547).

[11] კასტილიის მეფე კარლოსი - კარლოს I (მოგვიანებით გერმანიის იმპერატორი კარლ V) 1516 წლის იანვარში თავისი პაპის ფერდინანდ არაგონელის გარდაცვალების შემდეგ კასტილიის მეფედ გამოცხადდა.

[12] ელჩად ფლანდრიაში... - იგულისხმება 1515 წლის მაისში ჰენრი VIII -ის ელჩობა. კომერციული და დიპლომატიური კონფლიქტების მოსაგვარებლად ტ. მორი ფლანდრიაში გაემგზავრა. ეს კონფლიქტი ინგლისსა და ნიდერლანდს შორის წარმოიშვა მატყლით და მათემატიკური ვაჭრობის შესახებ დადებული ხელშეკრულების გამო, რომელიც ჯერ კიდევ 1496 და 1506 წლებში ჰენრი VII მიერ იქნა ხელმოწერილი. კონფლიქტი წარმოიქმნა კარლ ჰაბსბურგსა (გერმანიის მომავალი იმპერატორი კარლ V) და ჰენრი VIII დას შორის დინასტიური ქორწინების პროექტის დარღვევის გამო,

რამაც გამოიწვია ინგლისსა და ნიდერლანდს შორის ვაჭრობის დროებითი შეწყვეტა. ინგლისელ ვაჭრებს აეკრძალათ მატყლის ნიდერლანდში გატანა. ერთდროულად აიკრძალა ინგლისიდან ფლამანდური ქსოვილების გაზიდვა. ამან ორივე ქვეყნის ვაჭართა ინტერესების შელახვა გამოიწვია. 1515 წლის მაისში ტომას მორი კატბერტ ტულნსტალთან, რიჩარდ სამპსონთან და ელჩობის სხვა წარმომადგენლებთან ერთად მოლაპარაკების საწარმოებლად ბრიუგეში გაემგზავრა. მან ეს რთული მისია წარმატებით შეასრულა.

[13] კატბერტ ტუნსტალი (Tunstall Cuthbert, 1424-1559) - ტომას მორისა და ერაზმ როტერდამელის მეგობარი. 1511 წლიდან იგი კენტერბერის არქიეპისკოპოსის გენერალური ვიკარიუსი (თანაშემწე) 1522 წლიდან კი ლონდონის ეპისკოპოსი იყო.

[14] ბრიუგე - დასავლეთ ფლანდრიის დედაქალაქი (ამჟამად ბელგიის ერთ-ერთი ქალაქი).

[15] გეორგ ტემზიციუსი (Theimseke George, გარდაიც. 1536 წელს). მკვლევრებს მიაჩნიათ, რომ იგი გეორგ ვან ტემსეკია, ჩრდილოეთ საფრანგეთის ქ. კასელის მონასტრის წინამძღვარი.

[16] პალინურუსი - ვერგილიუსის თხზულების „ენეიდის“ გმირის ენეასის მესაჭე.

[17] ულისე - ჰომეროსის პოემის „ოდისეას“ მთავარი გმირის ოდისეესის ლათინური სახელი.

[18] პლატონი (427-347ძვ. წ.) - ცნობილი ბერძენი ფილოსოფოსი, რომლის თხზულებებს უაღრესად დიდი მნიშვნელობა ჰქონდა ტომას მორის მსოფლმხედველობის ჩამოყალიბებისათვის. სხვადასხვა წერილობითი წყარო მოგვითხრობს პლატონის მოგზაურობათა შესახებ. იმ ქვეყნებს შორის, რომლებიც მოუვლია პლატონს, წყაროებში ნახსენებია ასურეთი, ბაბილონი, სპარსეთი, იტალია, სიცილია.

[19] ლუციუს ანეუს სენეკა (ახ. წ. 4-65) - რომაელი ფილოსოფოსი, ტრაგიკოსი, იმპერატორ ნერონის აღმზრდელი.

[20] მარკუს ტულიუს ციკერონი (106-43 ძვ. წ.) - რომაელი ორატორი, პოლიტიკური მოღვაწე და ფილოსოფოსი.

[21] ლუზიტანია - ახლანდელი პორტუგალია.

[22] ამერიგო ვესპუჩი (1451-1512) - ფლორენციელი მეზღვაური, რომლის სახელსაც ატარებს ამერიკის კონტინენტი. მან ოთხჯერ შემოიარა ახალი სამყარო. მეოთხე მოგზაურობის დროს (1503-1504წწ.) რამდენიმე მისი თანამგზავრი ბრაზილიაში დარჩა.

[23] „ვისაც ურნა არ გააჩნია, მას ზეცა დაიფარავს“... - ციტატა რომაელი პოეტის მარკუს ანეუს ლუკანუსის თხზულებიდან „ფარსალია“, რომელიც ეძღვნება კეისრის ბრძოლას პომპეუსთან.

[24] საიქიოსკენ მიმავალი გზა ყოველგნით ერთია“... - შეცვლილი ციტატა ციცერონის „ტუსკულანური საუბრებიდან“ (I, 43. 104): „ჩინებულად უპასუხა ანაქსაგორამ, როდესაც ლამფსაკოსში კვდებოდა, მეგობრების შეკითხვაზე გადაესვენებინათ თუ არა მისი სხეული მის მშობლიურ კლადომენეში: „არ არის ამის არავითარი საჭიროება - ჯოჯოხეთისაკენ მიმავალი გზა ყოველგნით ერთია“. ტომას მორმა სიტყვა „ჯოჯოხეთი“ „საიქიოთი“ შეცვალა.

[25] ტაპრობანა - ახლანდელი კუნძული შრი-ლანკა.

[26] კალიკვიტი - ინდოეთის საზღვაო ნავსადგური, თანამედროვე კალიკუტი (და არა კალკუტა), ოდესღაც აყვავებული სავაჭრო ქალაქი. 1498 წლის მაისში აქ იმყოფებოდა ცნობილი პორტუგალიელი მეზღვაური ვასკო და გამა (1469-1524)

[27] მაგნიტის გამოყენება - ზღვაოსნობის დროს მაგნიტის გამოყენების შესახებ წერდა ნეტარი ავგუსტინე თავის თხზულებაში „ღვთიური სახელმწიფოს შესახებ“. (De Civitate Die, 21. 4)

[28] სკილა - (ბერძნ. მით.) - ზღვის ურჩხული იტალიასა და სიცილიას შორის, მესინის სრუტეში.

[29] კელენო - (ბერძნ. მით.) - ერთ-ერთი სამ ჰარპიათაგან მითიური ურჩხული ქალის სახით, რომელსაც ძერას სხეული და უზარმაზარი ბრჭყალები ჰქონდა.

[30] ლესტრიგონები - (ბერძნ. მით.) - ძველი იტალიის მკვიდრნი, რომლებიც თითქოს ჯერ კამპანიაში, შემდეგ სიცილიაზე ცხოვრობდნენ. გადმოცემის თანახმად, ისინი კაციჭამიები იყვნენ. მათი ქვეყანა აღწერილია „ოდისეაში“. ჰომეროსის „ილიადაში“ აქილევსი აგამემნონს „კაციჭამიას“, „ხალხის მყლაპავს“, უწოდებს.

[31] უმოწყალოდ განადგურდნენ... - საუბარია ჰენრი VII წინააღმდეგ კორნუელის (ჩრდილო-დასავლეთ ინგლისი) საგრაფოს მცხოვრებთა აჯანყებასა და მათ მიერ განცდილ მარცხზე.

[32] იოანე მორტონი - ჯონ მორტონი (Morton Jhon, 1420-1500). გამოჩენილი სახელმწიფო და საეკლესიო მოღვაწე, კენტერბერის არქიეპისკოპოსი და კარდინალი, ლორდ-კანცლერი ჰენრი VII მეფობის დროს (1485-1509). მან კეთილი გავლენა იქონია ტომას მორზე, რომელმაც ახალგაზრდობის წლები მის სახლში გაატარა.

[33] კორნუელთან და ცოტა უფრო ადრე ... გალიასთან ბრძოლის შემდეგ - გადასახადების ზრდას ჩრდილოეთ ინგლისში 1484-1491 წლებში მოჰყვა აჯანყებანი. 1497 წლის აჯანყება ცნობილია კორნუელის ამბოხების სახელით.

[34] პირად მცველთა უზარმაზარ ბრბოს... - ტომას მორს მხედველობაში აქვს ფეოდალთა რაზმები, ე.წ. „ლივრეის ხალხნი“, რომლებიც ჯერ კიდევ მრავალრიცხოვანნი იყვნენ ტიუდორთა მმართველობის პერიოდში.

[35] რაც შეეხება გალიას... - აქ იგულისხმება 1515 წელი, როცა საფრანგეთში შვეიცარელი დაქირავებული ჯარისკაცები შემოვიდნენ.

[36] სალუსტიუსი (86-34 ძვ. წ.) - რომაელი ისტორიკოსი. ციტატა აღებულია მისი თხზულებიდან „კატილინას შეთქმულება“

[37] ამრიგად მას შემდეგ... - ეს ადგილი მოტანილია კ. მარქსის „კაპიტალის“ I ტომში, გვ. 590-591.

[38] ოლიგოპოლია - უმცირესობის უფლება ვაჭრობაზე. ბერძნ. სიტყვებიდან - „უმცირესობა“, „ვყიდი“, „ვვაჭრობ“ ე. ი. „მცირერიცხოვანთა ვაჭრობა“.

[39] მანლიუსის კანონები... - რომაელი ტიტუს მანლიუსი ძვ. წ. 362 წელს სამხედრო ტრიბუნი იყო, ძვ. წ. 353 და 349 წლებში კი დიქტატორი. მის მიერ გატარებული კანონები გამოირჩევიან განსაკუთრებული სიმკაცრით (მან ხომ საკუთარი ვაჟიშვილი სიკვდილით დასაჯა სამხედრო დისციპლინის დარღვევის გამო).

[40] სტოელნი და მათი მიმდინარეობა სტოიციზმი - ერთ-ერთი მნიშვნელოვანი ფილოსოფიური მიმდინარეობა ძველ საბერძნეთში. იგი დააარსა ძენონმა ძვ. წ. IV ს. ბოლოს, ქადაგებდა ყოველგვარი გაჭირვების ამტანობას.

[41] სპარსეთში... - ტომას მორს სპარსეთის შესახებ ამბები გაგებული ჰქონდა უწინარეს ყოვლისა ანტიკური ავტორების ჰეროდოტესა (დაახლ. 484-425 ძვ. წ.) და სტრაბონისაგან (გარდაიცვ. ახ. წ. 25 წელს).

[42] პოლილერიტები... - სახელწოდება წარმოშობილია ბერძნ. სიტყვებიდან „ბევრი“ და „ცარიელი, უაზრო ყბედობა“. ამით მორს სურს თქვას, რომ ასეთი ხალხის არსებობის დაჯერება უაზრობაა.

[43] ცდა ბედის მონახევრეაო... - ანდაზა „კამათლებს ხშირად თუ გააგორებ, შეიძლება ვენერაც დასვა“. „ვენერას“ რომაელები თამაშის დროს კამათლების ხელსაყრელ განლაგებას უწოდებდნენ. ერაზმ როტერდამელის „ადაგიაში“ ეს ანდაზა შემდეგნაირადაა ახსნილი: „ხშირი თამაშით შეიძლება მოიგო არა ოსტატობის, არამედ შემთხვევის წყალობით“. (Crebo iacti iaci aliquardo venerem).

[44] ბენედიქტინელთა მონასტრებში... - დასავლეთ ევროპის უძველესი კათოლიკური ორდენი, დაარსებული წმ. ბენედიქტე ნურსიელის მიერ (482-543) მონტე კასინოში. ბენედიქტინელთა სააბატო უმნიშვნელოვანეს კულტურულ ცენტრს წარმოადგენდა.

[45] „რისხავდეთ, მაგრამ არა სცოდავდეთ“ ... - ფსალმუნი 4,5.

[46] „შენს სახლზე ეჭვიანობამ შემჭამა“... - ფსალმუნი, 68, 10.

[47] ელისე - ძველ ებრაელთა წინასწარმეტყველი. მის მელოტ თავს ერთხელ ბიჭებმა დასცინეს. ელისე განრისხდა, მუდარით შესთხოვა ღმერთს დახმარებოდა შურისძიებაში. უსმინა ღმერთმა: ტყიდან ორი დათვი გამოვიდა და ორმოცდაორი ბავშვი დაგლიჯა.

[48] „სულელს მისი სისულელის მიხედვით უპასუხე“ - შეცვლილი ციტატა სოლომონისეულ იგავთა წიგნიდან, სადაც ნათქვამია: „სულელს მისი სისულელის მიხედვით არ უპასუხო, რათა თვითონ შენ მას არ დაემსგავსო“.

[49] დიონისიოსის კარზე... - დიონისიოსის უმცროსი - სიცილიის მმართველი(ძვ. წ. 367-343). მან პლატონი თავის კარზე მიიწვია, რათა სახელმწიფოს მართვა-გამგებლობა შეესწავლა, მაგრამ პლატონმა დიონისიოსზე სერიოზული გავლენა ვერ მოახდინა, თვითონ პლატონი კარისკაცთა ინტრიგების ქსელში გაება და მისი სიცოცხლე საფრთხეში აღმოჩნდა.

[50] გალიის მეფის კარზე... - 1515 წელს საფრანგეთის სამეფო ტახტზე ავიდა ფრანსუა I (1515-1547), რომელიც აგრძელებდა თავისი წინაპრების შარლ VIII და ლუი XII დაწყებულ პოლიტიკას - ომებს იტალიაში. საუბარია იმის შესახებ, თუ ვის ეკუთვნის მილანო და ნეაპოლი (საფრანგეთს თუ იტალიას).

[51] მედიოლანუმი... - თანამედროვე მილანო, რომელიც იმ დროისათვის ეკუთვნოდა ვისკონტთა გვარის მთავრებს. ვალენტინა ვისკონტი ფრანგთა მეფის ლუი XII (1498-1515) ბებია იყო.

[52] ხელიდან გამსხლტარი ნეაპოლი... - ეს ეპითეტი იმ გარემოებით აიხსნება, რომ ნეაპოლი ცდილობდა შეენარჩუნებინა დამოუკიდებლობა და არ დაენებოდა ფრანგ მეფეებს, რომლებიც მის ხელში ჩაგდებას ლამობდნენ.

[53] ვენეტების დარბევა... - კამბრეს 1508 წლის ხელშეკრულების თანახმად, ვენეტია (ახლანდელი ვენეცია) და მისი ოლქი განაწილდა ლუი XII, ფერდინანდ არაგონელს, მაქსიმილიანე I ავსტრიელსა და პაპ იულიუსს შორის.

[54] მთელი იტალიის დამორჩილება... - იმ დროისათვის იტალია შედგებოდა ხუთი დამოუკიდებელი სახელმწიფოსა (მილანო, ფლორენცია, რომი, ვენეცია და ნეაპოლი) და წვრილი ფეოდალური სამფლობელოებისაგან.

[55] ძალაუფლების მოპოვება ფლანდრიაზე, ბრაბანტზე... მთელ ბურგუნდიაზე ... - 1477 წელს საფრანგეთის მეფე ლუი XI ბურგონის ჰერცოგის შარლ თამამის დაღუპვის შემდეგ ხელთ იგდო ბურგონი. შარლ თამამის ასულის მარი ბურგონელისა და მაქსიმილიანე I ავსტრიელის ქორწინების შემდეგ ფლანდრია და ბრაბანტი ავსტრიის ხელში გადავიდა.

[56] გერმანელთა დაქირავება... - გერმანელებსა და შვეიცარიელებს იმ დროისათვის ხშირად ქირაობდნენ სხვადასხვა სახელმწიფოები სამხედრო სამსახურისათვის.

[57] უდიდებულესობა იმპერატორი... - იგულისხმება „რომის საღვთო იმპერიის“ იმპერატორი მაქსიმილიანე I ავსტრიელი (1493-1519).

[58] არაგონის მეფე... - ფერდინანდ არაგონელი (1474-1516) - ინგლისის მეფის ჰენრი VIII პირველი ცოლის ეკატერინე არაგონელის მამა. 1512 წელს ფერდინანდმა დაიპყრო ნავარის სამეფოს სამხრეთ ნაწილი, რომელიც 1515 წელს კასტილიის სამეფოს შემოუერთდა.

[59] ნავარის სამეფო... - საფრანგეთსა და ესპანეთს შორის, პირენეის კალთებზე. იგი დინასტიური ქორწინების მეშვეობით გადადიოდა ხან ერთი და ხან მეორე ფრანგი დიდებულის ხელში, თუმცა არაგონის მეფეები მუდამ აცხადებენ პრეტენზიას მასზე.

[60] კასტილიის მეფე... - კასტილია - ესპანეთის ოლქი, ესპანეთის უდიდესი სამეფო. „უტოპიის“ შექმნის წლებში წარმოებდა მოლაპარაკება კასტილია-საფრანგეთის კავშირის თაობაზე, კასტილიის პრინც კარლოსსა და ლუი XII-ის ასულის დინასტიური ქორწინების გზით.

[61] შემართული უნდა გვყავდნენ სკოტები... - საფრანგეთი მხარს უჭერდა სკოტების ანუ შოტლანდიელების მტრობას ინგლისის მიმართ და ომის შემთხვევაში იმედოვნებდა მათთან კავშირის დამყარებას.

[62] ახორიელები... - ბერძნ. უარყოფითი ნაწილაკი და „ქვეყანა“, ე. ი. „არარსებული ქვეყნის“ მცხოვრებნი.

[63] გაზარდონ მონეტის ღირებულება...- ამგვარ ოპერაციებს მიმართავდნენ ინგლისის მეფეები ედუარდ IV და ჰენრი VII.

[64] შეწყვიტა სისხლისღვრა... - აქ საუბარია იმის შესახებ, რომ ინგლისის მეფემ ჰენრი VII 1492 წელს საომარი ოპერაციების დაწყებამდე საფრანგეთთან ზავი დადო.

[65] ამოუქექია ჭიანჭამი კანონები... - ეს ფაქტი მართლაც მოხდა ჰენრი VII-ს მეფობის ხანაში.

[66] ხელმწიფის უცილობელი პრეროგატივა... - პრეროგატივა განსაკუთრებულ უფლებას, უპირატესობას ნიშნავს. აქ ტომას მორს მხედველობაში აქვს ცნობილი ინგლისური გამოთქმა: „მეფე არ ცდება“ (king does no wrong).

[67] კრასუსი... - მარკუს ლიკინიუს კრასუსი, უმდიდრესი კაცი მთელს რომში, ძვ. წ. 60 წელს პირველი ტრიუმვირატის წევრი იყო კეისარსა და პომპეუსთან ერთად. დაიღუპა, ძვ. წ. 53 წელს, პართელების წინააღმდეგ ლაშქრობის დროს.

[68] მწყემსის მოვალეობა... - შდრ. პლატონის აზრს - „შენ ფიქრობ, რომ მეცხვარეები ან მეცხრეები ცხვრის ან ხარების გამოკვებაზე ზრუნავენ, კვებავენ მათ, უვლიან და მხედველობაში აქვთ სხვა რამ და არა ბატონთა და საკუთარი თავის კეთილდღეობა“ (იხ. პლატონი, სახელმწიფო, I, 343).

[69] ფაბრიციუსი... - რომაელი კონსული და მხედართმთავარი ძვ. წ. II საუკუნეში.

[70] მაკარიელები... - ბერძნ. სიტყვიდან „ნეტარი“, „ბედნიერი“

[71] სქოლასტიკური ფილოსოფია... - „(ბერძნ. სიტყვიდან „სწავლული“) - შუა საუკუნეებში გაბატონებული ფილოსოფიური მიმდინარეობა, რომელიც ცდილობდა თეორიულად ფორმალურ-ლოგიკური არგუმენტებით დაესაბუთებინა ეკლესიის დოგმატები.

[72] პლავტუსი... - ტიტუს მაქციუს პლავტუსი (ძვ. წ. - 254-184), რომაელი კომედიოგრაფი.

[73] „ოქტავია“ - რომაელი ფილოსოფოსის სენეკას ტრაგედია. ოქტავია იყო ნეროსის მიერ უარყოფილი ცოლი. აქ იგულისხმება ტრაგედიის მეორე აქტი.

[74] ტერენციუს მიკიონი... - პუბლიუს ტერენციუს აფრიკელი (190-159 ძვ. წ.) - რომაელი კომედიოგრაფი. საუბარია კომედია „ძმების“ ერთ-ერთ გმირზე.

[75] უტოპიელთა კუნძული... - მრავალი მოსაზრება არსებობს, თუ რომელ ქვეყანას გულისხმობდა ტომას მორი უტოპიის ცნებაში. მკვლევართა ერთი ნაწილის აზრით, კუნძული უტოპია ინგლისის (იხ. Ritter G. The Corrupting Influence of Power, ed by R.W. Pick. Hadleigh, Essex, 1952, p, 46, ან პერუ (იხ. Mmorgan A.E. Nowhere Was Somewhere. Chapel Hill, 1946, p.212); ზოგი მკვლევარი პლატონის მიერ აღწერილ კუნძულ ატლანტიდას ასახელებს (იხ. Gerber. R. The English Island Myth, Remarks of the Englishness of Utopian Fiction. - Critical Quarterly, 1959, p. 37-38); საბჭოთა ისტორიკოსი მ.ბ. ალექსევი კი თვლის, რომ „უტოპიაში“ მორი მოგვითხრობს სამხრეთსლავურ თემზე, რის შესახებაც მას, შესაძლებელია, ლონდონის ვენეციელი ელჩის ლეონარდო ჯუსტინიანისაგან შეეტყო (Алексеев М. П. Из истории английской литературы), М. - Л., 1960. გვ.40).

[76] აბრაქსა... - კოპტურ ენაზე ეს სიტყვა (აბრაქსა, ან აბრაქსის ფორმით) ნიშნავს წმინდა სახელს. იგი გვხვდება შუა საუკუნეების ხანის გნოსტიკოსებთან (ფილოსოფოსები, რომლებიც ცდილობდნენ ბერძნულ-რომაული და ძველი აღმოსავლური მსოფლმხედველობის საფუძვლების ქრისტიანულ მოძღვრებასთან გაერთიანებას) და ალქიმიკოსებთან. მორი აღნიშნავს, რომ უტოპიელები ეთაყვანებოდნენ ღმერთ მითრას. გნოსტიკოსთა გემებზე, ე. ი. ქვის ამულეტებზე სიტყვა აბრაქსა ხშირად მითრას სახელთან იყო გაიგივებული.

[77] ორმოცდაათობმეტი ქალაქი... - იმდროინდელ ინგლისსა და უელსში ორმოცდაათობმეტი ქალაქი იყო.

[78] ამაუროტი... - იხ. შენ. 6.

[79] ფილარქოსი - ბერძნ. სიტყვიდან - „ფილეს მეთაური“. ფილების შესახებ ფრ. ენგელსის კლასიკური ნაშრომი „ოჯახის, კერძო საკუთრების და სახელმწიფოს შესახებ“, თავი V.

[80] წიწილების გამოჩეკა... - წიწილების ხელოვნური გამოჩეკა ჯერ კიდევ ჩვენს ერამდე ცნობილი იყო ეგვიპტეში, ჩინეთსა და ინდოეთში. იგი წარმოებდა ღუმელებში, რომლებსაც აქლემისა და ცხენის პატივით ახურებდნენ. პირველი ინკუბატორი, ამ სიტყვის თანამედროვე გაგებით 1777 წელს შეიქმნა.

[81] ჯირითში ახალგაზრდობის გასაწრთვნელად... - (იხ. პლატონი, სახელმწიფო, V, 467); „ბავშვები ადრეულ ასაკში ცხენზე ჯდომას მივაჩვიოთ, როცა სიარულს ისწავლიან, ომის მსვლელობის სამზერად გავიყოლიოთ...“

[82] შესვლა ყველას შუძლია - (იხ. პლატონი, სახელმწიფო, III, 416). „უპირველეს ყოვლისა, არც ერთ მათგანს (იგულისხმება სამხედრო ფენა პლატონის იდეალურ სახელმწიფოში) არ უნდა გააჩნდეს არავითარი საკუთრება, ფრიად საჭირო და აუცილებელის გარდა... არ ერთ მათგანს არ უნდა ჰქონდეს ისეთი არც საცხოვრებელი და არც საწყობი, სადაც არ შეეძლოს შესვლა ყოველ მსურველს“.

[83] მინა... - მორის ეპოქაში, მინის ფანჯრები მხოლოდ მდიდართა სახლებში იყო. ჯერ კიდევ 1567 წელს მინის ფანჯრების, როგორც იშვიათობის, დასაცავად განსაკუთრებული განკარგულებები ქვეყნდებოდა.

[84] ქარვა - აქ გაუგებარია, რას გულისხმობს მორი. ტაციტუსი თავის „გერმანიაში“ მოგვითხრობს გამდნარი ქარვის, როგორც ფისის შესახებ. მორი ცდება, როდესაც ვარაუდობს, რომ ამგვარი გამდნარი ქარვით შესაძლებელია ტილოს გაპოხვა.

[85] სიფროგრანტუსი - შესაძლებელია ეს სახელწოდება წარმოშობილია ბერძნ. სიტყვებიდან - „ბრძენი“ და - „უფროსნი“.

[86] ტრანიბორუსი, ამჟამად პროტოფილარქოსი - შესაძლებელია სახელწოდება წარმოშობილია ბერძნ. სიტყვებიდან - „ხელისუფალი“ და - „შთანთქმელი“.

[87] სენატს აცნობებენ - (იხ. ტაციტუსი, „გერმანია“ XI); „ნაკლებად მნიშვნელოვანი საქმეების შესახებ უხუცესები თათბირობენ, ხოლო უფრო მნიშვნელოვანი საქმის შესახებ ხალხი. ამასთანავე უხუცესები წინასწარ მსჯელობენ იმ საქმეებზე, რის გადაწყვეტის უფლებაც მხოლოდ ხალხს ეკუთვნის“.

[88] ადრე დილიდან გვიან საღამომდე.. - XIV-XVსს. ინგლისის მუშათა კანონმდებლობა სამუშაო დღის ხანგრძლივობას დილის 5 საათიდან საღამოს 7-8 საათამდე განსაზღვრავდა. ჰენრი VII დროს 1496 წელს გამოცემულ სტატუსში სამუშაო დღის ხანგრძლივობა მიწათმოქმედი მუშისათვის მარტიდან სექტემბრამდე უნდა გაგრძელებულიყო დილის 5 საათიდან შებინდებამდე. (იხ. კ. მარქსი, კაპიტალი, ტ. I, გვ. 119; გვ. 344-345).

[89] მეცნიერების შესწავლას უთმობს... - შდრ. ვ. ი. ლენინის აზრს: „შეუძლებელია წარმოვიდგინოთ მომავალი საზოგადოების იდეალი უიმისოდ, თუ ახალგაზრდა თაობის სწავლება ნაყოფიერ შრომასთან არ იქნება შეერთებული: ვერც სწავლა-განათლება ნაყოფიერი შრომის გარეშე და ვერც ნაყოფიერი შრომა სწავლებისა და განათლების გარეშე ვერ იქნება აყვანილი იმ სიმაღლემდე, რომელსაც ტექნიკის დონე და მეცნიერული ცოდნის მდგომარეობა მოითხოვს. ეს აზრი გამოთქვეს ჯერ კიდევ ძველმა დიდმა უტოპისტებმა“ (ს. ი. ლენინი, თხზ. ტ. 2. გვ. 584).

[90] გარიჟრაჟამდე... - ოქსფორდში მეცადინეობა დილის 6 საათზე იწყებოდა, ზოგიერთ უნივერსიტეტებსა და კოლეჯებში გაზაფხულობით - დილის 5 საათზე, ზამთრობით - 7-ზე. მაგ; 1517 წელს პარიზში მეცადინეობა 5 სთ-ზე იწყებოდა, სალამანკაში- 6-ზე. ჰუმანისტები თვლიდნენ, რომ დილის საათები მეცნიერებისათვის ძალზე ნაყოფიერია.

[91] ბარზანი... - შესაძლოა ეს სიტყვა ირანული წარმოშობისაა და ნიშნავს „მაღალს“. „ასე უწოდებდნენ სომხეთის მეფეს და ალექსანდრე მაკედონელის თანამედროვე ერთ-ერთ სატრაპს. შესაძლებელია ამ სიტყვის პირველი ნაწილი ძველებრათა სიტყვა „ბარ“-იდან იყოს წარმოშობილი, რაც „ძეს“ ნიშნავს. მეორე ნაწილი კი შესაძლოა მომდინარეობდეს ბერძნული დორიული სიტყვის ფორმიდან - ზევსი, ე. ი. შესაძლებელია „ბარზანი“ „ზევის ძეს“, „ღმერთის ძეს“ ნიშნავს.

[92] ადემუსი - „უხალხო“, ხალხის გარეშე. აქ შეერთებულია ბერძნ. უარყოფითი ნაწილაკი და „ხალხი“.

[93] ცოლები ემსახურებიან ქმრებს... - ტ. მორს აქ მხედველობაში აქვს ბიბლიის შემდეგი ადგილი: „ცოლებო, დამორჩილდით ქმრებს, ვითარცა ბატონებს, რამეთუ ქმარი ცოლის მბრძანებლად ითვლება“...

[94] ოთხი საავადმყოფო... - იმდროინდელ ლონდონში ოთხი დიდი საავადმყოფო არსებობდა ღარიბთათვის და მოხუცებულთათვის.

[95] ოქროსა და ვერცხლს... - შდრ. პლატონი, კანონები, V, 742. „კერძო პირთაგან არავისა აქვს ოქროსა და ვერცხლის ფლობის უფლება...“.

[96] ღამის ქოთნებს და უსუფთაო მოხმარებისათვის განკუთვნილ ჭურჭელს ამზადებენ... - შდრ. ვ. ი. ლენინის აზრს: „როცა ჩვენ გავიმარჯვებთ მსოფლიო მასშტაბით, ვფიქრობ, ოქროსაგან გავაკეთებთ საზოგადოებრივ საპირფარეშოებს მსოფლიოს რამდენიმე ყველაზე დიდი ქალაქის ქუჩებში...“ (ვ. ი. ლენინი, თხზ. ტ. 33. გვ. 117).

[97] ანემოლიელი ელჩები... - ბერძნ. სიტყვიდან - ცარიელი, ფუჭი, ქარაფშუტა. „ანემოლიელები“ - ხალხი, სიტყვებს რომ ქარს ატანს.

[98] იმ ფილოსოფოსთა შესახებ... - აქ ფილოსოფოსებს უწოდებდნენ იმ ადამიანებს, რომლებიც მეცნიერებასა და ხელოვნებას თეორიულ საფუძვლებს აძლევდნენ.

[99] დიალექტიკა... - აქ ეს სიტყვათა პლატონისეული გაგებით (როგორც უმაღლესი მეცნიერება, იდეების შეცნობის მეთოდი) კი არ იხმარება, არამედ როგორც ლოგიკის გამომხატველი.

[100] ახალ დიალექტიკოსთა... - აქ ტ. მორს მხედველობაში ჰყავს პეტრე ესპანელი (XIII ს). - პაპი ინოკენტი XXI, ავტორი ლოგიკის სახელმძღვანელოსი, რომელიც XIII-XVI საუკუნეებში დაახლოებით 150-ჯერ გამოიცა.

[101] „მცირე ლოგიკაში“ - იგულისხმება პეტრე ესპანელის ნაშრომში.

[102] „მეორე ინტენციები“ - ლოგიკის „მეორე მისწრაფების“ ტერმინი. პირველი მისწრაფება განასხვავებს საგნებს მათი ინდივიდუალურობისდა მიხედვით, მეორე განიხილავს საგანთა სახეებსა და ბუნებას.

[103] სიამოვნებათა მომხრეების დაჯგუფება... - „სიამოვნებათა მომხრეს“ უწოდებენ ბერძენ ფილოსოფოსს ეპიკურეს (ძვ. წ. 341-270). ჰუმანისტებმა ეპიკურეს შესახებ ციცერონის, სენეკას, ლუკიანეს და დიოგენეს თხზულებებიდან შეიტყვეს.

[104] მოწინააღმდეგეთა ჯგუფი - ფილოსოფოს-სტოიკოსები, ეპიკურელთა მოწინააღმდეგენი.

[105] კოჭით თამაში... - შდრ. ერაზმის აზრს: ყოვლად სულელი, სასაცილო ხალხი თამაშით იმ ზომამდეა გატაცებული, რომ როგორც კი კოჭის კაკუნს გაიგებენ, გული მკრედეში მომეტებულად აუძგერდებათ („ხოტბა სისულელისა“, 39).

[106] ნადირობა და ჩიტბადეობა... - შუა საუკუნეებში ნადირობასა და ჩიტბადეობას სხვადასხვანაირად უყურებდნენ: ერთნი იწონებდნენ ამ საქმიანობას, მეორენი უარყოფდნენ.

[107] გართობის მოყვარული... - ეს ერთადერთი ადგილია „უტოპიაში“, სადაც გართობაზე საუბარია არა როგორც უსაქმურობაზე. არამედ როგორც თავისუფალი დროის გონივრულად გატარებაზე.

[108] ბერძნული ლიტერატურისა და მეცნიერებების შესახებ... - XVI საუკუნეში ინგლისელი ჰუმანისტები ბერძენ ავტორთა შესწავლას განსაკუთრებულ მნიშვნელობას ანიჭებდნენ.

[109] ლათინურში... - იმ დროს ისტორიკოსებიდან თაყვანს სცემდნენ იულიუს კეისარსა და სალუსტიუსს, პოეტებიდან - პლავტუსს, ტერენციუსს, ვერგილიუსს, ჰორაციუსს.

[110] პლატონი... არისტოტელე... თეოფრასტე... - პლატონს იმ პერიოდში „ფილოსოფოსთა ღმერთად“ მიიჩნევდნენ. არისტოტელესადმი ავტორიტეტი საუკუნეთა განმავლობაში უდავოდ იყო მიჩნეული. თეოფრასტე (ძვ. წ. 372-287) - ძველი ბერძენი ფილოსოფოსი, ლოგიკოსი და ბუნებისმეტყველი, არისტოტელეს მოწაფე და მიმდევარი იყო. არისტოტელეს სიკვდილის შემდეგ სათავეში ჩაუდგა პერიპატოელთა სკოლას.

[111] ხელთ ჩაუვარდა მაიმუნს... - ტომას მორს სახლში ჰყავდა მაიმუნი. ჰანს ჰოლბაინის მიერ შესრულებულ ნახატზე, სადაც მორის მთელი ოჯახია გამოსახული, მორის ცოლის ფეხებთან ზის ეს მაიმუნი.

[112] კონსტანტინე ლასკარისი - (გარდ.1150წ.) - ბიზანტიელი მეცნიერი. 1476 წელს მილანში გამოიგა მისი ბერძნული ენის გრამატიკა.

[113] ჰესიხოსი და დიოსკორიდუსი... - ჰესიხოსი ჩვ. წ. V ან VI ს-ის ბერძენი გრამატიკოსი, მისი წიგნი 1514 წელს გამოიგა ვენეციაში. დიოსკორიდუს პედანიუსი - ნერონის თანამედროვე, ექიმი, მისი თხზულებები 1499 წელს გამოიგა ვენეციაში.

[114] პლუტარქე - ახ. წ. I ს-ის ბერძენი ისტორიკოსი, მისი თხზულებანი „პარალელური ბიოგრაფიები“ და „მორალია“ დიდად ფასობდა როგორც შუა საუკუნეებში, ასევე აღორძინების ეპოქაშიც.

[115] ლუკიანეს დაცინვები და ხუმრობები... - ლუკიანე ძველი ბერძენი მწერალი-სატირიკოსი. მორმა მისი თხზულებები თარგმნა ლათინურ ენაზე. ერაზმ როტერდამელი ლუკიანეს ცნობილი ორატორის დემოსთენეს და ისტორიკოს ჰეროდოტეს გვერდით აყენებდა. ლუკიანეს თხზულებები დასავლეთში XV საუკუნის პირველ მეოთხედში გახდა ცნობილი. აღდუს მანუციუსმა მისი თხზულებები 1503 წელს გამოსცა ვენეციაში.

[116] არისტოფანე - ძვ. წ. 445-385. ძველი ბერძენი კომედიოგრაფი, „კომედიის მამა“, მისი კომედიები პირველად 1498 წლის ივნისში გამოიგა ვენეციაში.

[117] ჰომეროსი - „ილიადასა“ და „ოდისეას“ ავტორი. ნაწარმოებები გამოიცა 1504 წლის ოქტომბერში ვენეციაში.

[118] ევრიპიდე - ძვ. წ. 485-406. ძველი ბერძენი დრამატურგი, მისი ტრაგედიები 1504 წლის თებერვალში გამოიცა.

[119] სოფოკლე - ძველი ბერძენი დრამატურგი, ტრაგიკოსი. სოფოკლეს ტრაგედიები პირველად გამოიცა 1502 წელს ვენეციაში.

[120] ალდუს მანუციუსი - (1449-1515) - აღორძინების ეპოქის ვენეციელი ჰუმანისტი, მესტამბე და გამომცემელი. 1494 წელს დაარსდა სტამბა და გამოსცა ძველ ბერძენ, რომაელ და აღორძინების ეპოქის კლასიკოსთა მეცნიერულად დამუშავებული თხზულებები. მის გამოცემებს „ალდინებს“ უწოდებენ. მინუსკული - განსაკუთრებული შრიფტი. ასეთი შრიფტით ალდუს მანუციუსმა პირველი წიგნი 1501 წელს გამოსცა.

[121] ჰეროდოტე (დაახლ. ჩვ. წ. 480-425) - ძველი ბერძენი ისტორიკოსი, „ისტორიის მამა“. მისი თხზულებები ალდუს მანუციუსმა 1502 წელს გამოსცა.

[122] ჰეროდოტე (170-240) - ძველი ბერძენი ისტორიკოსი, ეკუთვნის რომის იმპერატორთა ისტორია მარკუს ავრელიუსიდან გორდიანამდე.

[123] ტრიციანუს აპინატუსი - ჰითლოდევისის თანამგზავრი. მისი სახელი წარმომდგარია ლათინური სიტყვებიდან „ჩმახვა“ და „სისულელე“.

[124] ჰიპოკრატე - ძველი ბერძენი ექიმი, „მედიცინის მამა“. მისი თხზულებები პირველად 1526 წელს იქნა გამოცემული ბერძნულად.

[125] კლავდიუს გალენუსი (129-201) - რომაელი ექიმი, ბუნებისმეტყველი და ფილოსოფოსი, ანტიკური მედიცინის კლასიკოსი. მას ეკუთვნის ნაშრომები ფილოსოფიაში, ლოგიკაში, გრამატიკაში. განსაკუთრებით მნიშვნელოვანია მისი სამედიცინო ხასიათის თხზულებები, სადაც გაშუქებულია ანატომიის, ფიზიოლოგიის, პათოლოგიის, ფარმაკოლოგიის, გინეკოლოგიისა და სხვა საკითხები. აღსანიშნავია მისი „მცირე ხელოვნება“, რომელიც განსაკუთრებით პოპულარული იყო შუა საუკუნეებში.

[126] მედიცინა ნაკლებად სჭირდებათ... - პლატონის „სახელმწიფოში“ სოკრატე აღნიშნავს, რომ ექიმები წამხდარ საზოგადოებას ესაჭიროება. ჯანმრთელობის საწინდარია სწორი სმა-ჭამა და სხვადასხვა სახის ვარჯიშობანი (III. 405-408).

[127] ქალაქის დამზადება... - ქალაქი გამოიგონეს ძვ. წ.-ის II საუკუნეში ჩინეთში, VIII ს-ის შუა ხანებში ქალაქის დამზადების საიდუმლოება არაბებმა შეიტყვეს. სირიისა და ჩრდ. აფრიკის გზით ქალაქის დამზადების ხელოვნება ჯერ ესპანეთში, XII ს-ში კი საფრანგეთში აითვისეს. იტალიასა და გერმანიაში ქალაქის დამზადება მხოლოდ XIV საუკუნეში დაიწყო.

[128] გადაადგებენ სამარცხვინოდ სადმე ჭაობში... - შდრ. პლატონი (კანონები, IX, 873): „თვითმკვლელის დაკრძალვა უპირველეს ყოვლისა სხვა ხალხთაგან

განცალკევებით უნდა მოხდეს. ამგვარი უღირსი ადამიანები უდაბნოში უნდა დაიმარხოვნ... ყოველგვარი საფლავის ქვისა და წარწერის გარეშე“. არისტოტელე თვლის, რომ თვითმკვლელი იქცევა არა „ჭემმარტი განსჯის“, არა კანონისა და სახელმწიფოს, არამედ საკუთარი თავის წინააღმდეგ... ამიტომ მას სახელმწიფო სჯის („ნიკომაქეს ეთიკა“, V,15, 1138 (19-14). ტაციტუსი აღნიშნავს, რომ „მას ვინც შეარცხვენს თავის სხეულს, ჭუჭყს და ჭაობში ჩაფლავენ...“ (ტაციტუსი, „გერმანია, 12).

[129] ქორწინებამდე... - აქ საუბარია მონოგამიურ ქორწინებაზე.

[130] სჯერდებიან ერთ ცოლს - შდრ. ტაციტუსი (გერმანია, 18): „ისინი ხომ ბარბაროსთაგან ერთადერთნი არიან, რომელნიც მცირეოდენი გამონაკლისის გარდა, ერთი ცოლით კმაყოფილდებიან“.

[131] ნეფელოგეტები... ალაოპოლიტები - გამოგონილი ხალხი. „ნეფელოგეტები“ - სახელწოდება წარმოშობილია ბერძნული სიტყვებიდან „ღრუბელი“, „დაბადებული“, - ღრუბელთაგან შობილი“. „ალაოპოლიტები“ - წარმოშობილია სიტყვებიდან - „ბრმა“, - „მოქალაქე“, - „ბრმა მოქალაქენი“.

[132] ეშმაკობითა და მოხერხებულობით... - „თუმცა სიცრუის გამოყენება ცხოვრებაში საძაგლობა იქნებოდა, ომში ეს საქციელი სასარგებლო და სარწმუნო ხდება; და ის, ვინც ამარცხებს თავის მოწინააღმდეგეს ამგვარი საშუალებით, ისეთსავე ქებას იმსახურებს, როგორც ის, ვინც იარაღით ამარცხებს. ამგვარ მოსაზრებას გამოთქვამდნენ ისინი, ვინც დიდ ადამიანთა ისტორიას წერდნენ...“ (Макиавелли, Рассуждение о Тите Ливии, СПб., 1854, გვ. 488, წიგნი III, თავი 40).

[133] ზაპოლეტელები - ხალხის გამოგონებული სახელწოდება. წარმოშობილია ბერძნული სიტყვიდან - „გამყიდველი“. აქ იგულისხმება შვეიცარიელი დაქირავებული ჯარისკაცები.

[134] ბუთრესკები - მორის მიერ გამოგონებული სახელწოდება ბერძნ. - „ღვთისმოსავი“ შეერთებით. „ბუთრესკები“, „უაღრესად რელიგიურნი“.

[135] ცინემერული... ტრაპემერული - „გაუგებარი სახელწოდებები“. საფიქრებელია სახელწოდების მეორე ნაწილი წარმოშობილია ბერძნული სიტყვიდან - „დღე“.

[136] ავერნის გველი... - ავერნის ტბა მდებარეობს იტალიის სამხრეთით, კამპანიაში, იგი მიწისქვეშა სამყაროს შესასვლელად ითვლება.